

ዓይነት ማፃኣገ ዓይያ ካር

ሃና ዓይነት ማፃኣገ ጌኤዥ ማፃኣገ ጋራ ዓላ ማፃኣገይዳገ ቢያ ዲቢ ዓይህ ዓላ ዳልጊ ማፃኣገኤ። ዩይ ሚርጌ ዓይነት ፔቴ ዓሲ ፔኤር፣ ጊንህ ሃህ ፔቴሞና ዓይናዲያ ሃህ ናባባያኤ።

ሃና ማፃኣገጌሎ ጋራ ጌኤታና ደንጊንታሚና ዓይነት ዓላ። ዩይ ዓይነት ባሽህ ፃኣፔህ ካኣቲ ዳውቴኤ። ዩይ ዓይነት ዎላ ቡኩሲ ጊኢጊሻኒ ሚርጌ ዎዴ ዔኬያ ማዓዛ ዒሰራዔኤሌ ዴራ ያኦሲ ካኣሽካ ዳምቦኮ ዩይ ኮሺ ኮይሳያ ማዔኔ። ዩይ ዓይነት ፔቴ ፔቴ ዓይነት ዎዘጉዴ ዓንጋሞና፣ ሃህ ዎዘም ዓይናዲንታንዳቴያ ዓይነት ዓይናዲ ዓሶኮ ሱኡጋህም ዩይ ፔኤር ዔርዘኔ። ኮኦከንህና ዓይነት ማፃኣገ ዓይህ ያይደና ያይዲታሚ ደንጎናይዳ ዛጋኒ ዳንዳዓኔ። ዩይቶ ዓይነት ዩይ ያኦሲ ሄርሺህ፣ ጋላቲህ፣ ጉሙርቁህ፣ ሃጊ ማዓ ዎዛ ጌሥህ፣ ዳቢንቲ ማዲንቲ ጎሜ ዛላ ያይህ፣ ያኦሲኮ ጉሙርቁንታያ ማዲያንታ ዒ ማኣዳ ማኣዲያንታ፤ ዩይጉዴ ዳኤፔ ዳኤፔ ማዔ ጌኤዥ ማፃኣገ ማሊያ ዓኣያ ማዔኔ።

ዩይ ዓይነት ጌኤዥ ማሊያ ዓሲ ያኦሲ ዒናገ ጉሙርቁንዳጉዲኤ፤ ዩይ ዓይነት ፃኣፔ ዓሳ ያኦሲ ጋላቲህና፣ ጊንህ ሃህ ፔኤኮ ሜታህያ ዒዛም ከኤዚህና ዔያቶኮ ዒኖ ማሊያ ፔጋሲ ዔርዘኔ።

ሚናኣ ዎደና ዒሰራዔኤሌ ዓሳ ዩይ ዓይነት ዲማ ዲማ ጎይህና ማዳይዳ ፔኤሻኔ፤ ዩይያ፡-

1. ዓይነት ማፃኣገኮ ዓይ. 105ይዳ ዓይናዲንቲ ጎይያ ያኦሲ ጋላታኒ፤
2. ዓይነት ማፃኣገኮ ዓይ. 13ይዳ ዓይናዲንቲ ጎይያ ያይህ ዔርዘኒ፤
3. ዓይነት ማፃኣገኮ ዓይ. 1ይዳ ዓይናዲንቲ ጎይያ ዲማ ዲማ ባኣዚ ዔርዘኒ፤
4. ዓይነት ማፃኣገኮ ዓይ. 72ይዳ ዓይናዲንቲ ጎይያ ዒሰራዔኤሌ ካኣታ ፒዙሞና ዎጋንዳጉዲ ሺኢጲህር፤
5. ዓይነት ማፃኣገኮ ዓይ. 47ይዳ ዓይናዲንቲ ጎይያ ያኦሲኮ ቢታንታ ዒ ማዜ ባኮ ቢያኮ ዑፃ ማዔህ ዔርዘኒ፤
6. ዓይነት ማፃኣገኮ ዓይ. 122ይዳ ዓይናዲንቲ ጎይያ ዩሩሳላሜ ናሽካያ ማዲያ ዔርዘኒ፤

7. ዓይነቱ ማግኔጥ ዓይ. 126ይዳ ዓይናዲንገቴ ጎይጾ ቦንቾ ኬሊያኦ ቦንቻኒኩ።

ጎኔና ሚርጌ ዓይነቱ ማሊፃ ፔቴ ማሊሢዳፓ ዑሣ ማዓኒ ዳንዳዓኔ። ኑ ጎዳ ዩሱስ ኪሪሰቶሴ ቃኦሎ ኬኤዜያና፣ ጊንሣ ሃሣ ዲማ ዲማ ባኮ ዔርዜያና ዓይነቱ ማግኔጥ ጌኪ ዔኪ ሚርጌ ባኦዚ ኬኤዜኔ። ዓኮ ጫኦቁሞ ማግኔጥ ፃኦፔ ዓሳኦ ሚርጌ ቤስካ ዩያ ዓይነቱ ጌኪ ዔኪ ፃኦፔ። ዩያ ሌሊቱዋንቴ ቤርታዲ ኪሪሰቶሴ ጉሙርቂ ዔኪ ዓሳኦ ጾኦሲ ዩሱስ ኪሪሰቶሴ ዛሎና ማዴ ኮዦ ባኮ ዩያ ዓይነቱ ኬኤዚ ኬኤዚ ጾኦሲ ካኦሽኬኔ። ዩያኮ ኮኦኪንሢ ማዓይ ዓይነቱ ማግኔጥ ዓይ. 118ኮ ፓይዲ 22ይዳ ዓኦ ማሊፃ ዓኮ ጫኦቁሞ ማግኔጥ ይላ ማይንገቴ ፃኦፔንገቴጾኩ።

ማግኔጥ ዲማ ዲማ ዓርቂ ባኮ

ዓይነቱ ማግኔጥ ዳካ ዳካ ቤሲ ደንጎ ፓቂንገቴ፤ ዩያቶይዳፓ ባሽዞንሢ ጌይጾ ቤርታሶና ላምዓሶ ማዒ ፓቂንገቴ ማሊፃ ፃኦፔሢ ካኦቴ ዳውቴኩ። ሃይሣሶ ማዒ ፓቂንገቴ ዓይነቱ ፃኦፔሢ ዓሳኦፔ፣ ሃንጎ ቆሬኬ ጌይንገቴ።

ዓይሢ 120—134 ሄላንዳኦና ዓኦ ዓይነቱ ቦንቾ ኬሊ ቦንቻንገጎና ዓይናዲንገጎ ዓይነቱ። ሃካፓ ዴማ ዓይነቱ ማግኔጥ ዳካ ዳካ ደንጎ ቤሲ ፓቂንገቴ ጎይጾ ኬኤዚንገጎ።

- ዓይነቱ ማግኔጥ ዓይ. 1—41
- ዓይነቱ ማግኔጥ ዓይ. 42—72
- ዓይነቱ ማግኔጥ ዓይ. 73—89
- ዓይነቱ ማግኔጥ ዓይ. 90—106
- ዓይነቱ ማግኔጥ ዓይ. 107—150

ቤርታሳ ፓቂጾ

1

(ዓይነቱ ማግኔጥ ዓይ. 1—41)

ኮሺ ዓሲና ፑርታ ዓሲናኮ ናንጊ

- 1 ፑርቶ ዓሶ ዞር ዋይዙዋኦሢ
 - ጎሞ ዓሳ ሃንገጎ ጎይጾ ሃንገጎ
 - ጾኦሲ ባኮ ቦሃ ዓሶና ፔቴ ማዒባኦሢ ዓንጂንገቴጾኩ።
- 2 ዩያ ጉዴ ዓሢ
 - ናንጊና ናንጎ ጎዳኮ ዋጎና ዋዛዳኔ፤
 - ዩያ ዋጎዋ ዋንቶና ሮኦሮና ፔ ዒኖና ማላኔ።
- 3 ዒዚ፡-

ዎዶና ዎዶና ዓኣፒ ዓኣፓያ
ዒላዠኣ ዲኢኦዎያ
ዓልቃ ዋኣሢ ዓሸካ ቱኪንቴ ሚሢጉዲ ማዓኔ፤
ዒዚ ማዳ ባካኣ ቢያ ዒዛም ጊኢጋኔ።

- 4 ፑርቶ ማዳ ዓሳ ጋዓንቴ ያዲቱዋሴ፤
 ዠባሬ ፒፂ ዔኪ ዓኣዳ ዲልባጉዲኬ።
- 5 ዬያሮ ፑርቶ ማዳ ዓሳ
 ያኦሲ ዋጎ ዎጋ ኬሎና ቶላዓኬ፤
 ጎሞ ዓሳኣ ፃሎ ዓሶ ባኣካ ጴዳዓኬ።
- 6 ፃሎ ዓሳ ሃንታ ጎይያ ናንጊና ናንጋ ጎዳ ዔራኔ፤
 ፑርቶ ማዳ ዓሶ ጎይፃ ጋዓንቴ ባይሲንታ ባንሢ ዔኪ ዓኣዳያኬ።

2

ያኦሲ ዶኦሚ ካኣታሢ ካኣቲ

- 1 ዴራ ዓይጎሮ ጉንዲማይ?
 ዓሳኣ ጌኔ ማዳኒ ዓይጋ ዘርታይ?
- 2 ዓጮ ካኣታ ዔቄኔ፤
 ዔያቶ ዎይሢ ዓሳኣ ናንጊና ናንጋ ጎዳና
 ዒዚ ዶኦሚ ካኣታሢ ካኣቲናም ጌኔ ማዳኒ
 ሂዚ ጌይ ዘርቴኔ፡-
- 3 «ኦና ዔያታ ቱኬ ዓንጎ ዲያ ቶካፓ ኦ ቲቆም፤
 ሱዞዎ ዲኡዚ ኦኡኒ ኬኤሮም» ጌዔኔ።
- 4 ጫሪንጫ፥ ካኣቱም ቤዛ ዳዔሢ ዔያቶ ሚኢጫኔ፤
 ዬያ ዔያቶኮ ፓሡዎ ማሊያ ናንጊና ናንጋ ጎዳ ቶኦቻኔ።
- 5 ሃካፓ ሴካ ዒዚ ፔ ዳጎና ዔያቶ ጎራንዳኔ፤
 ታሞጉይ ዳጎና ዔያቶ ዒዚ ዒጊቻንዳኔ።
- 6 «ታኣኮ ዲማዴ ፃዮኔ ዲኮይዳ
 ታኣኒ ዶኦሚ ካኣቲ ታ ካኣታሢ» ጋዓንዳኔ።
- 7 «ናንጊና ናንጋ ጎዳ ጌዔ ባኮ ዒላቲ ታ ኬኤዛንዳኔ፤
 ዒዚ ታኣም ሂዚ ጌዔኔ፡-
 ሄኤኒ ታኣኮ ናዓሢኬ፤
 ታ ኔና ሃኖ ሾዔኔ፤

1:3 ዓ.ር. 17:8። 2:2 ዳ.ኪ. ማዶ 4:25-26። 2:7 ዳ.ኪ. ማዶ 13:33፤ ዔ.ብ. 1:5፤ 5:5።

- 8 ታና ሸኢቁ፤ ዳራ ቢያ
ኔ ቢታንቶ ዳማ ዋርቃንዳጉዲ ታ ማሃንዳኔ፤
ዓጪ ማዔ ካራና ቢያ ኔ ዳኔ ማዓንዳኔ።
- 9 ዓንገ ኮኦሎና ኔ ዔያቶ ጳርቃንዳኔ፤
ዓጪና ማዢንቲ ማሄጉዲ ኔ ዔያቶ ጋኦጫንዳኔ » ጌዔ።
- 10 ዒንሢ፣ ካኣታ ማሊ ጳቂሠታዎቲ፤
ዒንሢ፣ ዓጮ ዎይሣ ዓሳ ዒንሢና ዔሩዎቲ።
- 11 ናንገና ናንጋ ጎዳም ዒጊቹሞና ማዲዎቲ፤
ጎይቂ ጎይቂያኣ ዒዛ ቢታንቶ ዳማ ዋርቁዎቲ።
- 12 ደጋ ዒዛኮ ዔኤታንዳሢኮ ቤርታ
ዒንሢያ ዒ ባይዙዋንቲ ቤርታ
ጎይቂ ጎይቂ ናዓሢም ዳዲ ባዑዎቲ፤
ዒዛ ፑኖ ካይዚ ማሃዙንሢ ቢያ ዓንጂንቲያኩ።

3

ዳውቲ ፔ ናኣዚ ዓብሴሎሜፓ ቶላኒ ጳሽኬያና ዓይናዳ ዓይነቱ

- ማእደር ጉቲና ሸኢቁንቲ ሸኢጲሢ
- 1 ናንገና ናንጋ ጎዳሢያ! ሞርካ ታኣኮ ዎዚ ሚርጌያ!
ዓኣፒኒ ዓሲ ታ ዑፃ ፑርቲሞና ዔቂያ!
- 2 ሜርጌ ዓሳ፡- «ጾኦሲ ዒዛ ዓውሲንዳዎሴ» ጌይ ጌይ
ታ ዛሎ ጌሰታኔ።
- 3 ናንገና ናንጋ ጎዳሢያ! ኔኤኒ ታኣኮ ገቲማሢኩ፤
ታ ባሻንዳጉዲ ማሢ ቦንቾ ታኣም ዒንጌሢ ኔናኩ።
- 4 ታኣኒ ዑኡዙ ጳጊዲ ናንገና ናንጋ ጎዳ ባንሢ ዒላታኔ፤
ዒዚያኣ ፔኤኮ ዳሚዳ ዳኮ ዑፃ ማዒ ታ ዒላቶ ዋይዛኔ።
- 5 ታ ላሃኔ፣ ገንዓኔ፤
ናንገና ናንጋ ጎዳ ዋንቶ ቢያ ታና ካፔሢር
ገንዓሰካፓኣ ገንሣ ታኣኒ ጳጫኔ።
- 6 ዓጮ ታኣኮ ማንገ ዓኣ
ፓይዲንቲዎ ታ ሞርኮ ታኣኒ ዒጊጩዎሴ።
- 7 ናንገና ናንጋ ጎዳሢያ! ዔቂ!
ታ ጾኦዛሢያ! ሙኪ ታና ዓውሴ!

2:9 ዮሃ. ጾፔዳ 2:26-27፤ 12:5፤ 19:15።

ታ ሞርኮኮ ባንጋሎ ማንህ፤
 ዓጮቹ ዓይኖቶኮ ከይሱ።
 8 ዓሲ ዓውሳይ ናንገና ናንጋ ጎዳኬ፤
 ያኦሲዮ! ዓንጃ ኔኤሲ ኔ ዴርሞ ማፖንጎ።

4

ዓይኑም ሱኡጋህ ዓይህ ጎይያና ጎኦላና ዓይናዲንታ ዳውቴ
 ዓይኑም

ያኦሲ ጉሙርቁ ሺኢቁንታ ሺኢጲህ
 1 ታኣኮ ዲሎ ያኦዛህዮ!
 ታኣኒ ዔኤላ ዋዶና ታኣም ዩሄ፤
 ሚርጌና ታ ዋኣያ ዋኣዪያፓ ታና ሃውሺሴ፤
 ታና ማኣሬ፥ ሺኢጲያዋ ታኣሲ ዋይዜ።

2 ዒንህ፥ ሃይ ዓሳ
 ዋማ ሄላንዳኣና ታና ዒንህ ቶኦቻይ?
 ዓይዴ ሄላንዳኣና ፓሁቱ ባኣዚ ዒንህ ናሽካይ?
 ዋማ ሄላንዳኣናዳያ ሉኡዙሞ ዒንህ ኮዓህ?

3 ናንገና ናንጋ ጎዳ ጉሙርቁንታ ዓሶ ፔኤም ማሂ ዶኦሬህ ዔሩቀቴ፤
 ዩያር ታኣኒ ዒዛ ሺኢቃ ዋዶና ዒዚ ታኣም ዋይዜ።

4 ዋዚ ዒንህ ዲጋዴቴያ ጎሜ ማዲፖቴ፤
 ዒንህ ላሃ ቤዛ ዓኣያ ዚቲ ጌይ
 ዒኖ ዒንህኮ ኮሺ ማሂ ዛጉዋቴ።

5 ናንገና ናንጋ ጎዳም
 ፒዜ ማዔ ዒንጎ ባኣዚ ሺኢሹዋቴ፤
 ዒዛ ጉሙርቁዋቴ።

6 «ዓይጌ ኑና ኮሺ ባኣዚ ዳዋንዳይ?»

ጋዓ ዓሳ ሚርጌኬ፤
 ናንገና ናንጋ ጎዳህዮ!
 ኔ ዓኣፖ ካር ፖዓ ኑኡም ፖፖንጎ *
 7 ማሌ ዓሳ ሃኣኮንታ ዋይኖ ዓኣፖዋ ዴንቃያ ዋዛዳ ዋዛፓ

3:8 2ሳሙ. 15:13—17:22። 4:4 ዓፕ. 4:26። * 4:6 ኔ ዓኣፖ ካር ፖዓ ኑኡም ፖፖንጎ ጋዓዙ- ዒሰራዔኤሌ ዓሳ ያኦሲፓ ዓንጃ ዴንቃኒ ኮዓን ሂዚ ጌይ ሺኢቃ ሺኢጲህኬ።

ኔኤኒ ታ ዒኖ ዎዛሴህ ባሽኬ።

8 ናንጊና ናንጋ ጎዳሂዮ!
ኮሺ ናንጊ ታና ናንጊሻሂ ኔናታሂሮ
ሂርጋ ባኣያ ታ ላሃኔ፣ ጊንዒያ ታ ጊንዒኔ።

5

ዓይነቱ ስሉጋሂ ዓይህ ጎይዖና ሹሉንጎና ዓይናዲንታ ዳውቴ
ዓይነቱ

ጾኦ ማኣዳንዳጉዲ ሸኢቁንታ ሸኢጰሂ
1 ናንጊና ናንጋ ጎዳሂዮ! ታ ዑኡዞ ዎይዜ፤
ጋርሲና ታ ዚኢሊንቲ ጋዓ ባኮ ዔኬ።
2 ታ ካኣቲዮ፣ ታኣኮ ጾኦዛሂዮ!
ታ ኔና ሸኢቃሂሮ
ታና ኔ ማኣዳንዳጉዲ ታ ዒላታ ዒላቶ ዎይዜ።

3 ናንጊና ናንጋ ጎዳሂዮ!
ጉቶ ጉቶ ታ ሸኢቃ ሸኢጰያ ዎይዜ፤
ኔኤኒ ታኣም ዎዚ ጋዓቴያ ጉሙርቂ ታ ካፓኔ።

4 ኔኤኒ ፑርታ ማደና ዎዛደ ጾኦቲቱዎሴ፤
ፑርቶ ማደ ዓሳኣ ኔኤና ዎላ ናንጉዎሴ።

5 ጾቶርቃ ዓሳ ኔ ቤርታ ዔቁዎሴ፤
ፑርቶ ማደ ዓሰዎ ቢያ ኔኤኒ ዒፃኔ።

6 ሉኡዙሞ ጌሰታ ዓሰ ቢያ ኔ ባይዛኔ፤
ዓሲ ዎደ ዓሰንታ ጌሻ ዓሰዎ ኔኤኒ ሻኣከንታኔ።

7 ታኣኒ ጋዓንቲ ኔኤኮ ደኤፖ ማኣሪዖና ኔ ማኣሪ ጌላንዳኔ፤
ኔኤም ዲማዴ ጌኤዦ ማኣሮ ባንሂያ ቦንቾና ታ ዚጋንዳኔ።

8 ናንጊና ናንጋ ጎዳሂዮ! ታኣኮ ሚርጌ ሞርኬ ዓኣሂሮ
ኔ ዲሉሞና ኔኤኒ ታና ዔኪ ዓኣደ፤
ኔ ጎይዎዎ ኔኤኒ ታኣም ኮሽ።

9 ዔያታ ጌሰታ ጌኤዘይዳ ጎኑሞ ባኣሴ፤
ማሊያ ዔያቶሲዳ ጌኔ ኩሚያኬ፤
ቆርጫ ዔያቶሲ ሲንሂንቲባኣ ዲኡፒ ዔቴጉዲኬ፤

- ደንጋ ዔያቶሲያኣ ዓሲ ጌሻያኩ።
- 10 ያኦሲዮ! ዔያቶ ዒንሢ ደቢንቴያኩ ጌዔ፤
ጌኖ ማዳ ዔያቶሲ ዔያቶ ባይዘንጎ፤
ዔያቶኮ ጎማ ሚርጌሢሮ ዔያቶ ባይዜ።
- 11 ኔና ጉኖ ካዮ ማሃዘንሢ ቢያ ዎዛደንጎ፤
ናንጊና ዔያታ ዒላሾንጎ፤
ሱንዖ ኔኤኮ ናሽካ ዓሳ ቢያ ዒናፓ ዎዛደንዳጉዲ
ኔኤኒ ዔያቶኮ ጊቲማ ማዒ ካፔ።
- 12 ናንጊና ናንጋ ጎዳሢዮ! ኔኤኒ ፃሎ ዓሶ ዓንጃኔ፤
ኔኤኮ ሚጨንጎጎጎ ጊቲማ ማዒ ኔ ዔያቶ ዓውሳኔ።

6

ዓይነቱ ሱኡጋሢ ዓይሣ ጎይዖና ሳሊ ሻሺ ጎኦላና ዓይናደንታ ዳውቲ ዓይነቱ

- ሜቶ ዎዳና ሺኦቁንታ ሺኦጲሢ
- 1 ናንጊና ናንጋ ጎዳሢዮ! ኔ ዳጎና ታና ጎሪፖ፤
ኔኤኮ ታሞጉዴ ዳጎና ታጊዳ ሜቶ ዓጊፖ።
- 2 ናንጊና ናንጋ ጎዳሢዮ! ታኦኒ ላኣፓታሢሮ ታና ሚጨንጎጎጎ፤
ሜጌፃ ታኦኮ ኮልኮልቁሢሮ ሃዳራ ታና ዓውሴ።
- 3 ናንጊና ናንጋ ጎዳሢዮ!
ሺሞፓሢ ታኦኮ ጉቤ ካራ ባይዚ ሜታዳኔ፤
ኔኤኒ ማኦዲዎዖ ደዓሢ ዎማ ሃላንዳኦናዳይ?
- 4 ናንጊና ናንጋ ጎዳሢዮ! ጊንሣ ማዒ ታና ዓውሴ፤
ኔኤኮ ናንጊና ናንጋ ናሹሞና ታና ፓሢ።
- 5 ሃይቁ ዓሶይዳፓ ኔና ማሊ ጳቁሣይ ባኦሴ፤
ዲኡኪንቴ ቤዛ ዓኦፃ ኔና ጋላታይ ዖናዳይ?
- 6 ዖዴዖ ሚርጊያፓ ዔቁያና ታኦኒ ላቤኔ፤
ዬኤፓ ታኦኮ ሚርጊሢሮ ዋንቶ ሻኦላ ታኦኮ ዎዓኔ፤
ኬራኦ ታኦኮ ማሰኪንታኔ።
- 7 ታ ሞርኮኮ ማኪፃፓ ዔቁያና
ሚርጌ ታ ዬኤኬሢሮ ዓኦፓ ታኦኮ ዳይ ዔቴኔ፤
ዴንቃኒያ ታኦኒ ዳንደዑሞሴ።

- 8 ናንገና ናንጋ ጎዳ ዩኤፖ ዒላቶ ታኣኮ ዋይዘሣር
ዒንሢ ፑርቶ ማዳ ዓሳ ታ ኮራፓ ባይቁዋቴ!
- 9 ናንገና ናንጋ ጎዳ ሺኢጲያ ታኣኮ ዋይዘኔ፤
ታ ሺኢቁ ሺኢጲያዋ ዒዚ ዔኬኔ።
- 10 ሞርካ ታኣኮ ቢያ ቦርሲንታንዳኔ፤
ማለባኣያ ዳውሲንቲ ገንሢም ዔያታ ጳሽካንዳኔ።

7

- ዳውቲ ቢኢኒያሜ ዓሢ ኩዛ ዛሎ ያኦሲም ዓይናዴ ዓይኑም
ፒዚ ዋጌ ዋገንታንዳጉዲ ሺኢቁንቲ ሺኢጲሢሢ
- 1 ናንገና ናንጋ ጎዳ ማዔ ታ ያኦዛሢያ!
ኔኤኒ ታኣኮ ዓኣሺንቲ ቶሎ ካያሢኬ፤
ታና ዳውሳ ዓሶ ቢያሢፓ ማኣዲ ዓውሴ።
 - 2 ኔኤኒ ዩያይዲባኣያ ማዔቲ
ዔያታ ታና ዓዳ ዘቢጉዲ ሾኦላንዳኔ፤
ዓውሳ ዓሲባኣ ቤሰካ ዳርዚ ታና ዔያታ ላኣላንዳኔ።
 - 3-4 ናንገና ናንጋ ጎዳ ማዔ ታ ያኦዛሢያ!
ፔቲ ዓሲምታዎ ፑርታ ባኣዚ ታ ማዴቲ
ታ ላጋሢ ታኣም ማዴ ኮዠ ባኮ ዛሎ ፑርታ ማዲ ታ ማሄቲ
ታ ሞርካሢ ዚቲ ጋዓያ ታኣኒ ቡሬያ ማዔቲ
ዩያ ባኮ ቢያይዲፓ ፔቲማታዎ ታ ማዴያታቲ።
 - 5 ታ ሞርካሢ ዳውሲ ታና ዓርቆንጎ!
ሲላሎይዳ ኮላሲ ቦንቾ ታኣኮ ባይዘንጎ፤
ዒዚ ታና ዎዎድንጎ።
 - 6 ናንገና ናንጋ ጎዳሢያ! ኔ ዳጎና ዔቁ፤
ታ ሞርኮኮ ዳጎ ኔኤኒ ባይዘ፤
ዎጋ ፒዜ ማዓንዳጉዲ ኔኤኒ ዓይሢ ጎይዎና
ታና ማኣዳኒ ዔቁ።
 - 7 ሜሌ ዳር ኔ ባንሢ ቡኩሲ
ዑፃ ዔያቶኮ ካኣቲ ማዒ ዎይሢ።
 - 8 ናንገና ናንጋ ጎዳ ሜሌ ዳር ዑፃ ዎጋኔ፤
ናንገና ናንጋ ጎዳሢያ! ታ ዒሎሞጉዴያ ታኣም ዎጌ፤
ዴኤፖ ያኦዛሢያ! ታ ፒዙሞጉዴያ ታኣም ዒንጌ።
 - 9 ዓሲኮ ዒኔና ማሊሢና ዛጋ ዒሎ ያኦዛሢያ!

6:8 ማቲ. 7:23፤ ሉቃ. 13:27።

ፑርቶ ዓሰኮ ዋይዞ ዒዲያ ባይዜ፤
ዲሎ ዓሰ ጋዓንቴ ኔኤኒ ካፔ።

- 10 ታኣኮ ገቲማሢ፣ ዴኤፖ ጾኣዛሢኬ፤
ዒኖ ፒዜ ዓሰ ዒዚ ዓውሳኔ።
- 11 ጾኣሲ ዲሎ ዋጌ ዋጋያኬ፤
ዳጎዋ ፔኤሲ ኬላ ኬላ ፔጋሲ ዳዋያኬ።
- 12 ዓሲ ፔኤኮ ጎሞ ቡኡዲ ሃሹዋያ ማዔቴ
ዒዚ ጨጉሻ ዓፓር ፔኤሲ ዋርቃኔ፤
ሂኢዠዋ ፔኤኮ ዓኣሣኔ።
- 13 ዒዚ ፔኤኮ ዋዳ ጾሎ ዓንጋሞ ኮሻኔ፤
ታሚጉዲ ዔኤታ ሂኢዠዋ ገኢገሻኔ።
- 14 ፑርቱሞ ማሊ ማሊ ዓኣ ዓሲ
ጌኔ ማዳ ጎዳዲ፣ ሉኡዙሞ ሾዓኔ።
- 15 ማሌ ዓሲሞ ኬሴ ዔቴ ቦኣካ ዓሲ
ዬያ ዒ ቦኣኬ ዔታ ፔኤር ጌላኔ።
- 16 ዒዚ ማዳ ጌኖ ማዳ ዒዛሞ ማዓኔ፤
ዒ ማዳ ፑርቶ ባካ ዒዛ ቶኦካ ኬዳኔ።
- 17 ናንገና ናንጋ ጎዳኮ ዲሎሞር ታ ዒዛ ጋላታጎዳኔ፤
ዴኤፖ ጾኣዛሢ ሱንጾ ቦንቺ ጋላታ ዓይኑሞ ታ ዓይናዳንዳኔ።

8

ዓይነቱ ሱኡጋሢ ዓይሣ ጎይጾና ሹሉንጎና ዓይናዳንታ ዳውቴ
ዓይነቱሞ

- ጾኣሲ ዴኤፑሞና ዓሲኮዋ ቦንቻ
- 1 ናንገና ናንጋ ጎዳ ማዔ ኑ ጾኣዛሢዮ!
ሱንጾ ኔኤኮ ሳጾ ቢያይዳ ዴኤፒ ዔርቲያኬ።
ኔኤኮ ቦንቻኣ ጨሪንጮኮ ዑፃ ማዒ ዴጌኔ።
- 2 ኔ ሞርኮኮ ዳንጎ ባይዛኒ
ዳኮ ናኣቶንታ ዳንጾ ዳንቃ ናኣቶንታ ኔና ጋላታጎዳጉዲ ኔ
ማሄኔ።
- 3 ኔ ማዢ ጨሪንጮ ታ ዛጋኣና
ፔ ቤዛ ቤዛ ኔኤኒ ጌሢ
ዓገሎንታ ዠኡጋሢንታ ታ ዛጋኣና

7:9 ዮሃ. ጾፔዳ 2:23። 8:2 ማቴ. 21:16።

- 4 ኔ ማሊ ጳቂሃንዳጉዲ ዓሲንሢ ዓይኅ ባኣዚዳይ?
ሃሃ ኔ ዔያቶ ዛሎ ማላንዳጉዲ ዓሲ ዓይገንዴዳይ?
- 5 ከኢታንቻ ዓኣ ጎይፃፓ ዳካር ኔ ዔያቶ ከይሴቴያ
ቦንቸና ዳኤቸሞና ኔ ዔያቶሞ ዒንገኔ።
- 6 ኔ ማገፍ ባኮኮ ቢያ 0-ፃ ማሂ
ዔያቶ ኔኤኒ ዶኦሬኔ፤
ቢያ ባኮ ዔያታ ዋይሃንዳጉዲ ኔኤኒ ማሄኔ።
- 7 ማራቶንታ ባኣቶንታ፥ ካዮ ቦፆዋ ዓይሱዋፆ
- 8 ጫሪንጮ ካፖንታ ባዛ ሞላሢንታ
ባዛ ዋኣፆ ዴማ ናንጋ ባኮ ቢያ
ዔያታ ዋይሃንዳጉዲ ኔኤኒ ማሄኔ።
- 9 ናንገና ናንጋ ጎዳ ማዔ ኔ ፆኦዛሢዮ!
ሱንፃ ኔኤኮ ሳፆ ቢያይዳ ዳኤፒ ዔርቴያኩ።

9

ዓይነቱ ሱኡጋሢ ዓይሃ ጎይፆና «ናኣዚ ሃይቦና» ገይ ዓይናደ ዳውቴ ዓይነቱ

- ፒዜ ዋጋያ ማዔ ፆኦሲሞ ሸኢካ ጋላታ
- 1 ናንገና ናንጋ ጎዳሢዮ! ጉቤ ዒናፓ ታ ኔና ጋላታኔ፤
ኔኤኮ ዲቃሢ ሄርሺሳ ማዶ ዛሎ ቢያ ታኣኒ ከኤዛኔ።
- 2 ኔኤና ዔኤቢ ታኣሞ ኮሸካሢር ታ ዋዛዳኔ፤
ዴኤፖ ፆኦዛሢዮ!
ኔ ሱንፆ ጋላታ ዓይነቱና ታ ሄርሻኔ።
- 3 ኔኤኒ ፔጋዲ ደዳኣና ታ ሞርካ ገንሢሞ ማዓንዳኔ፤
ዲቂንቲ ሎኦሚ ኔ ቤርታፓ ዔያታ ባይቃንዳኔ።
- 4 ኔኤኮ ካኣቱሞ ፆይቶይዳ ኔኤኒ ዴዒ
ፒዜ ዋጌ ዋጋያኩ፤
ታ ገኤዞዋ ገሰቲ ፒዜና ኔ ታኣሞ ዋጋንዳኔ።
- 5 ሜሌ ዴር ኔኤኒ ጎሬኔ፤
ፑርቶ ማዳ ዓሰዋ ኔ ባይዜኔ፤
ሱንፆዋ ኔ ዔያቶኮ ናንገና ዲርካቹ ባይዜኔ።
- 6 ሞርካ ኑኡኮ ናንገና ባይቄኔ፤

8:4 ዓ.ፍ. 7:17-18፤ ዓይኑ. 144:3፤ ዔ.ብ. 2:6-8። 8:6 1ቆር. 15:27፤ ዔፕ. 1:22፤ ዔ.ብ. 2:8።

ካታሞቀ ኔ ዔያቶኮ ደይሲ ጋፒሴኔ፤
ማሊ ዔያቶ ጳቂሃ ባኣዚ ባኣያ ማዒ ባይቄኔ።

7 ናንጊና ናንጋ ጎዳ ጋዓንቲ ካኣታዲ ናኣናና ናንጋኔ፤
ካኣቲሞ የይቶቀ ዒኢካ ዴዒ ዎጋኒ ዒዚ ገኢጊሸኔ።

8 ዓጮም ዒዚ ዲሉሞና ዎጋንዳኔ፤
ሜሌ ዴሮዎ ፒዙሞና ዒ ዎይሃንዳኔ።

9 ናንጊና ናንጋ ጎዳ ሄርቁንቲ ዎርቃ ዓሶም ፑኖ ካይዚኬ፤
ሜታህሂ ዎዶና ጴጌ ቤዞ ማዒ ዒዚ ማኣዳኔ።

10 ሱንጾ ኔኤኮ ዔራ ዓሳ ኔና ጉሙርቃኔ፤
ናንጊና ናንጋ ጎዳሂዮ! ኔና ኮዓ ዓሶቀ ኔ ሃሹቀሴ።

11 ዲዮኔይዳ ናንጋ፥ ናንጊና ናንጋ ጎዳም
ጋላታ ዓይኑሞ ዓይናዲሞቲ!
ዒዛኮ ዲቃህሂ ሄርሺሳ ማዶቀ
ዴሮ ባኣካ ኬኤዙሞቲ!

12 ሱንጾ ማሃሂ ዔያቶም ማሌኔ፤
ሄርቁንቲ ዎርቃ ዓሶኮ ዒላቶ ዒዚ ዎለባኣሴ።

13 ናንጊና ናንጋ ጎዳሂዮ!
ታኣኮ ሞርካ ታና ሜታሳ ማቶ ዛጌ!
ታኣም ሚጨንቲ!
ሃይሶ ቤዛፓኣ ዔኪ ታና ማሄ።

14 ዩያ ኔኤኒ ታኣም ማዴቲ
ዲዮኔይዳ ዓሳ ቡካ ቤዛ
ጴጊዲ ታ ኔና ጋላታንዳኔ፤
ኔኤኒ ታና ዓይሴሂሮዎ ታ ዎዛዳንዳኔ።

15 ሜሌ ዴራ ፔ ቦኣኬ ዔታ ፔኤሮ ሎኦሜኔ፤
ዔያታ ዓኣቲ፣ ፒሬ ፒራሂዳ ቶካ ዔያቶኮ ዓዲንቴኔ።

16 ናንጊና ናንጋ ጎዳ ፒዜ ዎጊሂና ዔርቲያኬ፤
ፑርቶ ማዳ ዓሳ ፔኤኮ ፑርቶ ማዳ ፒራሂና ዓዲንቴኔ።

17 ፑርቶ ማዳ ዓሳ ሃይቄ ዓሶ ዓጮ ዴንዳንዳኔ፤
ዶኣሲ ዎሊ ሃሻ ዓሳኣ ቢያ ዒማዒ ማዓንዳኔ።

18 ሜታዳ ዓሳ ጋዓንቲ ቢያ ዎይ ዎለንቲንዲሞሴ፤
ማንቆ ዓሶኮ ሃጊ ማዓ ዎዛኣ ናንጊና ጉሪ ማዒ ዓቱቀሴ።

- 19 ናንጊና ናንጋ ጎዳሂህዮ! ዓሲ ፔ ደደሞና
 ኔጊዳፓ ዑሣ ዋልቃዳንጉዲ ማሂፕ፤
 ኔኤኒ ዔቁ፥ ማሌ ዳሮ ዑፃ ኔ ዋጌ።
- 20 ናንጊና ናንጋ ጎዳሂህዮ!
 ዲቃሣ ባአዚ ዔያቶ ዑፃ ከይሰ፤
 ዔያታ ዓሲ ማዒ ማዠገጎቴሂያ ኔኤኒ ዔያቶ ዔርዘ።

10

ጊዜ ዋጌ ዋጊነታንዳጉዲ ሺአቁንቴ ሺአጲሂ

- 1 ናንጊና ናንጋ ጎዳሂህዮ!
 ዓይጎሮ ኔኤኒ ሃያይዲ ሃኪ ዔቁይ?
 ሚታሂ ዋደና ዓይጋ ኔ ዓአሺንታይ?
- 2 ፑርቶ ማዳ ዓሳ ሶቶርቃ፥ ማንቆ ዓሶዋ ዔያታ ዳውሳ፤
 ማሌ ዓሶም ዔያታ ፒራ ፒራሂዳ ፔኤሮ ዓዲንቶንጎ።
- 3 ፑርቶ ዓሳ ፔኤኮ ፑርቶ ዓፁሞና ሄርሺንታ፤
 ዔኤቢ ጊዳፎ ጎውዋ ጎጋይቂ ሺራ ዓሶ ዔያታ ዓንጃ፤
 ናንጊና ናንጋ ጎዳ ዔያታ ጫጫሽካ።
- 4 ፑርቶ ማዳ ዓሳ ሶኦሲ ዔኤቢኬ ጎውዋሶ፤
 ዔያታ ፔ ሶቶርሙሞና ሶኦሲ ባአሴ ጌይ ማላ።
- 5 ፑርቶ ዓሶም ዔኤቢ ቢያ ዋዳ ጊኢጋ፤
 ሶኦሲ ዋጎ ዔያታ ዔራኒ ዳንዳውዋሶ፤
 ዬያሮ ዒዚ ፔ ሞርኮ ሚሚኢጫ።
- 6 ዔያታ ፔ ማሊያና፡- «ኑና ዓጊሣንዳይ ባአሶ፤
 ዓይጎ ማታአ ባአያ ቢያ ዋዳ ኑ ዋዛዳንዳ፤» ጋዓ።
- 7 ዔያታ ጌሰታ ጌኤዘይዳ
 ጋዳማንታ ሉኡዙሞንታ ዘርቂሂያ ኩሜያኮ፤
 ጌፎ ባአዚንታ ፑርቱሞዋ ዔያቶ ዳንጋኮ።
- 8 ጉርደኮ ጎይፆ ዓጫ ካቲ ዔያታ ዳዓ፤
 ዒሎ ዓሶዋ ወቱንቃ ካርካ ዔያታ ዋዳ፤
 ዓአፓ ዔያቶኮ ማንቆ ዓሶ ፑርቱሞና ዛጋ።
- 9 ካይዚዳ ናንጋ ዘቢጉዲ ዓአሺንቲ ዔያታ ዳዓ፤
 ማንቆ ዓሶ ዓርቃኒ ዒኢካ ካታ፤
 ዔያቶኮ ፒራሂና ዓይሂ ጎቺ ዔያታ ዔካ።

10:7 ሮሜ 3:14።

- 10 ማንቆ ዓሶ ጳርቂ ዔያታ ከኤራኔ፤
ማኣዳይ ባኣ ላቤ ዓሳ
ዔያቶ ኩጮ ጋሮ ጌሊ ሎኦሚ ዓታኔ።
- 11 ፑርታ ማዳ ዓሲ ፔ ዒኖና፡-
«ጾኦሲ ታና ዋሌኔ፤
ዓኣፖ ካሮ ፔኤኮ ካንቂ ታና ዴንቁዋሴ!» ጋዓኔ።
- 12 ናንጊና ናንጋ ጎዳሢዮ ዔቁ!
ጾኦዛሢዮ ኔኤኮ ዋልቆ ኩጮ ዔቁሴ!
ሄርቂንቲ ዋርቃ ዓሶ ዋሊፖ።
- 13 ፑርቶ ማዳ ዓሳ
ጾኦሲ ዑፃ ዓይጋ ፑርታ ጌሰታይ?
ፔ ዒኖና፡-
«ታ ማዳ ባኮሮ ዒ ታጊዳ ሜቶ ዓጋዓኬ» ዓይጋ ጋዓይ?
- 14 ጾኦሲዮ! ኔኤኒ ጋዓንቲ ሜቶና ዋኣዮና ዛጊ
ዬያ ሼሌዒሶንዶ ጎይሢ ጊኢጊሻኔ፤
ሜታዴ ዓሳ ፔና ኔኤሞ ሃሻኔ፤
ዜኤሮ ናኣቶዋ ኔኤኒ ማኣዳኔ።
- 15 ጎሞ ዓሶንታ ፑርቶ ዓሶንታኮ ዋልቆ ላቢሴ፤
ሃካፓ ሴካ ፑርታ ባኣዚ ዔያታ ማዲዋጉዲ
ዔያታ ማዳ ፑርቶ ማዶሮ ሜቶ ዔያቶይዳ ዓጌ።
- 16 ናንጊና ናንጋ ጎዳ ካኣቲ ማዒ ናኣናና ናንጋኔ፤
ሜሌ ጾኦዘሞ ዚጋ ሜሌ ዴራ ጋዓንቲ
ሳጾይዳፓ ጋፒ ባይቃንዳኔ።
- 17 ናንጊና ናንጋ ጎዳሢዮ!
ኔኤኒ ማንቆ ዓሶኮ ሺኢጲጾ ዋይዛኔ፤
ዔያታ ሺኢቃ ሺኢጲጾ ዋይዚ ኔ ዔያቶ ዶዲሻኔ።
- 18 ሳጾይዳ ዓሲ ማዒ ማዢንቲ ዓሲ
ሜሌ ዓሶ ዲቃሁዋጉዲ
ዜኤሮ ናኣቶንታ ሄርቂንቲ ዋርቃ ዓሶንታ ዛሎ
ኔኤኒ ሞኦታኔ።

11

ዓይነቱ ስኡጋሢ ዓይሣ ጎይጾና ዓይናዲንታ ዳውቲ ዓይነቱ
ጾኦሲ ጉሙርቂሢ
1 ናንጊና ናንጋ ጎዳ ታኣኮ ፑኖ ካያሢኬ፤

ዓካሪ ዒንሢ ታኣኮ ሸምፔሎ
«ካፒጉዲ ዲኮ ባንሢ ባራኒ ዓኣሺንቴ» ዓይጎር ጋዓዖ?

2 ፑርቶ ማዳ ዓሳ ሃይሾ ቆኦዞ ፔኤኮ ዳንሢ፤
ዒና ፒዜ ማዕዘንሢ ዲሞና ዔያታ ዲካኒ
ሂኢዠ ዔያታ ዓኣሢ።

3 ፃጲ ማዕ ባካ ደዓዛ
ዲሎ ዓሲ ዓይጎ ዎኦታኒ ዳንዳዓይ?

4 ናንጊና ናንጋ ጎዳ ፔኤኮ ዲማዳ ማኣራ ዓኣ፤
ካኣቱሞ ያይታ ዒዛኮ ጫሪንጮይዳኬ፤
ዒዚ ዓሶ ሲያ ዛጋ፤
ጊኸፍ ጌይ ዛጊያና
ዓሳ ዓይጎ ማዳቴያ ዓኣፓ ዒዛኮ ዳንቃ።

5 ናንጊና ናንጋ ጎዳ
ዲሎ ዓሶንታ ጎሞ ዓሶዎ ዎይታቴያ ዛጋ፤
ፑርቱሞ ናሽካ ዓሶ ጋዓንቴ ዒዚ ዒዒፃ።

6 ዒዚ ፑርቶ ማዳ ዓሶ ዑፃ
ታሚ ቁንሢና ሙርቁንሢና ኬይሳ፤
ዔያቶሞ ዓጊንቴ ባካ ታሚጉዲ ሸሸኤላ ዠባሬኬ።

7 ናንጊና ናንጋ ጎዳ ዲሎ ማዕሢር ዲሎ ማዳ ዒ ናሽካ፤
ፒዜ ማዳ ማዳ ዓሲ ሲያ ዒዛኮ ዓኣፓ ካር ዛጋንዳ።

12

ዓይነቱ ሱኡጋሢ ዓይሣ ጎይያ ሳሊ ሻሺና ዳንሦ ጎኦላና
ዓይናዲንታ ዳውቴ ዓይነቱ
ማኣዶ ዳንቃኒ ሸኢቁንቴ ሸኢኢሢሢ

1 ናንጊና ናንጋ ጎዳሢ! ማኣዳ፤
ዓሶ ባኣካ ፔቲታዖ ጉሙርቁንታ ዓሲ ጰዲሞሴ።

2 ዎሊም ዔያታ ሉሉኦ፤
ላምዖ ዒኔና ማዒ ዎሊ ጌሺ ዔያታ ጌሰታ።

3 ጌሺሢ ጌሻ ዳንጋንታ ሃይሴ ሚርጊሻ ዒንዲርሲያ
ናንጊና ናንጋ ጎዳ ባይዘንጎ!

4 ዔያታ- «ኦኡኒ ጌሰቲያና ኮዔ ባኣዚ ዳንቃንዳ፤
ሸኔ ጌዔ ጎይሢያኣ ኦኡኒ ጌሰታንዳ፤

ለአጋኒ ኑና ዳንዳዓሢ ያናዳይ?» ጋዓኔ።

5 ናንጊና ናንጋ ጎዳ ጋዓንቴ
«ሜታጴ ዓሳ ካራ ባይዜኔ፤
ዳውሲንቴ ዓሳአ ሜታሢ ዲቡሞፓ ዔቄያና ዚኢሊንታኔ፤
ዬያሮ ዔያቶ ሄላ ባካፓ ጎኑቢ ቃዛኒ ታ ዔቃንዳኔ» ጋዓኔ።

6 ናንጊና ናንጋ ጎዳኮ ሃጊ ማዓንዳ ዎዘ ቃኣላ ጉሙርቁንታያኬ፤
ናኣቦ ታሚዳ ለንካይ ማይንቴ ሸኤሸና ቢራ ዓንገጉዲ
ጌኤሺኬ።

7 ናንጊና ናንጋ ጎዳሢዮ!
ኔኤኒ ቢያ ዎዴ ኑና ካፔ፤
ፑርታ ማዔ ሃያ ዎዶ ዓሶይዳፓ ኔ ኑና ዓውሴ።

8 ፑርታ ማዲሢ ዓሲ ጋላቴሳ ዎይይዳ
ፑርቶ ማዳ ዓሳ ያቶርቁ ታኣካኔ።

13

ዓይኑሞ ሱኡጋሢ ዓይሢ ጎይያና ዓይናዲንታ ዳውቴ ዓይኑሞ
ማኣዶ ዴንቃኒ ሸኡቁንቴ ሸኡሲሢሢ

1 ናንጊና ናንጋ ጎዳሢዮ!
ዎማ ሄለንዳኣና ኔኤኒ ታና ዎላይ?

ናኣናና ጋፒ ኔ ታና ዎላንዳ?
ዎማ ሄለንዳኣና ታ ዓኣፓፓ ኔኤኒ ኔና ሸርሻይ?

2 ታ ማሊያና ታኣኒ ሞኑቴንታሢ
ታ ዒኖና ሮኦር ጉቤ ታኣኒ ያያሢ
ዓይዲ ሄለንዳኣናዳይ?

ዓይዲ ሄለንዳኣና ታ ሞርካሢ
ታና ባሺ ናንጋንዳይ?

3 ናንጊና ናንጋ ጎዳ ማዔ ታ ያኦዛሢዮ!
ሃዳራ ታና ዛጌ፣ ታ ጋዓ ባኮ ዎይዜ፤
ሃይቄያ ማዒ ጊንዒ ታ ዓቱሞጉዲ
ዶዶሞ ታኣሞ ዒንጌ።

4 ታ ሞርካ፡- «ኑ ዒዛ ባሸኔ» ጌይ ሄርሺንታንዳጉዲ
ታ ሎኦሚያና ዔያቶ ዎዛሲፖ።

- 5 ታኦኒ ኔኔኮ ጋፑዋ ናሹዋ ጉሙርቃኔ፤
 ዒና ታኦኮ ኔ ዓውሴሢረ ዋዛዳኔ።
- 6 ናንጊና ናንጋ ጎዳሢረ!
 ኔኔኒ ታኦም ኮሺ ባኦዚ ማዳሢረ
 ኔ ቦንቾም ታ ዓይናዳኔ።

14

ዓይነቱ ስኡጋሢ ዓይሣ ጎይጾና ዓይናዳንታ ዳውቴ ዓይነቱ
 ዓሲኮ ፑርቴዋ
 (ዓይኑ. 53)

- 1 ዓኤዮ ዓሳ ፔ ዒናና፡- «ጾኦሲ ባኦሴ» ጋዓኔ፤
 ዬያጉዴ ዓሳ ማኦሳኔ ዓሲኬ፤
 ዔያታ ሻኦካ ማዶ ማዳኔ፤
 ዔያቶ ባኦኮይዳ ኮሺ ባኦዚ ማዳ ዓሲ ፔቴታፖ ባኦሴ።
- 2 ማሊ ጸቂሣ ዓሲንታ
 ናንጊና ናንጋ ጎዳ ኮዓ ዓሲያኦ ዓኦቶ ዴንቃኒ
 ናንጊና ናንጋ ጎዳ ጫሪንጫፓ ሊካ ዓሶ ዛጌኔ።
- 3 ጋዓንቴ ዓሳ ቢያሢ ዣኦሌኔ፤
 ጉቤሢ ፔቴ ማዒ ፑርቴኔ፤
 ዔያቶይዳፓ ፔቴ ዓሲታዋ ኮሺ ማዳይ ባኦሴ።
- 4 ናንጊና ናንጋ ጎዳ፡- «ጾኦሲ ዔሪ ሺኢቁዋ ዓሶኮ
 ታኦኮ ዴሮ ዓዳ ካሣጉዲ ሙዓ
 ፑርቶ ማዳ ዓሶኮ ማሊ ጸቂሣ ዒኔ ባኦዳ?» ጋዓኔ።
- 5 ናንጊና ናንጋ ጎዳ ዲሎ ዓሶ ባኦካ ዓኦሢረ
 ዔያታ ዓኦ ቤዛ ዓኦፖ ዲቃቲ ጋፔኔ።
- 6 ዒንሢ ማንቆ ዓሶኮ ማሊፖ ዲቃኒ ማሌያታቴያ
 ናንጊና ናንጋ ጎዳ ጋዓንቴ ዔያቶኮ ጊቲማሢኬ።
- 7 ዒሰራዔኤሌ ዓሶም ዳቂንታ ዲዮኔይዳፓ ሙካቴ ዓይጎ!
 ናንጊና ናንጋ ጎዳ ፔ ዴሮኮ ዲዒንቴ ባኮ ማሃ ዋዶና
 ያይቆኑቤ ዋዛዳንዳኔ፤
 ዒሰራዔኤሌ ዴራኦ ዒላሻንዳኔ።

14:3 ሮማ 3:10-12።

15

ዳውቲ ዓይነቱ

ናንጊና ናንጋ ጎዳ ዓሲዳፓ ኮዓ ባኣዚ

1 ናንጊና ናንጋ ጎዳህዮ!

ኔኤኮ ጌኤኩ ማኣሪ ጌላኒ ያኣኒ ዳንዳዓይ?

ኔኤኮ ደማዴ ዲኮይዳ

ናንጋኒ ዳንዳዓህ ያናዳይ?

2 ሃይ ፓጩኔ ጌይሳ ባኣዚ ባኣ ዓሲ

ዲሎ ማዶ ማዶ ዓሲ

ዓናፓ ጎኔ ማዔ ባኣዚ ጌሰታ ዓሲ፥

3 ጌሰታ ጌኤዘና ዓሲ ጌሹዋ ዓሲ

ፔ ላጎም ፑርታ ባኣዚ ማዶዋ ዓሲ

ፔ ዓሺኖ ደንኩዋ ዓሲ፥

4 ፑርቶ ማዶ ዓሶኮ ማሊያ ዔኩዋ ዓሲ

ናንጊና ናንጋ ጎዳም ዓይህንታ ዓሶ ጋዓንቴ ቦንቻ ዓሲ

ዎዚ ዳኤያያ ማዔታቴያ ጩኣቄ ጩኣቄም ማዶ ኩንህ ዓሲ፥

5 ሚኢሾ ፔኤሲ ሾይቸና ዔካኒ ታልዑዋ ዓሲ

ዲሎ ዓሶ ማቶይዳ ዓጋኒ ዳሜና ሚኢሾ ዔኩዋ ዓሲ

ያኣዴ ማዔ ዓሲ ፔቴታዎ ዓጊግዓኬ፤

ኮሺ ናንጊ ናንጋንዳኔ።

16

ዳውቲ ካላሎ

ያኣሲ ጉሙርቄ ሺኢቁንቴ ሺኢደህ

1 ያኣሲዮ!

ታኣኒ ኔና ጉሙርቃህሮ ታና ካፔ።

2 ናንጊና ናንጋ ጎዳም ታኣኒ፡- «ኔኤኒ ታኣኮ ጎዳኬ፤

ኔኤፓ ዓታዛ ኮሺ ባኣዚ ታኣም ባኣሴ» ጌዔኔ።

3 ያኣሲም ደማዴያ ማዔ ሳዎይዳ ናንጋ ዓሳ

ቦንቸንቴያኬ፤ ታኣኒያኣ ዔያቶ ዛጋዎ ዎዛዳኔ።

4 ሜሌ ያኣዘ ካኣሽካ ዓሶ

ሚርጌ ያዩሳ ባኣዚ ህላንዳኔ፤

ታኣኒ ዬያጉዴ ሜሌ ያኣዘ ሹኪ ዑሻዓኬ፤

ዬያቶም ታኣኒ ዚገናኑ ካኣሽካዓኩ።

5 ናንገና ናንገ ጎዳሂዮ! ታኣኩ ዴናሂንታ ዑዳሂያ ኔናኩ፤
ታ ዛላ ባኣዚ ቢያ ኔ ኩጮ ጋራኩ።

6 ታኣም ዴና ፓቃኒ ዓገንቴ ሱዛ ኮሺ ቤሰካ ኬዴ፤
ጎኔና ታና ዋዛሳ ኮሺ ዴኔ ታና ሄሌኔ።

7 ታና ዘራ ናንገና ናንገ ጎዳ ታኣኒ ጋላታኔ፤
ዋንቶ ማዕቴያ ዒና ታኣኩ ፒዜ ማዕ ባኣዚ ታና ዔርዛኔ።

8 ቢያ ዋዴ ታኣኒ ናንገና ናንገ ጎዳ ቤርታሳኔ፤
ዒዚ ታኣኩ ሚዛቆ ዛላናታሂሮ ታኣኒ ዓገፃዓኩ።

9 ዬያሮ ዒና ታኣኩ ኮሺ ዋዛዳኔ፤
ዑፃኣ ታኣኩ ሂርጋ ባኣያ ሃውሻኔ።

10 ኔኤኒ ሽምፓሂ ታኣኩ ዱኡፖ ዔታ ሃሺንዲዋሴ፤
ኔኤም ዲማዴሂያኣ ኔኤኒ ዋዒሲንዲዋሴ።

11 ኔኤኒ ናንገ ጎዳሂ ታና ዳዋንዳኔ፤
ኔ ኮራ ሚርጌ ዋዛ ኩሚያኩ፤
ኔኤኩ ሚዛቆ ዛላ ናንገና ሃውሺሂያኣ ዓኣኔ።

17

ደውቴ ሺኢጲያ

ጌኤሺ ዓሲኮ ሺኢጲሂ

1 ናንገና ናንገ ጎዳሂዮ!
ፒዜ ዋጌ ታኣም ዋገንታንዳጉዲ
ታ ሺኢቃ ሺኢጲያ ዋይዜ፤
ዒላቶዋ ታኣኩ ዒና ዔኩ፤

ጌሺሂናቱዋንቴ ጎኔና ታ ኔና ሺኢቃሂ ዋይዜ።

2 ዓኣፓ ኔኤኩ ታ ፒዙም ዴንቃኒ ዳንዳዓሂሮ
ኔኤኒ ሌሊ ታኣም ዋጋኒ ዳንዳዓኔ።

3 ዒኖ ኔ ታኣኩ ዛጌያታቴያ
ዋንቶ ኔ ታና ሙኪ ያኦጩቴያ
ታ ዋይታቴ ኔኤኒ ዛጌቴያ
ፑርቱም ታኣፓ ኔኤኒ ዴንቃዓኩ፤

16:10 ዳኪ. ማዶ 13:35። 16:11 ዳኪ. ማዶ 2:25-28።

ደንጋ ታኣኮ ዳቢንታያቱቸው።

4 ዓሳ ማዳ ጎይጾቹቸውን
ኔኔኒ ከኤዛ ቃኣሎ ጎይጾና
ዋይዘ ዓፃ ዓሳ ሃንታ ጎይጾፓ
ታኣኒ ታና ካፔኔ።

5 ቢያ ዋዴ ኔ ጎይጾ ታ ሃንታኔ፤
ቶካ ታኣኮ ኔ ጎይጾፓ ከሰኪ ዣኣሊባኣሴ።

6 ጾኦሲዮ!
ሺኢጲዮ ኔ ታኣኮ ዋይዘሢ
ኔና ታኣኒ ሺኢቃኔ፤
ዋዮ ኔኤሲ ታ ባንሢ ማሄ፤
ታኣኒ ጋዓ ባኮ ዋይዘ።

7 ፔ ሞርኮፓ ቶላኒ ኔና ፑኖ ካይዚ ማሃዘንሢ
ኔኤኮ ሚዛቆ ኩጮና ዓውሳ ጾኦዘሢዮ!
ናንገና ናንጋ ናሹሞ ኔኤሲ ዲቃሢ ሄርሺሳ ጎይሢና ፔጋሲ
ዳቄ።

8 ዓኣፒኮ ጨልሼ ካፖማጉዲ ታና ካፔ፤
ኔኤኮ ጋኣዘ ዴማ ታና ዓኣቼ።

9 ታና ሜታሳ ፑርቶንሢዳፓ
ዋዳኒ ታና ማንጌ ታኣኮ ሞርካፓ ታና ዓኣቼ።

10 ሚጠገንቱዋያ ማዒ ዓሩ ዓይታ ፔኤሲ ዋዲ ሃሽኔ፤
ደንጋ ዓይቶሲ ጾቶርሙሞ ጌሰታኔ።

11 ዳውሲ ዓይታ ታና ሄሌኔ፥ ማንገሪያኣ ማንገሪኔ፤
ዋዲ ሳዓ ዓይታ ታና ሚጫኒ ጎዚ ዓቄኔ።

12 ዓይታ ዓርቂ ዓካኒ ኮዓ ዘቢጉዲ
ዓኣሸንቲ ካቲ ዴዔ ሃጊ ዓቃ ዘቢጉዲኬ።

13 ናንገና ናንጋ ጎዳሢዮ! ዓቂ ዓይቶ ዓርቂ ዓጌቴራ፤
ኔኤኮ ጨንቾ ዓፓሮና ፑርቶ ዓሶፓ ታና ዓውሴ።

14 ናንገና ናንጋ ጎዳሢዮ!
ዓይታ ናንጋ ናንጋ ሃያ ዓጮ ባኣዚም ሌሊ ማዔ

ዓሶ ኩጫፓ ታና ዓውሴ።
ኔኔኒ ናሽካ ዓሶም ሙኡዚ ዒንጌ፤
ናኣታ ዓይቶኮ ሚርጎንጎ፤
ናኣቶኮ ናኣቶም ማዓንዳ ሙኡዚ ዓይቶም ዒንጌ።

15 ታኣኒ ዪሉሞና ዓኣፖ ካሮ ኔኤኮ ዛጋንዳኔ፤

ገንዳህፓ ታኣኒ ጴጫፆ ኔኤኮ ዓውካሮ ዛገ ምዛዳንዳኔ።

18

ዓይነቱ ሱኡጋህሂ ዓይህ ጎይፆና ዓይናዲንታ ፆኦሲ ዓይላህ
ዳውቴ ዓይነቱ፤ ፆኦሲ ሳኦኦኤና ዒዛኮ ሞርኮናይፓ ዒዛ
ቶሊሴያና ፆኦሲ ሶንቾም ዓይናዲንቴያኬ።
ዳውቴ ባሺህ ዴንቃፆ ዓይናዳ ዓይነቱ
(2ሳሙ. 22:1-51)

1 ናንገና ናንጋ ጎዳህዮ!
ታኣም ምልቄ ዒንጋህሂ ኔናታህሮ ታ ኔና ናሽካኔ።

2 ናንገና ናንጋ ጎዳ ታኣኮ ላላህ
ታኣኮ ዲካህንታ ታና ዓውሳህያኬ፤
ታ ፆኦዛህ ታኣኮ ዓኣሺንቶ ካያህኬ፤
ዒዚ ታኣኮ ገቲማህና ጉራናህኬ።

3 ጋላታ ኮይሳ ናንገና ናንጋ ጎዳ ታኣኒ ሺኢቃኔ፤
ዒዚ ታ ሞርኮይፓ ታና ዓውሳኔ።

4 ሃይቢ ካራ ባይዚ ታና ማታሴኔ፤
ባይሲንታ ዲጲያ ታና ዴኡኬኔ።

5 ዴኡፒ ሱሲ ታና ማሬኔ፤
ሃይቢ ፒሮጉዲ ታኣም ፒሪንቴኔ።

6 ታኣኒ ማታዳ ምደና ናንገና ናንጋ ጎዳ ዔኤሌኔ፤
ታና ዒ ማኣዳንዳጉዲ ታ ፆኦሲ ታኣኒ ሺኢቄኔ፤
ዒዚያ ፔኤኮ ጌኤዢ ማኣራ ዓኣፆ ዑኡዞ ታኣሲ ሞይዜኔ፤
ታኣኮ ዒላቶ ሞዒ ዒና ዔኬኔ።

7 ሳዓ ዚምባሪ ጎጋይቄኔ፤
ዲኮኮ ሞፆ ዓገፂፆና ኮሬኔ፤
ናንገና ናንጋ ጎዳ ዲጋዳህሮ ዔያታ ዓገፆኔ።

8 ዒዛኮ ሲኢዳፓ ዳጎ ጩባ ኬሰኬኔ፤
ዳንጋፓ ዒዛኮ ሙሙዓ ታሚ ሎሰቶና
ሚሚቻ ቄንህያኣ ኬሰኬኔ።

9 ጫሪንጮ ዳርዚ ሊካ ዒ ኬዴኔ፤
ዒዛኮ ቶኮ ዴማ ዲም ጌዔ ሸኣሬ ዓኣኔ።

10 ዒዚ ከፋቤኤሎ ዑፃ ዴይ ባራኔኔ፤
ዢባሮ ጋኣዞና ባራኒ ሌካ ዒ ኬሰኬኔ።

- 11 ጥና ዲዚ ዲሞና ዓላቸኔ፤
ካርሜ ሻኦራኦ ዲዛ ካንቁ ዓላኔ።
- 12 ዲዛኮ ዓላ ፖፖፓ ዔቁያና ሻቸንታ ታሚ ፖዒንታ
ዲሞ ገዔ ሻኦሮ ባኣኪና ሶፐ ኬሰኬኔ።
- 13 ናንጊና ናንጋ ጎዳ ጫሪንጫፓ ጉጉንሣኔ፤
ዴኤፖ ጆኦዛሢ ዑኡዞ ፔኤሲ ማኣሚሴኔ።
- 14 ዲዚ ሂኢዮ ፔኤሲና ዲኪ ሞርኮ ላኣሊሽኔ፤
ጉጉንጆ ሚርጊሺ ካራ ባይዚ ዔያቶ ዳውሴኔ።
- 15 ናንጊና ናንጋ ጎዳሢዮ!
ኔኤኒ ኔኤኮ ሞርኮ ጎሪ ዎዶና
ዳጎ ዑኡዞ ኔኤኮ ኔ ዎይዚሴ ዎዶና
ዴኤፖ ባዘኮ ዴማ ፔጋዲ ዴዴኔ፤
ጎፖኮዎ ማዢንቶ ዓይጆ ካራ ፔጋ ኬሰኬኔ።
- 16 ናንጊና ናንጋ ጎዳ ሎኦፓ ኩጮ ዳኪ ታና ዓርቄኔ፤
ሚርጌና ዔቴ ማዔ ዎኣፖፓ ጎቺ ታና ዲ ኬሴኔ።
- 17 ታጉዳፓ ዎልቆና ባሺ ማዔ ታ ሞርኮፓ
ታና ዲዚ ዓውሴኔ፤
ታና ዲፃ ዓሶ ቢያሢ ኩጫፓ
ዲዚ ታና ዓይሴኔ።
- 18 ዔያታ ታኣኒ ሜታዴ ዎዶና ታኣኮ ሞርኬ ማዒ ዔቁኔ፤
ናንጊና ናንጋ ጎዳ ጋዓንቲ ታና ካፔኔ።
- 19 ዲዚ ታና ዳልጊ ቤሲ ኬሴኔ፤
ዲዛ ታኣኒ ዎዛሴሢሮ ዲ ታና ዓውሴኔ።
- 20 ናንጊና ናንጋ ጎዳ ታኣሞ ታ ዲሎሞጉዲ ጨጋንዳኔ፤
ታ ጌኤሹሞጉዲያኣ ማሂ ታኣሞ ዲንጋንዳኔ።
- 21 ናንጊና ናንጋ ጎዳኮ ጎይጆ ታ ሃንቲኔ፤
ፑርታ ባኣዚ ማዳኒ
ታ ዓኣፖ ካሮ ታ ጆኦዛሢ ቤርታፓ ሺርሺባኣሴ።
- 22 ዲዛኮ ዎጎ ቢያ ታኣኒ ማዲ ኩንሣኔ፤
ዳሞቦዎ ታ ዲዛኮ ቦንቺጆ ሃሺባኣሴ።
- 23 ዲዚ ታና ዛጌ ጎይጆ ታኣኒ ዲሎኬ፤
ጎሜይዳፓ ታና ታኣኒ ካፔኔ።
- 24 ናንጊና ናንጋ ጎዳ ታኣኮ ዲሎሞጉዴያ
ኩጫኣ ታኣኮ ጌኤሺ ማዔሢጉዴያ
ታኣሞ ኮይጎ ባኮ ዲዚ ጨጌኔ።

- 25 ናንጊና ናንጋ ጎዳሢዮ! ኔኤም ጉሙርቁንታዞም
 ኔኤኒያኣ ጉሙርቁንታያኤ፤
 ጎኔ ዓሲ ማዔዞንሢም ኔኤኒያኣ ጎኔ ማዓያኤ።
- 26 ጌኤዠ ዓሶም ኔኤኒ ጌኤሺኤ፤
 ዎሶ ዓሶም ጋዓንቴ ዔያቶም ኮይሳሢ ኔ ዒንጋኔ።
- 27 ዒኖ ሹሌዔ ዓሶ ኔኤኒ ዓውሳኔ፤
 ዖቶርቃዞንሢ ጋዓንቴ ኔኤኒ ዳውሲሳኔ።
- 28 ናንጊና ናንጋ ጎዳሢዮ! ታኣኮ ኔኤኒ ፖዓሢኤ፤
 ታ ዖኦዞሢዮ! ዲሞ ታኣኮ ኔ ፖዒሣኔ።
- 29 ኔ ዎልቆና ዖሎ ዖላ ዓሶ ባሺ ታኣኒ ሄርቄኔ፤
 ኔ ዎልቆና ኬኤሎ ዲሮና ጰሊ ታ ጌሌኔ።
- 30 ዖኦሲ ጎይፃ ሃይማ ፓጩኔ ጌይሳ ባኣዚ ባኣያ ፒዜኤ!
 ቃኣላኣ ዒዛሲ ጌኤሺኤ!
 ዒዛና ካናዳ ዓሶም ዒዚ ገቲማሢኤ።
- 31 ናንጊና ናንጋ ጎዳፓ ዓታዞ ዖናዳይ ዖኦሲ?
 ዒዛይዳፓ ዓታዞ ላሌ ማዓሢ ዖናዳይ?
- 32 ታኣም ደዲሞ ዒንጋሢንታ
 ጎይፃዎ ታኣኮ ፒዚሳሢ ዖኦሲኤ።
- 33 ዒዚ ቶኮ ታኣኮ ዎሾ ቶከጉዲ ደዲሻኔ፤
 ጌሜሮይዳ ሄርጋ ባኣያ ታና ዒዚ ዔቁሳኔ።
- 34 ኩጮ ታኣኮ ዒ ዖልዚ ዖሎንድ ጎይሢ ዔርዛኔ፤
 ኩጮ ታኣኮ ሞኦኖ ዓንጎ ቆኦዞ ጎቻንዳጉዲ ዒ ደዲሻኔ።
- 35 ኔኤኮ ባሺፃ ገቲሞ ኔኤኒ ታኣም ዒንጌኔ፤
 ኔኤኮ ሚዛቆ ኩጮኣ ታና ካፓኔ፤
 ኔኤኒ ታና ማኣዳኒ ሙኪ ዴኤፒ ማዶ ማዴኔ።
- 36 ታ ሃንታንዳ ጎይፃ ኔኤኒ ታኣም ዳልጊሾኔ፤
 ቶካኣ ታኣኮ ዲቁንቲባኣሴ።
- 37 ሞርኮ ታኣኮ ታኣኒ ዳኪ ዓርቄኔ፤
 ጋፒሲ ባይዙዎፃ ጊንሢም ታኣኒ ማዒባኣሴ።
- 38 ላሚ ጊንሢ ዔያታ ዔቁዎጉዲ ታኣኒ ዔያቶ ጋኣጩኔ፤
 ዔያታ ታኣኮ ቶኮ ዴማኣ ሎኦሚኔ።
- 39 ዖላንዳጉዲ ዎልቄ ኔኤኒ ታኣም ዒንጌኔ፤
 ታ ሞርኮ ታ ቶኮ ዴማ ኔኤኒ ጉምዓሢኔ።

40 ታ ሞርካ ገንሢህም ባሸገገጥ ጳሽካንዳጉዲ ኔ ማሄኔ፤
ታኣኒያ ታና ዒግዘንሢ ጋፒሲ ባይዜኔ።

41 ዔያቶ ማአዳ ዓሲ ኮይ ዔያታ ዒላቴኔ፤
ጋዓንቴ ዔያታ ዴንቁባኣሴ፤

ናንገና ናንጋ ጎዳ ባንሢ ዔያታ ዒላቴኔ፤
ዒዚ ጋዓንቴ ዔያቶም ዋይዚባኣሴ።

42 ዠባሬ ፒዲ ዔኪ ዓኣዳ ሲላሊ ማዓንዳያ ሄላንዳኣና
ታኣኒ ዔያቶ ጋኣጩኔ፤
ጎይሢዳ ዓኣ ደቃሌጉዲ ታ ዔያቶ ሄርቄኔ።

43 ዋይዘ ዒፃ ዴሮይዳፓ ኔኤኒ ታና ዓውሴኔ፤
ዴሮ ዑፃ ኔ ታና ዶኦሬኔ፤
ታኣኒ ዔሩዋ ዴሬ ታ ቢታንቶ ዴማ ዋርቃኔ።

44 ፃንጎ ማዔ ዓሳ ታኣም ዚጋኔ፤
ታ ማዳ ባኮ ዋዋይዘያ ታኣም ዔያታ ዓይሢንታኔ።

45 ዒጊቹሞና ካራ ዔያታ ባይዛኔ፤
ፔኤኮ ዋርዲዮ ቤዛፓ ጎጋይቂ ጎጋይቂ ኬሰኪ ሙካኔ።

46 ናንገና ናንጋ ጎዳ ባይቁዋያኬ!
ታ ፆኦዛሢ፥ ታኣኮ ላላሢ ቦንቹንቶንጎ!
ታና ዓውሴ ዋልቆ ፆኦዛሢ ዴግ ዴግ ጎፆንጎ።

47 ዒዚ ታ ሞርኮ ኮሚ ኮፃኔ፤
ዴሮዋ ታ ዴማ ማሂ ታኣም ዒ ዋይሣኔ።

48 ዒዚ ታኣኮ ሞርካፓ ታና ዓውሳኔ፤
ታ ሞርኮኮ ዑፃ ማሂ ኔኤኒ ታና ዴጊሳኔ፤
ጎርቲኖ ማዳ ዓሶይዳፓ ኔ ታና ዓውሳኔ።

49 ናንገና ናንጋ ጎዳሢዮ! ዬያሮ ዴሮ ባኣካ
ታኣኒ ኔና ጋላታኔ፥ ሱንፆዋ ታ ኔኤኮ ዓይኑሞና ሄርቫኔ።

50 ዒዚ ካኣታሢ ካኣቲም ዴኤፒ ባሸሢ ዒንጋንዳኔ፤
ዒ ፔኤሮ ዶኦሚ ካኣቲም ናንገና ናሹሞ ፔኤሲ ዒ
ቤኤዛንዳኔ፤
ዳውቴና ዜርፆናም ናንገና ዬያ ዒ ማዳንዳኔ።

19

ዓይኑም ሱኡጋሢ ዓይሣ ጎይጾና ዓይናደንታ ዳውቴ ዓይኑም ማዠንታ ቢያ ጾኦሲኮ ቦንቾ ፔጋሲ ዔርዘያ ማዒጾ

- 1 ጫሪንጫ ጾኦሲኮ ቦንቾ ኬኤዛኔ፤
ጎዓፓ ሌካ ደጌ ቤዛኣ ዒዛኮ ማዶ ዒላቴ ዋይዚሳኔ።
- 2 ፔቴ ኬላ ማሌ ኬሎም ዬያ ኬኤዛኔ፤
ዋንታኣ ሄላ ዋንቶም ዔራቶ ዒዛሲ ሃይሳታኔ።
- 3 ዔያታ ጌሰታ ሃይሴንታ ሙኡቺያ ባኣሴ፤
ዔያቶኮ ዑኡሲያ ዋይዚንቱዋሴ።
- 4 ያኣደ ማዒቲያ ዔያቶኮ ከኢታ ዓጮ ቢያ ሄላኔ፤
ጎዓ ማዔ ካሮ ሄላንዳኣና ዋይዚንታኔ፤
ጾኦ ጫሪንጫይዳ ዓቢም ማኣሪ ማዠኔ።
- 5 ዑኡቱም ማርካፓ ዑኡታ ኬሰካሢጉዲ
ዓቢያኣ ጌኤሺ ማዒ ጾርቃኔ፤
ጳሺ ጳሺካ ዓሲ ሄሌሎ ጳሺካኒ ዋዛዳሢጉዲ ዋዛዳኔ።
- 6 ዓባ ጾርቃሢ ጫሪንጫኮ ዓይጾ ካራፓኔ፤
ሺሪ ዴንዲ ጌላሢ ባጎ ዛሎ ጋፖይዳኔ፤
ዬያኮ ሩኡጾ ጾይዳፓ ቶሊ ዓታኒ ዳንዳዓይ ባኣሴ።

ናንጊና ናንጋ ጎዳኮ ዋጎ

- 7 ናንጊና ናንጋ ጎዳ ዋጎኮ
ሃይማ ፓጩኔ ጌይሳ ባኣዚ ባኣያኔ፤
ሹምፔ ማሂ ጊንሣ ዓካሳኔ፤
ዓይሢፃ ዒዛኮ ጉሙርቁንታያኔ፤
ዔኤዮ ዓሶ ዔር ማሃኔ።
- 8 ናንጊና ናንጋ ጎዳኮ ዋጋ ፒዜኔ፤
ዓሲኮ ዒና ዋዛሳኔ፤
ዓይሢፃ ዒዛኮ ጌኤሺኔ፤
ዓሲኮ ዓኣፒማኣ ፖዒ ማዓኔ።
- 9 ናንጊና ናንጋ ጎዳ ዒጊጩሢ
ናንጊና ናንጋ ጌኤሹምኔ፤
ዒ ዋጋ ዋጊፃ ፔቴ ፔቴሢ ጎኔ፥ ሃሣ ዒሎኔ።
- 10 ዬይ ዒ ዋጋ ዋጋ ጌኤሺ ዋርቁፓ ባሼ ዋኣኔ ኬሳያኔ፤
ዔኤሲ ጾሎሊዳፓ ባሼ ዓኣፃያኔ።
- 11 ኬኤም ማዳሢ ዬይ ዋጋ ዞራኔ፤
ዬያ ካፒሢና ደኤፒ ባኣዚ ዒዚ ዴንቃኔ።

- 12 ፔ ደቢንቲ ዴንቃ ዓሲ ባአሴ፤
ናንጊና ናንጋ ጎዳሢዮ!
ታአኮ ዓአሺንቲ ደቢንቶፓ ታና ጌኤሹ።
- 13 ታአኒ ኔኤኮ ዓይላሢ ጫርቁ ማዳ ጎሞይዳፓ ታና ካፔ፤
ዬይ ጎማ ታና ቆሉዋጉዲ ኔኤኒ ታና ማአዴ።
ኔኤኒ ያዲዴያታቲ ታአኒ ደቢንቲ ባአያ ማዓንዳ፤
ዴኤፖ ደቢንቶይዳፓአ ታአኒ ጌኤሽካንዳ።
- 14 ታአኮ ላላሢንታ ታና ዓውሳ ናንጊና ናንጋ ጎዳሢዮ!
ታአኮ ጌኤዘንታ ዒኖ ማሊያንታ ኔኤም ኮሽካያ ማያንጎ።

20

- ዓይነቱ ሱኩጋሢ ዓይሢ ጎይጾና ዓይናዲንታ ዳውቲ ዓይነቱ ባሽሢ ዴንቃኒ ሺኢቁንቲ ሺኢጲሢ
- 1 ኔኤኒ ሜታዳአና ናንጊና ናንጋ ጎዳ ኔኤኮ ሺኢጲያ ዋይዘንጎ!
ያይቆኦይ ያኦዛሢ ኔና ካፖንጎ!
 - 2 ፔኤኮ ጌኤዠ ማአራፓ ማአዳ ኔኤም ዒ ዳኮንጎ፤
ጂዮኔ ዲካፓ ኔና ዒ ማአዳንጎ።
 - 3 ኔ ዒዛም ዒንጋ ባኮ ቢያ ኔኤኮ ዒ ዔኮንጎ፤
ኔ ሚቺ ዒንጋ ባኮናአ ዒዚ ዋዛዳንጎ።
 - 4 ኔ ዒና ዓፃዲ ማላ ባኮ ኔኤም ዒዚ ዒንጎንጎ፤
ማሊያ ኔኤኮ ቢያ ዒ ኩንሦንጎ።
 - 5 ኔኤኮ ባሺያና ኑኤኒ ዋዛዳ፤
ኑ ያኦዛሢ ሱንጾና ባንዲሮ ዴጊዲ ኑ ዓርቃ፤
ናንጊና ናንጋ ጎዳ ኔ ሺኢቃ ባኮ ቢያ ኔኤም ኩንሦንጎ።
 - 6 ናንጊና ናንጋ ጎዳ ዶኦሚ ካአታሢ ካአቲ
ዒዚ ማአዳንዳሢ ታአኒ ዔራ፤
ዒዘኮ ሚዛቆ ኩጮና ዒዛ ኔኤኒ ባሺሲ
ኔኤም ዶማዴ፣ ጫሪንጫፓ ሺኢጲያ ኔ ዒዘኮ ዋይዘንዳ።
 - 7 ፔቲ ፔቲ ያሎ ዓሳ ፔኤኮ ያሎ ሳርጌሎ ያይቶና
ዓቲ ዓሳ ሃሢ ፔኤኮ ፓራሢና ሄርሺንታ፤
ኑኤኒ ጋዓንቲ ናንጊና ናንጋ ጎዳ ማዔ
ኑ ያኦዛሢ ዋልቆ ጉሙርቃ።
 - 8 ዔያታ ዲቁንቲ ሎኦማንዳ፤
ኑኤኒ ጋዓንቲ ዔቃንዳ፤ ዶዲያአ ኑ ዓታንዳ።

9 ናንጊና ናንጋ ጎዳሂዮ!
 ካአታሂ ሲዛኮ ሞርኮ ኩጫፓ ዓውሴ፤
 ኩኩኒያኣ ኔና ዔኤላ ዋደና ኩኩም ዋይዜ።

21

ዓይነቱ ሱኩጋሂ ዓይህ ጎይጾና ዓይናዲንታ ዳውቴ ዓይነቱ

ባሼ ባሼሂሮ ጋላቲንቴ ጋላታ

1 ናንጊና ናንጋ ጎዳሂዮ!
 ዋልቁ ኔ ሲዛም ሲንገሂሮ ካአቲ ዋዛዴኔ፤
 ኔ ሲዛ ባሼሴሂሮ ሚርጌና ሲዚ ዋዛዴኔ።

2 ሲዛኮ ሲና ማሌ ባኮ ኔ ሲዛም ሲንገኔ፤
 ሲዚ ኔና ሺኢቁ ባኮዋ ኔ ሲዛ ላአገባኣሴ።

3 ሚርጌ ዓንጅ ኔ ሲዛም ሲንገ ሸኣቸንሂ ዔኮኔ፤
 ሲዛኮ ቶኦኮይዳ ጌኤሺ ዋርቁና ኮሺንቴ ቦንቾ ባኮ ኔ ዓገኔ።

4 ናንገ ሲዛም ኔኤኒ ሲንጋንዳጉዲ ሲዚ ኔና ሺኢቁ፤
 ኔኤኒ ሲዛም ያደሲ ለዔንታ
 ጋፑዋ ናንጊያኣ ሲንገኔ።

5 ኔ ሲዛ ባሼሴሂሮ ቦንቻ ሲዛኮ ዴኤፒ ማዔኔ፤
 ቦንቻንታ ዴኤፑሞንታ ኔኤኒ ሲዛም ሲንገኔ።

6 ናንጊና ጋፑዋ ዓንጅ ኔ ሲዛም ሲንገኔ፤
 ኔኤኒ ሲዛና ዋላ ማዔጾና ሲዛ ኔኤኒ ዋዛሳኔ።

7 ካአታሂ ናንጊና ናንጋ ጎዳ ጉሙርቃኔ፤
 ዴኤፖ ጾኦዛሂ ጋጋፑዋ ናሹሞና
 ሲዛ ናሽኬሂሮ ሲዚ ዓገዲንዲሞሴ።

8 ኔ ኩጫ ኔኤኮ ሞርኮ ቢያ
 ኔኤኮ ሚዛቆ ኩጫኣ ኔና ሲፃዞንሂ ቢያ ዓርቃንዳኔ።

9 ፔጋዲ ኔኤኒ ጾዳ ዋደና ናኣቦፓ ኬሰካ
 ታሚ ላኣፀሚጉዲ ኔ ዔያቶ ሚቻንዳኔ፤
 ናንጊና ናንጋ ጎዳኮ ዳጎ ሺኤላኣ ዔያቶ ጋውላንዳኔ፤
 ታማኣ ዔያቶ ሙዓንዳኔ።

10 ዜርጾ ኔኤኒ ዔያቶኮ ሳገይዳፓ ባይዛንዳኔ፤
 ማሌ ዴሮ ባኣካፓ ዴማሲ ኔ ዔያቶ ዋዲ ኩርሳንዳኔ።

11 ኔኤም ፑርታ ማዳኒ ዔያታ ማሌያታቴያ
 ጌኔ ማሊሂያኣ ማሊ ቱኬቴያ ዔያቶም ጌኢጋዓኮ።

12 ዔይታ ሙኬ ጎይጾና ማሂ ኔኤኒ ዔይቶ ጳሻንዳኔ፤
ኔኤኮ ሂኢዠናኣ ዔይቶ ኔ ዱካንዳኔ።

13 ናንገና ናንጋ ጎዳሂዮ!
ኔኤኒ ኔ ዶዶሞና ጃግ ጃገ ገዔ፤
ዎልቆ ኔኤኮ ኮኡኒ ሄርሻኔ፣ ዓይናዲያ ኮ ዓይናዳኔ።

22

ዓይነቱ ሱኡጋሂ ዓይህ ጎይጾና ካሪዎ ዎልቁ ዛላ ዓይናዲንታ
ዳውቴ ዓይነቱ

ዎይሂ ዒላተና ጋላታ ዓይነቱ

1 ታ ዎኣዛሂዮ! ታ ዎኣዛሂዮ! ኔ ታና ዓይጋ ሃሼይ?
ኔኤኒ ታና ዓውሲዎ ሃሺ ሃኬሂ ዓይጎርዳይ?

ታኣኮ ዚኢሊንቲዎ ዑኡዘይዳፓ ዓይጋ ኔ ሃኬይ?

2 ታ ዎኣዛሂዮ! ሮኦር ታ ኔ ባንሂ ዒላታኔ፤
ኔኤኒ ጋዓንቴ ታኣሞ ዎይዙዎሴ፤

ዎንቶዎ ታ ዔኤሊንታኔ፣ ሃውሺያ ታኣኮ ባኣሴ።

3 ኔኤኒ ጋዓንቴ ዒሰራዔኤሌ ዓሳ ኔና ጋላታዎ
ኔኤኮ ካኣቱሞ ዎይቶይዳ ዳዒ ዎይህ ዱማዴ ዎኦሲኬ።

4 ኮኡኮ ቤርታኣ ዓዶንሂ ኔና ጉሙርቄኔ፤
ዔይታ ኔና ጉሙርቄሞ ኔኤኒያ ዔይቶ ዓውሴኔ።

5 ኔ ማኣዳንዳጉዲ ዔይታ ኔ ባንሂ ዒላቴ ዎዶና
ኔኤኒ ዔይቶ ዓውሴኔ፤
ዔይታ ኔና ጉሙርቄሂሮ ኔ ዔይቶ ቦርሲሲባኣሴ።

6 ታኣኒ ጋዓንቴ ዓሲዳፓ ቢያ ላኣፓ፣ ዛኣሌ ማዔያኬ፤
ዓሳ ታና ሚኢጫኔ፣ ዓሲ ባኣካ ታኣኒ ቶኦቹንቴያኬ።

7 ታና ዛጋ ዓሳ ቢያ ቦሂ ሺራኔ፤
ዔይታ ቶኣኮ ፔኤሲ ዓገሂ ዓገሂ
ሂዚ ገዒ ታና ሚኢጫኔ፡-

8 «ናንገና ናንጋ ጎዳ ዒዛ ዓውሳንዳኔ ገዒ
ዒዚ ጎዳ ጉሙርቄኔ፤
ሂንዳ ዒዚ ዒዛ ናሽካያታቴ ዓውሶንጎ» ጋዓኔ።

9 ኮሺና ታ ሸይንታንዳጉዲ ማሄሂ ኔናኬ፤

22:1 ማቲ. 27:46፤ ማር. 15:34። 22:7 ማቲ. 27:39፤ ማር. 15:29፤ ሉቃ. 23:35። 22:8 ማቲ. 27:43።

- ናይ ማዒ፣ ታ ዒንደኮ ዳንዖ ታ ዳንቃንቴያ
 ታ ጉሙርቁሂ ኔናኬ።
- 10 ታ ዒንደ ጎጳፓ ኬሰካዖ ኔ ዑፃ ታ ሃሺንቴኔ፤
 ታ ዒንደ ታና ሸዔማፓ ዓርቃዖ ታኣኮ ኔ ያኦዛሂኬ።
- 11 ታና ማታ ሄላኒ ዑኬሂሮ፣ ሃሃ ታና ማኣዳያኣ ባኣሂሮ
 ሃዳራ ኔኤኒ ታ ኮራፓ ሃኪፖ!
- 12 ሚርጌ ሞርካ ዓዳ ዲዋ ጌማይጉዲ ታና ማንጌኔ፤
 ዋልቆና ዓኣ ባኣሳኔ ዓጮ ዚዮ ጌማቶጉዲ ማንጌ ታና ዔቄ።
- 13 ከሚ ዋዲ ሸኣሊ ሙዓንዳ ዘቢ ጉዳሂጉዲ
 ዳንጎ ፔኤኮ ዔያታ ታ ዑፃ ሻዔኔ።
- 14 ዋልቃ ታኣኮ ላቢ ዓዳ ዋኣሂ ማዔኔ፤
 ማጌፃኣ ታኣኮ ቢያ ጨጊጫፓ ኮልኮልቄ፤
 ጋሮይዳ ዒና ታኣኮ ሸፒጉዲ ዓልቄ።
- 15 ዋልቃ ታኣኮ ሃይቄ ቦኣቆ ማቁሂጉዲ ዶዴኔ፤
 ዒንዲርዘ ታኣኮ ፃኣዲ ሆንጎላሂዳ ዓዲንቴኔ፤
 ኔኤኒ ታና ሃይቄ ዓሲጉዲ ሲላሎይዳ ሃሸኔ።
- 16 ዋርቶ ማዳ ዓሳ ካኒ ቡኪ ማንጋሂጉዲ ታና ማንጌኔ፤
 ዘባ ታኣኮ ኩጮንታ ቶኮንታ ፔ ፀንጎና ፃጴኔ።
- 17 ማጌፃ ቢያ ታኣኮ ፓይዲንታያ ማዒ ፔጋዲ ጴዴኔ፤
 ታ ሞርካ ታና ጊዥ ጌዒ ቶኦቲሂና ዛጌኔ።
- 18 ዓፒሎ ዔያታ ታኣኮ ጊሸቲ ዔኬኔ፤
 ታኣኮ ዖዶዘ ዓፒሎይዳኣ ዲማሲ ዔሮ ባኮ ዓጌኔ።
- 19 ናንጊና ናንጋ ጎዳሂዮ! ታ ኮራፓ ሃኪፖ፤
 ታና ማኣዳሂዮ! ታና ማኣዳኒ ዑካዴ።
- 20 ሸምፓሂ ታኣኮ ጨንቾ ዓፓሮና
 ዬያቶ ካናቶ ዋልቆናፓ ዓውሴ።
- 21 ዘቦ ዳንጋፓ ታና ዓይሴ፤
 ጨርጋ ማኤኖ ጉራናፓ ታና ካፔ።
- 22 ኔ ሱንዖኮ ዴኤፑሞ ታ ዒጊኖሞ ታ ኬኤዛንዳኔ፤
 ዔያታ ቡኪንቴ ቤዛ ታ ኔና ጋላታንዳኔ።

22:18 ማቴ. 27:35፤ ማር. 15:24፤ ሉቃ. 23:34፤ ዮሀ. 19:24። 22:22 ዔ.ብ. 2:12።

- 23 ዲንሢ ናንጊና ናንጋ ጎዳ ዲጊጫ ዓሳ ጋላቱዋቱ!
 ዲንሢ ያይቆኦቤ ዜርፃ ቢያ ዲዛ ቦንቹዋቱ!
 ዲንሢ ዲሰራዔኤሌ ዜርፃ ቢያ ዲጊቹሞና ዲዛ ዴግ
 ዴጊዲዋቱ!
- 24 ዲዚ ሄርቂንቲ ዋርቃ ዓሶኮ ሜቶ ቶኦቹባኣሴ፤
 ዬያ ዔያቶኮ ዲ ዛጊ ሻኦከንቲባኣሴ፤
 ፔኤኮ ዓኣፖ ካሮዋ ዔያቶይዳፓ ዲ ሺርሺባኣሴ፤
 ጋዓንቴ ፔና ማኣዳንዳጉዲ ዲላታ ዲላቶ ዋይዜኔ።
- 25 ኔኤኒ ማዴ ኮዠ ማደር
 ሚርጌ ኔ ዴራ ቡኬ ቤዛ ታ ኔና ጋላታንዳኔ፤
 ኔና ዲጊጫ ዓሶ ቤርታ ታ ዔቂ
 ታኣኒ ናኣቤ ናኣቦ ኩንሣንዳኔ።
- 26 ማንቆ ዓሳ ሚሸካንዳያ ሄላንዳኣና ሙዓኔ፤
 ናንጊና ናንጋ ጎዳ ኮዓዞንሢያ ዲዛ ጋላታኔ፤
 ዲና ዔያቶኮ ዔያታ ናንጋ ዋዶ ቢያይዳ ዋዛዳኔ።
- 27 ዓጮኮ ጋፖ ሄላንዳኣና ዓኣ ዓሳ ቢያ ማሊ ጳቂሥሢና
 ናንጊና ናንጋ ጎዳ ባንሢ ማዓኔ፤
 ዓጮይዳ ዓኣ ዴራ ቢያ ዲዛም ዚጋንዳኔ።
- 28 ቢታንቶ ቢያ ኔኤርኬ፤
 ዴሬ ቢያ ኔኤም ዋርቃኔ።
- 29 ናንጊና ናንጋ ጎዳሢዮ! ሚርጌ ቆሎ ዓኣ ዓሳ ቢያ ኔኤም
 ዚጋንዳኔ፤
 ሃይቂ ዲኡታኒ ዑኪ ዓኣሢያ ቢያ ሙኪ ኔ ቤርታ
 ጉምዓታንዳኔ።
- 30 ሙካንዳ ሸይንታ ዲዛም ማዳንዳኔ፤
 ሴካ ቤርታኣ ሸይንቶማኣ ጾኦሲ ባኣዚ ኬኤዚንታንዳኔ።
- 31 ሃጊ ሸይንቲባኣ ዴሬም
 ዔያታ ዲዛኮ ዲሉም ማደ
 «ናንጊና ናንጋ ጎዳ ዴር ፔኤሲ ዓውሴኔ» ጌዒ ጌዒ
 ኬኤዛንዳኔ።

23

ዳውቲ ዓይነቱ
ናንጊና ናንጋ ጎዳ ኮሺ ሄንቃያ ማዒያ

- 1 ናንጊና ናንጋ ጎዳ ታና ሄንቃሢኬ፤
ፔቴታያ ታኣም ፓጫ ባኣዚ ባኣሴ።
- 2 ዒዚ ታና ዋሻሌ ቤሰካ ቃኣቲሳኔ፤
ኮሺ ማዔ ዋታ ዋርዚ ባንሢ ዔኪ ዓኣዳኔ።
- 3 ናንጎ ዒ ታኣኮ ዓኪ ማሃኔ፤
ፔ ሱንጾሮ ጌዒ ዲሎ ጎይሢ ታና ዔኪ ዓኣዳኔ።
- 4 ሻኔ ዲሚ ማዔ ዶኦቲናታያ ታ ዓኣዳታቴያ
ኔኤኒ ታኣና ዋላ ማዔሢሮ ዓይጎ ፑርታ ባኣዚ ታ ዒጊጫዓኬ።
ኔኤኮ ኮኣላ ታና ዶዲሻኔ።
- 5 ታ ሞርካ ዛጋንቴ ሙኡዚ ኔ ታኣም ጊኢጊሻኔ፤
ቶኣኮዋ ኔ ታኣኮ ዛይቶ ቲዦና ቲሽካኔ፤
ታኣኮ ዑዦ ዓንጎ፣ ዑዦ ኩሚ ለኣሊንታኔ።
- 6 ታ ናንጎ ዋዶ ቢያይዳ ኮሹሞና ናሹሞና ዓኣያ ማዓንዳኔ፤
ናንጊና ናንጋ ጎዳ ማኣራ ቢያ ዋዶ ታ ናንጋንዳኔ።

24

ደውቴ ዓይነቱ

ዴኤፖ ካኣታሢ

- 1 ጎጆንታ ዒኣካ ዓኣ ባካ ቢያ
ዓጮንታ ጋሮይዳ ዓኣ ባካ ቢያ
ናንጊና ናንጋ ጎዳሮኬ።
- 2 ዒዚ ጎጆ ባዘ ዑፃ ማገቴኔ፤
ዬያ ዋኣፃ ዑፃይዳ ዶዲሺ ዲይሢሢያ ዒዛኬ።
- 3 ሌካ ናንጊና ናንጋ ጎዳኮ ዲኮ ጆኦኒ ኬሰካንዳይ?
ዒዛኮ ዲማዴ ቤዘይዳ ጆ ዔቃንዳይ?
- 4 ዬያ ማዳኒ ዳንዳዓሢ
ጌኤሺ ኩቲና ፒዜ ዒኔና ዓኣያ
ሜሌ ጆኦዞ ካኣሽኩዎያ
ሉኡዙሞና ጫኣቁዋዞንሢኬ።
- 5 ዬይ ዓሳ
ናንጊና ናንጋ ጎዳይዳፓ ዓንጆ
ዲቁሻያ ማዔ ፔ ጆኣዛሢዳፓ ማኣዶዋ ዳንቃንዳኔ።
- 6 ናንጊና ናንጋ ጎዳ ባንሢ ዑካንዳዞንሢና

ያይቆኑ ያከዛህ ኮባንዳዘንህ
ዬንህጉዳዎ ዓሰንህኩ።

7 ዓንህ ደኤግ ዓሳ ጌሎ ካሮ ቡሉዋቲ፤
ናንገና ናንጋ ጌሎ ካራ ቡሉንቶንጎ፤
ቦንቸንቲ ካኣታህያ ጌሎንጎ።

8 ዬይ ቦንቸንታ ካኣቲ ያናዳይ?
ናንገና ናንጋ ጎዳኬ፤
ዒዚ ደዳህና ያሎናኣ ዔርቴህኩ።

9 ዓንህ ደኤግ ዓሳ ጌሎ ካሮ ቡሉዋቲ፤
ናንገና ናንጋ ጌሎ ካራኣ ቡሉንቶንጎ፤
ቦንቸንታ ካኣታህያ ጌሎንጎ።

10 ዬይ ቦንቸንታ ካኣታህ ያናዳይ?
ዬይ ቦንቸንታ ካኣቲ
ቢያ ባኮ ዋይህ ጎዳህኩ።

25

ዳውቴ ዓይነቱ

ሜቶ ዋዳና ሸኢቁንቲ ሸኢጲህ

1 ናንገና ናንጋ ጎዳህዮ!
ታኣኮ ዒሎ ማሊያ ታ ኔኤም ሸኢሻኔ።

2 ታ ያኣዛህዮ! ታኣኒ ኔና ጉሙርቃኔ፤
ታ ሞርካ ታና ባሻንዳጉዲ ማህ ታና ቦርሲሲግ።

3 ኔና ጉሙርቃዘንህ ቦርሲንቱዋሴ፤
ቦርሲንታዘንህ
ኔኤም ዋይዘ ዒፆር ሩኡራዘንህኩ።

4 ናንገና ናንጋ ጎዳህዮ! ኔ ኮጲዘ ታና ዔርዜ፤
ኔ ጎይፆዋ ኔኤኒ ታና ዳዌ።

5 ኔኤኒ ታና ዓውሳ ያኣዛህኩ፤
ኔኤኮ ጎኑም ገንፆ ሃንቲ ናንጋንዳጉዲ ታና ዔርዜ፤
ታኣኒ ቢያ ዋዳ ጉሙርቃህ ኔናኩ።

6 ናንገና ናንጋ ጎዳህዮ!
ሚናፓ ዓርቃፆ ኔ ዳዋ
ሚጨንቲያንታ ናንገና ናንጋ ናሹሞዋ ማሌ።

7 ታኣኒ ጳጌ ዓኣዖ ማዳ ጎሞ
 ዳቢንቶቦ ታኣኮ ማሊፖ፤
 ናንጊና ናንጋ ጎዳሢዮ! ኔኤኮ ኮሹማ
 ሚርጌ ጎይዖ፥ ኔ ሚጨንቲዖፕ-ዲያኦ ታኣሞ ማሌ።

8 ዖኦሲ ኮሺ፥ ሃሃ ፒዜ ማዔሢሮ
 ጎሞ ዓሳ ዓኣዳኒ ኮይሳ ጎይዖ
 ዒዚ ዔዔርዛኔ።

9 ሹሌዔ ማዔዘንሢ ፒዜ ጎይሢ ዒ ዔኪ ዓኣዳኔ፤
 ጎይዖቦ ዔያቶ ዒ ዔርዛኔ።

10 ዒዛኮ ጫኣቁሞና ዳሞቦና ካፓዘንሢ
 ጎይዖ ቢያ ናሹሞና ጉሙርቂንቲሢኤ።

11 ናንጊና ናንጋ ጎዳሢዮ! ጎማ ታኣኮ ጳኤፒታሢሮ
 ኔኤኮ ሱንዖ ቦንቸሮ ጌዒጋፓ ዓቶንጎ ታኣሞ ጌዔ።

12 ናንጊና ናንጋ ጎዳ ጒጫሢ ዖናዳይ?
 ዔያታ ሃንታኒ ኮይሳ ጎይዖ ዶኦራንዳጉዲ ዒዚ ዔያቶ ዔርዛኔ።

13 ዩይ ዓሳ ዎዶ ቢያ ዖርጎቹሞና ናንጋንዳኔ፤
 ዔያቶኮ ናኣታኦ ሳዖ ዔካንዳኔ።

14 ናንጊና ናንጋ ጎዳ ዒዛሞ ዓይሢንታዘንሢኮ ቢያ ላጌኬ፤
 ዔያቶሞ ዒዚ ጫኣቁ ጫኣቁሞ ዶዲሻኔ።

15 ዒዚ ታና ፒራሢዳፓ ቢያ ዓውሴሢሮ
 ቢያ ዎዶ ታ ዒዛ ባንሢ ዛጋኔ።

16 ታኣኒ ታኣሮ ሌሊ ማዒ ሜታዳያ ማዔሢሮ
 ታ ዖኣዛሢዮ! ኔ ሃንጋ ታ ባንሢ ማዔ፤
 ታኣሞ ኮሺ ባኣዚያ ማዳ።

17 ታኣኮ ዒኖ ሜታሢ ሚርጌኬ፤
 ዎኣዪዖፓኣ ታና ሃውሺሴ።

18 ታኣኮ ዎኣዪዖንታ ሜታሢንታ ኔ ዛጌ፤
 ጎሞቦ ቢያ ኔ ታኣሞ ዓቶሞ ጌዔ።

19 ሞርካ ታኣኮ ዎማጉዲ ሚርጌቴያ
 ዔያታ ታና ዎማይዲ ዒዖቴያ
 ኔኤኒ ሂንዳ ዛጌ።

20 ሹሞፓሢ ታኣኮ ካፒ፥ ታና ዓውሴ፤
 ኔና ታኣኒ ታኣኮ ፑኖ ካያሢ ማሄሢሮ
 ታና ቦርሲሲፖ።

21 ታኣኒ ኔና ሃጊ ማዓ ዋዛ ማሂ ጌሠሂሮ
ጊሉሞንታ ፒዙሞንታ ታና ካፓንዳጉዲ ማሂ።

22 ጾኦዛሂዮ! ዒሰራዔኤሌ ዓሶ
ሜቶ ቢያይዳፓ ዓውሴ!

26

ደውቲ ዓይነቱ

ጌኤሺ ዓሰ ሸኢዲሂ

1 ናንጊና ናንጋ ጎዳሂዮ! ፒዙሞና ሴካ ሃንጋ ዓጊፀዋዎ
ኔና ጉሙርቁ ታ ናንጌሂሮ ታኣሞ ዋጌ።

2 ናንጊና ናንጋ ጎዳሂዮ! ታ ዒና ዋማዲታቲያ ዓጊሂ ማጌ፤
ታኣኒ ሱኡካዳ ሱኡኮንታ ታኣኮ ማሊያዋ ማጊ ዔሬ።

3 ኔኤኮ ጋፑዋ ናሹማ ታ ዓኣፓፓ ባይቁዋሴ፤
ቢያ ዋዴ ታና ዔኪ ዓኣዳሂ ኔኤኮ ጉሙርቁንቲያኬ።

4 ጌሻ ዓሶና ዋላ ታኣኒ ላጋቲባኣሴ፤
ፔና ጌኤሺ ማሃ ዓሶና ዋላ ታ ሶኦሪባኣሴ።

5 ፑርቶ ማዳ ዓሶኮ ቡኪንቶ ታኣኒ ዒፃኔ፤
ዬያ ዓሶና ዋላ ታ ዴዓኒያ ናሽኩዋሴ።

6 ናንጊና ናንጋ ጎዳሂዮ!
ታኣኒ ጌኤሺ ማዔሂ ዔርዛኒ
ኩጮ ታኣኮ ታኣኒ ማሰታኔ፤

ዒንጎ ባኮ ኔኤሞ ሸኢሾ ቤዘኮ
ዓጮ ታ ሸሪ ሸሪ ኔና ካኣሽካኔ።

7 ጋላታ ዓይነቱ ዓይናዲ ዓይናዲ
ኔ ዋልቆና ማዲንታ ዓኮ ባኮ ቢያ ታ ኬኤዛኔ።

8 ናንጊና ናንጋ ጎዳሂዮ!
ኔኤኒ ናንጋ ማኣሮና
ቦንቻኣ ኔኤኮ ጴዳ ቤዘ ታ ናሽካኔ።

9 ሸምፓሂ ታኣኮ ሱጉያ ላኣላ ዓሶሲና ዋላ ዔኪፖ፤
ናንጎዋ ታኣኮ ዓሶ ዋዳ ዓሶና ዋላ ባይዚፖ።

10 ዬያቶኮ ኩጮ ጌኔ ማዳ ማዳኒ ዔቁያ
ሚዛቆ ኩጮኣ ዔያቶኮ ዴሜና ዒንጎ ሚኢሽ ቡኩሳያኬ።

11 ታኣኒ ታ ዛሎና ፓጩ ባኣዚባኣ ፒዜ ናንጊ ናንጋኔ፤
ታና ሚጨጎቲ፥ ዓውሲያ ዓውሴ!

12 ቶካ ታኣኮ ባኣሲንቲ ገእጊ ቤሲዳ ዔቄኔ፤
ሚርጌ ቡኬ ኔ ዓሶ ባኣካ ናንጊና ናንጋ ጎዳ ታ ጋላታኔ።

27

ዳውቲ ዓይነቱ

ጋላታ ሺኢጲሢ

1 ናንጊና ናንጋ ጎዳ ታኣኮ
ፖዓሢና ጳኤሻሢናታሢሮ ያናኣ ታ ዒጊጩዋሴ፤
ናንጊና ናንጋ ጎዳ ታ ናንጎኮ
ሺባሢታሢሮ ያኣኒያ ታና ዒጊቹዋሴ።

2 ፑርቶ ማዳ ዓሳ ባሺ ታና ዋዳኒ ማላኔ፤
ጋዓንቲ ፔኤሮ ዔያታ ዲቁንቲ ሎኦማኔ።

3 ሚርጌ ያለ ዓሳ ታና ማንጌታቲያ ታኣኒ ዒጊጩዋሴ፤
ታኣኮ ሞርካ ታና ያሌታቲያ
ታኣኒ ያኦሲ ጉሙርቂያ ሃሻዓኬ።

4 ናንጊና ናንጋ ጎዳ ታኣኒ ፔቲ ባኣዚ ሺኢቃኔ፤
ዬና ታ ሺኢቃዛ
ታ ናንጎ ዎዶ ቢያይዳ ያኦሲ ማኣራ ናንጋኒ
ናንጊና ናንጋ ጎዳኮ ዲቃሢ ሄርሺሳያ ማዒያዋ ዛጋኒ
ዒዛኮ ጌኤዦ ማኣሮይዳኣ ሺኢቃኒ ዳንዳዓንዳጉዲኬ።

5 ሜታሢ ኬሎና ዒዚ ታና ፔ ሺቦ ዳማ ዓኣቻኔ፤
ዬያ ዒዛ ማኣሮኮ ጋሮይዳ ታና ዒ ጌልዚ ጌሣኔ፤
ላሌ ሹቹዳኣ ጳጊዲ ታና ዔቁሳኔ።

6 ሃሢ ታ ኮሮይዳ ዓኣ ታ ሞርኮ ዑፃ
ታኣኒ ታና ጳግ ጳጊዴኔ፤
ዎዛና ታ ዒላሺ ዒላሺ
ዒዛኮ ጌኤዦ ማኣሮይዳ ዒንጎ ዒንጊሢ ታ ሺኢሻንዳኔ፤
ዓይናዲ ዓይናዲ ናንጊና ናንጋ ጎዳ ጋላታንዳኔ።

7 ናንጊና ናንጋ ጎዳሢዮ!
ዑኡዘ ታኣኒ ጳጊዲ ዒላታኣና ኔኤኒ ዋይዜ!
ማኣሪያ ታና ማኣራ፤ ሺኢጲያዎ ታኣኮ ዋይዜ!

- 8 ዒና ታና «ዒዛኮ ዓላፖ ካሮ ኮዔ» ጌዔኔ፤
ናንገና ናንጋ ጎዳሂዮ! ታኣኒ ኔኤኮ ዓላፖ ካሮ ኮዔ።
- 9 ኔኤኮ ዓላፖ ካሮ ታጊዳፓ ማሂፖ፤
ዳጋዲ ኔ ዓይላሂ፥ ታና ኔኤፓ ሃኪሲፖ፤
ዎይቲቲያ ኔኤኒ ታኣኮ ማኣዳሂኬ፤
ታና ዓውሳ ታ ጾዛዛሂዮ!
ታና ኬኤሪፖ፥ ሃሺያ ሃሺፖ።
- 10 ታ ዓዶና ታ ዒንዶና ታና ሃሺቲያ
ናንገና ናንጋ ጎዳ ታ ቶኣኮ ዛጋንዳ።
- 11 ናንገና ናንጋ ጎዳሂዮ! ጎይጾ ኔኤሲ ታና ዔርዜ፤
ታኣኮ ሚርጌ ሞርኬ ዓኣሂር ኮሺ ጎይሂና ታና ዔኪ ዓኣዴ።
- 12 ሉኡዙሞና ማርካዳ ዓሳ ፑርቱሞ ጌሰቲ ጌሰቲ ታ ዑፃ ዔቄሂር
ታ ሞርካ ኮዓ ጎይጾ ዓኣሂ ታና ኔ ዔያቶሞ ዒንገፖ።
- 13 ሺሞፓሂና ዓኣ ዓሳ ናንጋ ሰዔሎይዳ ታ ዓኣ ዎዶና
ናንገና ናንጋ ጎዳኮ ኮሹሞ ታ ዛጋንዳሂ ጉሙርቃ።
- 14 ናንገና ናንጋ ጎዳ ጉሙርቄ፤
ደዴ፥ ዎዛ ቲቂፖ፤
ናንገና ናንጋ ጎዳ ጉሙርቄ።

28

ዳውቲ ዓይነቱ

- ማኣዶ ዴንቃኒ ሺኢቁንቲ ሺኢጰሂ
1 ናንገና ናንጋ ጎዳሂዮ! ኔ ባንሂ ታ ዒላታኔ፤
ታኣኮ ላላሂዮ፥ ዎይዜጾ ታኣሞ ዎይዚባኣያ ማዒፖ፤
ኔኤኒ ታኣሞ ዚቲዮ ጌዔያታቲ
ዔቲይዳ ዱኡኪንቲ ዓሲ ታኣኒ ማዓንዳ።
- 2 ማኣዶና ኔ ባንሂ ታ ዒላታ ዎዶና
ኔኤኮ ዱማዴ ጌኤዥ ማኣር ባንሂ
ኩጮ ታኣኮ ታ ዔቁሳኣና
ሺኢጰይ ታኣኮ ዎይዜ።
- 3 ዔያቶኮ ዒኖ ጋራ ጌኔ ባኣዚ ዓኣታንቲ
ፔ ላጎና ዎላ ኮሺ ጌሰታ ፑርቶ ማዳ ዓሰና
ዎይዘ ዒፃ ዓሰና ዎላ ጎቺ ታና ዔኪ ዓኣዲፖ።
- 4 ዔያቶኮ ማዶ ጉዴያ

ዓይነቱ ማግኒት ፑርቱም ጉዳይ
 ዓይነቱ ማግኒት ጠገን፤
 ዓይነቱ ማግኒት ጉዳይ ዓይነቱ ማግኒት ማህ ዓይነት።
 5 ናንገና ናንገ ጎዳ ዓይነቱ ዓይነት ጎዳ ጠገን፤
 ዓይነት ማግኒት ማግኒት ማግኒት ማግኒት
 ዓይነት ዓይነት ማግኒት፤
 ገንዘብ ማግኒት ዓይነት ጠገን።

6 ታኦት ሸኢኢያ ዓይነት ማግኒት
 ናንገና ናንገ ጎዳ ዓይነት ማግኒት።

7 ናንገና ናንገ ጎዳ ታኦት ማግኒት ጠገን፤
 ዓይነት ታኦት ዓይነት ጠገን፤
 ዓይነት ታኦት ማግኒት፤
 ዓይነት ታኦት ጠገን፤ ዓይነት ጠገን፤ ዓይነት ጠገን፤

8 ናንገና ናንገ ጎዳ ጠገን ማግኒት፤
 ዓይነት ማግኒት ማግኒት ማግኒት ማግኒት ማግኒት።

9 ጠገን ጠገን፤
 ጠገን ማግኒት ማግኒት፤ ዓይነት ማግኒት ማግኒት፤
 ናንገና ዓይነት ማግኒት ማግኒት።

29

ዓይነቱ ማግኒት

ናንገና ናንገ ጎዳ ዓይነት ማግኒት

1 ዓይነት ማግኒት ማግኒት፤ ናንገና ናንገ ጎዳ ማግኒት፤
 ማግኒት ማግኒት ዓይነት ማግኒት።

2 ዓይነት ማግኒት ማግኒት፤
 ዓይነት ማግኒት ማግኒት፤

3 ናንገና ናንገ ጎዳ ዓይነት ማግኒት፤
 ማግኒት ማግኒት ማግኒት፤
 ናንገና ናንገ ጎዳ ዓይነት ማግኒት፤

4 ናንገና ናንገ ጎዳ ዓይነት ማግኒት፤
 ዓይነት ማግኒት ማግኒት፤

5 ናንገና ናንገ ጎዳ ዓይነት ማግኒት፤

- 0-ኡዛ ዒዛኮ ለባኖኦሴ ሚጾዋ ሾኦላኔ።
- 6 ለባኖኦሴ ዲኮ ማርሶ ዳንቄ ናኦጋጉዲ
ሲሪዮኔ ዲኮዋ ጾሶ ናይጉዲ
ዋዛሲ ዪኪሳኔ።
- 7 ናንጊና ናንጋ ጎዳኮ 0-ኡዛ
ታሚ ሎሰቶጉዲ ፖዓኔ።
- 8 ናንጊና ናንጋ ጎዳኮ 0-ኡዛ ዓሲ ናንጉዋ ዳውሎ ዓጊሣኔ፤
ቃዴሴኮዋ ዓሳ ናንጉዋ ሳጾ ጎቃይሳኔ።
- 9 ናንጊና ናንጋ ጎዳኮ 0-ኡዛ ዶቆዞ ሸይዣኔ፤
ሚጾኮዋ ዋላዣ ዲኢኒሻኔ፤
ዒዛኮ ዲማዴ ቤዘይዳ ዓኣዞንሢ 0-ኡዛ ዒዛሲ ዋይዛዎ፡-
«ቦንቾ ጾኦሲም ማጾንጎ!» ጋዓኔ።
- 10 ናንጊና ናንጋ ጎዳ ዴኤፖ ዋኣጾ ዋይሣሢኔ፤
ዒዚ ናንጊና ካኣታዲ ዬያ 0-ፃ ዴዓኔ።
- 11 ናንጊና ናንጋ ጎዳ ፔ ዴሮም ዋልቄ ዒንጋኔ፤
ዒዚ ዴሮ ፔኤሲ ኮሹሞና ዓንጃኔ።

30

ጌኤዣ ማኣሮ ዓንጃ ማዶም ጊኢጊሾ ከሎ ዓይናዲንቴ ዳውቴ
ዓይኑዋ

- ጋላታ ሸኢጲሢ
- 1 ናንጊና ናንጋ ጎዳሢዮ! ሂርኬ ቤዛፓ ኔ ታና ዔቁሴሢረ
ታ ሞርካ ታኣኮ ማቶና ዋዛዳንዳጉዲ ኔ ማሂባኣሢረ
ታ ኔና ዴግ ዴጊዳኔ።
- 2 ናንጊና ናንጋ ጎዳ ማዔ ጾኣዛሢዮ!
ኔ ታና ማኣዳንዳጉዲ ታ ኔና ዔኤሌም
ኔኤኒያ ታና ፓሣኔ።
- 3 ናንጊና ናንጋ ጎዳሢዮ! ሸምፓሢ ታኣኮ ሄሊንቴዋያ ማዔ
ዲሞ ዔታፓ ኔኤኒ ከሴኔ፤
ሊካ ዴኡፖ ዔቶ ከዲጾይዳፓ ኔ ታና ካፔኔ።
- 4 ዒንሢ ዒዛም ጉሙርቁንታያ ማዔ ማዳዛንሢ ቢያ
ናንጊና ናንጋ ጎዳ ዓይኑሞና ጋላቱዋቴ!
ዒዛኮ ዲማዴ ሱንጾማኣ ጋላታ ሸኢሹዋቴ።
- 5 ዒዚ ዳጋዳሢ ቃሚሢ ዋይምኬ፤

ኮሹማ ዒዛኮ ጋዓንቴ ናንጊና ናንጋያኬ፤
ዋንቶ ዩኤኬ ጎይሣ ዋርቁንቴቴያ
ጉቶ ዋዋዛዲንታኔ።

6 ታና ጉሙርሳ ዓሢ ታኣኒ ዔራሢሮ
«ፔቴታዎ ታ ባሺንታዓኬ» ጌዔኔ።

7 ናንጊና ናንጋ ጎዳሢዮ! ኔ ዴኤፑሞና ዲካ ታኣሲ ደዴኔ፤
ኔኤኮ ዓኣጎ ካሮ ታ ጊዳፓ ኔ ማሄ ዋደና ዒና ታኣኮ ዲቃቴኔ፤

8 ናንጊና ናንጋ ጎዳሢዮ! ኔና ታ ዔኤላኔ፤
ኔ ባንሢ ሂዚ ጌዔያ ታ ሺኢቄኔ፡-

9 ታኣኮ ዱኡከንቴዎና ሃይቦና ዓይጎ ኔና ማኣዳንዳይ?
ዓጪ ኔና ጋላታ?

ኔኤኒ ጉሙርቁንታያ ማዔሢ ዓጫ ኬኤዛንዳ?
10 ናንጊና ናንጋ ጎዳሢዮ! ታኣሞ ዋይዜ፥ ታና ሚጨንቴ፤
ናንጊና ናንጋ ጎዳሢዮ! ታና ማኣዳሢ ኔና ማዔ።

11 ዎዲያ ኔኤኒ ታኣኮ ዋዛና ላኣሜኔ፤
ሲዮ ፓቴሎ ኔኤኒ ታኣኮ ጉሲ
ፓልሞ ኔ ታና ማይሴኔ።

12 ዬያሮ ታኣኒ ዚቲ ጋዓዓኬ፤
ጋላታ ዓይኑሞ ኔኤሞ ታ ዓይናዳንዳኔ፤
ናንጊና ናንጋ ጎዳሢዮ! ኔኤኒ ታ ያኦዛሢኬ፤
ዬያሮ ናንጊና ታኣኒ ኔና ጋላታንዳኔ።

31

ዓይነቱ ሱኡጋሢ ዓይሣ ጎይዎና ዓይናዲንታ ዳውቴ ዓይነቱ
ሜቶ ዋደና ያኦሲ ጉሙርቁ ሺኢቁንታ ሺኢጰሢ

1 ናንጊና ናንጋ ጎዳሢዮ!
ኔኤኒ ታኣኮ ፑሮ ካያሢ ማዓንዳጉዲ
ታ ኔ ባንሢ ሙኬኔ፤

ዬያሮ ታና ቦርሲሲፖ፤
ኔኤኮ ዪሉሞና ታና ዓውሴ።

2 ዋዮ ኔኤኮ ታ ባንሢ ማሢ ታኣሞ ዋይዜ፤
ዑካዲ ሙኪ ታና ዓውሴ፤
ታኣኮ ጌኤቁንቴ ዔቆ ላላሢ ማዔ፤
ታና ዓውሳኒ ታኣኮ ደዶ ዋርዲዮ ቤዛሢያ ማዔ።

- 3 ኔኤኒ ታኣኮ ዓኣሺንቶ ዋርዲዮ ቤዛሢኬ፤
ኔኤኮ ሱንፆሮ ገዲጋፓ ታና ዔኪ ዓኣዳ፤
ታኣኒ ዓኣዳንዳ ጎይፆዋ ኔ ታና ቤኤዜ።
- 4 ኔኤኒ ታኣኮ ፑኖ ካያሢ ማዔሢሮ
ታ ሞርካ ታኣሞ ዓኣቺ ፒሬ ፒራሢዳፓ ታና ኔ ቶሊሴ።
- 5 ጎኑሞ ፆኦሲ ማዔ ናንገና ናንጋ ጎዳሢዮ!
ታኣኮ ሺሞፓሢ ታ ኔኤሞ ሃሺኔ፤
ታና ኔኤኒ ዓውሴ።
- 6 ዔኤቢ ፓሡዋያ ማዔ ማሌ ፆኦዞሞ
ዚጋዞንሢ ቢያ ኔኤኒ ዒዒፆኔ፤
ታኣኒ ጋዓንቴ ኔና ጉሙርቃ።
- 7 ኔኤኮ ናንገና ናንጋ ናሹማ ታና ዋዋዛሳኔ፤
ሚርጌናኣ ታ ዋዛዳኔ፤
ሚታሢ ኔ ታኣኮ ዛጌኔ፣ ዋኣዪፆዋ ታኣኮ ኔ ዔራ።
- 8 ሞርኮሞ ዓኣሢ ኔ ታና ዒንገባኣሴ፤
ጋዓንቴ ኔኤኒ ታኣሞ ዳልገ ጎይሢ ጲሺኔ።
- 9 ናንገና ናንጋ ጎዳሢዮ! ታኣኒ ሜቶይዳታሢሮ
ታና ሚጨንቴ፤
ዓኣፓ ታኣኮ ፆዪፆና ላቤኔ፤
ሺሞፓሢንታ ዑፆንታ ታኣኮ ደጩኔ።
- 10 ታኣኮ ናንጋ ሜቶና፣ ለዓኣ ታኣኮ ዚኢሊንቴሢና ጋፔኔ፤
ሜታ ታኣኮ ሚርጌሢሮ ዋልቁ ታኣኮ ባይቄኔ፤
ሜጌፆኣ ታኣኮ ላቤኔ።
- 11 ታኣኒ ታኣኮ ሞርኮሞ ሚኢቺ
ታኣኮ ዓሺኖማኣ ዲቃሢያ
ታና ዔራ ዓሶሞ ታኣኒ ዒገቻያ
ጎይፆ ታና ዔያታ ዳንቃፆ ታ ጋይቴ ዓዓኣሺንታ።
- 12 ዓዳ ሃይቁ ዓሲጉዲ ታኣኒ ዋሊንቴኔ፤
ሃይቁሞ ኬኤሮና ቦኦቆና ፆቲናጉዲ ታ ማዔኔ።
- 13 ሚርጌ ዓሲ ካሸካሻንቴ ታኣኒ ዋይዜኔ፤
ጉቤ ባንፆና ዒገቻያ ማዔኔ፤
ታና ባይዛኒ ዔያታ ዋሊና ገሰታኔ፤
ዋዳኒያ ዋላ ዔያታ ዘርታኔ።

- 14 ናንጊና ናንጋ ጎዳሂዮ! ኔኤኒ ታኣኮ ጾኦዛሂኬ፤
ታኣኒ ኔና ጉሙርቃኔ።
- 15 ታኣኒ ቢያ ዎዴ ኔ ኩጫኬ፤
ታኣኮ ሞርኮና ዒዲ ታና ዳውሳዘንሂናፓ ቢያ ታና ዓውሴ።
- 16 ኔኤኮ ዓይላሂ፥ ታና ጌኤሺ ዓኣፒ ካራና ዛጌ፤
ኔኤኮ ጋፑዎ ናሹሞና ታና ዓውሴ።
- 17 ናንጊና ናንጋ ጎዳሂዮ!
ታኣኒ ኔና ዔኤላ ዎድና ኔ ታና ቦርሲሲፖ፤
ፑርቶ ማዳ ዓሳ ጋዓንቴ ቦርሲንቶንጎ፤
ዔያታ ዓጊጹዎያ ማዒ ሊካ ዲሞ ዔታ ሎኦሞንጎ።
- 18 ዲላሂዳ ዔያታ ሆኦሊንቴሂና ጾቶርሙሞና ጌስታሂር
ዔያቶኮ ሎኦቃ ዳንጎ ዚቲዴ።

- 19 ኔ ዴማ ዓታኒ ኔ ባንሂ ዑካዘንሂሞ
ዓሶ ቢያ ቤርታ ኔ ዒንጋ
ኔና ዒጊጫዘንሂሞ ኔ ጊኢጊሺ ኮሹማ
ዎዚ ዴኤፓይ!
- 20 ዓሳ ዔያቶ ባይዛኒ ዘርታሂዳፓ ኔ ማኣር ዴማ ኔ ዔያቶ ዓኣቹኔ፤
ማርማሂዳፓ ዔያቶ ዓውሳኒ ኔ ኬኤጾ ጋር ኔ ዔያቶ ጌልዜኔ።
- 21 ማንጊንቴ ካታሜሎ ጋራ ታኣኒ ዓኣንቴ
ዲቃሂ ሂርሺሳ ናሹሞ ኔኤኒ ታና ዳዌኔ፤
ናንጊና ናንጋ ጎዳ ዓንጂንቶንጎ!
- 22 ታኣኒ ሚርጌና ዲቃቴሂር
ኔ ዓኣፓፓ ኔ ታና ጋፒ ሂዔያ ታኣሞ ማሌኔ፤
ጋዓንቴ ታ ኔ ባንሂ ማኣዳሂ ኮዒ ዒላታዛ
ዒላቶ ኔ ታኣሲ ዎይዜኔ።

- 23 ዒንሂ ዒዛሞ ዲማዴ ዓሳ ቢያ
ናንጊና ናንጋ ጎዳ ናሽኩሞቲ፤
ዒዚ ጉሙርቁንታዘንሂ ካፓኔ፤
ጾቶርቃዘንሂሞ ጋዓንቴ ሜቶ ዒ ዓጋኔ።
- 24 ዒንሂ ናንጊና ናንጋ ጎዳ ሃጋኣ ዎዛ ማሂ ጌሃ ዓሳ ቢያ
ዒጊጨፖቲ፤ ዒናኣ ዒንሂኮ ደዶንጎ።

32

ዳውቴ ኬኤዚ ዔርዘ ባኮ

ጎሜ ቡኡዲ ማእሪጎቲሂ

1 ጎሞ ዓቶሞ ጌይንቴዘንሂና

ዳቢንቶዋ ካንቆና ዓሳ

ዓንጂንቴያኬ።

2 ናንጊና ናንጋ ጎዳ ጎሞ ዒዛኮ ዓርቁባአሂ

ሉኡዙሞ ሉኡቁዋ ዓሲያ ዓንጂንቴያኬ።

3 ጎሞ ታአኮ ታአኒ ቡኡፀ-ዋዖ ሃሺ ዎዶና

ሮኦ ጉቤ ታአኒ ዚኢሊንታሂሮ ዑፃ ታአኮ ላቤ።።

4 ሮኦሮና ዋንቶና ኔ ታና ኮሺ ማታሴ፤

ሎጪ ባአዚኮ ሎጪጭማ ያጎሂና ማላሂጉዲ

ዎልቃ ታአኮ ጋፒ ባይቄ።።

5 ጎሞ ታአኮ ታአኒ ኔኤሞ ቡኡዳ፤

ዳቢንቶዋ ታአኮ ታአኒ ዓአቺባአሴ፤

ጎሞ ታአኮ ቢያ ኔኤሞ ታ ቡኡፃኒ ማሌ፤

ኔኤኒያ ጎሞ ታአኮ ቢያ ዓቶሞ ጌዔ።።

6 ዬያሮ ዲሎ ዓሲ ቢያ ማቶ ዎዶና ኔና ሺኢቆንጎ፤

ዎልቄና ዓአ ዶዲ ዲጲ ኩሚ ሙካ ዎዶና

ዬይ ዲጲ ዒዛ ዔኤቢ ዎኦታዓኬ።።

7 ኔኤኒ ታአኮ ፑሮ ካያሂኬ፤

ማታሰካፓ ኔ ታና ካፓንዳ፤

ኔኤኒ ታና ዓውሴሂሮ ዒላቲ ዎዛና ታአኒ ዓይናዳ።።

8 ናንጊና ናንጋ ጎዳ ታአሞ፡- «ታአኒ ኔና ዔርዛንዳ፤

ኔኤኒ ሃንታንዳ ጎይዎዋ ታ ኔና ዳዋንዳ፤

ታ ኔና ዙራንዳ፤ ካፒያ ካፓንዳ።» ጌዔ።።

9 ዔያቶ ዓርቁ ቃዛኒ፤ ቢፃልቂያ ጫአናኒ

ጎቺ ዓአዳ ፓሮና ባቁሎናጉዲ

ጊኢጉዎያ ማዒፖቴ።።

ፓሮና ባቁሎና ዒንሂ ዬያይዲባአቴ

ዒንሂ ባንሂ ዑካዓኬ።።

- 10 ጎሞ ዓሳኮ ማታሢ ማርጌኬ፤
 ናንጊና ናንጋ ጎዳ ጉሙርቃ ዓሳ ጋዓንቱ
 ዒዛኮ ናንጊና ናንጋ ናሹሞና ካንቁንታንዳ።
- 11 ጂሎ ዓሲዮቱ! ናንጊና ናንጋ ጎዳና ዎዛዲዎቹ፤
 ዒሮ ፒዜዘንሢዮቱ! ዒላሹዎቹ።

33

ጋላታ ዓይኑም

- 1 ዒንሢ ጂሎ ዓሳ! ናንጊና ናንጋ ጎዳ ማዳ ባኮሮ ዎዛዲዎቹ፤
 ፒዜዘንሢ ዒዛ ጋላታንዲያ ኮይሳ።
- 2 ጎኦላ ዋርቂ ናንጊና ናንጋ ጎዳ ጋላቱዎቹ፤
 ታጳ ሻዦ ዴንሢ ዋርቆ ጎኦሎናኣ ዒዛም ዓይናዲዎቹ።
- 3 ዓኪ ዓይኑም ዒዛም ዓይናዲዎቹ!
 ጎኦሎ ማዛጲሲ ዴንሢ ዋርቁዎቹ፤
 ዎዛናኣ ዒላሹዎቹ።
- 4 ናንጊና ናንጋ ጎዳኮ ቃኣላ ጎኔ ቃኣላኬ፤
 ማዳኣ ቢያ ዒዛኮ ጉሙርቁንታያኬ።
- 5 ናንጊና ናንጋ ጎዳ ጂሎሞና ፒዜ ዎጊሢና ናሽካ፤
 ዒዛኮ ናንጊና ናንጋ ናሹማ ሳዖ ኩማ።
- 6 ናንጊና ናንጋ ጎዳሢ ቃኣሎና
 ጫሪንጫ ማዢንቴ፤
 ዒዛኮ ዑኡዘና ዓቦንታ ዓጊኖንታ
 ዦኦንሢያ ማዢንቴ።
- 7 ባዞ ዎኣዖ ቢያ ዒ ፔቲ ቤሰካ ቡኩሲ ዴይሢ፤
 ዴኤፖ ዔቶ ባዞ ዎኣዖማኣ
 ዴዓንዳ ቤሲ ዒዚ ጊኢጊሼ።
- 8 ሳዖይዳ ናንጋ ዓሳ ቢያ ናንጊና ናንጋ ጎዳ ዒጊጩዎቹ፤
 ዓጩይዳ ዓኣ ማሌ ዴራ ቢያ ዒዛ ቦንቹዎቹ።
- 9 ዒዚ «ማዖም» ጋጋዓዛ ሳዓ ማዢንቴ፤
 ዒዛኮ ዓይሢያና ቢያ ባካ ዶዲ ዔቄ።
- 10 ናንጊና ናንጋ ጎዳ
 ዴሮኮ ጌሮ ማሊያ ቱኡዘ ሁርዲሳ፤
 ዒያቶኮ ማሊያዎ ፓሡዎያ ማሃ።
- 11 ናንጊና ናንጋ ጎዳ ቱኬ ቱኡዛ ናንጊና ዶዲ ናንጋያኬ፤

- ዒዛኮ ማሊጻክ ሾይንቲፓ ሜሌ ሾይንቲ ሄላያኩ።
 12 ናንጊና ናንጋ ጎዳ ማዕ ያክዛሢ ዓሲ ማዕያና
 ዒዚ ፔ ዓሲ ማሂ ዶኦሬ ዴሬ ዓንጂንቲያኩ!
- 13 ናንጊና ናንጋ ጎዳ ጫሪንጫፓ ሊካ ዛጋኔ፤
 ዓሲ ዜርሢ ሲያ ዒ ዴዴንቃኔ።
- 14 ዒዚ ፔኤኮ ካኦቱሞ ያይታ ዴዒ
 ሳያይዳ ዓኣ ዓሶ ሲያ ዛጋኔ።
- 15 ዒዚ ሲያሢኮ ዒኖ ማኸሢኬ፤
 ዔያታ ማዳ ባኮሞ ሲያ ዛጋኔ።
- 16 ካኦታ ፔ ያሎ ዓሶ ማርጉሞና ያሊ ባሹሞሴ፤
 ያሎና ዔርቲሢ ፔኤኮ ዴኤፖ ሞልቆና ሃይባፓ ቶሉሞሴ።
- 17 ፓራሢና ያሊ ባሻንዳኔ ጌዒ ሞዛ ጌሥሢ ጉሪኬ፤
 ዔያታ ዴያ ሞልቆና ያናኣ ዓውሳኒ ዳንዳዑሞሴ።
- 18 ናንጊና ናንጋ ጎዳ ዒዛ ዒጊጫዞንሢና
 ዒዛኮ ናንጊና ናንጋ ናሹሞ ሃጋኣ ሞዛ ማሃዞንሢ ዛጋኔ።
- 19 ሃይቦይዳፓ ዒዚ ዔያቶ ዴያና ዓውሳኔ፤
 ናኖ ሞዶናኣ ሹሞፔና ዒዚ ዔያቶ ዓይሳኔ።
- 20 ሹምፓሢ ኦኤኮ
 ናንጊና ናንጋ ጎዳ ሃጊ ማዓ ሞዛ ማሂ ካፓኔ፤
 ኦና ማኣዳሢና ኦኤኮ ጊቲማሢያኣ ዒዛኩ።
- 21 ዒዛኮ ዲማዴ ሱንፆ ኦ ጉሙርቃሢ
 ዒዚ ኦና ሞዛሳኔ።
- 22 ናንጊና ናንጋ ጎዳሢየ!
 ኦኤኮ ሃጊ ማዓ ሞዛ ኦና ኦ ማሄ ጎይያና
 ኔኤኮ ጋፑሞ ናሹማ ኦኤሞ ማዖንጎ።

34

ዳውቲ ዓቤሜሌኬ ቤርቶ ዣኣኦ ማሊ ሙኬሢሢሮ ዳውሴም ዒ
 ጳሽካዖ ዓይናዴ ዓይኑሞ
 ናንጊና ናንጋ ጎዳኮ ኮሹሞሮ ጋላቲንታ ጋላታ
 1 ታኣኒ ሲያ ሞዴ ናንጊና ናንጋ ጎዳ ጋላታኔ፤

- ታ ዒዛ ጋላቴ ጎይሣ ዴዓኔ።
- 2 ታኣኒ ታኣኮ ጉቤ ዒናፓ ናንጊና ናንጋ ጎዳና ሄርሺንታኔ፤
ዒና ሸሌዘንሣ ዬያ ዋይዚ ዋዛዳኔ።
- 3 ሃኒ ሙኩዋቴ፥ ታኣና ዋላ ናንጊና ናንጋ ጎዳ ኑ ቦንቸሞ፤
ኑኡኒ ዋላ ሱንፆ ዒዛኮ ዴግ ዴጊደሞ።
- 4 ናንጊና ናንጋ ጎዳ ታና ማኣዳንዳጉዲ
ታኣኒ ኮዓዛ ዒ ታኣሞ ዋይዘኔ፤
ታ ዒጊጫ ባኮ ቢያይዳፓ ታና ዒ ዓውሴኔ።
- 5 ዒዛ ባንሣ ዛጋ ዓሶኮ ቢያ ዓኣፖ ካራ ፖዔኔ፤
ፔቴታፆ ቦርሲንቲ ዔያታ ቦርሲንቲዋሴ።
- 6 ሜታዲ ማኣደ ኮዓ ዓሣ ዒላቴኔ፤
ናንጊና ናንጋ ጎዳኣ ዒዛኮ ዬያ ዋይዘኔ፤
ሜታሣዳፓኣ ቢያ ዒዛ ዓውሴኔ።
- 7 ናንጊና ናንጋ ጎዳኮ ኪኢታንቻሣ
ፆኦሲ ዒጊጫ ዓሶኮ ዓጮ ማንጊ ዔቂ ካፓኔ፤
ዔያቶኮ ኮይላ ማዒ ፑርታ ሜቶይዳፓ ዓውሳኔ።
- 8 ናንጊና ናንጋ ጎዳኮ ኮሹሞ ሂንዳ ዛጉዋቴ፤
ዒዛ ፔኤኮ ጊቲማ ማሃ ዓሳ ዓንጃንቲያኩ።
- 9 ዒንሣ ዴማዴ ዓሳ ዒዛ ዒጊጩዋቴ፤
ናንጊና ናንጋ ጎዳ ዒጊጫ ዓሶሞ ፓጫ ባኣዚ ባኣሴ።
- 10 ዘባ ካራ ባይዛኒና ናይዲንታኒያ ዳንዳዓኔ፤
ናንጊና ናንጋ ጎዳ ኮዓዘንሣሞ ጋዓንቲ
ኮሺ ባኣዚ ፔቴታፆ ፓጫዓኩ።
- 11 ታ ናይዮቴ! ሃኒ ሙኪ ዋይዘዋቴ፤
ናንጊና ናንጋ ጎዳ ዒጊጩንደ ጎይሣ ታ ዒንሣ ዔርዛንዳኔ።
- 12 ዒንሣዳፓ ናንጊ ናንጋኒ ናሽካያና
ሚርጌ ዋዴ ኮሺ ባኣዚ ዛጋኒ ኮዓሣ ፆናዳይ?
- 13 ፆዲ ማዔቴ ዳንጎ ኔኤኮ ፑርታ ባኣዚ ጌሰቲዋጉዲ ዓርቄ፤
ዒንዲርዛ ኔኤኮ ሉኡዙሞ ባኣዚ ጌሰቲዋጉዲ ካፔ።
- 14 ፑርታ ባኣዚዳፓ ሺኢኩ፤
ኮሺ ባኣዚ ማዴ፤
ኮሹሞ ኮዔ፥ ጊንፆማ ዒዛኮ ዓኣዴ።
- 15 ናንጊና ናንጋ ጎዳሣኮ ዓኣፓ ዒሎንሣ ባንሣ ዛጋኔ፤

- ዋና ዓዲሲ ዓላቶ ዔያቶኮ ዋይዛኒ ቡሊንቴያኩ።
- 16 ሰዓጥ ዔያቶ ማሊሲ ጰቂሣ ባኣዚ ባይዛኒ
 ዓኣጥ ዓዲዎ ፑርቶ ማዳዘንሢዳኩ።
- 17 ጂሎ ዓሳ ዓላታዛ ናንጊና ናንጋ ጎዳ ዋይዛኔ፤
 ዔያቶኮ ዓኣ ማታሰካጥ ዒ ዔያቶ ዓውሳኔ።
- 18 ናንጊና ናንጋ ጎዳ ዒሮ ማቂ ማላዘንሢዳኖ ዑኩኩ፤
 ካራ ባይቂ ማላዘንሢዳኖ ዒ ዓውሳኔ።
- 19 ጂሎ ዓሳኮ ማታ ማርጌኩ፤
 ናንጊና ናንጋ ጎዳ ጋዓንቴ ዬያ ቢያይዳጥ ዔያቶ ዓውሳኔ።
- 20 ዔያቶኮ ማጌያ ቢያ ዒ ካጥሢሮ
 ዬያቶይዳጥ ፔቴ ማጌሢታዎ ማቆዋሴ።
- 21 ፑርቶ ማዳ ዓሶ ፑርቱማ ዎዳኔ፤
 ኮኩ ዓሶ ዒፃ ዓሳ ማቶ ዛጋንዳኔ።
- 22 ናንጊና ናንጋ ጎዳ ዒዛም ማዳዘንሢዳኖ ሽምጥሢ ዓውሳንዳኔ፤
 ዒዛ ጉሙርቃ ዓሶ ፑርታ ባኣዚ ሄላዓኩ።

35

ዳውቴ ዓይነቱ

- ማታዳ ዓሲ ሸኢቁ ሸኢጲሢሢ
- 1 ናንጊና ናንጋ ጎዳሢዮ! ታና ዒጂ ማካ ዓሶ ኔ ማኩ፤
 ታና ያላ ዓሶዋ ኔኤኒ ያሌ።
- 2 ኔኤኮ ያሎ ዓንጋሞንታ ጊቲሞንታ ዓርቂ፤
 ሙኪያ ታና ማኣዳ።
- 3 ዒጂ ታና ዳውሳ ዓሶም
 ኔኤኮ ዎርዎንታ ጨንቾ ዓገሮንታ ቱጊ
 «ታኣኒ ኔና ዓውሳሢኩ» ጌዒ ጎናሲ ኩኤዜ።
- 4 ታና ዎዳኒ ኮዓዘንሢዳኖ ቢያ
 ቦርሲንቲና ዳውሲንቲና ማዎንጎ!
 ታኣም ፑርታ ማዳኒ ዎሊና ዘርታዘንሢዳኖ ቢያ
 ዳውሲንቲ ጊንሢዳኖ ማዎንጎ!
- 5 ናንጊና ናንጋ ጎዳኮ ኪኢታንቻ ዔያቶ ዳውሳኣና
 ዠባሬ ፒጂ ዔኪ ዓኣዳ ዲባጉዲ ዔያታ ማዎንጎ!

6 ናንጊና ናንጋ ጎዳኮ ኪኢታንቻ ዔያቶ ዳውሳኣና ጎይፃ ዔያቶሲ ዲሜያና ሃሊፃያና ማፆንጎ!

7 ታኣኒ ዔኤቢ ፑርቲሴ ባኣዚ ባኣንቴ ፒሮ ዔያታ ታኣሞ ዓኣቹ ፒሬኔ፤ ታና ሎንሣኒ ዔቴያ ቦኦኬኔ።

8 ዔያታ ማሊባኣ ባይሲንታ ዔያቶ ሄሎሞ፤ ዔያታ ዓኣቹ ፒራሢ ዔያቶ ዓርቆሞ፤ ዔያታ ቦኦኬ ዔቶይዳ ፔኤሮ ሎኦሞንጎ!

9 ሸምፔላ ታኣኮ ናንጊና ናንጋ ጎዳሢና ዎዛዳኔ፤ ዒዚ ዓውሴሢሮ ሚርጌና ዎዛዳኔ።

10 ናንጊና ናንጋ ጎዳሢዮ! ኔኤኒ ማዜ ታኣኮ ዑፃ፡- «ሄርቂንቲ ዎርቃ ዓሶ ሄርቃ ዓሶይዳፓ ዓውሳያ ማንቆ ዓሶንታ ሜታዳ ዓሶንታ ቡራ ዓሶይዳፓ ካፓያ ኔጉዳያ ፆኦኒ ዓኣይ?» ጋዓኔ።

11 ፑርቶ ዓሳ ታኣኒ ማዲባኣ ዳቢንቲሮ ዎጌና ታና ዓይሢሴኔ፤ ታኣኒ ዔራዎ ባኣዚ ሉኡዙሞና ታ ዑፃ ማርካዳኔ።

12 ታኣኒ ኮሺ ማዳሢ ዛሎ ፑርታ ታኣሞ ዔያታ ማሄኔ፤ ታና ታኣሮ ሌሊ ማሂ ዔያታ ሃሺኔ።

13 ታኣኒ ጋዓንቴ ዔያታ ሃርጊንቴ ዎዶና ሲዬ ፓቲሌ ማይንቴኔ፤ ታኣኮ ዑፆዎ ሙፆ ሃሾ ዳሞቦና ታ ፆኦፒሴኔ፤ ታኣኒ ሺኢቁ ሺኢጲፃ ዎይዘንቴዎያ ማዒ ዓቴኔ።

14 ታኣኒ ፆዬ ፆዬፃ ታኣኮ ላጌሞ ጊንሣ ሃሣ ጌርሲሞ ፆያያጉዲኬ፤

ዒንዳ ሃይቁ ዓሲ ፆያሢጉዲ ታኣኒ ሱሊ ዳዒ ዬኤኬኔ።

15 ታኣኒ ዲቁንቴ ዎዶና ዔያታ ዎዛና ቡኬኔ፤ ታኣኒ ዔራዎ ጌኔ ማዳ ዓሲ ሙኪ ታና ሚኢጫፆ ጋፒ ዒፄኔ።

16 ፑርቶ ማዳ ዓሳ ማዳ ጎይፆ ፑርቲሞና ታና ሚኢጨ ሃኣሚያ ታኣሞ ዔያታ ዳዔኔ።

17 ናንጊና ናንጋ ጎዳሢዮ!
 ዋማ ሄለንዳኣና ዚቲዮ ጌይ ኔ ታና ዛጋይ?
 ዔያቶኮ ፑርቶ ማዲፓ ታና ዓውሴ፤
 ሃንሢ ዘቦጉዲ ቁኢሮንሢዲፓ ኔ ታና ካፔ!
 18 ሚርጌ ቡኬ ኔ ዴሮ ባኣካ ታኣኒ ኔና ጋላታንዳኔ፤
 ዬያ ቡኬ ዓሶ ቤርታ ታ ኔና ቦንቻንዳኔ።

19 ዔኤቢ ማዲንቴ ባኣዚ ባኣንቴ ታና ዒፃ ታ ሞርካ
 ታ ሜቶ ዛጊ ዋዛዳንዳጉዲ ማሂፖ፤
 ዔያታ ታና ዓኣፒ ዋዲ ዓማሊ ሺራንዳጉዲ ሃሺፖ።

20 ዔያታ ጌሰታ ጌኤዛ ሞርኬ ጌሰታንዳ ጌኤሲኬ፤
 ኮሺ ዓሲ ዑሰካ ጌኔ ማሊሢ ማሊ ዔያታ ቱካኔ።

21 «ሂዮ! ቃራ!
 ኑኡኒ ኑ ቶኦኪና ኔ ማዳሢ ዛጌኔ!»
 ጌዒ ጌዒ ዒላቲና ቶኦኪ ዔያታ ታኣኮ ባይዜኔ።

22 ናንጊና ናንጋ ጎዳሢዮ!
 ኔኤኒ ዬያ ዛጌኔ፤
 ዬያሮ ናንጊና ናንጋ ጎዳሢዮ!
 ኔኤኒ ዚቲዮ ጌዒፖ! ታ ኮራፓኣ ሃኪፖ!

23 ታኣኮ ናንጊና ናንጋ ጎዳ ማዔ ጆኦዛሢዮ!
 ታ ዛሎ ኔኤኒ ሞኦቲንቴ፤
 ዋጊያ ታኣም ዋጌ።

24 ናንጊና ናንጋ ጎዳ ማዔ ታ ጆኦዛሢዮ!
 ኔኤኮ ጂሉሞጉዴያ
 ጎኑሞና ታኣም ዋጌ፤
 ታ ሞርካ ታ ሜቶና ዋዛዳንዳጉዲ ማሂፖ።

25 «ሂዮ! ቃራ! ኑ ማሊጆጉዲ ማዔኔ!» ጌዒ ዔያታ ማላንዳጉዲ
 ጊንሣ ሃሣ «ኑኡኒ ዒዛ ባሺያንቴ!» ኔኤኒ ዔያቶ ጌይሲፖ።

26 ታና ሄሌ ሜታሢና ዋዛዲ ቶኦቺሢና ዛጋ ዓሳ ቢያ
 ቦርሲንቶንጎ፤ ዔርቶ ዒፂ ካራ ዔያቶም ባይቆንጎ፤
 ታ ዑፃ ፔና ዴግ ዴጊዳዘንሢ ቢያ
 ቦርሲንቴ ዳውሲንቶንጎ።

27 ታኣኮ ባሺፃ ዋዛሳ ዓሳ ቢያ ዋዛዳንጎ፤

35:19 ዓይኑ. 69:4፤ ዮሃ. 15:25።

«ናንገና ናንጋ ጎዳ ዳኤፒኬ!
ዒዛም ማዳ ዓይላሢም ዔባ ቢያ ገሊጋዛ
ናንገና ናንጋ ጎዳኣ ዎዎዛሳኔ!» ጎዶንጎ።

28 ታኣኮ ዳንጋ ሮኦሮ ጉቤ
ኔኤኮ ዲሎሞና ጋላቶና ዛላ ከኤዛኔ።

36

ዓይነቱ ሱኡጋሢ ዓይሣ ጎይዎና ዓይናዲንታ ያኦሲ ዓይላሢ
ዳውቱ ዓይነቱ

- ጎሞ ዓሶኮ ፑርቱሞና ያኦሲኮዎ ኮሹሞ
- 1 ፑርታ ባኣዚ ማዳ ዓሲ ፔ ዒኖና ዬያ ፑርቱሞ ማላኔ፤
ያኦሲ ዒጊጨዎሴ፣ ቦንቺያ ቦንቺዎሴ።
- 2 ፑርቶ ማዳ ዓሢ ዒዛኮ ፑርቱማ ሳልማሳሢሮ
ፔኤኮ ጎሞ ዛጋኒታቲያ ዒፃኒ ኮዑሞሴ።
- 3 ጌኤዛ ዒዛኮ ጌኔ ማለሢና ሉኡዙሞና ኩሜያኮ፤
ማሊ ጳቂሥሢና ኮሺ ባኣዚ ማዳሢያ ዒዛ ባሸኔ።
- 4 ላሃ ቤዛ ዓኣዖ ጌኔ ባኣዚ ማሊ ቱካኔ፤
ፔና ዒ ፑርታ ጎይሢ ዔኪ ዓኣዳኔ፤
ፑርቱሞ ባኮዎ ፔ ኮራፓ ሃኪሱሞሴ።
- 5 ናንገና ናንጋ ጎዳሢዮ!
ኔኤኮ ናንገና ናንጋ ናሹማ ጫሪንጮ
ጎኑማኣ ኔኤኮ ሻኣሮ ዴንዲ ሃላኔ።
- 6 ናንገና ናንጋ ጎዳሢዮ!
ዓሶንታ ቆልሞንታ ሜቶይዳፓ ኔኤኒ ዓውሳኔ፤
- ዲሎማ ኔኤሲ ዓዳ ዲኮጉዲ ኮሺ ዳግ ጌዔያኮ፤
ኔኤኮ ዎጋ ባዚ ዔታዳጉዲ ዔታዳያኮ።
- 7 ያኦዛሢዮ!
ኔኤኮ ናንገና ናንጋ ናሹማ ዎዚ ቦንቺንታያዳይ!
ዓሶ ኔኤኒ ካፓሢሮ ኔ ዴማ ካፒንቲ ዴዓኔ።
- 8 ኔ ማኣራ ገዲ ዑሣ ዓኣዳ ሙኡዚ ዔያታ ሙዓኔ፤
ኔኤኮ ዎዛሳ ዎራፓ ዎኣዖ ዔያቶ ኔ ዑሻኔ።
- 9 ኔኤኒ ናንገኪኮ ቢያ ዓልቃ ካራኬ፤
ኔኤኮ ፖዓ ፖዓሢሮ ኑ ዛጋኔ።
- 10 ኔና ዔራዞንሢም ናንገና ናንጋ ናሹማ ኔኤኮ ጋፓፓ፤
ዓውሲዎኣ ኔኤኮ ዒኖ ፒዜዞንሢም ጋፑዎያ ማዶንጎ።

11 የቶርቶ ዓሳኮ ቶካ ታና ሄርቃንዳጉዲ
ፑርቶ ማዳ ዓሳ ዋልቃዲ ታና ዳውሳንዳጉዲ
ታና ሃሺፖ።

12 ፑርቶ ማዳ ዓሳ ዋማይዲ ሎኦሚ ለሄቴያ ዛጌ!
ዔያታ ኬኤሪንቴኔ፥ ዔቃኒያ ያፓ ዳንዳዑዋሴ።

37

ዳውቴ ዓይነቱ

ፑርቶ ዓሳንታ ኮዡ ዓሳዋ ካፒ ዓኣ ባኣዚ

1 ፑርቶ ማዳ ዓሳ ዛጌ ዳጋዲ፤
ጎሞ ማዳ ዓሳሲ ዛጌ «ዔያቶም ዬይ ዓይጋ ማዔይ!» ጌይ
ማሊፖ።

2 ዔያታ ማኣቲጉዲ ዑኩና ማላንዳኔ፤
ዋላሺጉዲያኣ ሹሊ ዲኢናንዳኔ።

3 ናንጊና ናንጋ ጎዳ ጉሙርቁ ኮሺ ባኣዚ ማዳ፤
ዓጮይዳ ኮሺና ኔኤኒ ናንጋንዳኔ።

4 ናንጊና ናንጋ ጎዳና ዋዛዳ፤
ዒዚያ ኔኤኮ ዒና ኮዓ ባኮ ዒንጋንዳኔ።

5 ዒዚ ኔና ዔኪ ዓኣዳንዳጉዲ
ናንጊና ናንጋ ጎዳም ሃዳርሲ ኔና ዒንጌ፤
ዒዛ ጉሙርቁ፥ ዒዚ ኔና ማኣዳንዳኔ።

6 ዒዚ ያሉሞ ኔኤኮ ፖዒጉዲ
ኔኤም ዋጊንታ ዋጎዋ
ዓቢ ዲኡሲጉዲ ፖዒሳንዳኔ።

7 ጊቢ ዳንዳዒሢና ዶዲ
ናንጊና ናንጋ ጎዳ ማዳ ባኮ ዛጋኒ ካፔ፤
ሜሌ ዓሳኮ ፑርቶ ማሊፃ ዔያቶም ጊኢጌያ ማዔቴያ
ሮኦጋዲ፤።

8 ዳጋ ፑርታ ባኣዚዳ ሄሊሳሢር
ዳጋይዳፓ ኔና ማሄ፥ ሮኦጋዲሢዳፓኣ ካፒንቴ።

9 ፑርቶ ማዳ ዓሳ ዋዳንታንዳኔ፤
ናንጊና ናንጋ ጎዳ ጉሙርቃዞንሢ ጋዓንቴ ሳዖ ዔካንዳኔ።

- 10 ደካ ዎዴም ማዓንዳጋዓቲም
 ፑርቶ ማዳ ዓሳ ሩኡሪና ባይቃንዳኔ፤
 ኔኔኒ ዔያቶ ኮዔያታቲያ ዴንቃዓኬ።
- 11 ዒሮ ሸሌዔዔዘንሢ ዒጮ ዔካንዳኔ፤
 ጎርጎቹሞና ኮሹሞና ዴንቂ ዔያታ ዎዛዳንዳኔ።
- 12 ፑርቶ ማዳ ዓሢ ኮዣሢ ባይዘኒ
 ሜሌ ዓሶ ፑርቲሞና ዒዛ ዑፃ ዔቂሳኔ፤
 ዒዛ ዒፃሢና ሃእሚ ዳዓኔ።
- 13 ፑርቶ ማዳ ዓሳ ባይቃንዳ ኬላ ዑኬሢ ዔራሢር
 ናንጊና ናንጋ ጎዳ ዔያቶ ሚኢጫኔ።
- 14 ፑርቶ ማዳ ዓሳ
 ማንቆ ዓሶንታ ሜታዳ ዓሶዎ ዎዳኒ
 ኮዣ ማዳ ማዳዘንሢያ ሹካኒ
 ፔኤኮ ጩንቾ ዓጋር ቱጋኔ፤
 ሂኢዣ ፔኤኮ ጊኢጊሻኔ።
- 15 ጋዓንቲ ዔያቶኮ ጩንቾ ዓጋራ
 ዔያቶ ሳዘ ማዒ ጫርጋንዳኔ፤
 ሂኢዣኦ ዔያቶሲ ሜቃንዳኔ።
- 16 ፑርታ ማዳ ዓሲኮ ሚርጌ ቆሎይዳጋ
 ኮሺ ዓሲኮ ዳኮ ቆሎንሢ ባሽኬ።
- 17 ፑርቶ ማዳ ዓሶኮ ቃሳ ሜቃንዳኔ፤
 ዒሎ ዓሶ ጋዓንቲ ናንጊና ናንጋ ጎዳ ዶዲሻንዳኔ።
- 18 ናንጊና ናንጋ ጎዳ ዒሎ ዓሳ ናንጋንዳ ዎዶ ዔዔራኔ፤
 ዴና ዔያቶሲ ዔያቶም ማዒ ቢያ ዎዴ ናንጋንዳኔ።
- 19 ፑርታ ኬሊ ሙኬቲ ሜታ ዔያቶ ሂላዓኬ፤
 ሉማሢ ዎዶና ሙኡዚ ዴንቂ ዔያታ ሚሸካንዳኔ።
- 20 ፑርቶ ማዳ ዓሳ ጋዓንቲ ባይቃንዳኔ፤
 ናንጊና ናንጋ ጎዳኮ ሞርካ ቡኒጉዲ ዲኢናንዳኔ፤
 ዓዳ ጩቢ ባይቃሢጉዲ ዓኣጋጋ ባይቃንዳኔ።
- 21 ጎሜ ማዳ ዓሲ ዓሲዳጋ ታታልዓኔ፤
 ጋዓንቲ ማሂ ዬያ ጩጉሞኔ፤

ዲሎ ዓሲ ጋዓንቴ ሚጨገታኔ፤
ማሂያኦ ዲንጋኔ።

22 ናንገና ናንጋ ጎዳ ዓንጅ ዓሳ ሳዖ ዔካንዳኔ፤
ዲዚ ጋዳንቄ ዓሳ ጋዓንቴ ባይቃንዳኔ።

23 ዓሲኮ ናንገ ናንገና ናንጋ ጎዳ ዋዛሳያ ማዔቴ
ዲዚ ዬያ ዓሂኮ ናንጋ ፒዜ ማዒያ ጎናሳኔ።

24 ዬይ ዓሂ ዲቁንቴቴያ ሎኦማዓኬ፤
ናንገና ናንጋ ጎዳ ፔ ኩጮና ኬኤሊንቂ ዲዛ ዓርቃንዳኔ።

25 ደጋቶይዳፓ ጋርቻንዳያ ሄላንዳኦና ታ ናንጌኔ፤
ዬያይዳ ናንገና ናንጋ ጎዳ ኮሺ ዓሲ ሃሺም
ናኦታ ዲዛኮ ሙኤዚ ባይዚ ሺኢቃንቴ
ፔቴታዖ ታኦኒ ዛገባኦ።

26 ኮሺ ዓሲ ቢያ ዎዳና ዓሲም ዔኤቢ ጉሪ ዲዲንጋኔ፤
ዲዛኮ ናኦታኦ ዓንጂንቴያ ማዓንዳኔ።

27 ፑርታ ማደፓ ሃኬ፥ ኮሺ ባኦዚ ማዳ፤
ናንገና ኔኤኒ ናንጋንዳኔ።

28 ናንገና ናንጋ ጎዳ ፒዜ ዎጌ ናሽካኔ፤
ዲዛም ጉሙርቂንታዞንሂ ዲ ሃሹዋሴ፤
ናንገና ዔያቶ ዲ ካፓኔ፤
ፑርቶ ማደ ዓሲኮ ዜርፃ ጋዓንቴ ባይቃንዳኔ።

29 ሳዓ ዲሎ ዓሲም ዓታንዳኔ፤
ዲዘይዳ ዔያታ ናንገና ናንጋንዳኔ።

30 ዲሎ ዓሲ ፔ ደንጋፓ ዔራቶ ኬሳኔ፤
ዲንዲርዛ ዲዛኮ ፒዙም ጌሰታኔ።

31 ዲዛ ያኦዛሂኮ ዎጋ ዲዛኮ ዲናኦኬ፤
ቶካ ዲዛኮ ቡኤዲንቱዋሴ።

32 ፑርታ ማደ ዓሲ ዲላሂ ካታኔ፤
ዎዳኒያ ዲዛ ዲ ኮዓኔ።

33 ናንገና ናንጋ ጎዳ ጋዓንቴ
ዲዛኮ ሞርኮም ዓኦሂ ዲንገንዲዋሴ፤
ዓሲ ቡካ ቤዘይዳ ሞኦቶና ዓሳ ዲዛ ላሂንዲዋሴ።

34 ናንገና ናንጋ ጎዳኮ ማኦር ካራ ዳዔ፤

ጎይቶቹ ዲዛሲ ካፔ፤
ዲዛ ሳታ ኔኤም ዳካልሲ ኔና ቦንቸሳንዳኔ፤
ፑርቶ ዓሳ ባይቃንቴ ኔ ዛጋንዳኔ።

35 ፑርታ ማዳያና ቁኢሮ ዓሲሰኬይ
ዓዳ ሊባኖኦሴ ሚያጉዲ ሞርቂ ዓኣንቴ ታ ዛጌኔ፤

36 ጊንሣ ሃሣ ማሌ ዓቢና ዲኢና ታ ዓኣዳንቴ
ዲኢካ ዬይ ሚፃሣ ባኣሴ፤
ኮዲያ ታ ዲዛ ዴንቁባኣሴ።

37 ኮሺ ማዔ ዓሣና ፒዜ ማዔሣያ ዲናፓ ዛጌ፤
ኮሺ ማዔ ዓሲኮ ሃጊ ማዓ ሞዛ ዓኣኔ።

38 ጎሞ ማዳ ዓሳ ጋዓንቴ ጋፒ ሃይቃንዳኔ፤
ዜርፃኣ ዔያቶሲ ባይቃንዳኔ።

39 ዲሎ ዓሲኮ ዳቂንታ ሙካንዳሣ ናንጊና ናንጋ ጎዳፓኬ፤
ሚታሣ ሞዶና ፑኖ ካያሣ ዔያቶኮ ዲዛኬ።

40 ናንጊና ናንጋ ጎዳ ዔያቶ ማኣዳኔ፥ ዓውሲያ ዓውሳኔ፤
ፑርቶ ማዳ ዓሳ ኩጫፓ ዔያቶ ዲ ኬሳንዳኔ፤
ዔያታ ዲዛ ፔኤኮ ፑኖ ካያሣ ማሃሣሮ
ዲዛ ዔያቶ ዓውሳንዳኔ።

38

ዓይነቱ ሃውሻ ኬሎ ማሊ ጳቂሣ ዓይናድ ዳውቴ ዓይነቱ
ሚቶ ሞዶና ሺኢቂንታ ሺኢጲሣ

1 ናንጊና ናንጋ ጎዳሣዮ! ኔ ዳጎና ታና ጎሪፖ፤
ኔኤኮ ዳኤፖ ዳጎና ታጊዳ ሚቶ ዓጊፖ።

2 ኔ ሂኢዦና ኔ ታና ዲኬኔ፤
ኔኤኮ ዶዶ ኩጮና ኔ ታና ጳርቄኔ።

3 ኔኤኒ ጎሪንቴሣሮ 0-ፃ ታኣኮ ኮሺቱሞሴ።
ታ ጎማፓ ዔቄያና ዲቢሊ ታኣኮ ባኣሴ።

4 ዳቢንታ ታኣሲ ታና ዴኤፃያኬ፤
ዬይ ታኣኒ ኬዳኒ ዳንዳዓሣፓ 0-ሣኬ።

5 ታኣኮ ዔኤያቶና ታ ማዳ ዳቢንቶሮ
ከፃ ታኣኮ ጊኢሸኪ ዛዓኔ።

6 ታኣኒ ገሊራፓ ዋቤኔ፥ ሚርጌና ታ ኩንቲ ሃንቴኔ፤
ኬሎ ቢያ ያዩሢና ታ ፔኤቄኔ።

7 ገሊራ ታኣኮ ታሚጉዲ ዔኤቴኔ፤
ዑሰካኣ ታኣኮ ኮሽኩዋቤ።

8 ሚርጌና ታ ላቤኔ፥ ጋፒ ታኣኒ ሺኢቴኔ፤
ዒና ታኣኮ ሜታዴያታሢሮ ታ ዚኢሊንታኔ።

9 ናንገና ናንጋ ታ ጎዳሢዮ! ታኣኒ ኮዓ ባኮ ቢያ ኔ ዔራኔ፤
ታኣኮ ዚኢሊንቲፃ ኔኤም ዓኣሺንቴያቱዋቤ።

10 ባዛ ታኣኮ ዑኮ ዑኮ ዲዓኔ፥ ቆሳኣ ታኣኮ ጌላኔ፤
ዓኣፓ ታኣኮ ዛጎ ዒፃኔ።

11 ታኣኮ ዒገኖንታ ላጎንታ ኪያ ታኣኮ ሻኣኪንቴኔ፤
ታ ዒገና ታ ኮራፓ ሃኬኔ።

12 ታ ሼምፓሢ ባይዛኒ ኮዓዘንሢ ፒሮ ታኣም ፒራኔ፤
ፑርታና ታና ሜታሳኒ ማላዘንሢያ ባይዛኒ ታኣም ዚርቃኔ፤
ሮኦሮ ጉቤ ታና ባይዛኒ ጌኔ ማላሢ ሱካኔ።

13 ታኣኒ ዋይዚ ባይቄያ
ጌሰታኒያ ዳንዳዑዋያ
ዳንጋ ባይቄ ዓሲጉዲኬ።

14 ጎኔና ዋይዚ ባይቄ ዓሲና
ዳንጋ ቡሊንቲ ጌሰቱዋ ዓሲጉዲ ታ ማዔኔ።

15 ናንገና ናንጋ ጎዳሢዮ! ኔና ታ ጉሙርቃኔ፤
ናንገና ናንጋ ጎዳ ማዔ ታ ያኦዛሢዮ! ኔ ታኣም ማሢ
ኬኤዛንዳኔ።

16 «ሞርካ ታኣኮ ቶኦቹ ታና ዛጋንዳጉዲና
ቶካ ታኣኮ ሃሊፃም ፔና ዔያታ ጎኦቢሣንዳጉዲ ማዲፖ!»

ጌዒ ታ ኔና ሺኢቃኔ።

17 ሎኦማኒ ታ ዑኬኔ፤
ታኣኮ ዋኦይይዳፓ ፔቲታያ ታ ኬሰኪባኣሴ።

18 ዳቢንቶ ታኣኮ ታ ቡኡፃኔ፤
ጎማ ታኣኮ ታና ሜታሴኔ።

19 ታኣኮ ደዶ ሞርካ ሚርጌኬ፤
ታ ዔኤቢ ዋኦቲባኣንቴ ታና ዒፃዘንሢኮ ፓይዲ ባኣሴ።

20 ታኣኒ ኮሺ ማዶ ማዶሢሮ
ዬያ ኮዢ ማዶ ዛሎ ፑርታ ታኣም ማዶ ማሃ ዓሳ

ታኣኮ ሞርኬ ማዒ ዔቄ።

- 21 ናንገና ናንጋ ጎዳሢዮ! ታና ሃሺፖ፤
ታ ጾካዛሢዮ! ታ ኮራፓ ሃኪፖ።
- 22 ታ ጴኤሻሢ ማዔ ናንገና ናንጋ ጎዳሢዮ!
ታና ዑካዲ ማኣዳ።

39

ዓይነቱ ሱኡጋሢ ዓይሢ ጎይጾና ዔደታሜ ዛሎ ዓይናዲንቴ ደውቴ ዓይነቱ

- ዓሲ ሜታ ሄላዛ ዔልቃሚጉዲ ሺኢቃ ሺኢጲሢ
- 1 ታኣኢ፡- «ታ ማድንታ ዒንዲርዘዋ ጎሜፓ ካፓንዳ፤
ፑርቶ ማዳ ዓሳ ታ ኮራ ዓኣ ዎደና ዳንጎ ታኣኮ ታ ቢፃልቃንዳ።»
- ጌዒ ታ ጫኣቄ።
- 2 ዳንጋ ባይቄ ዓሲጉዲ ዚቲ ታ ጌዔ፤
ኮሺ ባኣዚ ጌሰታኒታፖ ዳንጎ ታኣሲ ታ ዓርቄ፤
ዬይ ያዲ ማዔ ታቲያ ሜታሢ ታኣኮ ሃቺሞ ሚርጌ።
- 3 ዒና ታኣኮ ጋራ ያይ፤
ማሊያ ታ ማሊሢር ዬይ ታማ ዔኤቴ፤
ዬካፓ ዳንጎ ቡሊ ሂዚ ጌይ ታ ኬኤዜ፡-
- 4 «ናንገና ናንጋ ጎዳሢዮ!
ናንጎኮ ታኣኮ ጋፒንፖ ሌፖኮዋ ፓይዶ ታና ዔርዜ፤
ታኣኒ ዓኣዳያና ባይቃያ ማዔሢ ታ ዔርሞ።»
- 5 «ሃይሾ ታኣኒ ናንጋንዳ ዎደ ኬኤላና ዋርቄ ኔ ዛገ ሃሾ፤
ታኣኒ ናንጋ ሌዓ ኔ ቤርታ ዔኤቢ ማዒ ፓይዲንቴዋሴ፤
ጎኔና ዓሲኮ ናንገ ቢያ ዓዳ ሱኡሌጉዳያኮ።
- 6 ዓሲ ናንገ ሺቢዳፓ ዳማቲዋሴ፤
ጉሪ ላቢንታ፤ ቆሎዋ ቡኩሳ፤
ጋዓንቴ ዬይ ቆላ ፖኦሞ ማዓንዳቴያ ዔሩዋሴ።»
- 7 «ናንገና ናንጋ ጎዳሢዮ!
ሂዴቲ ታኣኮ ሃጊ ማዓ ዎዛሢ ያናዳይ?
ናንገና ናንጋ ጎዳቲዋዓዳ?
- 8 ታኣኮ ጎሚፓ ቢያ ታና ዓውሴ፤
ዔቦ ዔሩዋ ዓሶሞ ሚኢቺ ታና ማሂፖ።
- 9 ሃያ ቢያ ማዳሢ ኔናታሢር

ታኣኒ ዚቲዮ ጋዓንዳኔ፤
 ዳንጎዎ ታኣኮ ታ ቡላዓኬ።
 10 ቃሶ ኔኤኮ ታ ዑፃፓ ዔቂሴ፤
 ኩጫ ኔኤኮ ታና ጳርቁሢሮ ሚርጌና ታ ላቤኔ።
 11 ዓሶ ዔያቶኮ ጎሞ ዛሎሮ ሜታሳኒ፥ ኔ ዔያቶ ጎራኔ፤
 ቆሎዎ ኔ ዔያቶኮ ቢሎና ባይዛኔ፤
 ጎኔና ዓሲኮ ናንጊ ሱኡሌይዳፓ ባሼቱዎሴ።»

12 «ናንጊና ናንጋ ጎዳሢዮ!
 ሸኢጲዖ ታኣኮ ዋይዜ፥ ዒላቶዎ ዔኬ፤
 ታ ዩኤካእና ዑኩና ታና ማኣዳ፤
 ዳካ ዎዴሞ ታ ኔኤኮ ሸኦቹኬ፤
 ታኣኒ ታኣኮ ቤርታኣ ዓድንሢጉዲ ቤሲባኣያ ማዒ ናንጌያኬ።
 13 ሃይቂ ታኣኒ ማዑዎ ቤዞ ዓኣዳንዳሢኮ ቤርታ
 ሃዳራ ታ ዎዛዳንዳጉዲ ዳካ ታኣሞ ጌዔቴራ።»

40

ዓይኑም ሱኡጋሢ ዓይሢ ጎይፆና ዓይናዲንታ ዳውቴ ዓይኑም
 ጋላታ ዓይኑም

1 ናንጊና ናንጋ ጎዳ ታና ማኣዳንዳጉዲ ጊቢ ዳንዳዒ ታ ካፔኔ፤
 ዒዚያ ታ ባንሢ ሸሪ፥ ሸኢጲዖ ታኣኮ ዋይዜኔ።
 2 ዓጊፃ ጫሪና ቶኦጳ ማዔ
 ሃሊፃ ዔታፓ ዒ ታና ኬሴኔ፤
 ቶኮ ታኣኮ ላሎ ሸጮ ዑፃ ዔቂሲ
 ዶዲ ታ ዔቃንዳ ቤሲ ዒ ታኣሞ ዒንጌኔ።
 3 ታ ዳንጎይዳ ዓኪ ዓይኑም
 ኑ ያኦዛሢሞ ጋላታ ዓይኑም ታኣሞ ዒ ዒንጌኔ፤
 ዩያ ሚርጌ ዓሳ ዒጊጩ ዛጊ
 ናንጊና ናንጋ ጎዳ ጉሙርቃንዳኔ።

4 ናንጊና ናንጋ ጎዳ ሌሊ ጉሙርቃዞንሢ
 ሜሌ ያኦዞ ካኣሸኪሮ ሸሩዎዞንሢ
 ዩያ ሜሌ ያኦዞ ጊንፆ ሃንታ
 ዋይዞ ዒፃ ዓሶና ዎላ ፔቴ ማዑዎዞንሢ ዓንጂንቴያኬ።
 5 ናንጊና ናንጋ ጎዳ ማዔ ታ ያኦዛሢዮ!
 ኔኤኒ ሚርጌና ዲቃሢ ሄርሸሳ ባኣዚ ኑም ማዳኔ፤
 ያኦኒያ ኔኤና ቤቃይ ባኣሴ፤

ኔኤኒ ኑሞ ማሌ ኮዦ ባኮ
ያኦኒያ ፓይዲ ዔራኒ ዳንዳዑቀሴ፤
ኬኤዛኒና ሃይሳዳኒ ታ ዓርቂታቲያ
ፓይዲ ታኣሞ ዔርቱቀያ ማዓንዳኔ።

6 ኔኤኒ ሚቺ ዒንጎ ዒንጊያንታ ማሌ ዒንጊያዋ ኮዑቀሴ፤
ቆልማ ሚቺ ዒንጎ ቤዘይዳ ሚቺንታንዳጉዲ
ጊንሣ ሃሣ ጎሞ ጌኤሻኒ ዒንጊንታ ዒንጊፃኣ
ኔኤሞ ዒንጊንታንዳጉዲ ኔ ኮዑቀሴ፤
ዬያ ማዳንዶ ቤዘ ዓይሢያ ኔኤኮ ዋይዚ
ኔኤሞ ታ ማዳንዳጉዲ ኔ ታና ማሃኔ።

7 ዬያር ታኣኒ፡- «ዋጎ ማፃአፖይዲ ታ ዛሎ ፃኣፒንቴ ጎይያና
ሃይሾ ታኣኒ ሙኬኔ።

8 ታ ያኣዛሢያ! ማሊያ ኔኤሲ ማዲ ኩንሣኒ ታ ኮዓኔ፤
ዋጋኣ ኔኤኮ ታ ዒኖይዳኬ» ጌዔኔ።

9 ዳኤፖ ቡኪንቶ ቤዛ ፒዜ ባኣዚ ታ ኬኤዜኔ፤
ናንጊና ናንጋ ጎዳሢያ! ኔኤኒ ዔራሢጉዲ
ታ ኬኤዛ ባኮ ኬኤዚያ ሃሻዓኬ።

10 ኮሹሞ ኔኤሲ ታ ዒና ታ ዓኣቻዓኬ፤
ኔኤኒ ጉሙርቂንታያና ዓውሳያ ማዔሢ ታ ኬኤዜኔ፤
ዬያ ዳኤፖ ቡኪንቶ ቤዛ ኔኤኮ ናንጊና ናንጋ
ናሹሞንታ ጎኑሞንታ ታ ዓኣቺባኣሴ።

11 ናንጊና ናንጋ ጎዳሢያ! ኔ ማኣሪያ ታጊዳፓ ሃኪሲፖ፤
ኔኤኮ ናሹሞንታ ናንጊና ናንጋ ጉሙርቂንቲፃኣ ናንጊና ታና
ካፖንጎ።

12 ሚርጌ ሜታ ታና ዋኣዪሳኔ!
ዳሲንታ ታኣኮ ሚርጌሢሮ ዛጋኒ ታ ዳንዳዑቀሴ፤
ዬይ ታኣኮ ቶኦኮ ጋፓናፓ ባሻያኬ፤
ዬያር ታ ዒና ታና ዒዲ ሃሼኔ።

13 ናንጊና ናንጋ ጎዳሢያ! ሃዳራ ታና ዓውሴ፤
ያኣዛሢያ! ዑካዲ ታና ማኣዴ።

14 ታና ዋዳኒ ኮዓ ዓሳ ቢያ ቦርሲንቶንጎ፤
ዔርቶ ዒዲ ካራ ዔያቶም ባይቆንጎ፤
ታና ፑርታ ባኣዚ ሄላንዳጉዲ ማላዘንሢሞ ቢያ

40:6 ዔ.ብ. 10:5-7።

ቦርሲንቲ ማግኔፖ።
 15 ታ ሎኦሚሂር፡- «ሂዮ! ማዳ!» ጋዓዘንህ
 ፔኤሮ ቦርሲንቲና ዲቃቶን።

16 ኔና ኮዓዘንህ ጋዓንቲ ቢያ ዋዛዶን፤
 ኮሺ ዑህ ዓኣጴያ ዋዛዶን፤
 ቢያ ዋዴ ኔ ዓውሲያ ናሽካዘንህ
 «ናንገና ናንጋ ጎዳ ዴኤፒኬ!» ጎዶን።

17 ታ ጾካዛሂዮ! ታኣኒ ሜታጴ ዓሲኬ፤
 ጋዓንቲ ኔኤኒ ታና ዋለባኣሴ፤
 ኔኤኒ ታኣኮ ማኣዳሂና ዓውሳሂ ማዔ ጎይጾና
 ሃሂያ ዑኬና ታና ማኣዴ።

41

ዓይነቱ ሱኡጋሂ ዓይህ ጎይጾና ዓይናዲንታ ዳውቴ ዓይነቱ
 ዓሲ ሃርጊንታጾ ሸኢቃ ሸኢጲሂ

1 ማንቆ ዓሶ ማኣዳ ዓሳ ዓንጃንቲያኬ፤
 ዔያታ ሜታጴ ዓቦና ናንገና ናንጋ ጎዳ ዔያቶ ማኣዳ።

2 ዒዚ ዔያቶ ካፓኔ፤
 ሸምፔናኣ ጌሃኔ፤
 ሳጾዳ ዔያቶ ዓንጃኔ፤
 ዔያቶኮ ሞርኮማኣ ዓኣሂ ዒንጉዋሴ።

3 ሃርጊንቲ ዔያታ ለሃዘ ናንገና ናንጋ ጎዳ ዔያቶ ማይሃኔ፤
 ፓሂያ ዔያቶ ፓሃኔ።

4 ታኣኒያ፡- «ናንገና ናንጋ ጎዳሂዮ!
 ታ ዳቤሂር ታና ሚጨንቲ ማኣሬ፤
 ሃርጎይዳፓኣ ታና ፖሲሴ» ጌዔ።

5 ታ ሞርካ ታ ዑፃ ፑርቱሞ ጌሰታጾ፡-
 «ዓይዲ ዒዚ ሃይቃንዳይ?
 ሱንፃ ዓዛኮ ሳጾዳፓ ዋለንታንዳሂ ዓይዲ ናንዳይ» ጋዓ።

6 ታና ዔያታ ጾኦጬኒ ሙካሂ ዒናፓቱዋሴ፤
 ታ ዑፃ ፑርታ ባኣዚ ጌሰታኔ፤
 ዲማ ዲማ ቤዞ ሃንቲ ሃንቲ ሱንጾ ዔያታ ታኣኮ ፑርቲሳ።

7 ሞርካ ታኣኮ ዋለ ፔቲ ማዒጋፓ ታ ዑፃ ካሽካሻኔ፤
 ፑርታ ታና ሄለንዳጉዲ ፑርቱሞ ማላ።

8 ዔያታ ማለጾ፡- «ዒዚ ሃርጊንቲ ሃይቃኒ ዑኬኔ፤
 ማይ ላሄ ቤዛፓ ዒዚ ዔቃዓኬ» ጋዓ።

- 9 ታኣኮ ካሦ ታኣና ዎላ ሙዔህ
 ታ ጉሙርቃ ዑኩ ማዔ ላጋህ
 ዬይያ ዓቲዎ? ሞርኬ ማዔ ታ ጊዳ ዔቄኔ።
- 10 ናንጊና ናንጋ ጎዳህዮ! ኔኤኒ ጋዓንቲ ታና ሚጨጎንቲ፤
 ታ ሞርኮ ኮሜ ታ ኮፃንዳጉዲ ታና ፓህ።
- 11 ታ ሞርካ ታና ባሺያና ዎዛዲ ዴዒንዳዎሴ፤
 ዬያና ኔኤኒ ታና ናሽካያ ማዔህ ታ ዔሬኔ።
- 12 ታኣኮ ጂሉሞሮ ኬልቂ ኔ ታና ዓርቄኔ፤
 ናንጊና ኔ ኮራ ኔኤኒ ታና ናንጊሻንዳኔ።
- 13 ናንጊና ናንጊ ሄላንዳኣና
 ናንጊና ናንጋ ጎዳ ማዔ ዒሰራዔኤሌ ያኣዛህ ጋላቲንቶንጎ!

ዓኣሜን! ዓኣሜን!

ለምዓሳ ፓቂያ

42

(ዓይኑ. ማፃ ዓይ. 42—72)

- ዓይነቱ ሱኡጋህ ዓይህ ጎይያና ቆሬ ናኣታ ኬኤዚ ዔርዜ ባኮ
 ዒዲ ደውሶ ዎዴና ሺኢቆ ሺኢዲህ
- 1 ሮኦቶ ዴኤቢንቲ ዓልቃ ዎኣህ ዴንቃኒ ኮዓህጉዲ
 ያኦሲዮ! ታ ሼምፓህያ ኔና ዴንቃኒ ዴኤቢንቲ ኮዓኔ።
- 2 ታ ሼምፓህያ ያኦሲ፥ ናንጊና ባይቁዎ ያኣዛህ ዴኤቤኔ፤
 ዓይዲ ታኣኒ ሄሊ ያኦሲኮ ዓኣፖ ካሮ ዘጋንዳይ?
- 3 ዓሳ ቢያ፡- «ያኣዛህ ኔኤኮ ዎካዳያ?» ጋዓ ዎደና
 ዓቢፃ ታኣኮ ሮኦሮንታ ዎንቶዎ ሙኡዚ ማዔኔ።
- 4 ታኣኒ ዓሶኮ ዓርና ማዔ
 ሚርጌ ዓሶና ዎላ ያኦሲ ማኣሪ ዴንዳኔ፤
 ቦንቾ ኬሎ ቦንቻ ዓሳ ዓይነቱና ዒላሺህና
 ናንጊና ናንጋ ጎዳ ጋላታኔ፤
 ዬያ ታኣኒ ሚናኣ ናንጎ ማላዛ
 ዒና ታኣኮ ያዪህና ዎኣፃኔ።
- 5 ታኣኒ ዓይጎሮ ዎዛ ቲቃንዳይ?

41:9 ማቲ. 26:23፤ ማር. 14:18፤ ሉቃ. 22:21፤ ዮሃ. 13:18። 41:13 ዓይኑ. 106:48።

ዓይገንዳር ታ ማታዳንዳይ?
ታኣኒ ያኦሲ ጉሙርቃኔ፤
ዒዚ ታና ማአዳሂሮባ ታ ጋላታኔ።

6 ታ ያኦዛሂዮ! ታ ዎዛ ቲቄኔ፤
ሼምፔላ ታኣኮ ያዬኔ፤
ዬያሮ ዮርዳኖሴንታ ዓርሞኒዔሜ ዓጮይዳ ዓአ
ሚዛሬ ዲካ ዳዒ ታ ኔና ማላኔ።

7 ኔኤኮ ሶኦሪንታ ዋኣዎኮ ጉኡሚፃፓ ዔቄያና
ፔቲ ቁልባ ባጎ ቁልቦ ዔኤላኔ፤
ኔኤኮ ዋኣዎ ጉዳሂ ዠባራ ዲኡኪ ታና ባይዜኔ።

8 ናንገና ናንጋ ጎዳ ፔ ማአሪዎ ሮኦራ ዳካኔ፤
ዋንቶ ታ ዒዛም ዓይናዳ ዓይኑም ታኣኮ ዓአኔ፤
ታ ናንጎኮ ያኦዛሂያ ታ ሺኢቃኔ።

9 ታኣኒ ታ ያኦዛሂ፥ ታኣኮ ላላሂም፡-
«ኔኤኒ ታና ዓይጋ ዋሌይ?
ሞርካ ታና ዋኣዩሴም ዓይጋ ታ ያዩ ሃንታዎ?» ጋዓንዳኔ።

10 ሞርካ ታኣኮ ቢያ ዎዴ፡- «ያኦዛሂ ኔኤኮ ዎካ ዓአዎ?» ጌዒ
ቶኦቻ ዎድና ማጌፃኣ ታኣኮ ዓቱዎዎ ቆፃኔ።

11 ታኣኮ ሼምፔሌ ዓይጋ ኔ ያያይ?
ዓይጋ ኔኤኒ ሻሊንታይ?
ጉሙርቁዎ ዎዞ ኔኤኮ ያኦዛሂዳ ማሄ፤
ታና ዓውሳያ ማዔ ታ ያኦዛሂ ሃጋኣ ታኣኒ ጋላታንዳኔ።

43

ዒዒ ዳውሶ ዎዴና ሺኢቆ ሺኢጲሂ

1 ያኦሲዮ! ታኣም ዎጌ፤
ኔና ጉሙርቁዎ ማሌ ዳሮና ዎላ ታ ዛሎ ሞኦቲንቲ፤
ፑርቶ ማዳ ዓሶና ጌሻ ዓሶናይዳፓ ታና ዓውሴ።

2 ታ ያኦዛሂዮ! ኔኤኒ ታኣኮ ደዶ ዋርዲያሂኬ፤
ኔኤኒ ታና ዓይጋ ሃሻይ?
ሞርካ ታና ዓይጋ ሮኦጋሲ ያዩሳይ?

3 ኔኤኮ ፖዖና ጎኑሞና ታኣም ዳኬ፤
ዔያታ ታና ዔኪ ኔኤኮ ዲማዴ ዲኮ

- ኔኤኮ ዋርቆ ማኣሮዋ ታና ሄሊሶንጎ።
- 4 ታኣኒ ያኦሲም ዒንጎ ባኮ ሺኢሾ ቤዞ ዓኣዳንዳኔ፤
ሃይማ ፓጩኔ ጌይሱዖ ዋዛሳ ያኦዛሢ ባንሢ ታ ዴንዳንዳኔ፤
ናንጊና ናንጋ ጎዳ ማዔ ታ ያኦዛሢዮ!
ሚርጌ ሻዦ ዴንሃ ጎኦሎ ዋርቁ ዋርቁ ታ ኔና ጋላታንዳኔ።
- 5 ታኣኮ ሸምፔሌ ዓይጋ ኔ ያያይ?
ዓይጋ ኔኤኒ ሻሊንታይ?
ጉሙርቁዖ ዋዞ ኔኤኮ ያኦዛሢዳ ማሃ፤
ታና ዓውሳሢ ማዔ ያኦዛሢ ሃጊ ታ ጋላታንዳኔ።

44

ዓይነጥ ሱኡጋሢ ዓይሢ ጎይዖና ቆሬ ናኣታ ኬኤዚ ዔርዜ ባኮ
ማኣዶ ኮዒ ሺኢቆና ሺኢጲሢ

- 1 ያኦሲዮ!
ሚናኣ ዋዶና ኔኤኒ ማዴ ባኮ ቢያ
ኑኤኒ ኑ ዋዮና ዋይዜኔ፤
ኑኤኮ ቤርታኣ ዓዶንሢ ዔያቶ ዋዶና
ኔኤኒ ዔያቶም ማዴ ዲቃሢ ዓኮ ባኮ ኑም ኬኤዜኔ።
- 2 ሚናኣ ዋዶና ኔኤኒ ማዴ ባኮ ቢያ
ኑ ዓዶንሢ ኑም ኬኤዜኔ፤
ዬይያ፡- ኑ ዓዶንሢ ቤዞ ጌልዛኒ
ሜሌ ዴሮ ኔኤኒ ዳውሴኔ፤
ዔያቶ ጊኢጊሺ ዴይሢኒ ቤርታ ዒኢካ ናንጋ ዓሶ ኔ ባይዜኔ።
- 3 ዓጩሎ ዔያታ ዓርቁሢ ዔያቶ ጩንቾ ዓፓሮና ያሊቱዋሴ፤
ባሺ ዔያታ ዔኬሢያ ዔያቶ ዋልቁናቱዋሴ፤
ዬያ ቢያ ዔያታ ማዴሢ ኔኤኒ ዔያቶ ናሽኬሢሮና
ዔያቶና ዋላ ማዒ ኔኤኮ ዋልቆና ደዴሞና
ዔያቶ ኔ ማኣዴሢሮኬ።
- 4 ኔኤኒ ታኣኮ ካኣቲኬ፤
ጊንሢ ሃሢ ኔ ታኣኮ ያኦዛሢኬ፤
ያይቆኦዜ ዜርዖ ማዔ ኔ ዴራ
ባሻንዳጉዲ ማዴሢ ኔናኬ።
- 5 ኔ ኑና ማኣዴም ኑ ሞርኮ ኑ ባሻኔ፤
ኑ ዑፃ ዔቃ ዓሶ ኔ ሱንዖና ኑ ዳውሲሳኔ።
- 6 ታኣኒ ታኣኮ ሂኢዦ ጉሙርቁዋሴ፤
ታኣኮ ጩንቾ ዓፓራኣ ታና ዓውሱዋሴ።

7 ኑ ሞርካፓ ኑና ዓውሳንዳሢ ኔናኬ፤
ኑና ዒፃ ዓሶ ቦርሲሳንዳሢ ኔናኬ።

8 ጆኦሲዮ! ኔኤና ኑ ሄርሺንታኔ፤
ሱንጆዋ ኑ ኔኤኮ ናንገና ጋላታኔ።

9 ሃሢ ጋዓንቴ ኔ ኑና ከኤሬኔ፥ ቦርሲሲያ ቦርሲሴኔ፤
ኑኤኮ ጆሎ ዓሶና ዋላ
ኔኤኒ ከሰኪጆዋ ሃሼኔ።

10 ኑኤኮ ሞርኮ ቤርታፓ ዓኣሺንቲ ጳሽካንዳጉዲ ኔ ኑና ማሄኔ፤
ኑ ሞርካኣ ኑኤኮ ዓኣ ባኮ ቢያ ቡሬኔ።

11 ኔ ኑና ሹኪንታ ማራይጉዲ ማሄኔ፤
ሜሌ ዴር ዓጫ ኔ ኑና ዜርቄኔ።

12 ዴር ኔኤኮ ኔ ዳካ ሚኢሺም ሻንቹኔ፤
ዴያ ኔ ሻንቹጆና ቃሲ ዴንቄ ባኣዚ ባኣሴ።

13 ኑኤኮ ዓሺና ኑና ጫሽካንዳጉዲ
ኑ ኮርይዳ ዓኣ ዓሶማኣ ኑ ሚኢቹ
ሃሢ ዓማሊ ባኣዚ ማዓንዳጉዲ ኔ ማዴኔ።

14 ዴሬ ኑ ዛላ ጌሰቲ ዓማሊያ
ቶኣቹሢና ቶኣኮዋ ፔኤኮ ዓገሃንዳጉዲ ኔ ማዴኔ።

15 ቢያ ከላ ዓኣፖ ካራ ታኣኮ ዳውሲንቲናኬ፤
ቢያ ባኣዚና ታ ቦርሲንታያ ማዔኔ።

16 ታኣኒ ያዲ ማዔሢ
ሞርካ ታኣኮ ኮሞ ኮፃ ዎዶና
ሜሌ ዓሳ ቄኤዲ ታና ቶኣቻሢ ዋይዜሢሮኬ።

17 ዩይ ቢያ ኑና ሄሌሢ
ኔና ኑ ዋሊባኣንቴ፥ ኔኤኮ ጫኣቄሞ ኑ ሃሺ ሻሂባኣንቴኬ።

18 ዒና ኑኤኮ ኔኤም ጉሙርቄንታ ጎይሢ ዓኣንቴኬ፤
ቶካኣ ኑኤኮ ኔ ጎይፓፓ ከሰኪባኣሴ።

19 ኔኤኒ ጋዓንቴ ቦዓ ፔኤቃ ቤዛ ማንሢ ኑና ከኤሬኔ፤
ሻኔ ዲሚና ኔ ኑና ባይዜኔ።

20 ኑ ጆኣዛሢኮ ሱንጆ ኑ ዋሊ
ኩጮዋ ሜሌ ጆኣዛ ባንሢ ዔቄሴያ ኑ ማዔቴ፥

21 ኑ ጆኣዛሢ ዩያ ዔሩዋዓዳ?
ዒዚ ዒናይዳ ዓኣ ባኣዚ ዔዔራያኬ።

22 ጋዓንቴ ኔ ዛሎ ከላ ከላ ኑ ሃይቄጆ ዓቲ ዓቲ ዓኣኔ፤

ሹኪንታ ማራይጉዲያ ኑ ፓይዲንቴኔ።

23 ናንጊና ናንጋ ጎዳሢዮ! ዔቄ! ዓይጋ ኔ ጊንዓይ?

ዔቄ! ናንጊና ኑና ኔ ከኤሪ ሃሺፖ!

24 ኔኤኮ ዓኣፖ ካሮ ኑ ጊዳፓ ኔ ዓይጋ ሺርሻይ?

ኑኤኮ ሜታዲያና ሄርቂንቲ ዋይያዋ ዓይጋ ኔ ዋላይ?

25 ሳዖ ከዲ ሄላኒ ዑኪ ኑ ኩንቴኔ፤

ዒኢካ ኑ ሎኦሚ ላሄኔ።

26 ዔቂጋፓ ኑና ማኣዲኒ ሙኩ!

ኔኤኮ ናንጊና ናንጋ ናሹሞሮ ጌይጋፓ

ጊንሣ ማሂ ኑና ሻንቂ ዔኪ ዓውሴ!

45

ዓይነቱ ሱኡጋሢ ዓይሣ ጎይያና ዛዬና ዓይናዲንቴ ቆሬ ናኣታ
ዔርዜ ባኮ

ናሹሞ ዛላ ካላሊ

1 ዒና ታኣኮ ኮሺ ማሊሢ ከሳኔ፤

ታኣኒ ጊኢጊሼ ካላሎ ካኣቲሞ ዋይዚሳንዳኔ፤

ዲንጋ ታኣኮ ዔሮ ዓሲ ዓርቂ ፃኣፓ በዒሬጉዲኬ።

2 ሚዛጵማ ኔኤሲ ዓሲዳፓ በያ ባሺኬ፤

ኔኤኒ ጌሰታ ጌኤዛኣ ሄርሺሳያኬ፤

ዬያሮ ናንጊና ናንጋ ጎዳ ኔና ዓንጃኔ።

3 ቦንቾና ዲቃሥሢና ኩሜ ዋልቆ ካኣቲዮ

ጨንቾ ዓፓሮ ኔኤሲ ቱኬ።

4 ጎኑሞንታ ፒዜ ዋጌንታ ዲሎሞንታ ዛላ

ኔኤኮ ዲቃሣ ፑኡፑሞና ባሻኒ ቱኡቲ ከሰኬ፤

ሚዛቆ ኩጫ ኔኤኮ ዲቃሣ ዓኮ ባኮ ማድንጎ።

5 ሂኢዥ ኔኤሲ ዋርቂንቴያኬ፤

ኔ ሞርኮኮ ሳዞ ዲካንዲኔ፤

ዓጮ ካኣታ ባሺንቲ ኔ ቢታንቶ ዴማ ሎኦማንዳኔ።

6 ዖኣዛሢዮ! ኔኤኮ ካኣቲሞ ዖይታ ናንጊና ናንጋኔ፤

ካኣቲሞ ኔኤሲ ፒዙሞና ኔ ዋይሣያኬ።

44:22 ሮሜ 8:36።

- 7 ዲሉሞ ኔኤኒ ናሽካኔ፤
 ዋይዚ ዲዲህ ኔኤኒ ናሽኩሞሴ፤
 ዬያሮ ናንገና ናንጋ ጎዳ ማዔ ያኦዛህ ኔና ዶኦሬኔ፤
 ኔ ላጎይዳፓ ባሼ
 ቶኦኮ ኔኤኮ ዎዛ ዛይቴና ዲ ቲሽኬኔ።
- 8 ኬርቤንታ ዲሬቴንታ ቢሬጉዳንታፓ ኮሺንቴ ሳውቃ ባካ
 ኔኤኮ ካኦቱሞ ዓፒሎይዳ ፑኡኪንቴኔ፤
 ዳርዘ ዓጮና ሚዛጲሶና ካኦቱሞ ማኦራ
 ሚርጌ ሻኩ ዳንህህ ዎርቆ ጎኦሎ ዎርቆዛ ኔና ዎዛሳኔ።
- 9 ኔኤኮ ካኦቱሞ ማኦራ ዓኣ ዉዱሮ ናኦቶ ባኣካ
 ካኦቶ ናኦቶ ማዔ ዉዱራህህ ዓኣኔ፤
 ጌኤሻ ጌኤሺ ዎርቆና ሚዛጲሶና
 ሚዛጲ ዓፒላ ማይንቲ
 ኔኤኮ ካኦቱሞ ያይቶኮ ሚዛቆ ዛላ ዔቄኔ።
- 10 ኔኤኒ ታ ናዔሌ!
 ታኣኒ ኔኤም ጋዓ ባኮ ዎይዜ፥ ሃይሶዎ ታኣኮ ዲናፓ ዎይዜ፤
 ኔኤኮ ዓዶ ማኦሮንታ ዳሮንታ ዎሊ ሃሼ።
- 11 ሚዛጲማ ኔኤኮ ካኦቲ ዲና ባይዜኔ፤
 ጋዓንቴ ዲዚ ኔኤኮ ጎዳታህሮ ዲዛ ቦንቹ።
- 12 ዲርሴኮ ዉዱሮ ናኦታ ዲንጎ ባኣዚ ኔኤም ዔኪ ዬዓኔ፤
 ያርጎጮ ዓሳኣ ቃይሺ ኔና ሺራኔ።
- 13 ካኦቲኮ ናኣ ቶኦካፓ ቶኮ ሄሊ ፓልሚ ዑኡቱሞ ማኦራ ዓኣኔ፤
 ማኦሃህያ ዲዘኮ ዎርቆ ሌሊኬ።
- 14 ዲዛ ፔኤኮ ሚዛጲ ማኦሃህ ማኦራ
 ካኦቲ ኮራ ዔውቲ ዓኣዳኔ፤
 ዲዘኮ ዔርጎና ዉዱራህህያኣ ዲዘ ጎኦቢህኔ።
- 15 ኮሺ ዎዛዲ ዎዛዲ
 ካኦቲ ማኦሪ ዎላ ዔያታ ጌላንዳኔ።
- 16 ዓቲንቆ ናኦታ ኔኤኮ ዓዶንህህ ቤዘ ካኦቱሞ ጌላንዳኔ፤
 ዎይሃንዳ ዓሶ ማሂ ዓጮ ቢያይዳ ኔ ዔያቶ ዶኦራንዳኔ።
- 17 ሱንያ ታ ኔኤኮ ሸይንቶ ቢያህም ማላታ ማሃንዳኔ፤
 ዬያሮ ዳሬ ናኣናና ኔና ሄርሼ ጎይህ ናንጋንዳኔ።

45:7 ዔ.ብ. 1:8-9።

46

ዓይነቱ ሱሉጋህሂ ዓይህ ጎይዖና ዓላሞዜህ ዓይናዲንታ ቆሬናኦቶ ዓይነቱሞ

ገኝሲኮ ኑኡና ዋላ ማዒዖ

1 ገኝሲ ኑኡኮ ፑኖ ካያህና ዋልቃህናኬ፤

ኑና ሃላ ማታህና ቢያ ኑኡኮ ዑኬ ማዒ ማኣዳህኬ።

2 ዬያሮ ሳዓ ዓገጃቴታዖ

ዲካኣ ዔቶ ባዛ ዔኤዲንቴቴያ ኑ ዒገጩዋሴ።

3 ባዞ ዋኣፃ ጉኡሚ ዓገጃቴያ

ዲካ ዬያ ዋኣፃ ኩሚፃፓ ዔቁያና ዓገጃቴያ

ኑኡኒ ዲቃታዓኬ።

4 ገኝሲኮ ካታሞ

ዲኤፖ ገኝሳህኮ ዲማዴ ማኣሮ

ዋዛሳያ ማዔ ዋታ ዋኣህሂ ዓኣኔ።

5 ገኝሲ ዬኖ ካታሚሎ ባኣካኬ፤

ዒዛ ዓገጃያ ዓገፃዓኬ፤

ጉቶ ዓማ ዒዞ ዒ ማኣዳንዳኔ።

6 ዴሬ ዋኦቶንዶ ካራ ባይዜኔ፤

ካኣታኣ ሎኦሚኔ፤

ናንገና ናንጋ ጎዳ ዑኡዞ ፔኤሲ ዋይዚሴ ዋዶና

ሳዓ ዓልቃኔ።

7 ቢያ ባኮ ዋይህ ጎዳ ኑኡና ዋላኬ፤

ያይቆኦጌ ገኝሳህኮ ኑኡኮ ፑኖ ካያህኬ።

8 ናንገና ናንጋ ጎዳኮ ማዶ

ሳገይዳኣ ዒ ማዴ ዓኮ ባኮ ዛጋኒ ሃኒ ሙኩዋቴ።

9 ዓይፃፓ ዴንዲ ጋፖ ሃላንዳኣና

ሳዓፓ ያልዚ ዒ ባይዛንዳኔ፤

ሂኢዮ ማንሃንዳኔ፤

ዋሮዎዋ ጋኣጩንዳኔ፤

ገቲሞዋ ታሚና ሚቻንዳኔ።

10 ሃውሹዋቴ፥ ታኣኒ ገኝሲ ማዔህያ ዔሩዋቴ፤

ታኣኒ ዴሮ ቢያ ባኣካ ዴግ ዴገ ጋዓንዳኔ፤

ሳገ ዑፃኣ ታኣኒ ፑኡፒ ዴዳንዳኔ።

11 ቢያ ባኮ ዋይህ ጎዳህ ኑኡና ዋላኬ፤

ያይቆኦጌኮ ገኝሳህኮ ኑኡኮ ፑኖ ካያህኬ።

47

ዓይነቱ ሱኡጋህ ዓይህ ጎይጾና ዓይናዲንታ ቆሬ ናኣቶ ዓይነቱ
ጾኦሲ ዓጮኮ ቢያ ካኣቲ፣ ማዕህህ

1 ዳሬዮቲ ቢያ ኩጮ ዒንህኮ ባዑቀቲ!

ዑኡዘቀ ዒንህኮ ዳጊዲ

ጾኦሲም ዒላሹቀቲ!

2 ዓጮ ቢያይዳ ዳኤፒ ማዕ ካኣታህ

ዳኤፒ ማዕ ናንጊና ናንጋ ጎዳ ዒጊቻያኩ።

3 ዒዚ ዳሮ ኑ ቢታንቶ ዳማ ማህኔ፤

ካኣታ ኑ ዳማ ማዒ ዋርቃንዳጉዲ ማዳኔ።

4 ዒዚ ናሽካ ያይቆኦቤም ቦንቾ ማዕ

ኑኡኮ ዳኔሎቀ ዒዚ ኑም ደኦሬኔ።

5 ዓሳ ዒላሻኣና፣ ዛያህያኣ ዋርቃኣና

ጾኦሲ ፔ ካኣቲም ያይቶ ቤዘ

ናንጊና ናንጋ ጎዳ ሌካ ዒ ዳዓ ቤዘ ኬሰኬኔ።

6 ዓይናዲቀቲ፣ ኑ ጾኦዛህም ዓይናዲቀቲ!

ዓይናዲቀቲ፣ ኑ ካኣቲም ዓይናዲቀቲ!

7 ኑ ጾኦዛህ ዓጮ ቢያኮ ካኣቲኬ፤

ዬያሮ ጋላታ ዓይነቱም ዒዛም ዓይናዲቀቲ!

8 ጾኦሲ ፔኤኮ ደማዳ ካኣቲም ያይታ ዳዕኔ፤

ዓጮ ዳሮቀ ዋይህህ ዒዛኬ።

9 ዓብራሃሜ ጾኦዛህ ዳሮና ዋላ

ዓጮ ዳሮኮ ሱኡጋ ቡኪንቴኔ፤

ዓጮ ካኣታኣ ዒዛሮኬ፤

ዒዚያ ኮሺ ዳግ ዳጊ ጌዔያኩ።

48

ቆሬ ናኣቶ ዓይነቱ

ጾኦሲ ካታም ማዕ ደዮኔ

1 ናንጊና ናንጋ ጎዳ ዳኤፒኬ፤

ኑ ጾኦዛህ ካታምይዳ፣ ዒዛም ደማዳ ዳካ

ዳጊ ጌዔ ጋላታ ዒዛም ጋላቲንታንዳያ ኮይሳኔ።

2 ዓጮ ቢያኮ ዋዛ ማዕ

ኬደ ባንጾና ሃኬና ዳዳ ዳጌ ቤዘይዳ ሚዛጳ ደዮኔ ዳካ

- 3 ደካማ ካላታህ ካታሞኬ።
 3 ጾካዛህ ሲዘኮ ዋርዲዮ ጋራ ማዒ
 ሲዘኮ ገቲማህ ማዒ ማርካሴ።
- 4 ካላታ ዋላ ቡኪንቲ ሙኬ፤
 ዔያታ ዋላ ዑፃ ያሎሮ ጎዔ።
- 5 ጋዓንቲ ዔያታ ዬኖ ካታሜሎ ዛጋያ ዲቃቲ፤
 ዒጊጨያ ጳሽኬ።
- 6 ሸይቹ ዓርቁ ላኣለጉዲ
 ዒኣካ ጎጋይቁ ዔያታ ዚኪንቲ።
- 7 ዓባ ኬሰካ ባንያ ዠባራ
 ቲርሴሴ ዓጮኮ ዋኣያ ካኣሚሎ ሜንሣሣጉዲ
 ኔኔኒያ ዔያቶኮ ዋልቆ ላቢሲ ጎቃይሴ።
- 8 ናንጊና ናንጋ ጎዳ ማዴ ባኮ ኑ ዋይዘህጉዲ
 ቢያ ባኮ ዳንዳዓ ጎዳህ ካታማ ዬኖ ጎይያ ማዓንቲ
 ኑ ዓኣፒና ኑ ዛጌ፤
 ዒዚ ዬኖ ካታሜሎ
 ናንጊና ዶዲሺ ዴይሣንዳ።
- 9 ጾኣሲዮ! ኑኡኒ ኔኔኮ ጌኤገ ማኣርይዳ ማዒ
 ኔኔኮ ማኣሪያ ኑ ማላ።
- 10 ጾኣዛህዮ! ኔና ጋላቲፃ ዓጫ ማዔ ካርና ሄሌህጉዲ
 ሱንፃኣ ኔኔኮ ዒማ ጎይያ ማዔ።
- 11 ኔኔኒ ፒዜ ዋጋያ ማዔህሮ
 ጂዮኔይዳ ናንጋ ዴራ ዋዛዳ፤
 ዪሁዳ ካታማ ናንጋ ዓሰዋ ዋዛሳ።
- 12 ዋሊ ገንያ ኬሰኪ ጂዮኔ ሸሩዋቲ፤
 ዒዘ ዴዒ ካፖ ሴኤሎዋ ፓይዲዋቲ።
- 13 ዒንህህ ሙካ ሸይንቶም ኬኤዛኒ
 ዒዘኮ ዶዶ ኬኤሎ ዲያዋ ማሊ ጳቂሁዋቲ፤
 ዋርዲዮ ቤዘዋ ዛጉዋቲ።
- 14 ዒንህህ ዔያቶም ኬኤዛንዳህ፡- «ጾኣሲ ያዲኬ፤
 ኑ ጾኣዛህ ናንጊና ናንጋያኬ፤
 ሴካ ቤርቲማኣ ዒ ኑና ዔኪ ዓኣዳንዳ።» ጌዒኬ።

48:2 ማቲ. 5:35።

49

ዓይነቱ ሱኡጋህ ዓይህ ጎይጾና ዓይናዲንታ ቆሬ ናኣቶ ዓይነቱ
ቆሎ ጉሙርቂህ ዓኤዩሞ ማዒያ

1 ዓሳ ቢያህ ዋይዙዋቴ!
ዓጮይዳ ናንጋ ዳራ ቢያ ዋይዙዋቴ!

2 ዒንህ ሂርኬ ዓሶንታ ዳጌ ዓሶንታ
ጾርጎጮንታ ማንቆንታ
ሃያ ዋይዙዋቴ።

3 ዳንጋ ታኣኮ ዔራቶ ጌኤሲ ጌሰታኔ፤
ታኣኮ ዒኖ ማሊፃኣ ማሊ ጰቂሥህ ዔርዛኔ።

4 ዋዮ ታኣሲ ታኣኒ ኮኣኪንህ ባንህ ማሃንዳኔ፤
ታኣኮ ዓኣቶዋ ሚርጌ ሻዡ ዳንህ ዋርቆ ጎኦሎ
ዋርቂ ታ ፔጋሳንዳኔ።

5 ፑርታ ኬሊ ሙኬም ፑርቶ ዓሳ ታና ማንጋኣና
ታኣኒ ዓይጋ ዒጊጮይ?

6 ዬያጉዲ ሃህ ፔኤኮ ቆሎ ጉሙርቃዘንህና
ፔ ጾርጎቹሞና ሂርሺንታ ፑርቶ ዓሳ
ታና ማንጌቴያ ዓይጋ ታ ዒጊጮይ?

7 ሜሊህኮ ሺምጋህ ማሃ ሻንቂ ዓውሳኒ ዳንዳዓ ዓሲ
ጊንህ ሃህ ዬያ ማሃያ ሚኢሾ ጾኦሲም ጨጋኒ ዳንዳዓ ዓሲ
ፔቴታያ ባኣሱ።

8 ዓሲኮ ሺምፔ ዛላ ሚኢሾ ጨጊህ ሚርጌ ሜቶኬ፤
ዋዚጉዳ ሚርጌ ሚኢሾ ጨጊንቴቴያ ጊዲዋሴ።

9 ሃይቁዋጉዲ፣ ዲኡኪንቴዋጉዲ
ናንጊና ናንጋያ ማሃኒ
ዋዚጉዳ ሚርጌ ሚኢሾ ጨጊንቴቴያ ጊዲዋሴ።

10 ዔሮ ዓሳ ሃይቃያ ማዔህ ዔርቴያኬ፤
ዬይ ዔሮ ዓሳ ዔኤዮና ቤልጾ ዓሶና ዋላ ሄኮ ሃይቃኔ፤
ዬያታ ቢያ ቆሎ ፔኤኮ ሃሺ ዳንዳኔ።

11 ሚርጌ ዳኖም ዔያታ ፔ ሱንህ ሱንህ ጌህ ዔኤሌታቴያ
ዔያቶኮ ዲኡጋ ናንጊና ናንጎ ማኣሮ

ሾይንታጋ ሾይንቲ ሄላንዳኣና
ዬይ ዔያቶኮ ናንጎ ቤዘ ማዓንዳኔ።

12 ዓሲ ፔኤኮ ቆሎና ቦንቹንቴ ጎይህ ጋፒንህ ሄሉዋሴ፤
ጴዲ ባይቃ ቆልሞ ማላኔ።

- 13 ዬይ ፔና ጉሙርቃ ዔኤዮ ዓሶና
 ዔያታ ጋዓ ባኮ ዋይዚ ዔካ ዓሶናኮ
 ጋፒንዖ ካሮኬ።
- 14 ማራይጉዲ ሳዓ ዴሜሞ ዔያታ ጊኢጌያኮ፤
 ሃይቢ ዔያቶ ማራይ ሃንቆሢጉዲ ሃንቃንዳኔ፤
 ፒዜ ዓሳ ጉቴና ዔያቶ ዋይሣንዳኔ፤
 ፔኤኮ ቦንቺንቴ ማኣራፓ ሃኪ ሳዖ ዴማ ዔያታ ዋዓንዳኔ።
- 15 ዖኦሲ ጋዓንቴ ሸምፓሢ ታኣኮ ሳዖ ዴማፓ
 ማሂ ሻንቁ ዔካንዳኔ፤
 ጎኔና ዒዛ ቤርታ ታኣኒ ዔርቴያኬ።
- 16 ዓሲ ዖርጎቺ ማዓዛ
 ዖርጎቺማኣ ሚርጊ ሚርጊ ዓኣዳዛ
 ዒዛ ዒጊጨፖ።
- 17 ዒዚ ሃይቁ ዋዶና ዔኪ ዓኣዳንዳ ፔቴ ባኣዚታዖ ባኣሴ፤
 ዬይ ቆላ ዒዛና ዋላ ዱኡቲንዲዋሴ።
- 18 ዓሲ ፔኤኮ ናንጋ ዋዶማና ዋዛዴያታቴያ
 ቢያ ባካ ዒዛም ጊኢጌሢሮ ዒ ጋላቲንታያ ማዔቴያ።
- 19 ሃይቁ ለሚ ዒ ፖዒ ዛጉዋ ቤሲ
 ፔኤኮ ቤርታኣ ዓዶንሢ ባንሢ
 ዒዚ ዓኣዳንዳኔ።
- 20 ማሊ ጳቁሥሢ ባኣ ዖርጎቺ ዓሲ
 ካይዚ ቦዖጉዲ ጉሪ ሃይቁ ባይቃያኬ።

50

ዓሳኣፔ ዓይነቱ

- ዖኦሲ ዋዛሳ ጎኔ ካኣሺ
- 1 ዴኤፖ ዖኣዛሢ ማዔ ናንጊና ናንጋ ጎዳ ኬኤዛኔ፤
 ዓባ ኬሰካ ካራፓ ዴንዲ ጌላ ካሮ ሃላንዳኣና
 ሳዖይዳ ዓኣ ዓሶ ቢያ ዒዚ ዔኤላኔ።
- 2 ዖኦሲ ሚርጌና ሚዛጳያ ማዔ
 ዲዮኔ ካታማፓ ሸኤሪ ፖዓኔ።
- 3 ኑ ዖኦሲ ሙካንዳኔ፥ ዚቲ ጋዓዓኬ፤
 ዒዛኮ ቤርታ ዔኤታ ታሚ ዓኣኔ፤
 ኮሮይዳኣ ዋልቁና ዓኣ ዓልጎ ዢባሬ ዓኣኔ።
- 4 ዒዚ ፔ ዴሮ ዋጋ ዋዶና

- ጫሪንጮንታ ሳዖንታ ማርካ ማሂ ዔኤላንዳ።
- 5 «ዒንጎ ባኮ ታአም ሺኢሺያና ታአና ዋላ ጫአቄ ዓሶ
 ታአም ጉሙርቁንታያ ማዔ ታ ዓሶ
 ታ ቤርታ ቡኩሱዋቱ» ጋዓ።
- 6 ያኦሲ ፔኤሮ ዋጋያ ማዔሢሮ
 ጫሪንጫ ዒዛኮ ዴጊ ጌዔ ዓሉሞ ከኤዛ።
- 7 «ዒሰራዔኤሌ! ታ ኔ ዑፃ ማርካዶም፤
 ዒንሢ ታ ዴራ! ዋይዙዋቱ ታ ከኤዛም፤
 ታአኒ ናንጊና ናንጋ ጎዳ ማዔ ኔ ያኦዛሢ።
- 8 ኔኤኒ ታአም ዒንጋ ዒንጊዖር ታ ኔና ቦሁዋሴ፤
 ቢያ ዋዴ ሚቺ ኔ ዒንጋ ዒንጊፃ ታ ቤርታ ጴዳ።
- 9 ታአኒ ጋዓንቴ ኔኤኮ ሞኦፃፓ ዚዮ ጌማቶ
 ኔኤኮ ባርታፓ ኮላቶ ኮዑዋሴ።
- 10 ካዮ ቦዓ ቢያ
 ዲካ ሄንቃ፥ ሺያና ፓይዲንታ ቆልማ ታኣሮኬ።
- 11 ጫሪንጫ ካፖ ቢያ ታአኒ ዔራኔ፤
 ዓሳ ናንጉዋ ዳውሎይዳ ዓኣ ቦዓኣ ታኣሮኬ።
- 12 ሳዖንታ ዒኢካ ዓኣ ባካ ቢያ ታኣሮታሢሮ
 ዔያታ ናይዲንቴቲያ ታ ኔኤም ከኤዙዋሴ።
- 13 ታአኒ ዚዮ ጌማቶኮ ዓሽኮ ሙዓ?
 ኮላቶ ሱጉዖዋኣ ታአኒ ዑሽካ?
- 14 ያኦሲም ጋላታ ዒንጊሢ ሺኢሺ፤
 ናኣቦዋ ኔኤኮ ዴኤፖ ያኦዛሢም ዒንጌ።
- 15 ማታ ኔና ሄሌ ዋዶና ታና ዔኤሌ፤
 ታአኒ ኔና ዓውሳንዳ፤
 ዩካፓ ኔ ታና ጋላታንዳ።» ጋዓ።
- 16 ጎሞሲም ጋዓንቴ ያኦሲ፡-
 «ኔኤኒ ታኣኮ ዋጎ ናባባኒ
 ታኣኮ ጫአቄም ኔ ዳንጎና ከኤዛኒ
 ዓይጎ ዔራቶ ኔኤኮ ዓኣይ?
- 17 ጎሪ ታ ኔና ዘራ ዘሮ ኔ ዒፃ፤
 ቃኣሎ ታኦሲ ጊንሢም ከኤራ።።
- 18 ዉሲ ዓሲ ኔ ዴንቃዖ ዋላ ጳሽካ፤
 ዘኣዛ ኮኦማ ዓሰና ዋላ ፔቲ ኔ ማዓ።።»
- 19 «ኔ ዳንጋ ፑርታ ባኣዚ ጌሰታንዳጉዲ ኔ ሃሻ፤፤

- ጌኤዛ ኔኤኮ ቢያ ጌሺሢ ሌሊኬ።
 20 ደዒጋፓ ኔኤኒ ኔ ጌርሲ ደንካኔ፤
 ኔ ዒንዶ ናዖኮዋ ሱንፆ ፑርቲሳኔ።
 21 ዬያ ኔ ማዳንቴያ ታኣኒ ዚቲዮ ጌዔኔ፤
 ዬያር ታኣኒ ኔጉዲ ማዔያ ኔኤም ማላኔ፤
 ሃሢ ጋዓንቴ ፔጌና ታ ኔና ጎሪ ዙራኔ። »
- 22 «ዒንሢ ታና ቶኦቻ ዓሳ ቢያ ሃያ ዒና ዔኪ ዋይዙዋቴ፤
 ሃንጎ ታ ዒንሢ ባይዛንዳኔ፤
 ዒንሢ ዓውሳንዳያኣ ባኣሴ።
- 23 ታኣም ጋላታ ዒንገሢ ሺኢሻሢ ታና ቦንቻኔ፤
 ጎይፆ ፔኤሲ ፒዚሳሢም
 ያኦሲኮ ዓውሲፆ ታኣኒ ቤኤዛንዳኔ» ጋዓኔ።

51

ዓይነቱ ሱኡጋሢ ዓይሃ ጎይፆና ዓይናዲንታ ዳውቴ ዓይነቱ፤
 ዳውቴ ቤርሳቤሄ ዒኢሴያና ያኦሲ ማሊፆ ኬኤዛ ናኣታኔ ሙኪ ዒዛ
 ጎሪኔ።
 ማኣሪንታኒ ሺኢቁንቴ ሺኢጰሢ
 1 ያኦሲዮ! ኔኤኮ ኮሹሞጉዴያ ታና ማኣሬ፤
 ኔኤኮ ሚጨንቲፆ ሚርጉሞና
 ዳቢንቶ ታኣኮ ዓቶም ጌዔኔ።
 2 ዳቢንቶ ታኣኮ ጋፒሲ ማሰኬ፤
 ታ ጎማፓ ታና ጌኤሹ።

3 ታኣኒ ታኣኮ ዳቢንቶ ዔራኔ፤
 ቢያ ዋዴ ጎማ ታኣሲ ታ ቤርታ ታኣም ጰዳኔ።
 4 ታኣኒ ዋይዘ ዒዔሢ ኔኤምኬ፤
 ታ ኔ ቤርታ ፑርታ ባኣዚ ማዳኔ፤
 ኔኤኒ ዒፆ ባኮ ታ ማዳኔ፤
 ዬያር ኔኤኒ ታኣም ዋጌ ዋጊፆና
 ማታሢያ ሄሊሴሢ ፒዜኬ።
 5 ታ ዒንዳ ታና ጎጰዳማፓ ታኣኒ ጎማናኬ፤
 ሸይቴማፓ ዓርቃፆ ታ ዳቢንቴያኬ።

51:1 2ሳሙ. 12:1-15። 51:4 ሮሜ 3:4።

- 6 ኔኤኒ ፒዜ ማዕረግና ጎኑሞና ናሽካሢሮ
ኔ ዔራቶኮ ዓኣሺንቴ ባኮ ታና ዔርዜ።
- 7 ሂሶጾ ዒላዠና ታና ኮርዴ፤
ታኣኒያ ጌኤሽካንዳኔ፤
ታና ማሰከ፥ ሻቺዳፓ ባሺ ታኣኒ ቦኦራንዳኔ።
- 8 ዋዛ ዑኡሲ ኔ ታና ዋይዚሴ፤
ኔ ታኣኮ ማንህ ማጌፃ ዋዛዳንዳኔ።
- 9 ታኣኮ ጎሞ ዛጊፖ፤
ዳቢንቶዋ ታኣሞ ዓቶሞ ጌዔ።

- 10 ታ ጾኦዛሂዮ! ጌኤሺ ዒና ታኣሞ ዒንጌ፤
ፒዜ ማዔ ዓያና ጋራ ታኣኮ ጌህ።
- 11 ኔ ቤርታፓ ታና ሺኢሺፖ፤
ኔኤኮ ደማዳ ዓያኖዋ ታጊዳፓ ዔኪፖ።
- 12 ኔኤኒ ታና ዓውሴ ዋደና ዒንጌ ዋዞጉዴ ዋዛ ታኣሞ ዒንጌ፤
ዓይሂንታያ ማዓንዳጉዲ ታና ማኣዴ።
- 13 ዩካፓ ታኣኒ ዓይሂያ ኔኤኮ ካፑዋ ዓሶ ዔርዛንዳኔ፤
ጎሞ ዓሳኣ ኔ ባንሂ ማዓንዳኔ።

- 14 ታኣኮ ዳኤሻሂ ማዔ ታ ጾኦዛሂዮ!
ዓሲ ዋዳሂዳፓ ታና ኔ ካፔ፤
ኔኤኒ ዓውሳያ ማዔሂሮ ጋላታ ዓይኑሞ ታ ዓይናዳኔ።
- 15 ናንጊና ናንጋ ጎዳሂዮ! ዳንጎ ታኣኮ ቡሌ፤
ታኣኒያ ኔና ጋላታንዳኔ።

- 16 ዋንዴ ኔ ዒንጎ ባኣዚ ናሽካያ ማዔቲ
ታኣኒ ኔኤሞ ዒንጌያ ናንዳኔ፤
ሚቺ ዒንጎ ዒንጊፃኣ ኔና ዋዛሱዋሴ።
- 17 ጾኦሲሞ ዒንጊንታ ዒንጊሂ ማቄ ዒኔከ፤
ማቄያና ሂርኪ ጌዔ ዒና ዒዚ ቦሁዋሴ።

- 18 ጾኦዛሂዮ!
ፃዮኔ ማኣዳኒ፥ ዩራሳላማኮዋ ከኤሎ ዲያ ኮሻኒ
ሃዳራ ኔኤኒ ጌዔሂጉዲ ማጾንጎ።
- 19 ዩማ ዋደና ፒዜ ዒንጎ ዒንጊጾንታ
ሚቺ ዒንጎ ዒንጊጾናኣ ኔኤኒ ዋዛዳንዳኔ፤
ኑኤኒያ ኔኤሞ ዒንጎ ባኮ ዒንጎ ቤዛ ዚዮ ጌማቶ ሺኢሻንዳኔ።

52

ዓይነቱ ሱኪጋሢ ዓይሣ ጎይጾና ዔራቶና ካላላንታ ዳውቴ ካላሎ፤ ዔደአሜ ዓሢ ደይቄ ሳኦጾኦ ኮራ ሙኪ፤ «ዳውቴ ዓቤሜሌኮ ማአሪ ሙኮኔ» ጌይ ኬኤዜያና ዓይናዲንቴያኮ።

ጾኦሲኮ ዎጎና ኮሹሞና

1 ዔዘ ዎልቆሶ ፑርቱሞና ዓይጋ ኔ ጨኢዲንታይ?

ጾኦሲ ዓኣፓ ኔኤኒ ቶኦቺንቴያታ?

ቢያ ዎዴ ዎይቲ ኔ ጾቶርቃይ?

2 ኔኤኒ ጌሺሢ ታኣኮ ማዶኬ ጌዒ ዓርቄሦ

ዳንጋ ኔኤኮ ዓጩ ሸጊሬጉዲ ሳይሲንታ ሱኪ ሸራሬ።

3 ኮሹሞይዳፓ ባሼ ፑርቱሞ

ጎኑሞይዳፓ ሉኡዙሞ ባሼ ኔኤኒ ደኦራሬ።

4 ኔኤኒ ዓሶ ጌሻ ዓሢ

ዓሲ ማአሳንሦንዶ ጎይሢ ጌሰታኒ ናሽካሬ።

5 ዬያር ጾኦሲ ኔና ጋፒ ባይዛንዳሬ፤

ኔ ማአራፓ ኮሲ ኔና ዒዚ ዳውሳንዳሬ፤

ዓሳ ናንጋ ሳዓፓ ኔና ቱጊ ኬኤራንዳሬ።

6 ዒሎ ዓሳ ዬያ ዛጊ ዓጊጫንዳሬ፤

ሚኢቺያ ሂዚ ጌዒ ዔያታ ሚኢጫንዳሬ፡-

7 «ጾኦሲ ፔኤኮ ጊቲማጉዲ ማሂባኣ

ፔ ቆሎ ሚርጉሞና ሄርሺንቴ

ፔ ፑርቱሞናኣ ደዴ

ሃያ ዓሢ ዛጉዎቴ።»

8 ታኣኒ ጋዓንቴ ጾኦሲ ማአርይዳ

ዎርቄ ዓኣ ዛይቶ ሪሚቶጉዲኬ፤

ዒዛኮ ጋፑሞ ናሹሞ

ናኣናና ታ ጉሙርቄ ጎይሢ ናንጋንዳሬ።

9 ጾኦሲዮ!

ኔኤኒ ማዴ ኮዠ ባኮር ቢያ ናንጊና ታ ኔና ጋላታሬ፤

ሱንፃ ኔኤኮ ኮሺታሢር ኔ ሱንፃ ታ ሃጋኣ ዎዛ ማሃሬ፤

ኔኤሞ ደሚዴ ዓሶ ባኣካ ታ ኔና ጋላታሬ።

52:1 1ሳሙ. 22:9-10።

53

ዓይነቱ ስሑጋህ ዓይህ ጎይያና ዔራቶና ካላሊንቴ ዳውቴ
ዓይነቱ

ዓሲኮ ፑርቱሞ

1 ዔኤያ ዓሲ ፔ ዒናና «ያኦሲ ባኣሴ» ጋዓኔ፤

ዔያታ ፑርታ ዓሲኮ፤

ማዳ ዔያቶኮ ሻኣካያኮ፤

ዔያቶ ባኣካ ፔቴታ? ኮሺ ማዳይ ባኣሴ።

2 ማሊ ጳቂህ ዓሲና ያኦሲ ኮዓ ዓሲያ ዓኣቴ ዛጋኒ

ዒዚ ጫሪንጫፓ ዓሶ ዛጋኔ።

3 ጋዓንቴ ቢያህሂ ዣኣሌኔ፤

ዔያታ ፔቴ ማዒያ ፑርቱኔ፤

ዔያቶይዳ ፔቴታ? ኮሺ ባኣዚ ማዳይ ባኣሴ።

4 ዓሲ ካህ ሙዓህጉዲ ዳር ታኣኮ ሙዓ ዓሳ

ታና ዔኤሊ ዔራቶ ዓሳ

ዔያታ ፑርቶ ማዳ ዓሳ

ፔቴታ? ዔኤቢ ዛገ ዔራቶዓዳ?

5 ያኦሲ ፔ ዳር ሞርኮ ማንህህረ

ዎኖ ዎዳፓኣ ባሺ ዒገቹሞ ዔያታ ዓርቄኔ፤

ዒዚ ዔያቶ ዒፃህረ ጋፔ ዔያታ ቦርሲንታንዳኔ።

6 ጸዮኔይዳፓ ዒሰራዔኤሌሞ ዳቂንታ ዔዓያታቴ ዓይጎ!

ያኦሲ ፔ ዳርኮ ዲዒንቴ ባኮ ማሃ ዎዶና

ያይቆኦና ናኣታ ዎዳዳንዳኔ፤

ዒሰራዔኤሌ ዳራኣ ኮሺ ዎዳዳንዳኔ።

54

ዓይነቱ ስሑጋህ ዓይህ ጎይያና ጎኦላና ዓይናዲንታ ዳውቴ
ዓይነቱ፤ ዜፓ ዓሳ ሳኣያኦሌ ኮራ ሙኪ፥ «ዳውቴ ፑኒ ኑ ኮራ ዓኣኔ»

ጌዒ ኮኤዜያና ዓይናዲንቴያኮ።

ሞርኮ ኩጫፓ ዓታኒ ሺኣቂንቴ ሺኣጲህ

1 ያኦሲዮ! ኔ ሱንያና ታና ዓውሴ፤

ኔ ዎልቆና ታኣሞ ዎጌ።

53:3 ርማ 3:10-12።

- 2 ያኑሲዮ! ሺኢጲያ ታኣኮ ዋይዘ!
ታኣኒ ጋዓ ባኮዋ ዒና ዔኬ።
- 3 ግንጎ ዓሳ ታኣም ዔቄኔ፤
ጌኔ ማዳ ዓሳ ሸምፓሢ ታኣኮ ዴሂ ሃንታኔ፤
ያኑሲ ዔያታ ዔኤቢኬ ጎዑዋሴ።
- 4 ጋዓንቴ ያኑሲ ታና ማኣዳሢኬ፤
ናንጊና ናንጋ ጎዳኣ ታና ኬኤለንቁ ዓርቄኔ።
- 5 ዔያቶኮ ጌኖ ማዳ ታና ዋኣዪሳ ታ ሞርኮም ማሄ፤
ዔያቶ ባይዘ፣ ኔኤኒ ጉሙርቄንታያ ማዒያ ዳቄ።
- 6 ኔኤም ዒንጎ ባኣዚ ታ ሸኔና ታ ዒንጋንዳኔ፤
ናንጊና ናንጋ ጎዳሢዮ!
ዪይ ኮይሳያ ማዔሢሮ ታ ኔና ጋላታኔ።
- 7 ታ ሜታፓ ቢያ ኔ ታና ዓውሴኔ፤
ታ ሞርኮኮዋ ሎኦሚያ ታ ዛጌኔ።

55

ዓይነቱ ሱኡጋሢ ዓይሣ ጎይያና ጎኦላና ዓይናዲንታ ዳውቴ ኬኤዚ ዔርዜ ባኮ

- 1 ያኑሲዮ! ሺኢጲያ ታኣሲ ዋይዘ፤
ታ ኔና ሺኢቃ ሺኢጲያ ቶኦዛዲፖ!
- 2 ታ ባንሢ ዛጌ፣ ዋይዘያ ታኣም ማሄ፤
ጋርሲና ታኣኒ ዲቃቴኔ፣ ዓጊዲያ ዓጊጻኔ።
- 3 ታ ሞርካ ታኣም ዚርቃሢሮ ታ ዒጊጩኔ፤
ፑርቶ ሄርቁ ዋይሢፃ ታና ሺኢቹኔ፤
ዔያታ ፑርታ ሜቶ ታ ጊዳ ዔኪ ሙካኔ፤
ዒዲ ዳጋና ታና ዔያታ ዛጋኔ።
- 4 ዒና ታኣኮ ታና ማሊሢና ዋኣዪሳኔ፤
ታኣኒ ሃይቄኔ ጌይሲ ታና ዒጊቹ ዓርቄኔ።
- 5 ዒጊቹሞና ዲቃቲሢና ታ ዓርቄኔ፤
ዑፃ ታኣኮ ማዔ ካራና ዲቃታኔ።
- 6 ዶኦሌጉዲ ጋኣሲ ታኣኮ ዓኣቴ ዓይጎ!
ባራኒ ዴንዲ ታ ሃውሼያ ናንዳኔ።

54:7 1ሳሙ. 23:19፤ 26:1።

- 7 ሄኤዶ ቤቲ ታኣኒ ሃኬ ዓኣዳቴ
 ዓሳ ናንጉዋ ዳውሎይዳ ታ ናንጋንዳቴኬ።
- 8 ዓልጋሢ ዠባርና ዠኢፖናፓ ታ ጳሽኪ
 ሩኡሪና ታ ማኣር ባንሢ ታ ሄሌያ ናንዳኔ።
- 9 ናንጊና ናንጋ ጎዳሢዮ!
 ካታሜሎይዳ ጌኔ ማደና ዠሎና ታ ዛጋሢር
 ዲቃሢ ካራ ዔያቶኮ ባይዜ፤
 ጌሰታ ሙኡጮዋ ዔያቶሲ ሲኢሬ።
- 10 ዒዛ ሜቶና ባይሲንታና ኩሜ ካታማኬ፤
 ፑርቶ ዓሳ ዋንቶንታ ሮኦርንታ ዒዛኮ ኬኤሎ ዲያ ዑፃ ሃንታኔ።
- 11 ባይሲንታ ዒዛይዳ ዓኣኔ፤
 ጌኔ ማደና ጌሺሢና ዓሳ ቡካ ጳኣካፓ ዒዛኮ ባይቁዋሴ።
- 12 ታና ጫሽካሢ ታ ሞርካሢቱዋሴ፤
 ዋንዳ ዩያታቴ ጊቢ ታ ዳንዳዔያ ናንዳኔ፤
 ታ ዑፃ ዖቶርቃሢያ ዒዛቱዋሴ፤
 ዒዛታቴ ቤርታፓ ታ ዒዛኮ ዓኣሺንቴያ ናንዳኔ።
- 13 ጋዓንቴ ዩያ ማዳሢ ታ ኔና ጉሙርቃ
 ታኣኮ ላጋሢና፥ ዓጊናሢ ማዔ ኔናኬ።
- 14 ኦኡኒ ዖኣሲ ማኣራ ዳር ባኣካ ዋላ ሃንቴኔ፤
 ዋዛሳ ናሹሞዋ ኦኡኮ ዓኣኔ።
- 15 ዒና ዔያቶኮ ፑርቱሞ ቡኬ ቤሲታሢር
 ታ ሞርኮይዳ ዔያታ ዔሩዋንቴ ሃይቢ ዩዖንጎ!
 ሳዛና ዓኣዖዋ ዲኡኪንቶንጎ!
- 16 ታኣኒ ጋዓንቴ ዖኣሲ ባንሢ ዒላታኔ፤
 ናንጊና ናንጋ ጎዳሢ ታና ዓውሳኔ።
- 17 ዋንቶንታ ጉቶንታ ሮኦርንታ
 ታኣኒ ዔኤሊንታኔ፥ ዚኢሊንቴያ ታ ዚኢሊንታኔ፤
 ዑኡዞዋ ዒ ታኣኮ ዋይዛኔ።
- 18 ታና ማኪ ዔቁ ዓሳ ሚርጌኬ፤
 ታኣሞ ማሎና ዖላፓ ሸምፓሢ ታኣኮ ዒዚ
 ማሢ ሻንቁ ዔኪ ዓውሳንዳኔ።
- 19 ዔያታ ፔኤኮ ሃንቴያ ላኣሚባኣሴ፤
 ዖኣሲያ ዔያታ ዒጊጩዋሴ፤
 ሚናፓ ዓርቃያ ፔኤኮ ካኣቱሞይዳ ዓኣ ዖኦዛሢ
 ዋይዚ ዔያቶ ዒ ዳውሲሳንዳኔ።

- 20 ታኣኒ ዒዛ ታ ላገኬ ጋዓ ዓሢ
ፔ ላጎ ጳርቃኒ ፔ ኩጮ ዔቁሴኔ፤
ዎላ ጫኣቄ ጫኣቄሞዎ ሃሼኔ።
- 21 ደንጋ ዒዛኮ ያይሲዳፓ ባሼ ሺኢታኔ፤
ዒና ጋዓንቴ ዒዛኮ ያልዚ ማላኔ፤
ዑኡዛ ዒዛኮ ዛይቴይዳፓ ባሼ ኮሸካኔ፤
ጋዓንቴ ቱጊንቴ ጨንቻ ዓፓሮጉዲኬ።
- 22 ኔና ዴኤፃ ባኮ ቢያ ናንጊና ናንጋ ጎዳም ሃሼ፤
ዒዚ ኔ ቶኦኮ ዛጊ ዓርቃንዳኔ፤
ዒዚ ኮዦ ዓሶ
ፔቴታፃ ሜታዳንዳጉዲ ሜቶም ዓኣሢ ዒንጉዎሴ።
- 23 ያኦሲዮ! ኔኤኒ ጋዓንቴ ፑርቶ ዓሶ
ባይሲንታ ዔቴይዳ ኬኤራንዳኔ፤
ዬያታ ዓሶ ዎዳ ዓሶና ጌሻ ዓሳ
ዔያታ ናንጋኒ ኮይሳ ሌዖኮ ሄካሢታፃ ናንጋዓኬ፤
ታኣኒ ጋዓንቴ ኔና ጉሙርቃኔ።

56

«ደኦሌላ ሃኬ ዓኣ ሻኣቦይዳ» ጌይንቴ ዓይኑሞና ዓይኑሞ ሱኡጋሢ ዓይሢ ጎይፃ ካላሊንቴ ዳውቴ ካላሎ (ፒሊሰፄኤሜ ዓሳ ጌኤቴይዳ ዳውቴ ዓርቄያና ዒ ካላሌያኬ።)

- ያኦሲ ጉሙርቄ ሺኢቁንታ ሺኢጲሢ
- 1 ያኦሲዮ! ዓሳ ታና ዎኣዪሳሢና
ሞርካኣ ታኣኮ ታና ቢያ ዎዴ ዳውሳሢናሮ
ታኣም ሚጨንቴ።
- 2 ያቶርሙሞና ታና ያላ ዓሳ ሚርጌኬ፤
ሞርካ ታኣኮ ሮኦር ጉቤ ታ ዑፃ ዔቄኔ።
- 3 ታና ዒጊቻ ዎደና
ታኣኮ ጉሙርቄፃ ታ ኔጊዳ ማሃኔ።
- 4 ታኣኒ ያኦሲ ጉሙርቃሢሮ ዒጊጫዓ፤
ታኣም ዒንጊንቴ ሃጊ ማዓ ዎዞሮ ዒዛ ታ ጋላታኔ፤
ታኣኒ ዒዛ ጉሙርቃሢሮ
ዔዞ ዓሲ ታና ዎዳንዳይ?

5 ሞርካ ታኣኮ ሮኦር ጉቤ

- ታ ደቢንቴቴ ዓርቃኒ ኮሲ ሃንታኔ፤
 ቢያ ዎዴ ታና ባይዛኒ ዎላ ዘርታኔ።
- 6 ቡኪንቴ ታና ዔያታ ካታኔ፤
 ሄያ ቢያ ዔያታ ታኣኮ ኮጲሳኔ፤
 ሹምፓሢ ታኣኮ ባይዛኒ ኮሳኔ።
- 7 ያኦሲዮ! ዎይቴቴያ ዔያታ ቶሊ ዓቱዋጉዲ ማዴ!
 ያቶ ዴሮ ኔኤኮ ጎሪንቶና ዳውሲሴ።
- 8 ቃያሢ ታኣኮ ፃኣፒ ዓርቁ፤
 ዓቢያዎ ኔ ዶሎዘይዳ ቃዴ፤
 ቢያሢ ፃኣፒ ዓርቆ ቤዛ ዓርቁንቴያቴዋዓዳ?
- 9 ኔ ባንሢ ታኣኒ ዔኤሊንታ ኬሎና
 ሞርካ ታኣኮ ገንሢም ማዓኔ፤
 ዬያና ያኦሲ ታኣኮ ኮራ ማዔሢ ታ ዔራኔ።
- 10 ዬይ ታኣና ዎላ ማዔ ያኦዛሢ
 ቃኣሎ ታ ዒዛኮ ጋላታሢና ቦንቻ ያኦዛሢኬ።
- 11 ታኣኒ ዒዛ ጉሙርቃሢሮ ዒገጫዓ፤
 ዓሲ ታና ዓይጎ ዎዳንዳይ?
- 12 ያኦሲዮ!
 ኔኤም ታኣኒ ናኣቤ ናኣቢ ዓኣኔ፤
 ዬይያ ጋላታ ታ ኔኤም ሸኢሻያኬ።
- 13 ሃይቢዳፓ ኔኤኒ ታና ዓውሴኔ፤
 ዲቁንቴ ታኣኒ ሎኦሙዋጉዲ ኔ ታና ማኣዴኔ፤
 ዬያሮ ሹምፖና ዓኣ ዓሶ ዑፃ ፖዓ ፖያይዳ
 ያኦሲ ቤርታ ታኣኒ ሃንታኔ።

57

«ባይዚፖ» ጌይንታ ዓይነቱና ዓይነቱ ሱኡጋሢ ዓይሢ ጎይያ ካላላንቴ ደውቴ ካላሊ (ዳውቴ ሳኣዎኦሌ ቤርታፓ ፑኒ ዴና ዔቶ ጌሌያና ዓይናዳያኬ።)

ያኦሲ ማኣዳንዳጉዲ ሸኢቁንቴ ሸኢጲሢ

1 ያኦሲዮ! ታኣም ሚጨንቴ፥ ታና ማኣሬ፤
 ታ ሹምፓሢኮ ፑሮ ካያሢ ኔናኬ፤
 ሜቶ ዲጳ ዓኣዳንዳያ ሂላንዳኣና
 ኔኤኮ ጋኣዘ ዴሞ ታኣኒ ጌላንዳኔ።

56:12 1ሳሙ. 21:13-15።

2 ታአም ማሌ ባኮ ማዲ ኩንሣ ያኦዛሣ
 ዒዛ ዴኤፓሣ ባንሣ ታኣኒ ዒላታኔ።
 3 ያኦሲ ፔ ሚጨንቲያና ጉሙርቁንቲያ
 ጨሪንጨፓ ዳኪ ታና ዓውሳንዳኔ፤
 ታና ማታሳ ዓሶ ዒዚ ዳውሲሳንዳኔ።

4 ሸምፔላ ታኣኮ ዘቢና ማንገንቴኔ፤
 ሸኦሊ ታና ሙዓ ቦያ ባኣካ ታ ኬዴኔ፤
 ዓጫ ዔያቶኮ ዋርሣና ሂኢሸናጉዲ
 ዒንዲርዘኣ ዔያቶሲ ዋርቁንቴ ጨንቻ ዓፓርኬ።

5 ያኦሲዮ!
 ሌካ ጨሪንጨኮ ዑፃ ዴግ ዴገ ጌዔ፤
 ቦንቻ ኔኤሲ ሳዖ ቢያይዳ ኩሞንጎ።

6 ሞርካ ታኣኮ ታና ዓይሣኒ ፒር ታአም ፒሬኔ፤
 ታና ጉቤና ዋቢሳ ዋዛ ቲቁሣ ታና ሄሌኔ፤
 ዔያታ ታኣኮ ጎይያይዳ ዔቴ ቦኦኬኔ፤
 ጋዓንቴ ዬያ ዔቶይዳ ፔኤር ዔያታ ሎኦሜኔ።

7 ያኦዛሣዮ! ዒና ታኣኮ ደዲኬ፤
 ካላሊያ ካላሊ ታኣኒ ዓይናዳኔ።

8 ታኣኮ ሸምፔሌ ጴጤ!
 ጎኦኦንታ ሃንጎ ዓይኑም ዓንጋሞንታ ዔቁዋቴ!
 ታኣኒያ ሚኢሪ ዔቆንዳኔ።

9 ናንገና ናንጋ ጎዳሣዮ! ዴር ባኣካ ታ ኔና ጋላታንዳኔ፤
 ታ ዴር ባኣካ ታ ኔኤም ጋላታ ዓይኑም ዓይናዳንዳኔ።

10 ኔኤኮ ናንገና ናንጋ ናሹማ ጨሪንጨ ሄላያኬ፤
 ጉሙርቁንቲያኣ ሻኣር ሄላኔ።

11 ያኦሲዮ! ጨሪንጨኮ ዑፃ ዴግ ዴገ ጌዔ፤
 ቦንቻ ኔኤኮ ሳዖ ቢያይዳ ማዖንጎ።

58

«ባይዚፖ» ጌይንታ ዓይኑምና ዓይኑም ሱኡጋሣ ዓይሣ ጎይያ
 ካላሊንቴ ደውቴ ካላሎ
 ያኦሲ ፑርቶ ዓሶ ዋጋንዳጉዲ ሸኢቁንቴ ሸኢጲሣ

57:11 1ሳሙ. 22:1፤ 24:3።

- 1 ዲንሢ ዎይሢ ዓሳ!
ፒዜ ዲንሢ ጌሰታ?
ዓሰሞ ጎኑሞና ሄኮ ዲንሢ ዎጋ?
- 2 ዬያ ዲንሢ ሃሺ ዲኖና ዲንሢ ፑርታ ባኣዚ ማሊ ቱካኔ፤
ሳያይዳ ዲንሢ ማዳ ባካ ቢያ ፑርታ ሌሊኩ።
- 3 ፑርቶ ዓሳ ዲንዶ ጎጳ ዓኣዖ ዣኣሌያኩ፤
ሾይንቱማፓ ዓርቃዖ ዳባኔ፥ ለኡዙሞሞ ዔያታ ጌሰታኔ።
- 4 ዔያታ ሾኦሺጉዲ ዳኣኒናኩ፤
ዎይዚ ባይቄ ጎፖ ሾኦሺ ጉዴያኩ።
- 5 ጎፖ ሾኦዣ ዎዮ ፔኤሲ ቱጫሢ
ሾኦዣ ማርሻ ዓሶንታ ሳጎ ዓሶንታኮ ዑኡዘ ዎይዘ ዲጂኩ።
- 6 ያኦሲዮ! ዬያቶ ዘቦጉዴ ፑርቶ ዓሶንሢኮ ዓጮ ማንሢ፤
ባንጋሎሞ ዔያቶሲ ሾኦሌ።
- 7 ላኣሊንታዖ ጋፓ ዎኣሢጉዲ ዔያታ ባይቆንጎ!
ሂኢዣ ዔያታ ዲካዛ ዳዳቦንጎ!
- 8 ሃንታዖ ማኣሽኪ ጋፓ ዳኣዴጉዲ
ጊንሣ ሃሣፖዒ ዘጉዎ፥ ቡሊሢጉዲ
ዔያታ ማዖንጎ!
- 9 ዔያታ ዔርቲባኣንቱ ዓንጊሢጉዲ
ቱጊንቲ ኩኤሪንታንዳኔ፤
ያኦሲ ፔኤኮ ዴኤፖ ዳጎና
ሾምፔና ዓኣንቱ ዜርቄ ዔያቶ ባይዘንዳኔ።
- 10 ጎሞ ዓሶኮ ኮማ ኮጂንታኣና ዘጋዖ
ጂሎ ዓሳ ዎዛዳኔ፤
ዔያታ ቶኮ ፔኤሲ ፑርቶ ዓሶ ሱጉዖና ማሰታኔ።
- 11 ዬኖ ዎዶና ዓሳ፡- «ጂሎ ዓሳ
ፔኤኮ ኮዣ ማዶ ዛሎ ዲንጎ ባኮ ዔኬኔ፤
ሳያይዳ ዎጋ ያኦሲ ጎኔና ዓኣኔ» ጋዓንዳኔ።

59

«ባይዚፖ» ጌይንታ ዓይነቱና ዓይነቱ ሱኡጋሢ ዓይሢ ጎይያ
ካላሊንቱ ዳውቱ ካላሊ (ዳውቱ ዎዳኒ ማኣር ዲዛኮ ማንጋንዳጉዲ
ሳኣዖኦሌ ዓሶ ዳኬያና ዲ ዓይናዴያኩ።)
ያኦሲ ካፓንዳጉዲ ሺኣቂንቱ ሺኣጲሢ

- 1 የኦሲዮ! ታኦኮ ሞርኮይዳፓ ታና ዓውሴ፤
ታና ማኦሳንሣሂኒ ዔቁ ዓሰይዳፓ ካፔ።
- 2 ፑርቶ ማዳ ዓሰይዳፓ ሄሊ ታና ዓይሴ፤
ዓሰ ዎዳ ዓሰይዳፓኦ ታና ዓውሴ።
- 3 ዔያታ ታና ካቲ ዓኦ ጎይያ ዛጌ!
የኦሲዮ! ሚጨንቱዎ ዓሳ
ታ ዳቤ ባኦዚንታ ጎሜያ ታኦኮ ባኦንቲ
ታ ዑፃ ቡኪ ዔያታ ዘርቴኔ።
- 4 ዔያታ ታ ዳቤ ባኦዚ ባኦንቲ ታና ማኦሳንሣሂኒ ጊኦጊንቲኔ፤
ኔኤኒ ዬያ ዛጊፓፓ ዔቁ ታና ማኦዴ።
- 5 ኔኤኒ ቢያ ባኮ ዎይሣ ጎዳ ማዔ ዒሰራዔኤሌ የኦዛሂኬ፤
ሚሌ ዴሮይዳ ማቶ ዓጋኒ ኬሰኬ፤
ዔያታ ፔኤኮ ጌሮ ማዶና ማዳ ባኮሮዎ
ሚጨንቱዎ ማቶ ዔያቶይዳ ኬኤሬ።
- 6 ካታሞይዳ ዔያታ ዓዳ ካጊቲዳ
ቦጨ ሃንቲ ሺራኦ ሺራ ፔኤቁ ዒባኒ ማዓንዳኔ።
- 7 ዳንጋፓ ዔያቶኮ ኬሰካ ባኮ ኔኤኒ ዎይዜ፤
ዳንጋ ዔያቶኮ ጨንቻ ዓፓሮ ዓኦኔ፤
ዔያታ፡- «የኦኒያ ኦኦሲ ዎይዙዎሴ» ጋዓኔ።
- 8 ናንጊና ናንጋ ጎዳሂዮ!
ኔኤኒ ጋዓንቲ ዔያቶ ሚሚኢ ጫኔ፤
ሚሌ ዴሮ ቢያ ቶኦቹ ኔ ዛጋኔ።
- 9 ታኦኮ ዶዶማሂዮ! ታና ኔ ካፔ፤
የኦዛሂዮ! ኔኤኒ ታኦኮ ፑሮ ካያሂኬ።
- 10 የኦሲ ፔ ማኦሪያና ታኦና ካኦማንዳኔ፤
ታ ጎዳሂ ታ ሞርኮኮ ሎኦሚያ ታና ዳዎንዳኔ።
- 11 ናንጊና ናንጋ ጎዳ ማዔ ኦ ጊቲማሂዮ!
ታኦኮ ዒጊና ኔኤኒ ኮሜ ኮፃያ ማዔሂ ዎሉዎጉዳ ዔያቶ
ዎዲፖ፤
ጋዓንቲ ኔኤኮ ዎልቆና ዔያቶ ዜርቁ፣ ሃሣ ዳውሲሴ።
- 12 ፔኤኮ ዔያታ ዳንጋፓ ኬሳ ጎሞሮ

- ፔ ሙሱሮና ዔያታ ጌስታ ዑኩዘር
 ዔያታ ጋዳንቂ ሉኩቃሢር
 ፔ ዖቶርሙሞና ዓዲንቶንጎ።
- 13 ኔኤኮ ዳጎና ዔያቶ ባይዜ፤
 ዔያቶ ጋጋፒሴ፤
 ያዲ ማዓዛ ያኦሲ ዒሰራዔኤሌ ዓሶ ዎይሣያ ማዔሣሢ
 ዓጮኮ ጋፖ ሄላንዳኦና ዔርቲያ ማዓንዳኔ።
- 14 ታኦኮ ሞርካ ጉሪ ካታሞይዳ
 ካነጉዲ ሶጪ ሃንቲ ሺራኦ ሺራ
 ዒባኒ ማዒ ሙካኔ።
- 15 ሙዖ ባይዚ ዔያታ ጳሽኪ ሺራኔ፤
 ዔያታ ሚሽኪባኦያታቴ ጉሪ ሶጪ ሺራኔ።
- 16 ታኦኒ ጋዓንቴ ኔኤኮ ዎልቆ ዛሎ ዓይናዳንዳኔ፤
 ኔኤኒ ታኦኮ ፑኖ ካያሢኬ፤
 ታና ሜቴ ኬሎ ኔ ታኦኮ ዲካሢኬ።
- 17 ያኦዛሢዮ! ኔ ታኦኮ ዲማዴሢኬ፤
 ኔኤኒ ታኦኮ ፑኖ ካያሢኬ፤
 ኔኤኮ ናንጊና ናንጋ ናሹሞ ኔ ታና ቤኤዛኔ፤
 ዬያሮ ጋላታ ዓይኑሞ ታ ኔኤሞ ሺኢሻኔ።

60

ዓይኑሞ ሱኡጋሢ ዓይሣ ጎይዖና «ሳሌ ቡኒ» ጌይንታ
 ዓይኑሞና ዓይናዲንታ ዳውቴ ካላሊ (ኬዶ ዛሎኮ ዓባ ጌላ
 ባንፃ ዓኦ ሜሴፖታሚያና ሶኦሪያ ዓጮኮ ሳዘይዳ ናንጋ ዓራማ ዓሳ
 ዒሰራዔኤሌ ዓሶ ያሌያና፣ ጊንሣ ሃሣ ዒዮዓኦይያ ሶኦጎ ደኦጮይዳ
 ታጳ ላምዖ ሺያ ማዓ ዔዶኦሜ ዓሶ ዎዴያና ዓሶ ዔርዛኒ ዳውቴ
 ካላሌ ካላሊኬ።)

ያኦሲ ዓውሳያ ማዒያ ዔርዛ ሺኢጲሢ
 1 ያኦሲዮ! ኔ ኑና ኬኤሬኔ፣ ሜንሢያ ጋኦጮኔ፤
 ኔ ኑና ጎሬኔ፤
 ሃሢ ጋዓንቴ ማሂ ኑና ኮሹ።

2 ሳዔሎ ኔ ዓጊሢ ፃሃሲ ዳርዜኔ፤
 ሴካ ሃንጋ ዒዛ ጋዓሢር ዒዘ ኮኦሌ።

3 ኔኤኮ ዳሮ ሜቶ ኔ ዳዌኔ፤
 ማሣ ዎይኔ ዑሺ
 ኑ ዑሽካንዳጉዲ ኔ ዒንጌኔ።

- 4 ፔኤኮ ሞርኮ ዓንጋፓ ቶሊ ዓታንዳጉዲ
 ኔና ዒጊጫዘንሢ ዴንቁ ፔና ካፓንዳንጉዲ
 ማላታ ማሂ ኔ ዔያቶሞ ዒንገኔ።
- 5 ኔ ናሽካ ዴራ ዳቃንዳጉዲ
 ሚዛቆ ኩጮና ኑና ማአዴ፥ ማሂያ ኑሞ ኬኤዜ።
- 6 ጆኦሲ ፔ ናንጋ ዲማዴ ማአራፓ ኬኤዛዎ፡-
 «ታኣኒ ዎዘና ሴኬሜ ሳዖ ጊሽካንዳኔ፤
 ሱኩቴ ደኦጮዎ ፓቃንዳኔ።
- 7 ጌሌዓዴንታ ሚናኣሴ ዓጮንታ ታኣሮኬ፤
 ዔፕሬኤሜ ዖሎሮ ታኣኮ ቶኦካ ዓጎ ዓንጎኬ፤
 ዪሁዳ ታኣኮ ካኦቱሞ ዎልቆኮ ማላታኬ።
- 8 ሞዓኣቤ ታኣኮ ዑዖ ማሰቶ ጎንጎኬ፤
 ዔደኦሜ ታኣሮ ማዒያ ዔርዘኒ ዲርዘ ታኣሲ
 ዒኢካ ታ ጌሣንዳኔ፤
 ፒሊሰጴኤሜ ዓሳኣ ታ ዴማ ዎርቃንዳኔ» ጌዔ።
- 9 ኬልቂ ዲርቂንቴ ካታሜሎ ዖ ታና ዔኪ ዓኣዳንዳይ?
 ዴንዲ ዔደሚያሴ ሄላኒ ዖ ታና ካኣሌሣንዳይ?
- 10 ጆኦሲዮ! ኑና ኬኤሬሢ ኔናኬ፤
 ኑኡኮ ዖሎ ዓሶና ዎላ ኬሰኪዖ ኔ ሃሼኔ።
- 11 ዓሲ ዓሲ ማአዳሢ ዔኤቢ ፓሁዎያኬ፤
 ዬያሮ ሞርኮ ኑኡኮ ኑ ባሻንዳጉዲ ኔ ኑና ማአዴ።
- 12 ጆኦሲ ኑኡና ዎላ ማዔያታቴ ኑ ባሻንዳኔ፤
 ዒዚ ሞርኮ ኑኡኮ ዳውሲሳንዳኔ።

61

ዓይነቱ ሱኡጋሢ ዓይሣ ጎይዖ ጎኦላና ዓይናዲንታ ዳውቴ ዓይነቱ

- ሜቶፓ ቶሊ ኬሰካኒ ሸኢቂንቴ ሸኢጲሢ
- 1 ጆኦሲዮ! ዒላቶ ታኣኮ ዒናፓ ዎይዜ፤
 ሸኢጲዶዎ ታኣኮ ዔኬ።
- 2 ዒና ታኣኮ ደጩ ዎደና
 ሳዖኮ ጋፓ ዓኣዖ ታኣኒ ኔና ዔኤላኔ፤
 ታ ጊዳፓ ባሼ ዴግ ጌዔ ላላሢ ባንሢ
 ዔኪ ታና ዓኣዴ።

60:12 2ሳሙ. 8:13፤ 1ዖኦሲ. ዓሃኬ 18:12።

- 3 ኔኤኒ ታኣኮ ፑኖ ካያሢኬ፤
ታ ሞርካፓ ታ ዓኣሺንታ ዶዲ ኬኤሌ ኔ ታኣኮ ማዔኔ።
- 4 ኔ ማኣሮይዳ ናንጊና ታ ናንጎም፤
ኔ ጋኣዙ ሺቦ ዴማ ታኣኒ ዔቆም።
- 5 ያኦሲዮ ናኣቦ ኔ ታኣሲ ዋይዘኔ፤
ኔኤኮ ሱንፆ ዒጊጫ ዓሶም ኔ ጊኢጊሼ ዓንጃ
ታኣማኣ ኔ ዒንገኔ።
- 6 ካኣቲ ናንጎይዳ ሚርጌ ለዔ ቃሴ፤
ሚርጌ ዋዴ ዒዛ ናንጊሼ!
- 7 ኔ ቤርታ ናንጊና ዒ ካኣታደንጎ፤
ዒዛ ካፓንዳጉዲ ኔኤኮ ማኣሪዮንታ ጉሙርቁንቲዮዋ
ዒዛም ጊኢጊሼ።
- 8 ኬላ ኬላ ኔኤም ታ ናኣቤ ናኣቦ ሺኢሺሢና
ቢያ ዋዴ ጋላታ ዓይኑም ታ ኔኤም ዓይናዳንዳ።

62

ዓይኑም ሱኡጋሢ ዓይሣ ጎይዮና ዔዶታኣሜ ዛሎ ዓይናዳንቲ ደውቲ ዓይኑም

- ያኦሲ ሌሊ ጉሙርቁሢ
- 1 ሺምፓሢ ታኣኮ ሃውሽ ዴንቃሢ ያኦሲና ሌሊኬ፤
ዳቁንታ ታኣም ሙካሢ ዒዛይዳፓኬ።
- 2 ታኣኮ ላሎ ሹጫሢና ዴኤሻሢ ዒዛ ሌሊኬ፤
ታኣኮ ፑኖ ካያሢያ ዒዛኬ፤
ፔቲታዮ ታ ዓጊዳኣኬ።
- 3 ዓሲ ዒንሢ ማኣሳንሣሢ ዓይዲ ሄላንዳኣናዳይ?
ሃያ ዠኢፔ ኮጮና ዓጊዳ ዲር
ዒንሢ ቢያሢ ሃዒ ዳይሳኒ ኮዓ?
- 4 ዔያታ ኮዓሢ ዒዛ ቦንቻፓ ሺኢሻኒ ማዔሢር
ዒዛይዳ ሉኡዙም ጌሰታኒ ዔያታ ናሽካኔ፤
ዔያታ ዳንጎና ዒዛ ዓንጃኔ፤
ዒናና ጋዓንቲ ዒዛ ጋጋዳንቃኔ።
- 5 ታኣኮ ሺምፔሌ ሃውሺጋፓ ያኦሲ ሌሊ ካፔ፤

- ታኣኮ ሃጊ ማዓ ዎዛ ሙካሢ ሲዛይዳፓኬ።
- 6 ታኣኮ ላሎ ሹጫሢና ጳኤሻሢ ሲዛ ሌሊኬ፤
ፑኖ ካያሢያ ታኣኮ ሲዛኬ፤
ታኣኒ ዓገፃዓኬ።
- 7 ታኣኮ ጳቂንቶና ቦንቸና የኦሲናኬ፤
ዶዶ ላላሢንታ ዓኣሺንቶ ቤዛሢያ ሲዛኬ።
- 8 ዓሲዮቴ! ቢያ ዎዶና ሲዛ ጉሙርቁዎቴ፤
ሲኖ ሲንሢሲ ሲዛ ቤርቶ ሺኢሹዎቴ፤
ሲዚ ኑኡኮ ፑኖ ካያሢኬ።
- 9 ቶኦቸንቴ ዜርሢዳፓ ሸይንተሢ ጉሪኬ፤
ቦንቸንቴ ዜርሢዳፓኣ ሸይንተሢያ ሉኡዙሞኬ፤
ዴኤሠሞ ዔር ባኮይዳ ዴኤፂ ጴዴያታቴያ
ዬይ ቢያ ዎሊ ዑፃ ዠባሬይዳፓ ሹሌዓያኬ።
- 10 ቡሪ ዔኮና ባኣዚና ሄርሺንቴፖቴ፤
ሲንሢ ሳሪ ዔኬ ባኮናኣ ቦንቸንታኒ ዎዛዲፖቴ፤
ቆላ ሲንሢኮ ሚርጌታቴያ ዬያና ጉሙርቁንቴፖቴ።
- 11 ዎልቁ የኦሲርኬ፤
ሲዚ ፔቴ ባኣዚ ከኤዛንቴ
ላምዒ ማይንቴ ታ ዎይዜኔ።
- 12 ናንገና ናንጋ ጎዳሢዮ! ሚጩንተሢ ኔኤርኬ፤
ኔኤኒ ፔቴ ፔቴሢም ማዶጉዴያ ጩጋንዳኔ።

63

- ዳውቴ ዓሲ ናንጉዎ ዪሁዳ ቦኦሎይዳ ዓኣና ዓይናዴ ዓይነቱ
የኦሲ ኮሲሢ
- 1 የኦሲዮ! ኔኤኒ ታ የኦዛሢኬ፤
ሲናፓ ታ ኔና ዴንቃኒ ኮዓኔ፤
- ዑፃ ታኣኮ ኔና ሱኡካዳኔ፤
ዎኣሢ ባይዚ ሜሊ ፃሄ ሳዓጉዲ
ሹምፓሢ ታኣኮ ኔና ዴኤቤኔ።
- 2 ታኣኒ ኔና ኔ ማኣርይዳ ዛጌኔ፤

62:12 ዓ.የ. 34:11፤ ዓ.ር. 17:10፤ ማቲ. 16:27፤ ሮሜ 2:6፤ ዮሃ. ያፔዳ 2:23።

- እኔኮ ወልቆንታ ቦንቸዋ ታ ዳንቄ።
- 3 ሚጨንቲፃ ነኔኮ ናንጊዳፓ ባሼታሢሮ
ዳንጋ ታኣኮ ነና ጋላታ።
- 4 ዓካሪ ናንጎ ወዶይዳ ቢያ ነና ታ ጋላታ፤
ኔ ሱንፆና ታ ኩጮ ታኣኒ ሌካ ዔቁሳ።
- 5 ሼምፓሢ ታኣኮ
ዔኤሰና ማለና ሙዒ ወዛዳ ዓሲጉዲ ወዛዳ፤
ዳንጋ ታኣኮ ወዛና ጋላታ ዓይነቱ ነኔም ዓይናዳ።
- 6 ታ ላሄ ቤዛ ዓኣፃ ነና ማላ፤
ዋንቶ ቢያ ኔ ባኣዚ ታ ሱካ።
- 7 ነኔኒ ታና ማኣዳሢታሢሮ
ነኔኮ ጋኣዞ ሺቦ ዳማ ዔቁ ወዛና ታ ዓይናዳ።
- 8 ሼምፔላ ታኣኮ ነና ጨጨምቢ ዓርቄ፤
ነኔኮ ሚዛቆ ኩጮኣ ታና ኬልቄ።
- 9 ታና ወዳኒ ኮዓሢ ቢያ
ሃይቁ ዲኡኪንታንዳ።
- 10 ጨንቸ ዓፓሮና ዔያታ ወዳንታንዳ፤
ሌዞ ዔያቶኮ ቦፆ ሙዓንዳ።
- 11 ፆኦሲ ዒዛም ባሺሢ ዓንጋሢሮ
ካኣቲ ወዛዳ፤
ፆኦሲ ሱንፆና ጌፓ ዓሳ ቢያ
ዒዛ ጋላታንዳ፤ ሉኡቃ ዓሶ ዳንጋ ጋዓንቴ ዓርቄንታንዳ።

64

ዓይነቱ ሱኡጋሢ ዓይሢ ጎይፆና ዓይናዳንታ ዳውቴ ዓይነቱ
 ሜታፓ ቶሊ ኬሰካኒ ሺኣቁንቴ ሺኣጲሢ
 1 ፆኦሲዮ! ታኣኮ ሜቶሮ ነና ታ ሺኣቃሢ ወይዜ፤
 ታ ሞርካ ታና ዓጊቻሢዳፓ ታና ካፔ።
- 2 ፑርቶ ዓሳ ታ ጊዳ ጌኔ ማላሢና ዔቁሢፓ
 ዔያቶኮ ዋጎ ዋጋኒ ቡኮሢዳፓኣ ታና ዓይሱ።
- 3 ዔያታ ዓንዲርዘ ፔኤኮ ዓዳ ጨንቻ ዓፓሮጉዲ ዋርቃ፤
 ዔያቶኮ ጨንጮ ዑኡዛ ሂኢሺጉዲ ዲካ።
- 4 ካቲ ዳዒ ዲሎ ዓሶ ዔያታ ዲካ፤
 ዓሳ ማለባኣንቴ ዓጊጩዋፆ ዲካ።

63:11 1ሳሙ. 23:14።

- 5 ፑርታ ባኣዚ ማዳኒ ዋላ ዘርታኔ፤
ፒራሢያ ዓኣቲ ፒራኒ ዔያታ ገሰታኔ፤
ዔያታ ዬያ ቢያ ሂዳዖ፡-
«ያኦኒያ ዴንቃኒ ኑና ዳንዳዑዋሴ» ጋዓኔ።
- 6 ዔያታ ገኔ ማሊሢ ማሊ ቱኬሰካፓ፡-
«ዓካሪ ፑርታ ማሊሢ ዶዲ ኑኦኒ ቱኬኔ» ጋዓኔ።
ዬይያ፡-
ዓሲኮ ዒናንታ ማሊሢያ ገኔ ባኣዚና ኩሜያ ማዒያ ዔርዘኔ።
- 7 ያኦሲ ጋዓንቲ ዔያቶ ፔ ሂኢዦና ዶካንዳኔ፤
ዔያታ ማሊባኣዖ ማኣሳናንዳኔ።
- 8 ፔ ዳንሳና ዔያታ ዶቁንታንዳኔ፤
ባይሰንታ ዔያቶ ሂሳንዳኔ፤
ዬያሮ ዔያቶ ዛጋ ዓሳ ቢያ ዔያቶ ዶንኪ
ቶኦኮ ፔኤሲ ዓገሣንዳኔ።
- 9 ዓሲ ቢያ ዓገጫንዳኔ፤
ያኦሲ ማዳ ባኮ ፔገና ዔያታ ኬኤዛንዳኔ፤
ዒናፓኣ ዔያታ ማላንዳኔ።
- 10 ዒሎ ዓሳ ያኦሲና ዋዛዶንሳ፤
ዒዛ ፔኤኮ ፑሮ ካያሢ ማሄ ዓሳ
ዒና ፔኬዚንሢያ ቢያ ዋዛዶንሳ።

65

ዓይነቱ ሱኡጋሢ ዓይሣ ጎይያና ዓይናዲንታ ዳውቴኮ ጋላታ
 ዓይነቱ
 ያኦሲ ጋላቲሢና ቦንቲሢ
 1 ያኦሲዮ! ዒዮኔይዳ ጋላታ ኔኤም ኮይሳኔ፤
 ኔኤም ኑኦኒ ናኣቤ ናኣቦዋ ዒንገ ኩንሣንዳኔ።
- 2 ኔኤኒ ሸኢጲሢ ዋይዛያ ማዔሢሮ
 ዓሲ ቢያ ኔ ባንሢ ሙካንዳኔ።
- 3 ጎማ ኑና ኩሚ ባይዜ ዋዶና
 ኔኤኒ ኑ ዳቢንቶ ዓቶም ገዔኔ።
- 4 ኔኤኒ ዶኦሬ፡ ኔ ባንሢያ ኔ ዑኪሴ
 ዓሳ ቡካ ጸኦካ ኔ ገሣዘንሢ ዋዛዶንሳ፤
 ኔኤኮ ዶማዳ ገኤዦ ማኣራፓ
 ኔ ኬኤፃፓ ዓንጅ ኑ ሚሸካንዳኔ።
- 5 ኑና ዓውሳ ያኦዛሢዮ!

- ኔኤኮ ዲቃሣ ዲሉሞና ኑኡሞ ማህ፤
- ኔኤኒ ሳዖኮ ጋፖሞ ቢያ
- ሃኬ ዓኣ ባዘማኣ ጉሙርሳ ዎዛሢኬ።
- 6 ዲኮ ኔኤኒ ኔ ዲዲሞና ማገፍኔ፤
- ዎልቆዎ ኔኤኮ ኔኤኒ ቱኡቴኔ።
- 7 ኔኤኒ ባዘኮ ዖኦዢያ
- ባዘ ጉዲሢኮዎ ጉኡሚያ
- ዴሮኮዎ ዣላሢ ኔ ዚቴዳኔ።
- 8 ሳዖኮ ጋፓ ሃኬ ዓኣሢ
- ኔኤኮ ዲቃሣ ዓኮ ማደሮ ዲቃታኔ፤
- ካሪያንታ ዓሚያንታ ሙካኣና
- ዎዛዲ ዒላሻንዳጉዲ ኔ ማሃኔ።
- 9 ሳዖሞ ዒርዚ ኔ ዎርቁሻኔ፤
- ዔባ ዓኣፓንዳጉዲ ማሂሢና ዖርሳቻኔ፤
- ዎሮ ዎኣሢና ኔ ኩንሣኔ፤
- ሳዖይዳ ሃኣኮ ኔ ባቃልሳኔ፤
- ዬያ ኔ ማዲሢያ ሂዲኩ፡-
- 10 ጎሽኪንቴ ጎዡይዳ ዒርዚ ኔ ዎርቁሳኔ፤
- ሂርኪ ደግ ጋዓ ቤዘ ኔ ጊኢጊሻኔ፤
- ሳዖ ዓጮ ዒሮኮ ዑኡፖና ኔ ዎዒሳኔ፤
- ባቃሎ ባቃልሲ ኔ ዑጊሳኔ።
- 11 ኔ ኮሹሞና ካፃ ሃኣካ ዎዚ ሚርጋይ!
- ኔ ዓኣ ቤዘ ቢያ ሚርጌ ሃኣኮ ዓኣኔ።
- 12 ዓሳ ናንጉዎ ዳውላ ሚርጌ ማኣቲ ዎርቁኔ፤
- ጌሜራኣ ዎዛና ኩሜኔ።
- 13 ቦኣላዳ ጊንፃ ቆልሞ ሌሊ ማዔኔ፤
- ደኣጮ ጊንፃኣ ሃኣኮና ኩሜኔ፤
- ዬያሮ ቢያሢ ዎዛዲ ዒላሽሢና ኔኤሞ ዓይናዳኔ።

66

- ዓይነቱ ሱኡጋሢ ዓይሣ ጎይፆና ዓይናዲንታ ዖኦሲ ሄርሺሢ
 ዓይነቱ
 ዎላ ቡኪ ጋላቶ ጋላታ
- 1 ዒንሢ ሳዖይዳ ዓኣ ዓሳ ቢያ
 - ዖኦሲሞ ዒላሽ ጋላቱዎቴ።
 - 2 ሱንፆ ዒዛኮ ቦንቺ ዓይናዲዎቴ፤

- ጋላታና ዒዛ ቦንቹዋቱ።
- 3 ያኦሲም ሂዚ ጎዑዋቱ፡-
 «ማዳ ኔኤኮ ዋዚ ዲቃሂ ሄርሺሳያዳይ!
 ዋልቃ ኔኤኮ ዳኤፒታሂሮ
 ኔ ሞርካ ኔ ቤርቶይዳ ዒጊቹሞና ጎጋይቃ።»
- 4 ሳገይዳ ዓኣ ዓሳ ቢያ ኔኤም ዚጋኔ፤
 ኔኤም ዔያታ ጋላታ ዓይኑሞዋ ሸኢሻኔ፤
 ሱንጾዋ ኔኤኮ ቦንቹሂና ዓይናዳ።»
- 5 ሃኒ ሙኪ ያኦሲ ማዳ ባኮ ዛጉዋቱ፤
 ዓሶ ባኣካ ዒዛኮ ማዳ ዒጊቻያኬ።
- 6 ባዞ ዒዚ ሳዓ ማሄኔ፤
 ኑኤኮ ቤርታኣ ዓዶንሂ ዎሮ ቶኪና ፒንቄኔ፤
 ዒዚ ማዳ ባኮና ኑኤኒያ ዎዛዳ።
- 7 ፔኤኮ ዋልቆና ዒዚ ናንጊና ዎይሃኔ፤
 ዓኣፖና ዳሮ ጊኹ ጌዒ ዛጋኔ፤
 ዬያሮ ዋይዞ ዒፃ ዓሳ ዒዛ ዑፃ ዔቁባኣቲ ቃራኬ።
- 8 ዒንሂ ዳራ ቢያ ኑ ያኦዛሂ ቦንቹዋቱ፤
 ዑኤዞ ዒንሂሲ ዳጊዲ ዒዛም ጋላታ ሸኢሹዋቱ።
- 9 ኑና ሹምፔና ጌሃሂ
 ቶኮዋ ኑኤኮ ሃሊፁዋጉዲ ካፓሂ ዒዛኬ።
- 10 ያኦሲዮ! ኑ ዎይታቲያ ኔ ኑና ዛጌኔ፤
 ዓዳ ቢራ ዓንጊጉዲ ኔ ኑና ሸኤሸኔ።
- 11 ፒሮይዳ ኔ ኑና ዓይሃኔ፤
 ዳኤሂ ባሲ ኑና ኔ ባሲሴኔ።
- 12 ኑኤኮ ሞርካ ኑና ጎይሂ ባይዚ ሄርቃንዳጉዲ ኔ ኑና ማሄኔ፤
 ታሚና ዲዲናኮ ባኣኪና ኑ ዓኣዳ።፤
 ሃሂ ጋዓንጌ ጆርጎቹሞ ኩሜ ዳልጎ ቤዞ ዔኪ ኔ ኑና ሙኬ።።
- 13 ኔ ማኣሪ ሚቺ ዒንጎ ዒንጊያ ዔኪ ታ ጌላንዳ፤፤
 ታኣኮ ናኣቦዋ ታ ኔኤም ሸኢሻንዳ።።
- 14 ፑርታ ሜታ ታና ሄሌ ዎዶና
 «ኔኤም ታ ዒንጋንዳ።» ጌዔ ናኣቦ ታ ሸኢሻንዳ።።
- 15 ሶቦሮ ጌማቶ ሚቺ ዒንጎ ዒንጊሂ ማሂ
 ዓዶ ማራቶዋ ሳውቃ ዒንጊሂ ማሂ

ታ ኔኤም ሺኢሻንዳኔ፤
ዚዮ ጌማቶንታ ኮላቶንታ ታ ኔኤም ሹካንዳኔ።

16 ዒንሢ ያኦሲ ዒጊጫ ዓሳ ሃኒ ሙኪ ዋይዙዋቲ፤
ታ ሹምፔሎም ዒዚ ማዴ ባኮ ታ ዒንሢም ኬኤዘም።

17 ታኣኒ ዒዛ ባንሢ ዒላቴኔ፤
ታ ዳንጎናኣ ታ ዒዛ ጋላቴኔ።

18 ጎሞ ታኣኮ ታ ቡኡፀዋዖ ዋንዴ ዒና ዓኣቼያታቲ
ናንጊና ናንጋ ጎዳ ሺኢጲዖ ታኣኮ ዋይዚንዲዋንቴኬ።

19 ሃሢ ጋዓንቴ ያኦሲ ጎኔና ዋይዜኔ፤
ታኣኒ ሺኢቃ ዑኡዘ ዒናፓ ዒ ዋይዜኔ።

20 ሺኢጲዖ ታኣኮ ቦሂባኣሢ
ሚጨንቲዖዋ ታና ሃሺባኣሢ
ዬይ ያኦዛሢ ጋላቴንቶንጎ።

67

ዓይነቱ ሱኡጋሢ ዓይሃ ጎይዖ ጎኦላና ያኦሲ ሄርሺ ዓይናዶ
ደውቲ ዓይነቱ
ጋላታ ዓይነቱ

1 ያኦሲ ኑና ሚጨንቶንጎ፣ ዓንጃንጎ፤
ዒዛኮ ዓኣፖ ካራ ኑም ፖዖንጎ።

2 ጎይዖ ኔኤሲ ሳዖ ዑፃ
ዓውሲፃኣ ኔኤሲ ዴሮ ባኣካ ዔርቶንጎ።

3 ያኦሲዮ! ዴራ ኔና ጋላታኔ፤
ዓሲ ቢያኣ ኔኤም ጋላታ ሺኢሻኔ።

4 ዴሮም ፒዙሞና ኔ ዋጋሢሮ
ዓሶዋ ሳዖይዳ ኔ ዔኪ ዓኣዳሢሮ
ዴራ ዋዛዶንጎ፤
ዒላሺያ ኔኤም ዓይናዶንጎ።

5 ያኦሲዮ! ዴሬ ኔና ጋላቶንጎ፤
ዓሳ ቢያኣ ኔኤም ጋላታ ሺኢሹንጎ።

6 ዬካፓ ሳዓ ሃኣኮ ካዒሳንዳኔ፤
ናንጊና ናንጋ ጎዳ ማዔ ኑ ያኦሲ ኑና ዓንጃንዳኔ።

7 ጾሱ ጉና ዓገጃንገገ፤
ዓጩ ማዕፍ ካራና ቢያ ዒዛ ዒጊጫንዳ።

68

ዓይነቱ ሱሉጋሢ ዓይህ ጎይጾ ጾሱ ሄርሺ ዓይናድ ዳውቴ
ዓይነቱ

ባሻገ ዓይናድ ዓይነቱ

1 ጾሱ ዔቆንገገ!

ሞርካ ዒዛኮ ላኣሊንቶንገገ!

ዒዛ ዒፃዘንሢ ዒዛ ቤርታፓ ጳሽኮንገገ!

2 ጩቤ ላኣሊንቲ ባይቃሢጉዲ ዔያቶ ፒፒንፂዳ፤

ታሚ ሾፒ ዓልቂሳሢጉዲ ፑርቶ ዓሳ ጾሱ ቤርታፓ ባይቆንገገ።

3 ፂሎ ዓሳ ጋዓንቴ ዎዛድንገ፤

ዒዛ ቤርታ ዔያታ ኮኦሞንገ፤

ዎዛና ዔያታ ኮርጎንገገ!

4 ጾሱም ዓይናድዎቴ፤

ዒዛ ሱንጾም ጋላታ ዓይነቱ ሺኢሹዎቴ፤

ሻኣሮይዳ ሃንታሢም ጎይሢ ጊኢጊሹዎቴ፤

ሱንጾ ዒዛኮ ናንጊና ናንጋ ጎዳኬ፤

ዒዛ ቤርታ ዎዛድዎቴ!

5 ዒዛም ዲማዳ ጌኤዦ ማኣራ ዓኣ ጾዛሢ

ዓዳባኣ ናኣቶም ዓድኬ፤

ዜኤሮንዳሢ ዘሎ ዒ ሞኦቲንታሢኬ።

6 ጾሱ ሴሎ ዓሶ ማኣሪ ዓሲ ባኣካ ጌሢኔ፤

ቱኤዞ ዓሶ ቱኤዛፓ ቡሊ ዎዛሲ ኮኦሚሳኔ፤

ዎይዞ ዒፃ ዓሳ ጋዓንቴ ዓሲ ናንጎዎ ዳውሎይዳ ናንጋንዳ።

7 ጾሱዮ! ዳር ኔኤኮ ኔ ዔኪ ዓኣዳ ዎዶና

ዓሳ ናንጉዎ ዳውሎይዳና ሃንቲሴ ዎዶና

8 ሲና ዱኮ ጾዛሢ ቤርታ

ዒሰራዔኤሌ ጾዛሢኮዎ ቤርታ

ሳሳ ዓጊፃኔ፥ ጫሪንጫኣ ዒሪዶኦቦ ዎርቂሴ።።

9 ጾሱዮ! ጊዳ ዒርዚ ኔ ዎርቂሴ፤

ፃኣዲ ሜሌ ኔ ዓጮ ኔ ዑሼኔ።።

10 ኔ ዴራ ዲኢካ ማኣሪ ማዢ ዴዔኔ፤
ኔኤኒ ያኦሲ ኔ ዓንጃፓ ማንቆ ዓሶሞ ዲንጌኔ።

11 ናንገና ናንጋ ጎዳ ሂዚ ጋዓ ዓይሥሢ ኬሴኔ፤
ዲዛኮ ዓይሢያ ኬኤዛዞንሢ ኮሺ ሚርጌኬ።

12 ዔያታ ሂዚ ጌዔኔ፡-
«ካኣቶንታ ዔያቶኮ ስሎ ዓሳኣ ዑኩና ፑኒ ጳሽኬኔ!
ስሎ ኬሰኩሞ ማኣራ ዓቲ ላኣላ ዲያና ባኮ ጊሸቲ ዔኬኔ።»

13 ዲዒ ዔኮና ባኮ ባኣካ፡- ዑፃ ቢራ ዓንገና ማዢንቲ
ዓኣፓ ዲካ ሞርቆና ጋኣዛ ኮሺንቲ
ደኦሌ ማሊሲ ኮሸና ባኣዚያ ዓኣኔ።
ዓሳ ስሎ ስላኣና ዲንሢዳፓ ዛሎ ዓሳ

ዓይጎር ማራቶ ሞኦፃ ዴዔይ?

14 ቢያ ባኮ ዳንዳዓ ያኦዛሢ ካኣቶ ላኣሌ ሞዶና
ሻቺ ፃልሞኔ ዲኮ ቶኦካ ኬዳንዳጉዲ ማሄኔ።»

15 «ባኣሳኣኔ ዲካ ሚርጌ ዛሬና ጌሚሪያ ኩሚ
ዲጊቻያ ማዔ ዲካኬ።»

16 ዲንሢያ ያዲ ማዔ ዲካ
ያኦሲ ናንጋኒ ደኦሬ ዲኮ
ቁኢሪ ዲንሢ ዛጋሢ ዓይጎርዳይ?
ዬካ ናንገና ናንጋ ጎዳ ናኣናና ናንጋንዳኔ።»

17 «ያኦሲ ሚርጌ ሺያና ፓይዲንታ
ዴኤፖ ሳርጌሎ ስይቶና ሲና ዲካፓ
ፔኤኮ ዲማዴ ጌኤዞ ማኣሪ ሙካንዳኔ።»

18 ሌካ ጫሪንጮ ኔ ዓኣዴኔ፤
ዲዒሢ ኔ ቡኩሴኔ፤
ናንገና ናንጋ ጎዳሢያ! ኔኤኒ ዲኢካ ናንጋኒ
ሞይዞ ዲፃ ዓሶይዳፓኣ ዓይሱሞ ዲንጎ ባኣዚ ኔ ዔኬኔ።»

19 «ባሶ ኦኡኮ ኬላ ኬላ ኬዳ
ኦና ዓውሳ ያኦዛሢ ዓንጃንቶንጎ።»

20 ኦ ያኦዛሢ ኦና ዓውሳ ያኦሲኬ፤
ሃይቢፓ ቶሊ ዓታኒ ዳንዳዒንታሢያ
ናንገና ናንጋ ጎዳናኬ።

21 ጎኔና ያኦሲ ፔ ሞርኮኮ

ጎሞና ደዲ ናንጋ ዓሶኮ
ቶኦኮ ዒ ዳኣግንዳኔ።»

22 ናንጊና ናንጋ ጎዳ፡-
«ታ ዔያቶ ባኣሳኣኔፓ ማሂ ዔኪ ሙካንዳኔ፤
ባዞ ዔቶይዳፓ ኬሲ ዔኪ ዩዓንዳኔ።

23 ቶካ ኔኤሲ ሞርኮኮ ሱጉይይዳ ሄርቃንዳኔ፤
ኔ ካናታኣ ዩያ ሱጉይ ላዓንዳኔ» ጋዓኔ።

24 ያኦሲዮ! ኔኤኮ ቦንቸንታ ሃንቲፃ ጴዳኔ፤
ዩይያ ታኣኮ ያኦዛሂና ካኣታሂ ጌኤዠ ማኣሪ ዓኣዳኣና
ሃንታ ሃንቲያኮ።

25 ዓይኑሞ ዓይናዳ ዓሳ ቤርቲና
ዓይኑሞ ዓንጋሞ ዋርቃ ዓሳ ጊንሂና
ካራባሂ ባዓ ዉዲራሂያ ዔያቶኮ ባኣካ ዓኣኔ።

26 ዔያታ፡- «ዒዛ ዓሳ ቡኬ ቤዛ ያኦሲ ጋላቱዋቲ!
ናንጊና ናንጋ ጎዳ ዴሬ ማዔ
ዒሰራዔኤሌ ዓሳ ቡኬ ቤዛ ዒዛ ጋላቱዋቲ!» ጋዓኔ።

27 ዔኪ ዔያቶ ዓኣዳሂ ዳኮ ፃዳሂ ቢኢኒያሜኬ፤
ዒኢካ ሚርጌና ፓይዲንታ ዩሁዳ ዓሶ ሱኡጋ
ዩያጉዲ ሃሃ ዛብሎኦኔንታ ኒፕታሌሜንታ ሱኡጋኣ ዓኣኔ።

28 ያኦሲዮ! ዋልቆ ኔኤሲ ቤኤዜ፤
ሚና ኔ ኦኡሞ ማዳ ጎይያ ሃሂያ ደዳሞ ኔኤሲ ዳዌ።

29 ዩሩሳላሜይዳ ዓኣ ኔኤኮ ጌኤዠ ማኣሮሞ
ዒንጎ ባኣዚ ካኣታ ኔኤሞ ዔኪ ዩዓንዳኔ።

30 ፒሎ ባኣካ ዓኣ ካዮ ቦያ
ዚዮ ጌማቶና ናኣሮ ማላ ካኣቶ ጎሬ፤
ቢያሂ ጉሞዓቲ ቢሮ ኔኤሞ ጊኢራንዳጉዲ ማዳ፤

ያሎ ያላኒ ናሽካ ዴርዋ ኔ ላኣሌ።

31 ጊብፄ ዓጫፓ ፖኦሊሶ ሱኡጋ ዩዓንዳኔ፤
ዒቶጲያ ዓሳኣ ኩጮ ሌካ ያኦሲ ባንሂ ዔቁሳንዳኔ።

32 ዒንሂ ዓጮ ካኣታ ቢያ ያኦሲሞ ዓይናዳዎቲ፤
ናንጊና ናንጋ ጎዳሞ ዓይኑሞ ሺኢሹዋቲ።

33 ሚናፓ ዓርቃያ ዓኣ ጫሪንጮኮ ዑያ ኬሰኬሂሞ
ፔኤኮ ዳኤፖ ዑኡዞና ጉኡማሂሞ ዓይናዳዎቲ።

34 ዲቃሂ ሄርሺሲፃ ዒዛኮ ዒሰራዔኤሌይዳ
ዋልቃኣ ዒዛሲ ሻኣሮኮ ዑሃ ማዔሂሮ

ጾኑሲኮ ዶዶሞ ኮኤዙዋቴ።
 35 ጾኑሲዮ! ኔኤኒ ኔኤኮ ጌኤኮ ማኣራ ዲቃሢ ሄርሺሳያኬ፤
 ዲሰራዔኤሌ ዓሶኮ ጾኑዛሢ ፔ ዳሮሞ
 ዋልቄና ዶዶሞና ዲንጋኔ፤

ጾኑሲም ጋላታ!

69

ዓይነቱ ሱኡጋሢ ዓይሣ ጎይፆ ዛዬና ዓይናዲንታ ዳውቴ
 ዓይነቱ

ማኣዶ ዳንቃኒ ሺኢቂንቴ ሺኢሲሢሢ

1 ጾኑሲዮ! ታና ዓውሴ፤

ዋኣፆ ታኣኮ ቆርጮ ሄሌኔ።

2 ቶኪ ዔቃ ቤሰባኣ ዔቴ ቶኦጶይዳ

ታኣኒ ጌሊ ዔኤዲንቴኔ፤

ዔታዳ ቁልቤ ዋኣሢዳ ታ ጌሌኔ፤

ዋኣፆ ጉዳሢያ ታና ዔኤዳኔ።

3 ዒላቲና ታ ላቤኔ፤

ቆርጮኣ ታኣኮ ፃኣዳኔ፤

ታ ጾኑዛሢኮ ጎይፆ ታ ዛጋንቴ ዓኣፓ ታኣኮ ታይሬኔ።

4 ታኣኒ ማዳ ባኣዚባኣንቴ ታና ዒፆ ዓሳ

ታ ቶኦኮ ጋፓናፓ ባሺ ሚርጌኔ፤

ሺምፓሢ ታኣኮ ባይዛኒ ኮዓ ዓሳ

ጉሪ ታና ዒፆ ዓሳ ሚርጌ ማዔኔ፤

ዉኡቂ ታኣኒ ዔኪባኣ ባኣዚ

«ማሂ ዔኪ ዩዔ» ጌይንቴኔ።

5 ጾኑሲዮ! ኔኤኒ ታኣኮ ዔኤያቶ ዔራኔ፤

ታ ዳቢንታ ኔኤም ዓኣሺንቴያቱዋሴ።

6 ቢያ ባኮ ዋይሣ ጎዳሢዮ!

ኔና ዋዛ ማሂ ካፓ ዓሳ

ታ ጌዳ ማዲንታ ባኮ ዛጌ ቦርሲንቶፓ፤

ናንገና ናንጋ ጎዳ ማዔ ዲሰራዔኤሌ ጾኑዛሢዮ!

ኮሺ ኔና ኮዓ ዓሳ ታ ጌዳ ማዲንታ ባኮ ዛጌ ዳውሲንቶፓ።

7 ኔ ጋይቴ ጌዒ ጫሺ ታ ጌቤኔ፤

ቦርሲንቲና ዓኣፖ ካራ ታኣኮ ቦኦሬኔ።

8 ታ ጌርሲንሢም ዓዳ ፃንጎ ዓሲጉዲ
ታኣኮ ዒንደ ናኣቶማኣ ሸኦቲ ታ ማዔኔ።

9 ኔ ማኣሮ ዛሎ ባካ ታና ሻላኔ፤
ኔና ጫሽኮ ጫዠ ታ ዑፃ ማዔኔ።

10 ሹምፓሢ ታኣኮ ታ ሙፆ ሃሾ ዳምቦና ሜታሴኔ፤
ዬያሮዋ ዔያታ ታና ፓሴኔ።

11 ሲዮ ፓቲሎ ታ ማይንቴ ዋደና
ዔያታ ታና ዓማሊ ማሂ ሚኢጠኔ።

12 ዲሮ ካራ ዳዒ ዓሶም ጌኤሲ ጌሰቶያ
ማሢንቴ ዓሶማኣ ኮሢ ኮርጎያ ታ ማዔኔ።

13 ናንጊና ናንጋ ጎዳሢዮ!
ኔ ናሽካ ዋደና ታ ኔና ሺኢቃንዳኔ፤

ፆኦሲዮ! ኔኤኮ ዳኤፖ ማኣሪፆና
ኔኤኮ ዓውሲፆ ጎኑሞና ታኣም ዋይዜ።

14 ቶኦጳሢዳፓ ታና ኬሴ፤
ዔኤዲንታንዳጉዲ ታና ሃሺፖ፤

ዋኣፆ ዔታፓ
ዬያቶንታ ታና ዒፃዞንሢናፓ ሄሊ ዓውሴ።

15 ዲጳ ኩሚ ዔኪ ታና ዓኣድፓ፤
ዋኣፆ ዔታኣ ታና ዔኤድፓ፤
ዔታ ደዒ ካሮ ታኣኮ ባይዘፓ።

16 ናንጊና ናንጋ ጎዳሢዮ! ማኣሪፃ ኔኤኮ ሚርጌ ማዔሢሮ
ታኣም ዋይዜ፤

ኔኤኮ ሚጠንቶ ሚርጉሞና
ታ ባንሢ ሺሬ።

17 ታና ኔ ዓይላሢዳፓ ዓኣፖ ኔኤሲ ሺርሺፖ፤
ታኣኒ ሜቶይዳታሢሮ ዑኬና ታኣም ዋይዜ።

18 ታ ባንሢ ሙኪጋፓ ታና ዓውሴ፤
ታ ሞርኮ ኩጫፓኣ ታና ጊንሣ ማሂ ሻንቂ ዓይሴ።

19 ታና ሄሌ ጫዠንታ ቦርሲንቶንታ
ዳውሲንቶዋ ኔ ዔራኔ፤
ታኣኮ ሞርኮዋ ፔቴ ፔቴ ኔ ዔራኔ።

- 20 ጫዛ ዒኖ ታኣኮ ማንህኔ፤
 ዎዛ ባይቂ ታኣኮ ጋፔኔ፤
 ታኣም ሚጪንታ ዓሲ ታ ኮዔኔ፤
 ጋዓንቴ ታ ዴንቁባኣሴ።
- ታና ደዲሻ ዓሲያ ታ ኮዔንቴ
 ፔቴታዖ ባኣሴ።
- 21 ዔያታ ሙዖ ታኣኮ ጪሸና ሲኢሬኔ፤
 ታ ዴኤቢንታዛ ሶልኪ ዑሺ ታኣም ዒንጌኔ።
- 22 ዔያቶም ሸኢሸና ካፃ ፒሮ ዔያቶም ማዖንጎ፤
 ዔያቶኮ ሙዖሮ ቡኪንቴፃኣ ባይሲንታ ካራ ማዖንጎ።
- 23 ዓኣፓ ዔያቶሲ ዛጉዋጉዲ ዲሞንጎ፤
 ጊኢራ ቢያ ዎዴ ዎሮንጎ።
- 24 ዲማ ዲማ ኔኤኮ ዎዳ ባኮ ዔያቶ ዑፃ ኬይሴ፤
 ዔያታ ዔሪባኣንቴ ኔ ዳጎ ዔያቶ ዑፃ ጮኦሽኬ።
- 25 ጉርዳ ዔያቶሲ ዳውሌ ማዖንጎ፤
 ዓፒሎና ማጉና ማኣራ ዔያቶኮ ዓሲ ናንጎፓ።
- 26 ኔ ጸርቄ ዓሶ ዔያታ ዳውሴኔ፤
 ኔ ኪፃሴ ዓሶኮ ማታህ ዔያታ ዳልጊሼኔ።
- 27 ዳቢንቶይዳ ዔያቶኮ ዳቢንቴ ቃሴ፤
 ኔ ዲሉሞ ባንህያ ዑኮፓ።
- 28 ናንጎ ማፃኣፓፓ ዔያታ ቃኣጪንቶንጎ፤
 ዲሎ ዓሶና ዎላ ፃኣፒንቶፓ።

- 29 ጋዓንቴ ታኣኒ ማቶ ዎኣዪሂዳ ዓኣኔ፤
 ጾኦሲዮ! ኔኤኮ ዓውሲፃ ኬልቂ ታና ዓርቆንጎ።
- 30 ጾኦሲኮ ሱንፃ ጋላቲሂና ታ ዓይናዳንዳኔ፤
 ጋላቲሂና ታኣኒ ዴግ ዴጊዳንዳኔ።
- 31 ዬይያ ጌማይደፓ ባሽ
 ጉራኒንታ ሹቁሊንታ ኬሴ
 ዚያ ጌማይ ዒዛም ዒንጊሂዳፓ ባሽ
 ናንጊና ናንጋ ጎዳ ዎዛሳኔ።
- 32 ማንቆ ዓሳ ዬያ ዛጋዖ ዎዛዳንዳኔ፤
 ዒንሂ ጾኦሲ ኮዓ ዓሳ ዒና ዒንሂኮ ደደንጎ።
- 33 ናንጊና ናንጋ ጎዳ ማታቆ ዓሶኮ ዒላቶ ዎይዛኔ፤

69:21 ማቴ. 27:48፤ ማር. 15:36፤ ሉቃ. 23:36፤ ዮሀ. 19:28-29። 69:23 ሮሜ
 11:9-10። 69:25 ዳኪ. ማዶ 1:20። 69:28 ኬሲ. ማፃ 32:32፤ ዮሀ. ጾፔዳ
 3:5፤ 13:8፤ 17:8።

ቱኡቲ ዓኣ ዓሶዋ ዒዚ ቶኦዛዲ ዛጉዋሴ።

34 ጫሪንጮንታ ሳዖንታ ባዘንታ
ዬያኮ ጋሮይዳ ዓጊፃ ባካ ቢያ
ዖኦሲ ጋላቶንጎ።

35 ዖኦሲ ሂዮኔ ዓውሳንዳኔ፤
ዪሁዳ ካታሞዋ ማሂ ጊንሣ ማኸንዳኔ፤
ዬካፓ ዳራ ዒዛኮ ዒኢካ ናንጋንዳኔ፤
ሳዔሎዋ ዔያታ ፔኤሮ ማሃንዳኔ።

36 ዒዛ ዓይሎ ዜርፃ ዬኖ ዳካላንዳኔ፤
ዒዛ ናሽካዘንሢያ ቢያ ዒኢካ ናንጋንዳኔ።

ማኣዶ ዳንቃኒ ሸኢቁንቴ ሸኢጲሢሢ

70

(ዓይኑ. 40:13-17ይዳ ዓኣሢና ዋሊ ማላያኬ)

ዓይነቱ ሱኡጋሢ ዓይሣ ጎይዖና ማሊ ጳቂሥሢሮ ዓይናዲንታ ዳውቱ ዓይነቱ

1 ዖኦሲዮ! ታና ዓውሳኒ ታ ባንሢ ሸሬ!
ናንጊና ናንጋ ጎዳሢዮ! ታና ማኣዳኒ ሩኡሬቴራ!

2 ታኣኮ ሸምፓሢ ባይዛኒ ኮዓዘንሢ
ቦርሲንቶንጎ፣ ዲቃቲ ካራ ባይዘንጎ፤

ታኣኮ ባይሲንቶ ካፓዘንሢ
ዳውሲንቴ ጊንሢም ማዖንጎ።

3 ታ ዑዖይዳ፡- «ማዳ ዒዛም!» ጋዓዘንሢ
ቦርሲንቴ ጊንሢም ማዖንጎ።

4 ጋዓንቴ ኔና ኮዓዘንሢ ቢያ ኔኤና ሚርጌና ዋዛዶንጎ፤
ኔኤኮ ዓውሲያ ናሽካዘንሢ ቢያ ዋዴ፡-
«ዖኦሲ ዳኤፒኬ!» ጎዖንጎ።

5 ዖኦሲዮ! ታኣኒ ጋዓንቴ ማንቆ፣ ሃሣ ማታዳ ዓሲኬ፤
ናንጊና ናንጋ ጎዳሢዮ! ሩኡሪና ታና ሄሌ፤
ታና ማኣዳሢና ዓውሳሢያ ኔናታሢሮ
ዖኦሲዮ! ኔኤኒ ኔጊፕ!

71

ጾኑሲ ካፓንዳጉዲ ሺኦቂንቴ ሺኦሲሂ

1 ናንጊና ናንጋ ጎዳሂዮ! ታ ኔና ታኣኮ ገቲማሂ ማሄሂር
ፔቴታፆ ታኣኒ ቦርሲንታዓኩ።

2 ኔ ዒሉሞና ቶሊሲ ታና ዓውሴ፤
ዋዮ ኔኤኮ ታ ባንሂ ማሂ ታና ዓይሴ።

3 ዓይጎ ዋዴናኣ ታ ዓኣሺንቴ ጌኤቂንታ ላላሂ ታኣኮ ማዔ፤
ኔ ታኣኮ ዋርዲዮ ላሎ ሹጫሂኬ፤
ዬያር ታና ዓውሳንዳ ዓይሥሂ ኬሰኮንጎ።

4 ጾኑሲዮ! ፑርቶ ዓሶ ኩጫፓ
ሚጨንቴዋ ጌኔ ማዳ ዓሶፓ ታና ዓውሴ።

5 ናንጊና ናንጋ ጎዳሂዮ!
ኔኤኒ ታኣኮ ሃጊ ማዓ ዋዛሂ
ናኣቴማፓ ዓርቃፆ ኔ ታኣኮ ጌኤቂንቶሂኬ።

6 ታኣኒ ሸይንታፓ ዓርቃፆ ኔ ዑፃ ጌኤቂንቴኔ፤
ታ ዒንዶ ጎጶፓ ታና ኔ ኬሴኔ፤
ቢያ ዋዴ ታኣኮ ጋላቶሂ ኔናኬ።

7 ኔኤኒ ታ ዛሎ ደዲ ያልታሂ ማዔሂር
ናንጋ ታኣኮ ሚርጌ ዓሶሞ ማላታ ማዔኔ።

8 ሮኦር ጉቤ ኔኤኮ ቦንቾ ኬኤዛኒ
ዳንጋ ታኣኮ ጋላታ ሌሊ ማዔኔ፤

9 ሃሂ ታ ጋርቼቴያ ታና ኬኤሪፖ፤
ዋልቃ ታኣኮ ጋፓዛኣ ታና ሃሺፖ።

10 ሞርካ ታኣኮ ዋላ ጌሰቴኔ፤
ሹምፓሂ ታኣኮ ባይዛኒ ኮዓ ዓሳ ዋሊና ዘርቴኔ።

11 ዔያታ ዒማና፡- «ጾኑሲ ዒዛ ሃሹኔ፤
ዒዛ ዓውሳንዳይ ባኣሂር
ዳውሲ ዒዛ ዓርቁዋቴራ» ጌዔኔ።

12 ጾኑሲዮ! ኔ ታ ኮራፓ ሃኪፖ፤
ታ ጾኦዛሂዮ! ታና ማኣዳኒ ሩኤሬ።

13 ማኪ ታና ዒፃዘንሂ ዒጊጨ ባይቆንጎ፤
ማኣሳንሂኒ ኮዓዘንሂያ ቶኦቹንቴ ዳውሲንቶንጎ።

14 ታኣኒ ጋዓንቴ ቢያ ዋዴ ኔና ጉሙርቃኔ፤
ቃሲ ቃሲ ጋላታ ታ ኔኤሞ ሺኦሻኔ።

- 15 ደንጋ ታኣኮ ኔ ዒሉሞ ርኦሮ ጉቤ
 ኔ ደቂሺያ ኬኤዛኔ፤
 ጌኤዘ ዎማካ ዔቂሶንዶቴያ ታኣሞ ዔርቲባኣሴ።
- 16 ታኣኒ ሙኪ ናንጊና ናንጋ ጎዳኮ
 ዶዶ ማዶ ኬኤዛንዳኔ፤
 ኔ ዒሉሞ ሌሊ ታኣኒ ኬኤዛንዳኔ።
- 17 ያኦሲዮ! ኔኤኒ ታና ናኣቴሞፓ ዓርቃያ ዔርዘኔ፤
 ታኣኒያ ሃኖ ሄላንዳኣና ኔኤኮ ሄርሺሲ ዲቃሣ ዓኮ ማዶ
 ኬኤዛኔ።
- 18 ያኦሲዮ! ታኣኒ ጋርቺ ቡኡቄቴያ
 ኩጮ ኔኤኮ ሙካ ሸይንቶሞ
 ዎልቆዎ ጊንፃ ኬሰካ ዴሮሞ
 ቢያ ታ ኬኤዛንዳያ ሄላንዳኣና ኔ ታና ሃሺፖ።
- 19 ያኦሲዮ! ዒሉማ ኔኤሲ ጫሪንጮ ሄላያኬ፤
 ኔኤኒ ዴኤፒ ዴኤፒ ባኣዚ ማዴኔ፤
 ያኦዛሂዮ! ኔጉዴያ ያናዳይ?
- 20 ኔኤኒ ታና ሚርጌ ሜቶና ዎኣዪሂና ሄሊሴታቴያ
 ናንጎ ታኣሲ ኔ ጊንሣ ዓካሳንዳኔ፤
 ሳያ ዴሞ ዔቶይዳፓ
 ላሚ ታና ኔ ኬሳንዳኔ።
- 21 ታኣኮ ቦንቸ ታኣሞ ኔ ቃሳንዳኔ፤
 ማሂ ኔ ታና ጊንሣ ዶዶሻንዳኔ።
- 22 ያኦሲዮ! ኔኤኮ ጉሙርቂንቲያ ዛሎ
 ጎኦላ ዎርቂ ታ ኔና ጋላታንዳኔ፤
 ዒሰራዔኤሌሌ ዓሶኮ ያኦዛሂዮ!
 ዓይኑሞ ዓንጋሞና ጋላታ ዓይኑሞ ታ ኔኤሞ ሸኢሻኔ።
- 23 ታኣኒ ኔኤሞ ዓይኑሞ ዓይናዳ ዎዶና
 ሙሱራ ታኣኮ ዎዛና
 ኔኤኒ ማሂ ሻንቂ ዓውሴ ሸምፔላኣ ዒላሻኔ።
- 24 ደንጋ ታኣኮ ኔ ዒሉሞ ዛሎ ርኦሮ ጉቤ ኬኤዛኔ፤
 ታና ሜታ ሄላንዳጉዲ ኮዓዘንሂ
 ቦርሲንቴኔ፥ ጋፒ ዳውሲንቴኔ።

72

- ሃገ ሙካ ካክታህ ጾኑሲ ማኣዳንዳጉዲ ሺኦቁንቴ ሺኦጲህ
- 1 ጾኑሲዮ! ኔኤኮ ዋጎ ካክቲም
 ዲሉሞዋ ኔኤኮ ካክቲ ሩኣዚም ዒንጌ።
 - 2 ዒዚ ኔ ዴሮኮ ጌኤዘ ዲሉሞና ዛጋንዳኔ፤
 ሜታዳዘንህማኣ ፒዙሞና ዎጋንዳኔ።
 - 3 ዲካ ጾርጎቹም
 ጌሜራኣ ዴሮም ዲሉሞ ዓኣፒ ዔኪ ዬዓንዳኔ።
 - 4 ዒዚ ሜታዳ ዴሮም ሞኦቲንታንዳኔ፤
 ማንቆ ዓሶዋ ዓውሳንዳኔ፤
 ዓሶ ሄርቂ ዎይህ ዓሶዋ ዒ ጋኦጫንዳኔ።
 - 5 ዓባ ዓኣ ዎዶይዳ ቢያ
 ዓገናኣ ፖዓ ዎዶይዳ ቢያ
 ሾይንቲፓ ሾይንቲ ሄላንዳኣና ዒዚ ሩንጋንዳኔ።
 - 6 ሃኣኮ ቡሪንቴም ማኣሊዳ ዋርቃ ዒርዚጉዲ
 ዒ ዋርቃንዳኔ፤
 ዓዳ ፀብ ዒርዚጉዲ ሳዓ ጌላንዳኔ።
 - 7 ዒዛ ካኦቱሞና ዲሉሞ ሚርጋንዳኔ፤
 ዓገና ፖዓ ሃሻንዳያ ሄላንዳኣና
 ጾርጎቹማ ዒዛኮ ሚርገ ዴዓንዳኔ።
 - 8 ዒዛ ዓጮኮ ዛጳ ባዛፓ ባዞ ሄላንዳኣና
 ዔፕራዲሴ ዎራፓ ዴንዲ ዓጮ ጋፖ ሄላንዳኣናኸ።
 - 9 ዳውሎ ዓጮ ዓሳ ዒዛም ዚጋንዳኔ፤ *
 ሞርካ ዒዛኮ ዒዛ ቤርታ ሎኦሚ ዓጪ ኩኡላንዳኔ።
 - 10 ቱርሴሴንታ ዋኣያ ሳዛ ዓኣ ዓጮ ካኣታኣ
 ጌኦራ ሚኦሺ ዒዛም ዔኪ ዬዓንዳኔ፤
 ዓሬቤንታ ሳኣባ ዓጮ ካኣታኣ ዔኤቤ ዒንጋኒ ዒዛም
 ሺኦሻንዳኔ።
 - 11 ካኣታ ቢያ ዒዛም ዚጋንዳኔ፤
 ዴራኣ ቢያ ዒዛም ዎርቃንዳኔ።
 - 12 ሜታዳህ ዒላታ ዎዶና
 ማንቆ ዓሶንታ ማኣዳይ ባኣ ዓሶዋ ዒዚ ሄሊ ዓውሳንዳኔ።

72:8 ዛካ. 9:10። * 72:9 ዳውሎ ዓጮ ዓሳ ዒዛም ዚጋንዳኔ ጋዓዞ፡- ላንካይታዎ ዓሳ ቡሉ ማፃላፍ ይዳ «ዒቶጲያ ዒዛም ዚጋንዳኔ» ጋዓኔ።

13 ማንቆንታ ማታጅ ዓሰንታም ዒ ሚጨንታንዳኔ፤
 ዬያቶ ሃይቢዳፓኣ ዒ ዓውሳንዳኔ።
 14 ሄርቁንቲ ዋርቆ ዋይጆይዳፓ ዒዚ ዔያቶ ኬሳኔ፤
 ሱጉፃ ዔያቶሲ ዒዛ ቤርታ ቦንቺንቴያኬ።

15 ካኣታሢ ሚርጌ ለዔ ናንጎም!
 ሳኣባ ዓጮይዳፓ ዋርቆ ዒዛም ሺኢኮም፤
 ሺኢጲሢያ ቢያ ዋይ ዒዛም ሺኢቁንቶም፤
 ቢያ ዋይ ያኦሲኮ ዓንጃ ዒዛም ማጋም።

16 ዓጫ ዒዛሲ ሚርጌ ሃኣኮ ካሦም፤
 ዲካ ዒዛኮ ሃኣኮ ባቃልሶም፤
 ሊባኖኦሴ ዲኮጉዲ ማሊ ማጋም፤
 ሃኣኮኮ ናታ ዒዛኮ ማኣቲጉዲ ሚርጎም።
 17 ሱንፃ ዒዛሲ ናንጊና ደዲ ናንጎም!
 ዔርቲፃ ዒዛኮ ዓቢ ናንጋሢጉዲ ማጋም፤
 ዴሬ ቢያ ዒዛና ዓንጃንቶም፤
 ዴራ ቢያ፡- «ኔኤኒ ዓንጃንቴያኬ!» ዒዛ ጎጋም።

18 ፔኤር ሌሊ ሄርሺሲ ዲቃሢ ዓኪ ባኣዚ ማዳ
 ናንጊና ናንጋ ጎዳ ማዔ ዒሰራዔኤሌ ያኦዛሢ ዓንጃንቶም!

19 ዒዛኮ ቦንቺ ሱንፃ ናንጊና ዓንጃንቶም፤
 ዓጫ ቢያ ዒዛኮ ቦንቺና ኩሞም!

ዓኣሜን! ዓኣሜን!

20 ዒሴዬ ናኣዚ ዳውቴ ሺኢጲፃ
 ሃይማ ሄሊ ጋፔኔ።

ሃይሣሳ ፖቂያ

73

(ዓይኑ ማፃ ዓይ. 73—89)

ዓሳኣፔ ዓይነቱ

ያኦሲኮ ፒዜ ዋጊያ

- 1 ዒና ጌኤሺ ማዔ ዒሰራዔኤሌ ዓሶም
 ያኦሲ ዋዚ ኮሺዳይ!
- 2 ታኣኒ ጋዓንቴ ቶካ ታኣኮ ዲቁንታኒ
 ሃሊፃም ሎኦማኒ ዳካር ዓቴኔ።

3 ታኣኒ ፑርቶ ዓሰም ዔባ ኮሽካዛ ዛጊ
 ዋይዞ ዒፃ ዓሰማኣ «ዬይ ዎዲ ማዔያ»
 ጌይ ማሌኔ።

4 ፔቲታፆ ሜታ ዔያቶኮ ባኣሴ።
 ዑፃ ዔያቶሲ ኩሙሢ ኮሺኬ።

5 ዓሲ ሄላ ፑርታ ሜታ ዔያቶ ሄሉዋሴ፤
 ዓይጎ ዓሲዳኣ ማዓ ሜታ ዔያቶ ዑፃ ማዑዋሴ።

6 ዬያር ፆቶርሙሞ ዔያቶኮ ቆርጫ ማይንቶ ፓልሞኬ፤
 ዋይዚ ዒዲሢያ ዓዳ ዔያታ ማኣፆጉዲ ማይንቴኔ።

7 ዔያቶኮ ማሌ ዓኣፓ ቴልዮ ጌይ ዛጋኔ፤
 ዒናኣ ዔያቶሲ ፑርታ ማሊሢ ኬሳኔ።

8 ቶኦቺሢና ፑርቱሞ ዔያታ ጌሰታኔ፤
 ለካ ጨኢዲንቲ ጨኢዲንቲ ዋይዞ ዒዲያና ዚርቃኔ።

9 ጫሪንጫ ዓኣ ፆኦዛሢ ማኪ ዔያታ ጌሰታኔ፤
 ጌኤዛ ዔያቶኮ ሳዓ ማዔ ካሮ ሄላኔ።

10 ዬያር ፆኦሲ ዳራኣ ዓቱሞፆ ዔያቶ ባንሢ ጎዓኔ፤
 ዋኣፆዋ ዔያቶኮ ካራባኣ ጎይሢና ዑሽካኔ።

11 «ዓካሪ ፆኦሲ ዋይቲ ዔራይ?
 ዴኤፖ ፆኦዛሢ ኮራ ዔራቶ ዓኣ?» ዔያታ ጋዓኔ።

12 ፑርቶ ዓሳ ያዲ ማላኔ፤
 ዔያቶኮ ዓኣ ቆላ ጊዳያኬ፤
 ዬያይዴንቴያ ቃሲ ቆሎ ዔያታ ዴንቃኔ።

13 ሃይሾ ዒኖ ታኣኮ ታ ጌኤሺ ማሄሢ ጉሪኬ፤
 ዔኤቢ ታ ካኣሚባኣዋይ ጌዒ ኩጮ ማሰታሢያ ጉሪኬ።

14 ሮኦር ጉቤ ታ ሜታዴኔ፤
 ጉቶ ጉቶዋ ሜቶ ታ ዔኬኔ።

15 ታኣኒ ሃያይዲ ጌሰታንዳኔ ጌዔያ ማዔያታቶ
 ኔኤኮ ናኣቶ ሾይንቶይዳ ሄኤዶ ፑርታ ባኣዚ ማዴያናንዳኔ።

16 ዬያ ባኮ ታ ዔራሲ ማሌ ዎዶና
 ላቢሢ ማዶ ማሊ ታኣም ጴዴኔ።

17 ዬያ ፆኦሲኮ ዲማዴ ማኣሮ ታ ጌላንዲያ ሄላንዳኣና
 ፓፓንፆዋ ዔያቶኮ ታ ዛጋንዲያ ሄላንዳኣናኬ።

18 ጎኔና ሃሊፃ ቤሰካ ኔ ዔያቶ ጌሢኔ፤
 ባይሰንታ ባንሢያ ኔ ዔያቶ ኬይሴኔ።

19 ዔያታ ቤዘና ሩኡሪ ዋይቲ ባይቄይ?

ዲቃቲ ጋፒ ዔያታ ኩዳኔ።
 20 ዓሲ ዓውቲዳፓ ዲቃታፖ ዎኦታሢጉዲ
 ናንጊና ናንጋ ጎዳሢዮ!
 ኔኤኒ ዔቃ ዎድና ባልባቲሢጉዲ ጉሪ ኔ ዔያቶ ማሃንዳኔ።

21 ማሊፃ ታኣኮ ሚርጌና ጫንቄኔ፤

ዒናኣ ታኣኮ ማቄኔ።

22 ማሊሢባኣያና ዔራዎ ዓሲያ ታ ማዔኔ፤

ኔ ቤርታ ቆልሞጉዲ ታ ማዔኔ።

23 ያዲ ማዔያታቲያ ቢያ ዎዴ ታ ኔኤና ዎላኬ፤

ኔኤኒያ ታኣኮ ሚዛቆ ኩጮ ዓርቄኔ።

24 ኔ ዘሪዎና ዔኪ ታና ኔ ዓኣዳኔ፤

ጊንፃፓ ኔ ታና ቦንቹሳንዳኔ።

25 ጫሪንጮይዳ ኔኤፓ ዓታዛ ታኣኮ ያኦኒ ዓኣይ?

ሳዎይዳ ኔ ጊዳፓ ማሌ ታ ኮዓይ ባኣሴ።

26 ታኣኮ ዑዎንታ ዒኖንታ ላባኒ ዳንዳዓኔ፤

ዎኦሲ ጋዓንቲ ዒኖኮ ታኣኮ ደደማሢና

ናንጊና ታኣሮ ማሂ ታ ዔኬሢኬ።

27 ዓኣሪ ኔኤፓ ሃኣዘንሢ ሳይቃንዳኔ፤

ኔኤኒ ኔኤም ጉሙርቁንቲዎዘንሢ ቢያ ሳይዘንዳኔ።

28 ታኣም ጋዓንቲ ዎኦሲ ባንሢ ዑኪሢ ኮይሳኔ፤

ናንጊና ናንጋ ጎዳ ጊቲማሢ ታኣኮ ታ ማሄኔ፤

ኔኤኮ ማዶ ዛሎዎ ታኣም ኬኤዛኒ ኮሺኬ።

74

ዓሳኣፔ ዔራቶና ኣላሌ ኣላሊ

ዴራ ኮሺ ናንጋንዳጉዲ ሺኣቁንቲ ሺኣጲሢ

1 ዎኦሲዮ!

ናንጊና ኔ ኑና ዓይጋ ኬኤሬይ?

ሄንቆ ቦኦሎይዳ ዓኣ ኔ ማራቶይዳ ዳጋ ኔኤኮ ዓይጋ ዔኤቲይ?

2 ሚናፓ ዓርቃፖ ኔ ዶኦሬ

ኔ ዓጊኒ ማዓንዳጉዲ ዓይላታፓ ሻንቄ ኔ ኬሴ

ዴር ኔኤኮ ማሌ፤

ሃያኮ ቤርታ ኔኤኮ ናንጎ ቤሲ ኔ ማሄ

ፃዮኔ ዲኮም ማሌ።

3 ሄዎ ኔኤኮ ናንጊና ቆይዳ ማዔ ቤዘ ባንሢ ማሄ፤

ሞርካ ኔኤኮ ጌኤዢ ማኣራ ዓኣ ባኮ ቢያ ፑርቲሴኔ።

- 4 ሞርካ፡- «ኑ ባሽኔ» ጌራ
 ኔኤኮ ጌኤኮ ማኣሮይዳ ሄርሺንታኔ፤
- ባሺያ ዓርዛ ዓያቶኮ ባንዲሮዋ ሱጭ።
- 5 ካዮ ባኣካ ሚሢ ቆፃኒ
 ሄርጋ ዓርቄ ዓሲ ዓያታ ማላኔ።
- 6 ሚያ ቃርፂ ኮጫ ሱያና ባኮ
 ሄርጋና ቆፂ፥ ሞቶሾናኣ ጳርቄ ሜንሣኔ።
- 7 ኔኤኮ ጌኤኮ ማኣሮ ሚቺ ዓያታ ባይዜኔ፤
 ኔ ሱንያኮ ዋይያ ቤዘዋ ዒኢሴኔ።
- 8 ዓያታ ፔኤኮ ዒኖና፡-
 «ጋፒንሢ ሄርቄ ኑ ዓያቶ ዋይሣንዳኔ» ጌዓኔ፤
 ሳዔሎይዳ ያኦሲ ካኣሽኪንታ ቤዘ ቢያ ዓያታ ሚቺኔ።

- 9 ማይ ኑ ዛጋንዳ ማላታ ማዓ ባኣዚ ባኣሴ፤
 ፔቲታያ ያኦሲ ማላሢ ኬኢዛኒ ኬሰካ ዓሲያ ባኣሴ፤
 ሃይ ዋማ ሄላንዳኣና ሃማይዲ ዴዓቲያ
 ዔራይ ኑ ባኣካ ባኣሴ።
- 10 ያኦሲዮ! ሞርካ ሚኢ ጫሢ ዋማ ሄላንዳኣናዳይ?
 ኔ ሱንያ ጫርቄ ዓያታ ቶኣቻሢ ዋማካ ጋፓይ?
- 11 ኩጮ ኔኤኮ ኔ ዓይጋ ማሃ ዓካይ?
 ሚዛቆ ኩጮ ኔኤኮ ሾኦጶ ዴማ ዓይጋ ዳካይ?

- 12 ያኦሲዮ! ሚናፓ ዓርቃያ ኔ ታኣኮ ካኣቲኬ፤
 ሳያይዳ ኔኤኮ ዓውሲያ ማዶ ኔ ማዳኔ።
- 13 ኔኤኮ ዋልቆና ባዘ ፓቄሢ ኔናኬ፤
 ባዘይዳ ናንጋ ቦያኮዋ ቶኣኮ ዋኣያይዳ ኔ ዳኣጭ።
- 14 ሌዋታኔ ጌይንታ ቦያኮ ቶኣኮ ኔ ጋኣጮኔ፤
 ዓሲ ናንጉዋ ዳውሎ ማዢንቶማዋኣ *
 ሙኤዚ ማሃ ኔ ዒንጌኔ።
- 15 ዓልቃ ዋኣያንታ ዋታ ዋርንታ ዑሬሢ ኔናኬ፤
 ቢያ ዋዴ ዋታ ዋር ኔ ሚጪሴኔ።
- 16 ሮኣርንታ ዋንቶንታ ኔኤርኬ፤
 ዓጊኖና ዓቦና ኔኤኒ ዶዲሺ ዴይሣኔ።
- 17 ሳያኮ ማዓ ካር ጌሣሢ ኔናኬ፤

74:13 ኬሲ. ማግ 14:21። * 74:14 ዓሲ ናንጉዋ ዳውሎ ማዢንቶማኣ ጋዓዘ፡-
 ለንካይታዋ ዓሳ ቡሌ ማግኒትይዳ «ዒቶጲያ ዓሰማኣ ሙኤዚ ኔ ዒንጌኔ» ጋዓኔ።
 74:14 ዒዮ. 41:1፤ ዓይኑ. 104:26፤ ዒሲ. 27:1።

ጎጎጎጎጎ ባርጎጎጎጎ ኔኔኔ ኬሴኔ።

- 18 ናንጊና ናንጋ ጎዳሢዮ!
ኔ ሞርካ ኔና ቦሂ ዓማላሢ ዛጌ፤
ዔያታ ዔኤያ ማዔሢሮ ኔ ሱንጎይዳ ጫርቃ።
- 19 ኔኤም ወርቃ ሽምጋሢ ቦጎም ዓኣሢ ዒንጊፖ፤
ኔኤም ማዳዘንሢኮ ሜቶ ናንጊና ዋሊፖ!
- 20 ጫኣቁሞ ኔኤሲ ማሌ፤
ዋይዚ ዒዲሢ ቡኬ ቤሲ
ሳዔሎኮ ዲሜ ጊንፃ ኩሜኔ።
- 21 ሄርቁንቲ ዋርቃዘንሢ ቦርሲንቲ ማጎፓ፤
ማንቆንታ ሜታዳ ዓሶንታ ሱንጎ ኔኤሲ ጋላቶንጎ።

- 22 ጎኦሲዮ! ዔቁ!
ኔ ጌኤዘ ዛሎ ሞኦቲንጎ፤
ጋሡዋ ዓሳ ሮኦሮ ጉቤ
ኔና ቶኦቻሢ ዛጌ።

- 23 ኔ ሞርኮኮ ሄርሺንቶ
ቢያ ዋዴ ዲቢ ዲቢ ዓኣዳ ሆኦሊንቶ
ዔያቶኮ ኔኔኔ ዋሊፖ።

75

«ባይዚፖ» ጌይንታ ዓይነቱና ዓይነቱ ሱኡጋሢ ዓይሣ ጎይጎ
ዓይናዲንቲ ዓሳኣፔኮ ጎኦሲ ሄርሺጎ ዓይነቱ
ጎኦሲ ዋጋያ ማዒጎ

- 1 ጎኦሲዮ! ኦኡኔ ኔና ጋላታ፤
ኔኔኔ ሃንጋ ኦ ባንሢ ዐኩሢሮ
ኔ ሱንጎም ኦ ጋላታ ሺኣሻኔ፤
ኔ ማዳ ዲቃሢ ሄርሺሳ ማዶ ኦ ኬኤዛ።

- 2 ኔኔኔ:- «ታኣኔ ዋጌ ዋጋንዳ ኬሊ ሜንሣ፤
ዬኖ ዋዶና ፒዜ ታ ዋጋንዳ።

- 3 ሳዓ ዓገጃታቴያ
ዒኣኣ ዓኣ ማዢንታ ጎጋይቁቴያ
ታኣኔ ሳጎኮ ዓይጎ ዶዲሻኔ።

- 4 ጎቶርቃዘንሢ ዒንሢ ሄርሺንቲፖ፤
ፑርቶ ዓሶዋ «ጨኢዲንቲፖ፤» ታኣኔ ጋዓንዳ፤

- 5 ያኦሲ ዑያይዳ ኔና ጴግ ጴጊዲፖ፤
ሃንሳ ሃሣ ያቶርቁ ጌሰቲፖ» ጌዔ።።
- 6 ዋጌ ዓባ ኬሰካ ባንፃፓ ማዖም ጌላ ባንፃፓ
ጊንሣ ሃሣ ዓሲ ናንጉዋ ዳውላፓ ሙኩዋሴ።።
- 7 ፔቲሢ «ዳቤ።» ጌዒ ዋጋሢ
ባጋሢ «ዔኤቢ ኔኤኮ ባኣሴ» ጌዒ
ፒዜ ዋጋሢ ያኦሲኬ።።
- 8 ዑዠ ዑሽኮ ዓንጋ ናንጊና ናንጋ ጎዳኮ ኩጫ ዓኣ፤
ኮይሳሢጉዲ ጊኢጊሸና ዲባዳ ዋይኖ ዑዠ ኩሚ ዓኣ፤
ዬያ ዒ ዓንጋፓ ላኣላዛ ሳያይዳ ዋይዞ ዒፃ ዓሳ
ሞጮዋ ዓይሱዋፃ ጋፒሲ ዑሽካንዳ።።
- 9 ታኣኒ ጋዓንቴ ዬያ ናንጊና ኬኤዛንዳ፤
ያይቆኦ ያኦዛሢ ሞዓይነቱ ሸኢሻንዳ።።
- 10 ፑርቶ ዓሶኮ ካኣሮ ቢያ ታ ማንሣንዳ፤
ዒሎ ዓሶሲ ጋዓንቴ ጴግ ጋዓንዳ።።

76

ዓይነቱ ሱኡጋሢ ዓይሣ ጎይያ ጎኦላና ዓይናዲንቴ ዓሳኣፒኮ
ያኦሲ ሄርሺያ ዓይነቱ

- ያኦሲ ባሻያ ማዔሢ
- 1 ያኦሲ ዪሁዳ ዓጫ ዔርቴ፤
ሱንፃ ዒዛኮ ዒሰራዔኤሌይዳ ዴኤፒኬ።።
- 2 ጌኤዠ ማኣራ ዒዛኮ ዬሩሳላሚይዳ (ሳሌሚይዳ)
ዒዚ ዋርቃ ቤዛኣ ዒዮኔይዳ።።
- 3 ዒኢካ ዲከንታ ሂኢዠንታ ጊቲሞንታ
ዋርቃዋ ዒ ማንሣ።።
- 4 ያኦሲዮ! ኔኤኒ ዒጊቻያኬ፤
ኔኤኮ ዲቃሢ ሄርሺሲፃ ዴኤፖ ዲካፓ ባሼኬ።።
- 5 ያሎና ዔርቴ ፖኦላሳ ዲዒ ዔኬ ባካ
ጊንሣ ቡሪንቲ ዔውቴ፤
ኩጮ ዔያታ ዔቂሶ ባሺንቲ
ጋፒ ጊንፃ ጊንዔ።።
- 6 ያይቆኦ ያኦዛሢ!
ኔኤኒ ዔያቶ ጎሪ ዋይና
ፓራሢ ቶጌ ዓሳ ፓራሢና ዋላ ሃይቄ።።

- 7 ዒጊጮንዶያ ኮይሳሢ ኔና ሌሊኬ፤
ኔኤኒ ዳጋዴ ዎደና ኔ ቤርታ ዖኑኒ ዔቃኒ ዳንዳባንዳይ?
- 8 ኔኤኒ ጫሪንጫፓ ዎጎ ኬኤዜም
ሳዔላ ዎይዚ ዒጊቹሞና ዚቲዮ ጌዔኔ።
- 9 ዖኑሲዮ! ዩይ ያዲ ማዔሢ
ኔኤኒ ሳዖይዳ ማታዴ ዓሶ ዓውሳኒ
ዎጎሮ ዔቁ ዎደናኬ።
- 10 ዓሲ ማቶ ዓጊ ኔኤኒ ጎሬቲያ ኔ ቦንቾም ማዓኔ፤
ዩያ ጎሪንቶፓ ቶሌዘንሢያ ሪኢራኔ።
- 11 ናንጊና ናንጋ ጎዳ ማዔ ዒንሢ ዖኑዛሢም ናኣቡዎቲ፤
ዒንሢ ናኣቤ ናኣቦዎ ኩንሡዎቲ፤
ዒዛኮ ዑኬ ዓኣ ዓሳ ቢያ
ዒጊቻያ ማዔሢም ዒንጎ ባኣዚ ሺኢሾንጎ።
- 12 ዒዚ ዖቶርቃ ሱኡጎ ዳውሲሳኔ፤
ዴኤፖ ዴኤፖ ካኣቶዎ ጎቃይሳኔ።

77

- ዓይኑም ሱኡጋሢ ዓይሢ ጎይዖ ዔዶታሜ ዛሎ ዓይናዲንቲ
ዓሳኣፔ ዓይኑም
- 1 ዑኡዘ ታኣኮ ዴጊዲ ዖኑሲ ባንሢ ዒላቲኔ፤
ዒዚ ታኣም ዎይዘንዳጉዲ ዒዛ ባንሢ ዔኤሊንቲኔ።
 - 2 ታኣኮ ማታሢ ኬሎና
ናንጊና ናንጋ ጎዳ ታ ኮዔኔ፤
ዎንቶ ላቢሢ ባኣንቲ ኩጮ ታ ዒዛ ባንሢ ዔቁሴኔ፤
ሹምፔላ ጋባንቲ ታኣኮ ዶዲዖ ዒፄኔ።
 - 3 ዖኑሲ ዛሎ ታ ማላ ዎደና ታ ዖዩኔ፤
ዒናፓ ታ ማላዛ ዒና ታኣኮ ዶጩኔ።
 - 4 ዎንቶ ጉቤ ኔ ታና ጴቹኔ፤
ዖዩዖ ታኣኮ ማርጌሢሮ ጌሰታኒ ታ ዳንዳዒባኣሴ።
 - 5 ጊንሢም ዓኣዴ ኬሎ ታ ማሌኔ፤
ሚና ዓኣ ሌዖዎ ማሊ ታ ጳቂሣኔ።
 - 6 ዎንቶ ታ ዓይናዴ ዓይኑም ማሌኔ፤
ታኣኮ ዒኖና ታ ጌሰቲኔ፤
ታ ዓያኖና ታ ማላዖ።

- 7 «ናንገና ናንጋ ጎዳ ኑና ጋፒ ከኬኤሪያ?
ሃካፓ ሴካ ፔ ኮሹሞ ዒ ፔቲታፆ ዳዋዓዳ?
- 8 ዒዛኮ ማኣሪፃኣ ኑኡሞ ናንገና ባይቂያ?
ጫኣቁማኣ ሃካፓ ሴካ ዶዲ ዴዑዋዓዳ?
- 9 ፆኦሲ ፔኤኮ ኮሹሞ ዋሊያ?
ዳጎይዳፓ ዔቂያና ሚጨጎቶ ዒ ሃሺያ?» ጌዔኔ።
- 10 ታኣኒ፡- «ዳኤፖ ፆኦዛሂኮ ሚዛቆ ኩጫ ላኣሚንቴያ ማሂ ማሊፃ
ታኣኮ ላቢሂኬ» ጌዔኔ።
- 11 ናንገና ናንጋ ጎዳኮ ማዶ ታ ጳቂሣኔ፤
ሚና ዒ ፔ ዋልቆና ማዳ ዲቃሣ ማዳ
ጎኔና ታኣሞ ጳቃኔ።
- 12 ማዶ ቢያ ታ ኔኤኮ ማላኔ፤
ዲቃሣ ዓኮ ማዶ ቢያ ማሊ ታ ሱካኔ።
- 13 ፆኦሲዮ!
ኔኤኒ ማዳ ባካ ቢያ ዲማዴያኬ፤
ኔፕዴያ ዳኤፒ ፆኦሲ ፆናዳይ?
- 14 ኔ ዋልቆና ማዳንታ ዓኪ ባኣዚ ማዳይ ኔናኬ፤
ሜሌ ዴሮ ባኣካ ኔ ዋልቆ ኔ ፔጋሲ ዳዋኔ።
- 15 ፆይቆኦቤንታ ዮሴፔንታ ናኣቶ
ኔ ዋልቆና ዴሮ ኔኤኮ ማሂ ሻንቂ ኔኤኒ ዓውሴኔ።
- 16 ፆኦሲዮ!
ዋኣፃ ኔና ዛጋፆ ዒጊጨኔ፤
ዔቶ ባዞ ዋኣፃኣ ጎጋይቄኔ።
- 17 ሻኣራ ዒሮ ዋርቄኔ፤
ጫሪንጫ ጉጉንፃ ጉጉንሣኔ፤
ዜኤሊንፃኣ ጫሪንጫፓ ቢያ ባንፆና ፖዔኔ።
- 18 ኔኤኮ ጉጉንሣ ዑኡዛ ዓልጋሂ ዢባሮይዳ ዋይዚንቴኔ፤
ዜኤሊንፃ ኔኤኮ ዓጮ ፖዒሴኔ፤
ሳዓ ጎጋይቂ ዓጊጻኔ።
- 19 ኔኤኮ ጎይፃ ባዞ ዋኣፆይዴና ዓኣዳኔ፤
ኔ ሃንቴፃ ዴኤፖ ዋኣፆይዳኬ፤
ኮጲሲ ጋዓንቴ ኔኤኮ ጴዲባኣሴ።
- 20 ሙሴና ዓኣሮኔና ዋላ ኔ ማዒ
ዴሮ ኔኤኮ ዓዳ ማራይጉዲ ዔኪ ኔ ዓኣዳኔ።

78

ዓሳኣፔ ዔራቶና ካላሌ ካላሊ

ፆኦሲና ዒዛኮ ዴሮና

1 ታ ዴሬዮቴ! ታ ዔርዛ ባኮ ዋይዙዋቴ፤

ታ ቃኣሎዋ ዒና ዔኩዋቴ።

2 ሃይሶ ታኣኮ ታኣኢ ኮኣኪንሂና ዓርቃንዳኔ፤

ሚናፓ ዓኣቺ ዓማሎ ዓማሊና ታ ኬኤዛንዳኔ።

3 ዬይ ኦኡኒ ዔሬሂና ዋይዜሂኬ፤

ኦ ዓድንሂያ ኦኡሞ ኬኤዜሂኬ።

4 ዬንሂ ባኮ ኦ ናኣቶሞ ኦ ዓኣቻዓኬ፤

ናንገና ናንጋ ጎዳኮ ዋልቆ ዛሎ

ዒዚ ማዴ ዴኤፖ ማዶና

ዒ ፔ ዋልቆና ማዴ ዲቃሂ ሄርሺሳ ባኮ

ሙካ ሸይንቶሞ ኦ ኬኤዛንዳኔ።

5 ዒዚ ያይቆኦቤም ዳምቤ ኬሴኔ፤

ዒሰራዔኤሌይዳኣ ዋጌ ዒ ጌህኔ፤

ናኣቶ ፔኤኮ ዔያታ ዔርዛንዳንጉዲ

ኦ ዓድንሂም ዓይህኔ።

6 ዬያ ሙካ ሸይንታ ዔራንዳጉዲ

ዔያታ ፔ ዋዶና ዔያቶኮ ናኣቶሞ

ሃገ ሸይንታዘንሂማኣ ኬኤዛንዳጉዲኬ።

7 ዬያይደናሂሮ ዔያታ ፆኦሲ ጉሙርቃንዳኔ፤

ዒዛኮ ማዶዋ ዔያታ ዋላዓኬ፤

ዓይሂያዋ ዔያታ ካፓንዳኔ።

8 ጋዓንቴ ዔያታ ፔ ዓድንሂጉዲ ዋይዚያና

ዓይሂንቴያዋ ዒፃ፡ ዒሮዋ ፔኤኮ ፒዚሲባኣ

ዓያናኣ ፆኦሲ ጉሙርቁዋ ሸይንቴ ማዓዓኬ።

9 ሂኢዦና ያላ ዔፕሬኤሜ ናኣታ

ሂኢዦ ዓርቁያ ማዔያታቴያ

ያሎ ኬሎና ገንሂም ዔያታ ማዔኔ።

10 ፆኦሲ ጫኣቄ ጫኣቁሞ ዔያታ ካፒባኣሴ፤

ዒዛኮ ዋጎ ጎይያ ዓኣዲያዋ ዒፄኔ።

11 ዒዚ ማዴ ማዶ

ዔያቶ ዒ ዳዌ ዲቃሂ ዓኮ ባኮዋ ዔያታ ዋሌኔ።

- 12 ዓደንሢ ዔያቶኮ ፔ ዓኣፖና ዛጋንቴ
ገብፄ ዓጫ ያዓኔ ገይንታ ሴዛ
- ዒ ፔ ዎልቆና ማዲንታ ዓከ ባኣዚ ማዳኔ።
- 13 ባዞ ፓቂ ዔያቶ ዒ ፒንሣኔ፤
ዎኣዎ ዓቲጉዲ ዔቂሴኔ።
- 14 ርኣሮ ሻኣሬና ዔከ ዔያቶ ዓኣዳኔ፤
ዎንቶዎ ቢያ ታሚ ያምፔ ዔያቶም ፖዔኔ።
- 15 ዓሳ ናንጉዎ ዳውሎይዳ ላሎ ዲኡሴኔ፤
ዩካፓ ባዚ ዎኣሢጉዴ ሚርጌ ዎኣሢ ዒ ዔያቶ ዑሼኔ።
- 16 ሹጮ ዳኤፓፓ ዓልቃ ዎኣሢ ዑሬኔ፤
ዎኣዎ ዎርዚጉዲ ዎይሴኔ።

- 17 ዔያታ ጋዓንቴ ዓሲ ናንጉዎ ዳውሎይዳ
ዳኤፖ ያኦዛሢም ዎይዞ ዒዲያና ጎሜ ማዲሢዳፓ ማዒባኣሴ።
- 18 ኮሺ ዔያቶ ዓፃሴ ሙኡዚ ያኦጪሢና
ዔያታ ዒኖና ዔሬያታዎ «ያኦሲ ዎይታቴያ» ጌዒ ዛጌኔ።
- 19 ያኦሲ ዑፃ ገንዲሚ ጌሰቴሢ
«ያኦሲ ዓሲ ናንጉዎ ዳውሎይዳ ሙኡዚ ገኣጊሺ ዒንጋኒ
ዳንዳዓ?»
- 20 ዒዚ ላሎ ዲኡሴሲሢና ዎኣዎ ዲዲጉዲ ዎይሴሢ ጎኔኩ፤
ሢዴቴያ ሙኡዚ ኑም ዒንጋኒና ዓሽከ ገኣጊሻኒ ዳንዳዓኔ
ጌይሢዳ?» ጌዔኔ።

- 21 ናንጊና ናንጋ ጎዳ ዬያ ዎይዛዎ ሚርጌና ዳጋዳኔ፤
ያይቆኦሴ ዑያይዳ ታሚ ዔኤቴኔ፤
ዳጋ ዒዛኮ ዒሰራዔኤሌይዳ ዔቂኔ።
- 22 ዔያታ ዒዛ ጉሙርቂባኣሴ፤
ዒዛኮ ዓውሲያናኣ ጌኤቂንቲባኣሴ።
- 23 ዒዚ ጋዓንቴ ሎፓ ሻኣሮ ዓይሣኔ፤
ጫሪንጮኮዎ ካሮ ቡሌኔ።
- 24 ዔያታ ሙዓንዳጉዲ ማና ዒ ዲኣኒሺኔ፤
ጫሪንቺዳ ዓኣ ሙኡዚ ዔያቶም ዒንጌኔ።
- 25 ዓሲ ከኣታንኛ ካሦ ሙዔኔ፤

78:12 ኬሲ. ማፃ 7:8—12:32። 78:13 ኬሲ. ማፃ 14:21-22። 78:14 ኬሲ.
 ማፃ 13:21-22። 78:15 ኬሲ. ማፃ 17:1-7፤ ፓይ. ማፃ 20:2-13። 78:18 ኬሲ.
 ማፃ 16:2-15፤ ፓይ. ማፃ 11:4-23፤ 31-35። 78:24 ዮሃ. 6:31።

- ሚሸከሩ ደምባ ዓይሳንዳያ ሄላንዳኣና
 ሙያ ዓይያቶም ዒንጌኔ።
- 26 ጫሪንጫፓ ዓባ ከሰካ ባንዎ ዠባሮ ዒ ዒቁሴኔ፤
 ደኣሎ ባንዎ ዠባሮዋ ዒኪ ሙኩኔ።
- 27 ዓሸኪ ዓይያቶም ዓጪጉዲ
 ባራና ካፖዋ ባዞ ዓጮ ማኣሻሎጉዲ ዒ ኬይሴኔ።
- 28 ዓይያቶኮ ጉርዶ ባኣኮይዳ
 ዓፒሎና ማዠንጉቴ ማኣሮ ኮራኣ ኬይሴኔ።
- 29 ዓይያታ ሚሸካንዳያ ሄላንዳኣና ሙዒኔ፤
 ዓይያታ ሚርጌና ዓፃዴ ባኮ ዓይያቶም ዒ ዒንጌኔ።
- 30 ጋዓንጉ ሃጌ ሱኡካ ዓይያቶኮ ማዐብንጉቴ
 ሙዒ ዓይያቶኮ ዳንጋ ዓኣ ጎይሣ ዓኣንጉቴ
- 31 ያኦሲኮ ጎሪጎታ ዓይያቶ ዐፃ ሙኩኔ፤
 ዓይያቶ ባኣካፓ «ኑ ዶዲኬ» ጋዓ ዓሶ ዋዴኔ፤
 ሃጋ ቡሮ ማዒ ዴጌሢያ ማንጭ።
- 32 ዬይ ቢያ ማዒንጉቴያ ዓይያታ ፔኤኮ ዳቢንቶና ዶዴኔ፤
 ዒዚ ማዳ ዲቃሣ ባኮዋ ዓይያታ ጉሙርቁባኣሴ።
- 33 ዬይሮ ዋዶ ዓይያታ ፔኤሲ ጉሪ
 ናንጎዋ ዲቃተሢና ጋፒሴኔ።
- 34 ዒዚ ዓይያቶ ዋዴ ዋዶና ዓይያታ ዒዛ ኮዒኔ፤
 ዒናፓ ኮዒሢና ዒዛ ባንሢ ማዒኔ።
- 35 ያኦሲ ዓይያቶኮ ላላሢ ማዒሢ ዓይያታ ጳቂሢኔ፤
 ዴኤፖ ያኣዛሢ ዓይያቶ ዓውሳሢ ማዒሢያ ማሌኔ።
- 36 ጋዓንጉ ዓይያታ ፔ ዳንጎና ዒዛ ጌሼኔ፤
 ዬያ ዳንጎና ዒዛም ዓይያታ ሉኡቄኔ።
- 37 ዒና ዓይያቶኮ ዒዛና ዶዲባኣያኬ፤
 ዒዛኮ ጫኣቁሞማኣ ጉሙርቁንጉባኣሴ።
- 38 ዒዚ ጋዓንጉ ማኣራያ ማዒ ጎይያና
 ዳቢንቶ ዓይያቶሲ ዓቶም ጌዒኔ፤
 ዓይያቶ ዒዚ ባይዚባኣሴ፤
 ዳንጎዋ ሚርጌ ዋዴ ቲኢሬኔ፤
 ዲማ ዲማ ዋዳ ባኮዋ ዓይያቶይዳ ዒ ኬይሲባኣሴ።
- 39 ከሰካዎ ማዐብ ዠባሪጉዲ
 ዓይያታ ዓሲ ማዒሢያ ዒ ማሌኔ።
- 40 ዓሲ ናንጉዋ ዳውሎይዳ ዋማይዳ ዓይያታ ዋይዞ ዒዳይ!

- ዩያ ዳውሎይዳ ዎማዴ ዒዛ የዩሴይ!
- 41 ያኦሲ ዎይታቲያ ጌዒ ላሚ ላሚ ዔያታ ዛጌኔ፤
ዒሰራዔኤሌኮ ዲማዴሢያ ዔያታ ዳጋሴኔ።
- 42 ዔያቶ ዩኖ ዎዶና ሞርካፓ ዒ ዓውሴሢ
ዩያ ዎልቆ ዒዛኮ ዔያታ ማሊ ጳቂሢባኣሴ።
- 43 ጊብፄ ዓጫ ዒ ፔ ዎልቆና ማዳ ዓኮ ባኮ ማላቶ
ያዒኔ ጌይንታ ዓሳ ናንጉዎ ዳውላ
ዒዚ ዳቄ ዲቃሢ ሄርሺሳ ማዶ ዔያታ ማሊባኣሴ።
- 44 ዎር ዎኣያ ዔያቶኮ ዒ ሱጉሢ ማሄኔ፤
ዛር ዎኣያ ዑሽካኒ ዔያታ ዳንዳዒባኣሴ።
- 45 ቫኣሪጉዳ ሰኣያምቦ ዉፃሌ ዔያቶም ዒ ዳኬኔ፤
ዩይ ሰኣያምባሢያ ዔያቶ ዳዔኔ፤
ፓንቆዎ ዔያቶም ዳኬኔ፤
ዩይያ ዓሶኮ ካራ ባይዜኔ።
- 46 ባቃሎ ዔያቶኮ ማኮም
ሃኣኮዎ ዔያቶኮ ዒ ዓቢሢም ዒንጌኔ።
- 47 ቱኮና ዎይኖ ዔያቶኮ ቫቺና
ቤሌሶ ሚያዎ ቃኣኖና ዒ ዎዲሺ ባይዜኔ።
- 48 ባኣቶ ዔያቶኮ ቫቺና
ሃንጎ ቆልሞዎ ጉጉንሢና ዎዴኔ።
- 49 ፔኤኮ ዒ ዶዶ ዳጎ ዔያቶ ዑፃ ዳኬኔ፤
ዲማ ዲማ ዎዳ ባኮንታ ዒ ሌሊ ካኣሽኪንታኒ ኮዓ ዳጎዎ
ኬይሴኔ፤
ያሊ ባይዛ ኪኢታንቸዎ ዔያቶይዳ ዳኬኔ።
- 50 ጎሪንቲም ጎይሢ ዒዚ ጲሺኔ፤
ዔያቶኮ ሺምፓሢ ሃይቢዳፓ ዓውሲባኣሴ፤
ሺምፓሢ ዔያቶኮ ዲማ ዲማ ዎዳ ባኮም ዓኣሢ ዒንጌኔ።
- 51 ዔያቶ ዴጋቶ ዎልቆኮ ቤርቶ ማዔዘንሢ
ካኣሚኮ ዓፒሎና ኮሸና ማኣራ
ቶይዶ ናኣቶዎ ዔያቶኮ ቢያ ጊብፄ ዓጫ ዒ ጋፒሲ ዎዴኔ።
- 52 ዳር ፔኤኮ ዓዳ ማራይጉዳ ሄንቃኒ ኬሴኔ፤
ዓሲ ናንጉዎ ዳውሎይዳ ማራይ ጎይሢ ሄንቄኔ።
- 53 ኮሺና ዔያቶ ዒ ዔኪ ዓኣዴሢር ዔያታ ዒጊጨባኣሴ፤

78:44 ኬሲ. ማግ 7:17-21። 78:45 ኬሲ. ማግ 8:1-6፤ 20:24። 78:46 ኬሲ. ማግ 10:12-15። 78:48 ኬሲ. ማግ 9:22-25። 78:51 ኬሲ. ማግ 12:29። 78:52 ኬሲ. ማግ 13:17-22።

- ሞርኮ ዔያቶኮ ጋዓንቲ ባዛ ሙዔኔ።
- 54 ዒዛኮ ሚዛቆ ኩጮና ዒ ዓርቁ ዲኮ ባንሢ
 ዒዛሞ ዲማዴ ዓጩሎሞ ዔያቶ ዒ ጌልዜ።።
- 55 ሚሌ ዴሮ ዔያቶ ቤርታፓ ዳውሴኔ፤
 ዬያ ዓሶኮ ዓጮ ዔያቶ ዴኔ ማሂ ዒዚ ጊሽኬኔ፤
 ዒሰራዔኤሌ ዓሶ ፃጶ ዔያቶ ሞርኮ ማኣራ ናንጊሼኔ።።
- 56 ዔያታ ጋዓንቲ ዴኤፖ ጆኣዛሢ ዎይታቴያ ጌይ ዛጌ፤
 ዎይዚያ ዒዛሞ ዔያታ ዒፃኔ፤
 ዳሞቦሞ ዒዛሲ ካፒባኣሴ።።
- 57 ዔያቶኮ ዓደንሢጉዲ ዒዛሞ ዎይዙሞያ ማዔኔ፤
 ጉሙርሱሞ ዎቦ ሂኢሺጉዲ ዔያታ ማዔኔ።።
- 58 ጌሚሮይዳ ሚሌ ጆኣዛ ካኣሽኮ ቤዞ ኮሺሢና
 ዔያታ ዒዛ ዳጋሴኔ፤
 ዓርሲ ኮሽና ሚሌ ጆኣዛ ካኣሽኪያና
 ዳኅ ዒዛኮ ዔያታ ዔቁሴኔ።።
- 59 ጆኣሲ ዬያ ዎይዜ ዎደና ሚርጌና ዳጋዴኔ፤
 ዒሰራዔኤሌ ዓሶሞ ጋፒ ዒዚ ሃሽኔ።።
- 60 ዓሶ ባኣካ ዒዚ ዳቁ ዓፒላፓ ኮሽና ማኣሮ
 ሴኤሎይዳ ፔኤኮ ዎርቆ ቤዞ ዒ ሃሽኔ።።
- 61 ዒዛኮ ዎልቆ ማላታ ማዔ ጫኣቁሞ ታኣቦቶ ዲዒሴኔ፤
 ዒዛኮ ቦንቾሞ ሞርኮሞ ዓኣሢ ዒንጌኔ።።
- 62 ዴሮ ፔኤሲ ዒዚ ጩንቾ ዓፓሮሞ ማሄኔ።።
 ፔ ዴሮይዳ ሚርጌና ዒ ዳጋዴኔ።።
- 63 ዳጌሢ ዔያቶኮ ታሚ ሙዔኔ፤
 ዉዲሮ ናኣቶማኣ ዔፒ ጋኣዴ ጋኣዲንቲባኣሴ።።
- 64 ቁኤሳ ዔያቶኮ ጩንቾ ዓፓሮና ዎዳንቲኔ፤
 ዔያቶ ላኣላ ዬኤካኒ ዔያቶ ዳንዳዒባኣሴ።።
- 65 ናንጊና ናንጋ ጎዳ ጊንዓፓ ጴጫ ዓሲጉዲ
 ዳጋሢ ማሄ ዓሲ ማሢንታዎ ጫርቃሢጉዲ
 ጫርሺ ዓሲ ማዒ ዔቁኔ።።
- 66 ሞርካ ዒዛኮ ባሽንቲ ጊንሢሞ ጳሽካንዳጉዲና

78:53 ኬሲ. ማግ 14:26-28። 78:54 ኬሲ. ማግ 15:17፤ ዒያ. 3:14-17።
 78:55 ዒያ. 11:16-23። 78:56 ሱኣጎ. ማግ 2:11-15። 78:60 ዒያ. 18:1፤
 ዔር. 7:12-14፤ 26:6። 78:61 1ሳሙ. 4:4-22።

- ናንገና ጋፑዋ ቦርሲንቲ ቦርሲንታንዳጉዲ ማሄኔ።
- 67 የሱፐኮ ዓፒሎና ማዢንቲ ማኦር ዒዚ ሃሼኔ፤
ዔፕሬኤሜ ፃጸዋ ዒዚ ዶኦሪባኦ።
- 68 ጋዓንቲ ዩሁዳ ፃጸ
ዒዚ ሚርጌና ናሽኪ ፃዮኔ ዲኮ ዶኦሬኔ።
- 69 ፔኤኮ ጌኤኮ ማኦር ኮሺ ዴጋያ
ናንገና ናንጋያ ማሂ ሳዖ ዒ ዶዲሺ ማዢ ጎይዖ ማዢኔ።
- 70 ፔኤኮ ዓይላሢ ዳውቲ ዒ ዶኦሬኔ፤
ማራቶ ሄንቆ ቤዛፓ ዒ ዔኮኔ።
- 71 ፔ ዴር ያይቆኦቤ
ዒዛ ዴኖ ማዔ ዒ ሰራዔኤሌ ሄንቃንዳንጉዲ
ማራቶ ሄንቁፃፓ ዔኪ ሙኮኔ።
- 72 ዩካፓ ዒዚ ፒዜ ዒናና ዔያቶ ሄንቁኔ፤
ዔራቶናኦ ዔኪ ዔያቶ ዓኦዴኔ።

79

ዓሳኦፔ ዓይነቱ

- ዴሮኮ ኮሹዋ ዛላ ሺኢቁንቲ ሺኢጲሢ
- 1 ዖኦሲዮ! ሜሌ ዴራ ዴኖ ኔኤኮ ዓርቁኔ፤
ኔኤኮ ዴማዴ ጌኤኮ ማኦርዋ ዔያታ ዒኢሴኔ፤
ዩሩሳላሜ ሻሂ ዔያታ ባይዜኔ።
- 2 ኔ ዓይሎኮ ሌዘ ጫሪንጮ ካፖዎ
ኔኤኮ ዴማዴዘንሢኮዋ ዓሽኮ ካዮ ቦዖዎ
ሙኤዚ ማሂ ዔያታ ዒንጌኔ።
- 3 ሱጉዖ ዔያቶኮ ዩሩሳላሜይዳ ዓዳ ዋኦሢጉዲ ዔያታ ላኦሌኔ፤
ዩያ ዓሶ ዴኡካ ዓሲያ ዴዲባኦ።
- 4 ኦኡኒ ኦ ዓሺኖዎ ሚኢቺ
ኦ ኮይላ ዓኦ ዓሶማኦ ዓማሊ ባኦዚ ማዔኔ።
- 5 ናንገና ናንጋ ጎዳሢዮ! ሃይ ዓይዲ ሄላንዳኦናዳይ?
ኔኤኒ ዴጋዳሢ ናንገና ጋፑዋያዳ?
ሜሌ ካኦሽኪንቲዋጉዲ ኮዓ ኔ ማሊፃ ታሚጉዲ ዔኤቲ ጎይሣ
ናናንጋ?
- 6 ኔና ዔሩዋ ሜሌ ዴር ዑፃ
ሱንፃዋ ኔኤኮ ዔኤሎዋ ካኦቶ ዑፃ

78:70 1ሳሙ. 16:11-12፤ 2ሳሙ. 7:8፤ 1ዖኦሲ. ዓሃኬ 17:7። **79:1** 2ካኦቶ. ማ 25:8-10፤ 2ዖኦሲ. ዓሃኬ 36:17-19፤ ዔር. 52:12-14።

ዲማ ዲማ ኔኤኮ ዎዳ ባኮ ዳኬ።
 7 ዔያታ ያይቆኦቤ ሙዔኔ፤
 ዔያቶኮ ናንጎ ቤዘዎ ዓሲ ናንጉዎ ዳውሌ ማሄኔ።

8 ኑ ዓደንሢ ጎሞ ኑ ዑፃ ማሂፖ፤
 ማእሪፃ ኔኤኮ ዑኩና ኑ ባንሢ ሙኮንጎ፤
 ኑኤኒ ዓአሢያ ማቶይዳኬ።

9 ኑና ዓውሳያ ማዔ ምክሃሢዮ!
 ኑ ሱንፆ ቦንቸሮ ጌዒ ኑና ማአዳ፤
 ኑ ሱንፆሮ ጌዒያ ሄሊ ኑና ዓውሴ፤
 ጎሞዎ ኑኤኮ ዓቶሞ ጌዔ።

10 ዴራ፡- «ምክሃሢ ዔያቶኮ ዎካዳዎ?» ዓይጎሮ ጋዓይ?
 ኔኤም ማዳ ዓሶ ሱንፆ ዛሎ ኮሞ ኮፄ፤
 ኑ ዓአፓ ዛጋንቴ ዬያ ማዳ።

11 ቱኪንቲ ዓአ ዓሶኮ ማቶ ዒላታ ኔ ቤርቶ ሄሎንጎ፤
 ሃይቆንጎ ጌይ ዎጊንቴ ዓሶዎ ኔ ዎልቆና ዓውሴ።

12 ናንጊና ናንጋ ጎዳሢዮ! ኑ ዓሸና ኔና ሚኢጩ ሚኢጩ
 ላንካይ ጳንጩ ማሂ ዔያቶ ኮንቁሴኔ።

13 ኑኤኒ ኔኤኮ ዴራ፡ ኔኤኒ ሃንቃ ማራታ
 ናንጊና ጋላታ ኔኤም ሸኢሻኔ፤
 ሾይንታፓ ሾይንቲ ሃላንዳአና
 ኔ ኑም ማዳ ባኮ ኑ ኬኤዛንዳኔ።

80

«ጩአቁሞ ቡኒ» ጌይንታ ዓይኑሞና ሱኡጋሢ ዓይሣ ጎይፆ
 ዓይናዲንታ ዓሳኦፔ ዓይኑሞ

ዒሰራዔኤሌ ካአታ ጊንሣ ደዳንዳጉዲ ሸኢቁንቴ ሸኢዲሢ
 1 ዮሴፔ ማራይጉዲ ሃንቃ፡ ዒሰራዔኤሌያ ሃንቃሣ ኑም ዎይዜ!
 ከሩቤኤሎይዳ ዓአ ካአቱሞ ፆይታ ዴዓሣ
 ኔኤኮ ፖፆና ፔጋዲ ጴዳ።

2 ዔፕራኤሜንታ ቢኢኒያሜንታ ሚናሴንታሞ
 ኔና ፔጋሲ ዳቄ፤
 ዎልቆ ኔኤሲ ዓጊሣ፤
 ሙኪያ ኑና ዓውሴ።

80:1 ኪሲ. ማፃ 25:22።

3 ጾኑሲዮ! ኑና ማሄ፤
ኑ ዳቃንዳጉዲ ኔ ዓኣፖ ካር ኑኡሞ ፖረሣ።

4 ቢያ ባኮ ወይሣ ጎዳ ማዔ ዴኤፖ ጾኣዛሢዮ!
ኔ ዴርኮ ሺኢጲዮ ወይዘ ዒዲ
ጎሪንቶ ኔኤኮ ኔ ቤኤዛሢ ወማ ሄላንዳኣናዳይ?

5 ጾዩሢ ዓዳ ሙኡዘጉዲ
ዓቢሢያ ዑሺጉዲ ሚርጌና ኔ ዔያቶ ዑሼኔ።

6 ኑ ዓሺኖሞ ኔ ኑና ዑራ ማዣ ዓሲ ማሄኔ፤
ኑኡኮ ሞርካኣ ኑና ሚኢጨኔ።

7 ቢያ ባኮ ዳንዳዓ ጾኣዛሢዮ! ኑና ማሄ፤
ኑ ዳቃንዳጉዲ ኔ ዓኣፖ ካር ኑሞ ፖረሴ።

8 ጊብዔ ዓጫፓ ወይኔ ዘንዜ ኔ ዔኪ ሙኮኔ፤
ሜሌ ዴር ዳውሲ ዔያቶ ቤዛ ዬያ ኔ ቱኮኔ።

9 ዬይ ዑጋንዳ ቤዘ ኔ ጲሺ ጊኢጊሼኔ፤
ዬያር ፃጲ ዳኪ ዓጨኖሎ ባልጊ ኩሜኔ።

10 ዳካ ዬያ ዒላዦና ሺቢንቴኔ፤
ዴኤፖ ዚቢቃኣ ዬያ ካኣፖ ዴማ ዔቄኔ።

11 ዬይ ካኣፓ ዴንዲ ባዘ ሄላንዳኣ
ቶሻኣ ዔፕራዲሴ ወር ሄላንዳኣና ጋሞፒንቴኔ።

12 ዓካሪ ዒኢና ሊካ ሌካ ጋዒሢ ዓኣፖ ዬያ ማንግዳጉዲ
ዲያ ኔኤኒ ዓይጋ ሻሄይ?

13 ጉዲንፃ ካያፓ ከሰከ ዬያ ፑርቲሳንዳኔ፤
ቆልማ ሄንቃ ቤዛ ዲርጋ ቆልማ ቢያ ሙዓንዳኔ።

14 ቢያ ባኮ ወይሣ ጎዳሢዮ! ዓካሪ ኑ ባንሢ ማዔ፤
ጨሪንጨፓ ሊካ ኑ ባንሢ ዛጌ፤

ሃኖ ኔኤኒ ቱኮ ወይኔሎ ዛጊ ካፔ።

15 ሃይ ኔኤኮ ሚዛቆ ኩጫ ቱኮ ባቃላ
ኔ ዛላ ማሂ ኔ ባቃልሴ ናዒሢ።

16 ዬይ ወይናሢ ተቁንቲ ታሚዳ ሚጨኔ፤
ኔ ዳጎ ጎሪንታ ኔ ዓሶ ባይዛንዳኔ።

17 ኔኤር ማሂ ኔኤኒ ዳዲሺ ዔቄሴ ዓሢ ዑፃ
ኔኤኮ ሚዛቆ ዛላ ዓኣ ኔ ናዒሢ ዑፃ

ኔ ኩጫ ማጾንጎ።

18 ሃይካፓ ሴካ ኔና ሃሺ ገንሣም ኑ ማዓዓኬ፤
ናንገና ባይቁዋያ ኑና ማሄ፤
ኑኡኒያ ኔና ካኣሽካንዳኔ።

19 ናንገና ናንጋ ጎዳ ማዔ ዴኤፖ ጆኦዛሣ!
ኑና ገንሣ ሴዘ ማሄ፤
ኑኡኒ ዲቃጎዳጉዲ ኔ ዓኣፖ ካር ኑም ፖዒሴ።

81

ዓይነቱ ሱኡጋሣ ዓይሣ ጎይጆ ሹሉንጎና ዓይናዲንታ ዓሳኣፔ
ዓይነቱ

ቦንቾ ከሊና ዓይናዲንታ ዓይነቱ

1 ኑኡከ ደደማሣ ማዔ ጆኦዛሣም ዓይናዲቱ!

ያይቆኑይ ጆኦዛሣም ዒላሹቱ!

2 ዓይነቱ ዓርቁቱ፤ ታምቡርቱ ባዑቱ፤

ፔቱ ሻሺና ደንሣ ዋርቆ ጎኦሎንታ

ሜሌ ዓይነቱ ዓንጋሞዋ ደንሣ ኮሺ ዑኡሲና ዓይናዲቱ።

3 ዓገና ጃኤራኣና ገንሣ ዋኣፃ ጌላኣና

ዴኤፖ ቦንቾ ከሎናይዳኣ ዛዬ ዋርቁቱ።

4 ዬይ ዒሰራዔኤሌ ዓሶም ዒንገንቱ ዳምቤ

ያይቆኑይ ጆኦዛሣ ከሴ ዋጌኬ።

5 ዒዚ ገብጃ ዓጮይዳ ሜቶ ዓጌ ከሎና

ዬይ ዮሴፔም ከሶናያኬ፤

ታ ዔሩቱ ሙኡቾና ሂዚ ጋዓንቱ ታ ዋይዜኔ፡-

6 «ጌኤቶ ታ ዒዛኮ ከዲዳፓ ሃውሺሴ፤

ኩጫ ዒ ዔካ ዴኤጆ ባኮ ታ ዒዛ ሃሺሴ።

7 ኔና ሜቱ ዋደና ኔ ታና ዔኤሌኔ፤

ታኣኒያ ኔና ዓውሴኔ፤

ታ ዓኣሺንቱ ዓኣ ዲሞ ሻኣር ጉጉንጆሲ ባኣካ ዓኣጆ

ታ ኔኤም ዋይዜኔ፤

ዛላሣ ዋርኮ ዋኣፃ ዓልቃ ቤዛ

ኔ ዋይታቱያ ጌዒ ታ ኔና ዛጌኔ።

8 ታ ዴሬዮቱ! ታ ላታ ባኮ ዋይዙቱ፤

ዒሰራዔኤሌ! ኔ ታኣም ዋይዛቱ ዓይጎ!

- 9 ኔ ካኣሸካ ፃንጎ ያኦሲ
 ሃሃ ዔርቱዋ ያኦሲ ኔኤኮ ባኣያ ማዖንጎ፤
 ዬያ ካኣሸኪፖ።
- 10 ጊብፄ ዓጫፓ ኔና ከሴ ናንጊና ናንጋ ጎዳ ማዔ
 ኔ ያኦሃሂ ታናኬ፤
 ዲንጎ ኔኤሲ ኮሺ ሾኦኬ፤
 ታኣኒ ከንሂ ኩልሳንዳኔ።»
- 11 «ታኣኮ ዳራ ጋዓንቴ ታኣም ዋይዚባኣሴ፤
 ዒሰራዔኤሌ ዓሳኣ ታኣም ዓይሂንቴባኣሴ።
- 12 ዬያሮ ዔያታ ማሌ ማሊያጉዬያ ዓኣዲንዳጉዲ
 ዔያቶኮ ባይቄ ዒኖም ዓኣሂ ታ ዔያቶ ዒንጌኔ።።
- 13 ታ ዳራ ዋንዴ ታኣም ዋይዜያ ማዔያታቴ
 ዒሰራዔኤሌ ዓሳ ታ ጎይያና ዓኣዲያታቴ
- 14 ቤዘና ታ ዔያቶኮ ሞርኮ ባሺያ ናንዳንቴኬ፤
 ዔያቶ ሞርኮ ዑፃ ታ ኩጮ ታ ዔቁሴያ ናንዳንቴኬ።።
- 15 ያኦሲም ዋይዘ ዒፃ ዓሳ ዒዛ ቤርታ ዳውሲንታንዳኔ፤
 ዔያቶ ሄላ ሜታሂያ ናንጊና ጋፑዋያ ማዓንዳኔ።።
- 16 ዒንሂ ታ ጋዓንቴ ኮሺ ዛርጌ ሙኡዛንዳኔ፤
 ዑታሂ ዔኤዘና ታ ዒንሂ ሚሻንዳኔ።።»

82

ዓሳኣፔ ዓይነቱ

- ያኦሲ ቢያፓ ዑሃ ማዔሂ
- 1 ያኦሲ ጫሪንጮ ቡኪንቶይዳ
 ሜሌ ያኦዛ ቡካ ቡኪንቶይዳ
 ሙኪ ጰዲ ዋጌ ዋጋኔ፡-
- 2 «ዋጎ ዒንሂ ፒዜ ዋጉዋኣሂ ዋማ ሄላንዳኣናዳይ?
 ፑርቶ ዓሶ ማኣዲ ዒንሂ ጌሰታሂ ዓይዲ ሄላንዳኣናዳይ?»
- 3 ዋልቃባኣ ዓሶና ዜኤሮ ናኣቶናም ፒዜ ዋጉዋቴ፤
 ሜታዳሂና ማንቃሂና ሄርቁንቴዋጉዲ ማዲዋቴ።።
- 4 ዒጊኒ ባኣሂና ሜታዳሂና ሄሊ ዓውሱዋቴ፤
 ሄርቁ ዋይሃ ዓሶይዳፓ ዔያቶ ዓይሱዋቴ።።»
- 5 «ዔራቶና ማሊ ጰቂሥሂና ዒንሂኮ ባኣሴ፤
 ዲሚዳ ሴካ ሃንጋ ዒንሂ ሃንታኔ፤
 ሳዖኮዋ ዴማ ቢያ ካራና ዓጊፄኔ።።»

81:10 ኬሲ. ማፃ 20:2-3፤ ላሚ. ዋማ 5:6-7።

6 ታኣኒ፡- <ዒንሢ ጾኦዘኩ፤
 ቢያሢ ዒንሢ ዴኤፖ ጾኦዘሢ ሩኦቶኩ> ጌዔ።።
 7 ጋዓንቴ ዒንሢ ዓሲ ሃይቃ ጎይሢ ሃይቃንዳ፤
 ዋይሢ ሱኡጎ ጎይጾ ጉሪ ዒንሢ ሎኦማንዳ።።»

8 ጾኦሲዮ! ዔቁ፤
 ሳጾ ዴሮ ዑፃ ቢያ ዋጌ፤
 ዴራኦ ቢያ ኔኤሮኩ።።

83

ዒሰራዔኤሌኮ ሞርካ ባሽንታንዳጉዲ ሸኢቁንቴ ሸኢጲሢ
 ዓሳኦፔኮ ጾኦሲ ሄርሺጾ ዓይነቱ
 1 ጾኦሲዮ! ኔኤኒ ዚቴዮ ጌዒፖ፤
 ጾኦሲዮ! ኔኤኒ ጨዋዮ ጌዒፖ።።
 2 ሞርካ ኔኤኮ ዋማይዲ ዔቁያታቴ ዛጌ፤
 ኔና ዒፃ ዓሳ ቶኦኮ ፔኤሲ ዋማይዲ ዴጊሴቴያ ዛጌ።።
 3 ኔኤኮ ዴሮ ዑፃ ጌኔ ማዳኒ ዓኦቶ ጌሰታ፤፤
 ኔኤኒ ካፓ ዓሶ ኮሞባኒ ዔያታ ዘርታ።።
 4 «ሃካፓ ሴካ ዒሰራዔኤሌ ዓሶ ሱንፃ ዔርቴዋጉዲ
 ሃኒ ሙኩዋቴ ዴሬ ማዑዋጉዲ ኑ ዔያቶ ጋፒሶ» ጋዓ።።

5 ፔቴ ማሊሢና ዋላ ጊኢጊ ዔያታ ዘርቴ፤፤
 ኔ ዑፃ ዔቃኒ ዋላ ጫኦቁ።።
 6 ዔያታ፡- ዔዴኦሜ፥ ዒሰማዔኤሌ፥ ሞዓኦ፥ ዓጋሪያ፥፥
 7 ጌባሌ፥ ዓሞ፥፥ ዓማሌቁ፥ ፒሊሰጂኤሜንታ ጂሮሴ ዴሮንታኩ።።
 8 ዓሶኦሬ ዓሳኦ ዔያቶና ዋላ ፔቴ ማዔ፤፤
 ሎኦጾ ሩኦቶዋ ዔያታ ማኦዲያ ማዔ።።

9 ሚዲያሜ ዓጮይዳ ኔ ማዴ ጎይጾ ዔያቶይዳ ማዴ፤፤
 ቁሶኔ ዋራ ሲሳራና ዒያቢሴናይዳ ኔ ሄሊሴ ባካ ዔያቶ
 ሄሎንጎ።።
 10 ዔያታ ዓይኔዶሬ ጌይንታ ቤዛ ባይቁ፤፤
 ዓዳ ሳዓይዳ ኬኤሪንቴ ቡኡራ ማዔ።።
 11 ጾሬቤና ዜቤ ዓሶና ዑፃ ኔ ማዴ ጎይጾ
 ሃያ ዓሶ ሱኡጎ ዑፃኦ ማዴ፤፤
 ዜባሄና ፃልሙናዔ ዓሶና ዑፃ ኔ ማዴ ጎይጾ

82:6 ዮሃ. 10:34። 83:9 ሱኡጎ. ማፃ 4:6-22፤ 7:1-23።

- ሃያ ዓሶ ዎይሣ ዓሶይዳኣ ማዴ።
 12 ዔያታ፡- «ዎኦሲ ዓሶ ቤዞ
 ኑኡኒ ኑኡሮ ማሃንዳኔ» ጌዔኔ።
- 13 ዬያሮ ታ ዎኦዛሢዮ! ዔያቶ ሲላሊጉዲ
 ዠባሬ ዔኪ ዓኣዳ ዲልባጉዲ ላኣሌ።
- 14 ታሚ ዴኤሊ ካይዚ ሙዓሢጉዲ
 ታሚኮ ሎሰታ ዲካ ዓርቃሢጉዲ
- 15 ኔኤኮ ጉዳሢ ዠባሮና ዔያቶ ዳውሴ፤
 ዓልጎ ዠባሮናኣ ዲቃሢ።
- 16 ናንጊና ናንጋ ጎዳሢዮ! ዔያታ ሱንዎ ኔኤሲ ኮዓንዳጉዲ
 ቦርሲንቲ ዔያቶይዳ ዋሄ።
- 17 ናንጊና ዔያታ ካራ ባይዚ ቦርሲንቶንጎ፤
 ዳውሲንቲ ዔያታ ባይቆንጎ።
- 18 ሱንዎ ኔኤኮ ናንጊና ናንጋ ጎዳ ማዔሢ ኔ ሌሊ
 ሳዎ ቢያይዳ ዴኤፓሢ ኔና ማዔሢያ ዔያታ ዔሮንጎ።

84

ዓይኑሞ ሱኡጋሢ ዓይሣ ጎይዎና ቆሬ ናኣታ ሹሉንጎና ዓይናዴ
 ዓይኑሞ

- ዎኦሲኮ ጌኤዠ ማኣሮ ጳቂሥሢ
 1 ቢያ ባኮ ዎይሣ ጎዳሢዮ!
 ኔ ዎርቃ ማኣራ ዎዚጉዲ ናሽኪንታያዳይ!
- 2 ሽምፓሢ ታኣሲ ናንጊና ናንጋ ጎዳ ካራ
 ዓጎ ቡካ ጳኦኮ ጳቂሣኔ፤
 ታኣኮ ዒኖንታ ዑዎንታ ናንጊና ባይቁዎ ዎኦዛሢሞ ዒላሹዎቴ።
- 3 ቢያ ባኮ ዎይሣ ጎዳ ማዔ ዎኦዛሢዮ፡ ታ ጎዳ!
 ኔኤሞ ዒንጎ ባኮ ሺኢሾ ቤዞ ኮራ
 ሱኡታታዎ ናንጋ ማኣሪ
 ዶኦሌያ ፔ ናኣቶ ዴይሣ ማኣሪ ማዣኔ።
- 4 ኔ ማኣራ ናንጋዞንሢ ዓንጂንቲያኬ፤
 ናንጊና ዔያታ ኔና ጋላታኔ።
- 5 ኔና ፔኤኮ ዎልቃሢ ማሄዞንሢ
 ዒኖና ፔኤኮ ደዮኔ ጎይዎ ማላዞንሢ
 ሚርጌና ዓንጂንቲያኬ።

83:11 ሱኡጎ. ማፃ 7:25፤ 8:12።

- 6 ባካ ጌይንታ ዋእፃ ባኣ ዶኦጦና ዔይታ ፒንቃ ዎዶና
 ዓልቃ ዋኣሢ ፆኦሲ ዔይቶም ዑራኔ፤
 ሲሎ ዒራኣ ቦቆሎ ዔቶ ዋኣሢና ኩንሣንዳኔ።
- 7 ዎልቄይዳ ዎልቄ ዔይታ ቃሳንዳኔ፤
 ፔቴ ፔቴሢ ፃዮኔ ዲኮይዳ ዓኣ ፆኦሲ ቤርቶ ሺኢካንዳኔ።
- 8 ቢያ ባኮ ዎይሣ ጎዳሢዮ! ሺኢጲፆ ታኣኮ ዎይዜ፤
 ያይቆኦቤ ፆኦዛሢዮ! ታኣም ዎይዜ።
- 9 ፆኦሲዮ! ዶኦሪ ኔ ኑም ዶኦሜ ካኣቲ ዓንጄ፤
 ዒዚ ኑኡኮ ጊቲማ ማዔሢሮ ዒዛ ዛጌ።
- 10 ሜሌ ቤሰካ ሺያ ኬሊ ዴይሢዳፓ
 ኔ ጌኤዮ ማኣሮ ካራ ፔቴ ኬሊ ፔኤቂሢ ኮሺኬ፤
 ፑርቶ ዓሶ ማኣራ ናንጊፆይዳፓ
 ፆኦሲ ማኣሮ ካፓያ ማዒ ናንጋኒ ታ ኮዓኔ።
- 11 ኑኡኮ ጎዳሢና ፆኦዛሢዮ!
 ኔኤኒ ዓዳ ዓቢና ጊቲማና ጉዲኬ፤
 ኔ ኮሹሞና ኔ ቦንቾና ኔ ኑና ካፓኔ፤
 ኮሺ ማዳ ዓሲም ዓይጎዎ ኮሺ ማዔ ባኣዚ ኔ ላኣጉዎሴ።
- 12 ቢያ ባኮ ዎይሣ ጎዳሢዮ!
 ኔና ጉሙርቃዞንሢ ዎዚ ዓንጂንቴያዳይ!

85

- ዓይነቱ ስኡጋሢ ዓይሣ ጎይፆና ቆሬ ናኣታ ዓይናጄ ዓይነቱ
 ኮሹሞ ዛላ ሺኢቂንቴ ሺኢጲሢ
- 1 ናንጊና ናንጋ ጎዳሢዮ!
 ኔ ጎፆም ኔኤኒ ኮሺ ባኣዚ ማዳኔ፤
 ያይቆኦቤኮ ዲዒንቴ ዓሶ ማሢ ኔ ዓንጄኔ።
 - 2 ኔ ዴሮኮ ጎሞ ዓቶም ኔኤኒ ጌዔኔ፤
 ጎሞ ዔይቶሲ ቢያ ኔ ካንቄኔ።
 - 3 ኔኤኮ ዎዳ ባኮ ቢያ ኔ ሺኢሺኔ፤
 ዴኤፖ ዳጎይዳፓኣ ኔ ማዔኔ።
 - 4 ኑኡኮ ዴኤሻሢ ማዔ ፆኦዛሢዮ!
 ኑና ኑ ቤዞ ማሢ፤
 ኑ ዑፃ ዔቃኒ ማላ ዳጎ ኔኤኮ ሺርሼ።
 - 5 ኔ ኑና ጎሬ ጎይሣ ናኣናና ናንጋ?

ዳጋ ኔኤሲ ሾይንቲፓ ሾይንቲ ሃሄላኒዳ?

6 ዴራ ኔኤኮ ዋዛዳንዳጉዲ
ኔ ኑም ገንሣ ሾምፖ ዒንጋዓዳ?

7 ናንገና ናንጋ ጎዳሢዮ!
ኔኤኮ ማኣሪያ ኑና ዳዌቴራ፥ ኑና ዓውሴ።

8 ናንገና ናንጋ ጎዳ ማዔ ያኦዛሢ ከኤዛ ባኮ ታ ዋይዛንዳኔ፤
ኑኤኒ ኑኤኮ ዔኤዩም ጎይያ ማዒ ዴንዲባኣቲ
ዒዚ ኑና ፔ ዴሮ፥ ዲማዴዘንሢም ኮሹም ዒንጋኒ ጫኣቄ።

9 ቦንቻ ዒዛኮ ኑ ሳይይዳ ናንጋንዳጉዲ
ዒዛ ዒገጫዘንሢም ዓውሲያ ዒዛኮ ዑኬኬ።

10 ማኣሪሢና ጉሙርቁንቲሢና ዋላ ካኣማያኬ፤
ዒሉምና ኮሹምና ዋሊ ዔካያኬ።

11 ጉሙርቁንቲሢ ሳዓፓ ለካ ባቃላኔ፤
ዒሉም ጫሪንቺፓ ለካ ዛጋኔ።

12 ናንገና ናንጋ ጎዳ ኮሺ ባኣዚ ዒንጋኔ፤
ዓጩላ ኑኤኮ ጎሽኮዛ ሚርጌ ባኣዚ ካሣኔ።

13 ዒሉማ ዒዛኮ ቤርታ ቤርታ ዓኣዳኔ፤
ሃንታንዳጉዲ ጎይያ ዒዛም ገኢገሻኔ።

86

ዳውቴኮ ሺኢጲያ

ያኦሲ ማኣዳንዳጉዲ ሺኢቁንቲ ሺኢጲሢ

1 ናንገና ናንጋ ጎዳሢዮ!
ዋዮ ኔኤሲ ታ ባንሢ ማሂ ዋይዜ፤
ታኣኒ ማንቆ ሃሣ ማታዴ ዓሲኬ።

2 ኔኤም ታኣኒ ዲማዴ ዓሲታሢሮ ሾምፓሢ ታኣኮ ካፔ፤
ኔኤኒ ታኣኮ ያኦዛሢኬ፤
ኔና ጉሙርቃ ኔኤኮ ዓይላሢ፥ ታና ዓውሴ።

3 ናንገና ናንጋ ጎዳሢዮ! ታና ሚጨንቲ፤
ሮኦሮ ጉቤ ታ ኔ ባንሢ ዒላታኔ፤

4 ኔ ዓይላሢኮ ሾምፓሢ ዋዛሴ፤
ናንገና ናንጋ ጎዳሢዮ! ታ ሾምፓሢ ታ ኔኤም ዒንጋኔ።

5 ናንገና ናንጋ ጎዳሢዮ! ኔኤኒ ሚጨንታያና ዓቶም ጋዓያናኬ፤
ኔና ዔኤላዘንሢም ቢያ ሚጨንቲያኮ ዛጲ ኔኤኮ ባኣሴ።

6 ናንገና ናንጋ ጎዳሂዮ! ሺኢጲዖ ታኣኮ ዒናፓ ዋይዜ፤
ታ ማታዲ ሺኢቃ ሺኢጲዖ ዋይዜ።

7 ኔኤኒ ታኣም ማሂ ኬኤዛያታሂሮ
ታኣኮ ማታሂ ኬሎ ታ ኔ ባንሂሂ ዒላታኔ።

8 ጎዳሂዮ! ማሌ ያኦዘ ባኣካ ኔጉዴይ ባኣሴ፤
ኔ ማዶና ቤቃ ማዶዋ ባኣሴ።

9 ጎዳሂዮ! ኔኤኒ ማዜ ዴራ ቢያ
ኔ ቤርቶ ሙኪ ኔኤም ዚጋንዳኔ፤
ኔ ሱንዖም ቦንቾዋ ዒንጋንዳኔ።

10 ኔኤኒ ዴኤፒ ማዔሂሮ
ኔ ዋልቄና ማዲንታ ዓኪ ባኣዚ ኔ ማዳኔ፤
ኔኤኒ ሌሊ ያኦሲኬ።

11 ናንገና ናንጋ ጎዳሂዮ!
ኔኤኮ ጎይዖ ታና ዔርዜ፤
ኔ ጎኑሞና ታ ዓኣዳንዳኔ፤
ሱንዖ ኔኤኮ ታ ዒጊጫንዳጉዲ ኩሙሂሂ ዒኔ ታኣም ዒንጌ።

12 ናንገና ናንጋ ጎዳ ማዔ ታ ያኦዛሂዮ!
ጎኔ ዒናፓ ታ ኔና ጋላታኔ፤
ናንገና ሱንዖ ታ ኔኤኮ ቦንቻኔ።

13 ኔ ታና ሚጨንቴ ሚጨንቲፃ ኮሺ ዴኤፒኬ!
ሺምፓሂ ታኣኮ ኔ ሄሊንቲዋ ዔታፓ ዓውሴኔ።

14 ያኦሲዮ! ያቶርቃ ዓሳ ታ ጊዳ ፑርቲሞና ዔቄኔ፤
ዒጊቻ ፑርቶ ዓሳ ዋዳኒ ታና ኮዓኔ።
ኔና ዔያታ ዔኤቢኬ ጌይባኣሴ።

15 ጎዳሂዮ!
ኔኤኒ ጋዓንቴ ኮሺ ሃሃ ሚጨንታ ያኦሲኬ፤
ሩኤሪና ዳጋዲዋያ፡ ኮሹሞንታ ጉሙርቂንቲፃኣ ኔኤኮ
ሚርጌኬ።

16 ታ ባንሂሂ ዛጊ ታና ሚጨንቲ፤
ታና ኔ ዓይላሂም ዋልቄ ዒንጌ፤
ታና፡ ኔ ዓይሌሎ ናዓሂ ዓውሴ።

17 ታና ዒፃ ዓሳ ዛጊ ቦርሲንታንዳጉዲ
ኔኤኮ ሚጨንቲፃ ማላቶ ታና ዳዌ፤
ናንገና ናንጋ ጎዳሂዮ!

ኔ ታና ማኣዳኔ፥ ደዲሼኔ።

87

ቆሬ ናኣቶኮ ጋላታ ዓይነቱ

ዬሩሳሌሜ ሄርሾና ሄርሺሢ

1 ናንጊና ናንጋ ጎዳ ካታሞ ፔኤሲ

ዲማዳ ዲኮ ቶኦካ ዔቁሴኔ።

2 ናንጊና ናንጋ ጎዳ ያይቆኦቤኮ ዎርቆ ማኣራፓ ባሽ

ደዮኔኮ ጌሎ ካሮ ናሽካኔ።

3 ያኦሲ ካታሜሌ!

ቦንቾ ማዔ ባኣዚ ሂዚ ጌይ ኔ ዛሎ ከኤዚንታንዳኔ፡-

4 «ታና ዔራዘንሢ ባኣካ

ጊብደንታ ባብሎኔንታ ታኣኒ ፃኣፓንዳኔ፤

ፒሊሰደኤሜንታ ደርሴንታ ዒቶጲያ ዓሳኣ ዒኢካ ሾይንቴኔ።

5 ጎኔና ደዮኔ ዛሎ፡- <ሃያ ዳርንታ ዬያ ዳርንታ ዒዛይዳ ሾይንቴኔ፤

ዴኤፖ ያኦዛሢ ፔኤሮ ዒዛ ደዲሽ ዔቁሳንዳኔ። ጌይንታንዳኔ።

6 ናንጊና ናንጋ ጎዳ ዳር ፔኤሲ ፃኣፓ ዎደና

<ሃያ ዳራ ሾይንቴሢ ዒኢካከ። ጌይ ፃኣፒንታንዳኔ።

7 ዓይነቱ ዓይናዳ ዓሶንታ ኮዎ ኮርጋ ዓሳ

<ሃያ ዓንጀኮ ቢያ ካሬላ ደዮኔከ። ጌይ ጌይ

ዎዛና ዓይናዳንዳኔ።»

88

ቆሬ ናኣቶኮ ጋላቶ ዓይነቱ

ዓይነቱ ሱኡጋሢ ዓይሢ ጎይዎና ዎለሞ ዓጊ ዓጊ ዓይናዳ፡

ዒዘራዔኤሌ ዓሢ ዔማኔ ካላሎ፥ ያኦሲ ማኣደ ዴንቃኒ ሺኢቁንቴ

ሺኢጲሢ

1 ናንጊና ናንጋ ጎዳ ማዔ ታና ዓውሳ ያኦዛሢ!

ሮኦሮና ዎንቶና ታ ኔ ቤርታ ዒላታኔ።

2 ሺኢጲፃ ታኣሲ ኔ ቤርቶ ሄሎንጎ፤

ዎዮ ኔኤኮ ታ ዒላቶ ባንሢ ማሄ!

3 ሚርጌ ሜታ ታና ሄሌሢሮ

ሃይቃኒ ታኣኒ ዑኩኔ።

- 4 ሃይቁ ዲኡኪንታ ዓሶና ዎላ ታኣኒ ፓይዲንቴኔ፤
ፔቴታዎ ማኣዳ ዓሲባኣያ ታ ማዕኔ።
- 5 ሃይቁ ዓሶ ባኣካ ኬኤሪንቴ ዓሶጉዲ
ዎዲ ዲኡከና ዓሲጉዲ ታ ላሃኔ፤
ሃካፓ ሴካ ኔ ማሊ ጳቂሠብ ዓሶጉዲ
ኔ ኩጫፓ ኬሰኪ ኬኤሪንቴ ዓሶጉዲ ታ ማዕኔ።
- 6 ኔ ታና ዔቶ ቶርጳሢዳ ኬኤሬኔ፤
ዲሚ ዔቴይዳ ኔ ታና ዓጌኔ።
- 7 ኔ ጎሪንቶ ዴኤሠማ ታ ዑፃ ማዕኔ፤
ኔኤኮ ዎኣዎ ጉዳሢና ኔ ታና ዲኡኬኔ።
- 8 ታኣኮ ዑካ ላጎ ታ ኮራፓ ኔ ሃኪሴኔ፤
ዔያታ ታና ሻኣኪንታንዳጉዲ ኔ ማዕኔ፤
ታ ማንገንቴኔ፣ ቶላኒያ ታ ዳንዳዒባኣሴ።
- 9 ዓኣፓ ታኣኮ ዎዪዎና ዴዒ ዓቴኔ፤
ናንገና ናንጋ ጎዳሢዮ! ታ ኔ ባንሢ ዒላታኔ፤
ኩጮዎ ታ ኔ ባንሢ ዔቂሳኔ።
- 10 ኔኤኮ ዲቃሢ ሄርሺሳ ማዳ ሃይቁ ዓሶም ኔ ቤኤዛ?
ሃይቁ ዓሶኮ ዔኤዛ ዔቂ ኔና ጋላታ?
- 11 ሚጨንቲፃ ኔኤኮ ዲኡፒ ቤሰካ
ጉሙርቂንቲፃኣ ባይሲንታ ቤሰካ ኬኤዚንታ?
- 12 ዲቃሢ ሄርሺሳ ማዳ ኔኤኮ ዲሞ ቤዛ
ዒሉማኣ ኔኤሲ ዎሊንቴ ሳዓይዳ ዔርታ?
- 13 ናንገና ናንጋ ጎዳሢዮ!
ኔ ታና ማኣዳንዳጉዲ ኔ ባንሢ ታ ዒላታኔ፤
ጉቶዎ ሺኢጲዎ ታኣኮ ታ ኔ ቤርቶ ሺኢሻኔ።
- 14 ናንገና ናንጋ ጎዳሢዮ! ዓይጋ ኔ ታና ሃኪሳይ?
ኔኤኮ ዓኣፓ ካርዎ ታ ገዳፓ ዓይጋ ኔ ሺርሻይ?
- 15 ታኣኒ ናኣቱዎፓ ዓርቃዎ ሜታዴያና
ሃይቃኒያ ዑኬያኬ፤
ኔ ታና ሚርጌና ዲቃሢኔ፤
ዔርቲያ ታኣም ዒፃኔ።
- 16 ኔ ጎሪንታ ዑዎ ታኣኮ ካንቄኔ፤
ዲማ ዲማ ባይዛ ባካኣ ታና ኩርሴኔ።
- 17 ሮኣሮ ጉቤ ዓዳ ዲጲጉዲ ታና ማንጌኔ፤
ጋፒ ታና ዬይ ዔኤዴኔ።

18 ታኣኮ ዒጊኖንታ ላጎንታ ኔኔኒ ታ ኮራፓ ሃኪሴኔ፤
ዲሚ ሌሊ ታኣኮ ላጌ ማዒ ዓቴኔ።

89

ዒዘራዔኤሌ ዓሢ ዔታኔኮ ካላሎ

ሜቶ ዎዴና ዓይናዲንቲ ዓይነቱ

1 ናንጊና ናንጋ ጎዳኮ ሚጨንቶ ዘሎ ዓይናዴ ጎይሣ ታ ናንጋንዳኔ፤
ታ ዳንጎና ኔኔኮ ጉሙርቁንቲዎ ሙካ ሸይንቶም ታ
ከኤዛንዳኔ።

2 ሚጨንቲዎ ኔኔኮ ናንጊና ናንጋያ ማዔሢ
ጉሙርቁንቲዎ ጨሪንጫ ኔ ደዲሻሢ ታ ከኤዛንዳኔ።

3 ኔኔኒ ቤርታሲ፡- «ታኣኒ ደኦሬ ዓሢና ዎላ ጫኦቄኔ፤
ታ ዓይላሢ ዳውቴም ታ ሳላዴኔ» ጌዔኔ።

4 ኔ ዒዛም ሳላዴ ሳላ፡-
«ኔ ዜርፃፓ ናንጊና ካኣታዳንዳይ ከሰካንዳኔ፤
ካኣቱም ዎይቶ ታኣኒ ሸይንቲፓ ሸይንቲ ሃላንዳኣና
ደዲሻንዳኔ» ጋዓያከ።

5 ናንጊና ናንጋ ጎዳሢዮ! ጨሪንጫ ኔኔኮ ዲቃሢ ሄርሺሳ ማዴ
ጉሙርቁንቲዎ ኔኔኮ ኔኤም ማዴ ኪኢታንቻ ፔ ቡኪንታ
ሄርሸንጎ።

6 ናንጊና ናንጋ ጎዳና ጨሪንጫይዳ ዎኣኒ ቤቃይ?
ዒዛኮ ኪኢታንቻይዳፓ ዒዛጉዴይ ዎናዳይ?

7 ዒዛም ደማዴ ኪኢታንቻ ባኣካ ሚርጌና ዒጊጨንታዎ
ዒዛ ኮራ ዓኣዘንሢዳፓ ቢያ ዑሣ ዒ ዲቃሢያከ።

8 ናንጊና ናንጋ ጎዳ ማዔ ዴኤፖ ዎኣዛሢዮ!
ኔጉዴያ ዎኣኒ ዓኣይ!

ናንጊና ናንጋ ጎዳሢዮ! ኔኔኒ ዴኤፒከ፤
ኔኔኮ ጉሙርቁንቲዎኣ ኮሮ ማንጊ ዓኣኔ።

9 ኔኔኮ ቢታንቶና ባዛ ዓጊፃሢ ኔ ዔቁሳኔ፤
ባዛ ጉዳሢያ ኔኔኒ ዘቲዳኔ።

10 ሬዓባ ጌይንታ ቦዓሢ ጳርቄ ኔ ዎዴኔ፤
ኔኔኮ ዴኤፖ ዎልቆና ሞርኮ ኔኔኮ ኔ ላኣሌኔ።

11 ጨሪንጫንታ ሳዎንታ ኔኤሮከ፤

89:4 2ሳሙ. 7:12-16፤ 1ዎኦሲ. ዓሃከ 17:11-14፤ ዓይኑ. 132:11፤ ዳኪ. ማዴ 2:30።

- ዓጩንታ ዒኢካ ዓኣ ባኮ ኔኤኒ ማገዜ።
 12 ከደ ባንደንታ ድኦሎ ባንደዋ ማገዜህ ኔናኬ፤
 ታቦኦሪንታ ሄርሞኔ ዲኮንታ ኔ ሱንዶና ዋዛዳ።።
 13 ቢታንታ ኔኤኮ ኮሺ ደዲኬ፤
 ኩጫኣ ኔኤሲ ዋልቁናኬ፤
 ሚዛቆ ኩጫኣ ኔኤኮ ዴግ ዴጊ ጌዔያኬ።።
 14 ካኣቱሞ ያይታ ኔኤኮ ሂሉሞና ፒዜ ዋጌና ደዲሾናያኬ፤
 ሚጨንቲዶንታ ጉሙርቁንቲዶንታ ኔኤኮ ቤርታ ቤርታ ዓኣዳ።።
 15 ናንጊና ናንጋ ጎዳሂዮ! ዋዛና ዒላሻዘንሂና
 ኔኤኮ ፖዓ ናንጋዘንሂሂ ዓንጂንቲያኬ።።
 16 ሮኦሮ ጉቤ ኔ ሱንዶና ዔያታ ዋዛዳ፤፤
 ኔ ሂሉሞናኣ ዔያታ ኮሺ ዋዛዳ።።
 17 ዔያቶ ደዲሞኮ ቦንቻሂ ኔናኬ፤
 ኔ ኮሹሞና ካኣሮ ኦኡኮ ኔኤኒ ዴግ ዴጊዴ።።
 18 ኦኡኮ ጊቲማሂ ናንጊና ናንጋ ጎዳሮኬ፤
 ኦኡኮ ካኣቲያ ዒሰራዔኤሌኮ ደማዴ ያኦዛሂሮኬ።።
 ያኦሲ ደውቲም ጫኣቁ ጫኣቁሞ
 19 ኔኤኒ ፔጋሲ ዳዋ ባኮና
 ሚና ኔ ናኣቶም ኔ ከኤዛዎ ሂዚ ጌዔ።-
 «የሎና ዔርቲሂ ታኣኒ ማኣዴ፤፤
 ዴሮ ባኣካፓ ደኦሪንቲሂ ታኣኒ ዴግ ዴጊዴ።።
 20 ታኣኮ ዓይላሂ ዳውቲ ታ ዴንቁ፤፤
 ደማዴ ዛይቶ ቲዦና ታ ዒዛ ቲሽኪ ደኦሜ።።
 21 ታ ኩጫ ከልቂ ዒዛ ዓርቃንዳ፤፤
 ቃሳ ታኣኮ ዒዛ ደዲሻንዳ።።
 22 ዒዛኮ ሞርካ ዒዛ ባሻዓኬ፤
 ፑርቶ ማዳ ዓሳኣ ሄርቂ ዋይህዓኬ።።
 23 ሞርኮ ዒዛኮ ታኣኒ ዒዛ ቤርታ ጋኣጫንዳ፤፤
 ዒዛ ዒፃዘንሂ ታ ሺርኪ ባይዛንዳ።።
 24 ታኣኮ ጉሙርቁንቲዶንታ ሚጨንቲዶንታ ዒዛና ማዓንዳ፤፤
 ታ ሱንዶና ካኣራ ዒዛኮ ዴግ ዴጊ ጋዓንዳ።።
 25 ዒዚ ዋይህ ዓጮ ሚዲቴራኒያ ባዘ ሄላንዳኣና
 ዒዛ ዓጮኮ ዛጶ ጭገሮሴና ዔፕራዒሴ ዋሮ ሄላንዳኣና
 ታኣኒ ደልጊሻንዳ።።

89:18 1ካኣቶ. ማ 4:31። 89:20 1ሳሙ. 13:14፤ 16:12፤ ዳኪ. ማዶ 13:22።

- 26 ዒዚ ታና፡- ኔ ታኣኮ ዓደኬ፤
ኔ ታኣኮ ጾኦዛሂና ጳቁንቶ ለላሂናኬ» ጋዓንዳኔ።
- 27 ታኣኒ ዒዛ ታኣኮ ናኣዚ ቶይዲ ማሃንዳኔ፤
ዓጮ ካኣቶይዳፓ ዑሣ ጳጊ ዒ ጋዓንዳኔ።
- 28 ሚጠንቲጾ ታኣኮ ናንጊና ዒዛሞ ታ ማሃንዳኔ፤
ታ ዒዛና ጫኣቁ ጫኣቁማ ደዲ ናንጋንዳኔ።
- 29 ዒዛኮ ዜርጾ ናንጊና ታኣኒ ናንጊሻንዳኔ፤
ካኣቱሞ ጫሪንጫ ናንጋማ ጎይጾ ታ ደዲሻንዳኔ።»

- 30 «ጋዓንቴ ዜርፃ ዒዛኮ ታ ምጎ ዑሣ ዓኣዴቴ
ታ ደምቦና ዔያታ ናንጊባኣያታቴ፤
- 31 ታኣኒ ቱኬ ደምቦ ዑሣ ዔያታ ኬሰኬቴ
ታኣኮ ዓይሂጾ ሃፒባኣቴ፤
- 32 ዔያቶኮ ጎሞሮ ታ ዔያቶ ኮኣሎና
ዳቢንቶሮ ታ ዔያቶ ዢራፓና ጳርቃንዳኔ።
- 33 ሂደያታቴያ ሚጠንቲጾ ታኣኮ ታ ዒዛይዳፓ ሺኢሻዓኬ፤
ታ ጉሙርቁንቲጾ ታ ዒዛሞ ፓጠሳዓኬ።
- 34 ታ ዒዛና ጫኣቁ ጫኣቁሞ ሻሃዓኬ፤
ታ ዳንጋፓ ታ ኬሴ ባኮሞ ማሃዓኬ።»

- 35 «ፔቴና ታኣኮ ጌኤሹሞና ታ ጫኣቁኔ፤
ደውቴም ታኣኒ ሉኡቃዓኬ።
- 36 ዒዛኮ ዜርጾ ናንጊና ታኣኒ ናንጊሻንዳኔ፤
ካኣቱማኣ ዒዛኮ ዓቢ ናንጋማጉዲ ታ ቤርታ ደዲ ናንጋንዳኔ።
- 37 ጫሪንጫይዳ ጉሙርቁንታ ማርካ ማዒ ናንጋ ዓጊኒጉዲ
ዒዛኮ ካኣቱማ ናንጊና ደዲ ዴዓያ ማዓንዳኔ።»

- ካኣቲ ደውቴ ባሺንቴሂር ሄሌ ጾዪሂ
- 38 ሃሂ ኔ ጋዓንቴ ዒዛ ቶኦቲ ሃሺኔ፤
ኔኤኒ ደኦሚ ካታሄሂያ ሚርጌና ጎሬኔ።
- 39 ኔ ዓይላሂና ኔ ጫኣቁ ጫኣቁሞ ሻሄኔ፤
ቦንቾሮ ቶኦካ ዓጎ ባኮሞ ሲላላ ኔ ኬኤሬኔ።
- 40 ዒዛኮ ኬኤሎ ዲጾ ቢያ ኔ ሻሄኔ፤
ዋርዲዮ ቤዞሞ ደይሲ ኔ ባይዜኔ።
- 41 ዒኢና ቱሮ ሊካ ዓኣዳሂያ ቢያ ዒዛ ቡሬኔ፤
ዒዛኮ ዓሺሮማኣ ዓማሊ ዒ ማዔኔ።
- 42 ዒዛ ሞርኮኮ ሚዛቆ ኩጮ ኔ ዴግ ዴጊዴኔ፤

- ዒዛ ዒፃ ዓሶ ቢያ ኔ ዎዛሴኔ።
- 43 ዒዛ ጨንቾ ዓፓሮኮ ዓጨያ ኔ ቱኒሴኔ፤
ያሎ ዎዶና ኔ ዒዛ ማኣዲባኣሴ።
- 44 ዓሶ ዒዛኮ ዲቃሣ ጳኤፑሞ ኔ ባይዜኔ፤
ካኣቱሞ ያይቶዎ ኔኤኒ ሰዓ ኮኤሬኔ።
- 45 ኔ ዒዛኮ ጳጋቶ ዎዶ ቃሚሣኔ፤
ቦርሲሲያ ኔ ዒዛ ዴይሣኔ።

ዳቁንታሮ ሸኢቁንቲ ሸኢጲሣ

- 46 ናንጊና ናንጋ ጎዳሢዮ!
ኔ ኦሞ ፔጋዲሞ ናንጊና ናናንጋኒዳ?
ዳጋ ኔኤኮ ታሚጉዲ ዔኤታሢ ዓይዲ ሄላንዳኣናዳይ?
- 47 ታኣኮ ናንጎ ሌዓ ዎዚ ቃሚሣታቲያ ሂንዳ ማሌ፤
ዓሲ ኔ ማፍሣ ዔኤቢ ጉሪ ባኣዚሞዳ?
- 48 ሃይቢ ሃይቁሞ ናንጋንዳ ዓሲ ዓኣ?
ፔ ቶኣኮ ዲኡፒፓ ዓውሳንዳይ ያናዳይ?

- 49 ናንጊና ናንጋ ጎዳሢዮ!
ዳውቱሞ ኔኤኮ ጉሙርቁንቲያና ኔ ጫኣቁሢ
ኔኤኮ ሚናኣ ሚጨንቲፃ ዎካ ዓኣይ?

- 50 ጎዳሢዮ!
ዓይላሢ ኔኤኮ ዎማይዲ ቶኦቹንቲቲያ
ሚርጌ ዓሶኮ ቦሂያ ዒዚ ዔኤጳሢያ ማሌ።

- 51 ናንጊና ናንጋ ጎዳሢዮ!
ሞርካ ኔኤኮ ዒዛ ሚኢጨሣ
ኔኤኒ ካኣታሢ ዓሢኮ ሄያ ዔያታ ቶኦቹሢ
ሂንዳ ማሌ።

52 ናንጊና ናንጋ ጎዳ ጋላቲንቲ ጎይሣ ዴዎም!

ዓኣሜን! ዓኣሜን!

ያይዳሳ ፖቁያ

90

(ዓይኑ ማፃ ዓይ. 90—106)

ያኦሲ ዓሢ ሙሴኮ ሸኢጲያ

ያኦሲና ዓሲናኮ ናንጎ ሌያ ዲሙሞ

1 ናንጊና ናንጋ ጎዳሢዮ!

ኔኤኒ ሾይንቲፓ ሾይንቲ ሄለንዳኣና
ኑኡኮ ፑኖ ካያሢኬ።

2 ዲኮ ማዳንዳሢና ዓጮቀ ኔ ማዣንዳሢኮ ቤርታ
ኔኤኒ ናኣናና ናናንጋ ጆኦሲኬ።

3 ዓሶ ኔኤኒ ሳዖ ባንሢ ማሃኔ፤
«ዓሲዮቴ! ዒንሢ ቤዘ ማዑቀቴ!» ጋዓኔ።

4 ሺያ ሌዔ ኔኤም ካሪ ዓኣዴ ዚገናኣ ኬለጉዲኬ፤
ዳካ ዴዓዖ ካራ ዲሚጉዲኬ።

5 ዲጲጉዲ ፒዒ ኔ ዔያቶ ዔኪ ዓኣዳኣና
ዓውቲጉዲ ዔያታ ማዓንዳኔ፤
ጉቶ ጉቶ ባቃላ ማኣቲጉዲ ዔያታ ዋርቃኔ።

6 ማኣታ ጉቶ ባቃላዖ ዓኣዓኔ፤
ዓሶ ጌሎ ሹሊ ሜላኔ።

7 ኔኤኮ ጎሪንታ ኑና ኩርሴኔ፤
ዲማ ዲማ ዋዳ ባኮናኣ ኑ ዲቃቴኔ።

8 ጎሞ ኑኡሲ ኔ ቤርታ ኔ ጌሃኔ፤
ኑኡኮ ዓኣሺንቲ ዳቢንቶ ኔኤም ጳዳ ቤሰካ ኔኤኒ ዴይሃኔ።

9 ኑኡኮ ናንጎ ዋዳ ቢያ ኔ ጎሪንቶና ጋፔኔ፤
ናንጎ ኑኡሲ ኑ ጎኦሺንቲ ጎይሃ ጋፒሳኔ።

10 ናንጎ ሌዓ ኑኡኮ ላንካይታሚ ሌዔ፤
ሚርጌኔ ጌዔያታቴ ሳሊታሚ ሌዔኬ፤

ዩካፓ ዑሃ ዓኣዴያ ማዔቴ
ላቢሢና ሜቶና ሌሊ ማዓያኬ፤
ናንጋ ኑኡኮ ዑኬ ጋፓኔ፣ ኑኡኒ ዓዓኣዳኔ።

11 ኔኤኮ ዳጎ ዋልቆ ጆኦኒ ዔራይ?
ዲማ ዲማ ዋዳ ባካ ኔኤኮ ዒጊቹጆጉዴያ ዴኤፒኬ።

12 ኑኡኮ ናንጎ ሌዖንሢዳ ዔራቶና ኑ ናንጋንዳጉዲ
ዔራቶ ዓኣ ዒኔ ኑም ዒንጌ።

13 ናንገና ናንጋ ጎዳሢዮ! ኔኤኒ ማዔ፤
ሃይ ዓይዲ ሄለንዳኣና ሃኣዲ ማዓንዳይ?
ኔኤኮ ማዳ ዓይሎም ሚጨንቲ።

14 ኑኡኮ ናንጎ ዋዳይዳ ቢያ ኑ ዋዛዳንዳጉዲ

- ኔኤኮ ሚጨንቲያ ጉቴና ጉቴና ዲቢሺ ዳዌ።
- 15 ማታሢ ኔ ኑና ዳዌ ሌዖጉዴያ
ፑርቶ ባኮዋ ኑ ዛጌ ሌዖጉዴያ
ኑና ዋዛሴ።
- 16 ማዳ ኔኤኮ ኔ ዓይሎም
ቦንቻኣ ዔያቶኮ ናኣቶም ፔጋዲ ጴዳም።
- 17 ናንጊና ናንጋ ጎዳ ማዔ ኑ ጾኣዛሢኮ ኮሹማ
ኑ ዑፃ ማዖም!
ኑ ማዳ ባኮዋ ኑኡም ዓንጄ፤
ሂዮ ኑኡም ዓኣፒሴ።

91

ጾኣሲኮ ካፒያ

- 1 ናንጊና ናንጋ ጎዳ ፑኖ ካይዚ ማሂ ናንጋ ዓሲ
ቢያ ባኮ ዳንዳዓ ጾኣዛሢ ሺባ ዋርቃኔ።
- 2 ታኣኒ ዒዛ፡- «ታኣኮ ፑኖ ካያሢ፣ ዋርዲዮ ቤዛሢ፤
ጊንሣ ሃሣ ጉሙርቆ ጾኣዛሢ ጋዓኔ።
- 3 ዒዚ ዓኣቲንቴ ፒራሢና
ዋዳኒ ዳንዳዓ ዶርዓሢናይዳፓ
ኔና ካፓኔ።
- 4 ዒዚ ፔ ጋፓኖና ኔና ዓኣቻንዳኔ፤
ዒዛኮ ጋኣዞ ዴማ ዓኣሺንቶ ቤሲ ኔ ዴንቃንዳኔ፤
ጉሙርቁንቴፃ ዒዛሲ ጊቲማጉዲ ኔና ቃዛያ ማዓንዳኔ።»
- 5 «ዲሞኮ ዲቃሢያይዳፓ
ሮኦሮናኣ ዱኮ ሂኢዢ ኔ ዒጊጫዓኬ።
- 6 ዲሚና ሃንታ ፑርታ ባኣዚዳፓ
ዓቢ ሮኦሪ ሙካ ባይሲንታኣ ኔ ሂርጋዓኬ።»
- 7 «ኮይሎይዳ ኔኤኮ ሺያ፤
ሚዛቆ ዛሎና ታጶ ሺያ ሎኦማንዳኔ፤
ጋዓንቴ ዬይ ኔ ባንሢ ዑካዓኬ።
- 8 ኔኤኒ ኔኤኮ ዓኣፖና ሌሊ ዬያ ዛጋንዳኔ፤
ፑርቶ ዓሳ ማታሢ ዔካሢ ዛጊ ኔ ዛጋንዳኔ።»
- 9 «ናንጊና ናንጋ ጎዳ ኔኤኮ ዓኣሺንቶ ቤዛሢ
ዴኤፖ ጾኣዛሢያ ፑኖ ካያሢ
ኔኤኒ ማሄኔ።

- 10 ይደር ፑርታ ባኣዚ ኔና ሄላባኬ፤
ባይዛ ሃይቢያ ኔ ማኣሪ ጌላባኬ።
- 11 ኔ ሃንታ ጎይፃ ቢያ ኔና ዒ ካፓንዳጉዲ
ኪኢታንኻ ዒዚ ኔኤም ጌዒ ዓይሃንዳኔ።
- 12 ቶካ ኔኤኮ ሹጮይዳ ዲቁንቱዋጉዲ
ዔያታ ፔኤኮ ኩጮና ኔና ኬዲ ዓርቃንዳኔ።
- 13 ዘቦንታ ደርቦ ሸኣኩንታይዳ ኔ ሄርቃንዳኔ፤
ሃጊ ዔቃ ዓደ ዘቦንታ ቃራሂያ ኔኤኒ ዒማይዳንዳኔ።»

- 14 ናንጊና ናንጋ ጎዳ ሂዚ ጋባኔ፡-
«ታና ዒ ናሽኬሂሮ ታ ዒዛ ሄሊ ዓውሳንዳኔ፤
ታ ሱንፆ ዒዚ ዔሬሂሮ ታ ዒዛ ጎኦቢ ዓይሳንዳኔ።
- 15 ዒዚ ታና ዔኤላኣና ታ ዋይዛንዳኔ፤
ዒዛኮ ማታሂ ዋደና ዒዛና ማዓንዳኔ፤
ታ ዒዛ ዓውሳንዳኔ፣ ቦንቻንዳኔ።
- 16 ሚርጌ ለዔ ዒዛ ታ ናንጊሻንዳኔ፤
ታኣኮ ዓውሲፆዋ ዒዛም ዳዋንዳኔ።»

92

ዓይሁደኮ ሃውሾ ኬሎና ዓይናዲንታ ዓይነቱም
ጋላታ ዓይነቱም

- 1 ናንጊና ናንጋ ጎዳ ጋላቲሂ ኮሺኬ፤
ዴኤፖ ፆኦዛሂዮ! ኔ ሱንፆም ዓይናዲሂያ ቃራኬ።
- 2 ሚጨንቲፆ ኔኤሲ ጉቴ ጉቴ
ጉሙርቁንቲፆዋ ዋንታ ዋንታ ኬኤዚፃ ኮሺኬ።
- 3 ታጳ ሻዢ ዴንሂ ዋርቆ ጎኦሎና
ዬያጉዴ ዓይነቱም ዓንጎና ዓይናዲ ኬኤዚፃ ቃራኬ።
- 4 ናንጊና ናንጋ ጎዳሂዮ!
ኔኤኮ ማዶና ታ ዋዛዴሂሮ
ኔ ኩጮና ኔ ማዴ ማዶሮ ዋዛና ታ ዓይናዳኔ።

- 5 ናንጊና ናንጋ ጎዳሂዮ!
ማዳ ኔኤኮ ዋዚ ዴኤፒዳይ!
ማሊፃኣ ኔኤኮ ዋዚጉዴ ሄሊንቱዋያዳይ!

91:11 ማቲ. 4:6፤ ሉቃ. 4:10። 91:12 ማቲ. 4:6፤ ሉቃ. 4:11። 91:13 ሉቃ. 10:19።

- 6 ቦኦዛ ዓሲ ዔራሪ
 ዔኤያ ዓሲያ ማሊ ጰቂሣኒ
 ዬያ ዳንዳዑቆሴ።
- 7 ፑርቶ ማዳ ዓሳ ማኦቲጉዲ ባቃላያ ማዔቴያ
 ጌኔ ማዳ ዓሳ ቡኔቴያ
 ናንጊና ዔያታ ባይቃንዳኔ።
- 8 ናንጊና ናንጋ ጎዳሢዮ!
 ኔኤኒ ጋዓንቴ ዳኤፒ ማዒ ናንጋያኬ።
- 9 ናንጊና ናንጋ ጎዳሢዮ! ሞርካ ኔኤኮ ባይቃንዳኔ፤
 ፑርቶ ማዳዘንሢያ ቢያ ላኦሊንታንዳኔ።
- 10 ታኦኮ ካኦር ጋዓንቴ ዖሶ ካኦሪጉዲ ኔ ዳጊሴኔ፤
 ሃጊ ጊሲንቴ ዛይቴና ኔኤኒ ታና ቲሽኬኔ።
- 11 ታ ሞርኮኮ ሎኦሚያ ዓኦፓ ታኦኮ ዛጌኔ፤
 ዋያ ታኦኮ ፑርቶ ሞርኮኮ ባሽንቴያ ዋይዜኔ።
- 12 ዲሎ ዓሳ ዓዳ ሜኤጃጉዲ ጋሞፒንታኔ፤
 ሊባኖኦሴ ሚያጉዲያኦ ዑጋኔ።
- 13 ዔያታ ናንጊና ናንጋ ጎዳ ማኦሪ ቱከንቴኔ፤
 ዓሳ ቡካ ጰኦካኦ ጋሞፒንታንዳኔ።
- 14 ጋርቹ ዋዶናታያ ዔያታ ዓኦፓንዳኔ፤
 ዓኦፓ ማዒ ዶዴ ጎይሣ ናንጋንዳኔ።
- 15 «ናንጊና ናንጋ ጎዳ ፒዜኬ፤
 ዒዚ ታኦኮ ላላሢኬ፤
 ዒዛኮ ዳቢንቴ ባኦያኬ» ዔያታ ጋዓንዳኔ።

93

- ጎኦሲ ካኦቲ ማዔሢ
- 1 ናንጊና ናንጋ ጎዳ ካኦቲኬ፤
 ዒዚ ዲቃሣ ዳኤፑሞ ማይንቴኔ፤
 ዶዶሞዋ ቱኡቶ ባኦዚጉዲ ቱኡቴኔ፤
 ጎሳ ዓጊጹዋጉዲ ዒ ዶዲሸኔ፤
 ዖኦኒያ ዬያ ዓጊሡቆሴ።
- 2 ኔኤኮ ካኦቱሞ ዖይታ ሚናፓ ዓርቃያ ዶዲኬ፤
 ኔኤኒ ናኦናና ዓኦያኬ።
- 3 ናንጊና ናንጋ ጎዳሢዮ! ዋራ ዑኡዘ ዳጊዳኔ፤
 ዋኦጎ ዳጊ ጌዒ ጉኡሜኔ፤

4 ሆራ ጉሉማ ጉዳህ ከባርኮ ዑኩዞ ማኣሚሴኔ።
 ሚርጌ ጉሉማ ዋኣይይዳፓ ባሼ
 ባዞ ጉዳህ ከባርፓ ዑህ
 ናንጊና ናንጋ ጎዳኮ ዋልቃ ዴጊ ጌዔያኩ።

5 ዳምባ ኔኤሲ ደዴያኩ፤
 ናንጊና ናንጋ ጎዳሂዮ!
 ጌኤዡ ማኣራ ኔኤኮ ደማዴያና ሚዛጳያ ማዒ
 ናኣናና ናናንጋያኩ።

94

ያኦሲ ቢያሂም ዋጋያ ማዔሂ
 1 ናንጊና ናንጋ ጎዳ ማዔ ኮሜ ኮፃ ያኦዛሂዮ!
 ኮሜ ኮፃ ያኦዛሂዮ! ፖዒ ፔጋዲ ጴዴ።
 2 ሳይይዳ ዋጋያ ማዔህ ዔቁ!
 ያቶርቃ ዓሰም ዔያቶ ማድጉዴያ ዒንጌ።
 3 ናንጊና ናንጋ ጎዳሂዮ!
 ፑርቶ ማዳ ዓሳ ዓይዲ ሄላንዳኣናዳይ ፃካንዳሂ?
 4 ዔያታ ሄርሺንቲ ዑኩሲ ሚርጊሻኔ፤
 ፑርቶ ዓሳ ሆኦሊንቲ ዲቢሻኔ።

5 ናንጊና ናንጋ ጎዳሂዮ!
 ዔያታ ዴር ኔኤኮ ላቢሳኔ፤
 ዓሶ ኔኤሲያ ዋኣዩሳኔ።
 6 ዜኤርይንድንሂና ቤዛባኣ ዓሰም ዔያታ ዋዳኔ፤
 ዜኤር ናኣቶኮዋ ሸምፓሂ ባይዛኔ።
 7 ዬያይዳያ ዔያታ፡-
 «ናንጊና ናንጋ ጎዳ ኑና ዴንቁዋሴ፤
 ያይቆኦቤ ያኦዛሂ ዬያ ዔሩዋሴ» ጋዓኔ።

8 ዒንሂ ዒዛ ዴር ባኣካ ዓኣ ማሉዋ ዓሳ
 ሂንዳ ኮሺ ማሉዋቲ፤
 ዒንሂ ዔኤዮ ዓሳ ዔራ ዒንሂ ማዓንዳሂ ዓይዲዳይ?
 9 ዋዮ ደቁሂ ፔኤር ዋይዙዋያ?
 ዓኣፖ ማዜሂያ ዛጉዋዓዳ?
 10 ዴር ጎሪ ዘሪ ፔ ጎይያ ባንሂ ማሃሂ
 ዔራቶ ዓሰም ዒንጋሂ ሜቶ ዓጋዓዳ?
 11 ናንጊና ናንጋ ጎዳ ዓሲኮ ማሊሂ

ዔኤቢ ፓሠቀያ ጉሪ ማዔሢ ዔራኔ።

- 12 ናንጊና ናንጋ ጎዳሢዮ! ኔኤኒ ጎሪ ዘራ ዓሲ
ኔ ዎጎዎ ኔ ዔርዛ ዓሲ ዓንጂንቴያኬ።
- 13 ጎሞ ዓሳ ሎኦማንዳ ዔቴ ቦኦኪንጎጎንዳያ ሄለንዳኣና
ኔኤኒ ዒዛ ፑርታ ሜቶፓ ሃውሺጎንዳኔ።
- 14 ናንጊና ናንጋ ጎዳ ዴሮ ፔኤሲ ኬኤሩዋሴ፤
ፔ ዓሶዎ ሃሹዋሴ።
- 15 ዎጌ ጊንሣ ፒዜ ጎይሢና ዎጊንጎንዳኔ፤
ዒኖ ፒዜ ዓሳ ቢያ ዬያ ጊንያ ዓኣዳንዳኔ።
- 16 ፑርቶ ዓሶ ታኣም ቃዛንዳያ ያናዳይ?
ፑርቶ ማዳ ዓሶና ታ ዛሎ ሞኦቲንጎጎንዳያ ያናዳይ?
- 17 ናንጊና ናንጋ ጎዳ ዎንዴ ታና ማኣዲባኣያታቴ
ቤዘና ታ ሄኤዶ ሃይቄ ዓሶ ሳያ ኬዴያ ናንዳኔ።
- 18 ታኣኒ «ታና ሃሊፃኔ» ጌዔ ዎዶና
ናንጊና ናንጋ ጎዳሢዮ!
ኔኤኮ ሚጨጊንቴፃ ላባዒ ታና ዓርቄኔ።
- 19 ማሊፃ ታኣኮ ሚርጌ ጎይያ
ኔኤኮ ዶዲሺፃ ሹምፓሢ ታኣኮ ዎዛሳኔ።
- 20 ዎጌ ሱንሢና ጊኣጊሺንቴ ጌኔ ማዶና
ዎቢሲ ዎጊንቴ ዎጌና ፔቴ ኔ ማዓንዳ?
- 21 ሂሎ ዓሶ ዑፃ ጌኔ ጌሰቲ ዔያታ ኬሰካኔ፤
ጌኤዦ ዓሳ ሃይቃንዳጉዲ ዔያታ ዎጋኔ።
- 22 ታኣም ጋዓንቴ ናንጊና ናንጋ ጎዳ ዎርዲዬ ቤሲ፤
ታኣኮ ያኣዛሢያ ፑኖ ካይዚ ማዔኔ።
- 23 ዒዚ ዳቢንቶ ዔያቶሲ ዔያቶም ማሃንዳኔ፤
ዔያቶ ፑርቱሞሮ ዒ ባይዛንዳኔ፤
ናንጊና ናንጋ ጎዳ ማዔ ኦ ያኣዛሢ ዔያቶ ጋጋፒጎንዳኔ።

95

ጋላታ ዓይነቱ

- 1 ሃኒ ሙኩዋቴ፤ ዎዘና ኦ ናንጊና ናንጋ ጎዳም ዓይናዶም!
ኦኤኮ ዳቄንቶ ላላሢም ኦ ዒላሸም!
- 2 ዒዛም ማዓ ጋላታ ዓይነቱም ዔኪ

94:11 1ቆሮ. 3:20።

ኑ ዒዛ ቤርቶ ሺኢኮም!
 ዓይነቱ ማግኒት ኑ ዒዛ ሄርሾም፤
 3 ናንጊና ናንጋ ጎዳ ዴኤፒ ያኦሲታሂር
 ማሌ ያኦዛፓ ዑህ ዒ ዴኤፒ ካኦቲታሂር።
 4 ሳዖ ዴማኦ ቢያ ዒዛ ኩጮ ጋራኬ፤
 ዴኮኮ ቶኦካኦ ዒዛሲኬ።
 5 ዒዛ ማገፍሂር ባዛ ዒዛርኬ፤
 ኩጮ ዒዛኮ ሳዖ ኮሺኬ።
 6 ሃኒ ሙኩዋቲ፤ ኑ ዒዛ ካኦሽኪ ዚጎም!
 ኑና ማገፍ ናንጊና ናንጋ ጎዳ ቤርታ ኑ ጉምዓቶም።
 7 ዒዛ ኑኡኮ ያኦዛሂኬ፤
 ኑ ዒዛ ኩጮ ካፒያ ዴማ ዓኦ ማራቶ
 ኑና ዒ ሄንቃ ዒዛኮ ዴርኬ፤
 ዩያር ዒዛ ሃኖ ሂዚ ጌዒ ኬኤዛሂ ዋይዙዋቲ፡-

8 «ዩያ ዓሳ ናንጉዋ ዳውላ ማሪባና ማሳ ጌይንታ ቤዛ
 ዒንሂኮ ቤርታኦ ዓደንሂ ማዴሂጉዲ
 ዒንሂያ ዋይዚ ዒያ ማዒፖቲ።
 9 ዔያታ ማዶ ታኦሲ ዛጌያ ማዔያታቲያ
 ታ ዋይታቲያ ጌዒ ታና ዔያታ ዛጌኬ፤
 ማሂ ማሂ ታና ዔያታ ዋይታቲያ ዛጌኬ።
 10 ዩኖ ሸይንቶ ያይዲታሚ ሌዔ ጉቤ ታኦኒ ሻኦኪንቴኔ፤
 ዒማና ታኦኒያ፡- <ዒና ዔያቶኮ ታና ሃሼ ዴሬኬ፤
 ጎይያዋ ታኦሲ ዔያታ ዔሩዋሴ> ጌዔኔ።
 11 ዩያር፡- <ፔቲታዖ ታኦኮ ሃውሸይዳ ዔያታ ጌላዓኬ
 ጌዒ ታኦኮ ዳጎና ታ ጮኦቄኔ።»

96

ያኦሲ ቢያሂኮ ዑፃ ማዔሂ
 (1ያኦሲ. ዓሃኬ 16:23-33)

1 ናንጊና ናንጋ ጎዳ ማዓ ዓኪ ዓይነቱ ማግኒት ዓይናዲዋቲ!
 ዓጮ ቢያ ናንጊና ናንጋ ጎዳ ማዓ ዓይናዲዋቲ!
 2 ናንጊና ናንጋ ጎዳ ማዓ ዓይናዲዋቲ፣ ዒዛኮ ሱንያ ዓንጂዋቲ፤
 ዒዛኮ ዓውሲያ ጉቲ ጉቲ ኬኤዙዋቲ።

95:8 ዔ.ብ. 3:15፤ 4:7። 95:9 ኬ.ሲ. ማፃ 17:1-7፤ ፓይ. ማፃ 20:2-13።
 95:11 ፓይ. ማፃ 14:20-23፤ ላሚ. ዋማ 1:34-36፤ 12:9-10፤ ዔ.ብ. 4:3-5።

3 ቦንቸ ዲዛኮ ዳሮ ባኣካ
ዲቃሢ ሄርቪሳ ማዶዋ ዓሲ ቢያ ቤርታ ኬኤዙዋቲ!

4 ናንጊና ናንጋ ጎዳ ዳኤፒኬ፤
ዲዛ ሄርቪያ ኮይሳያኬ፤
ሜሌ ካኣሽኮ ጾኦዛፓ ቢያ ዑሣ
ዲዚ ዓጊጨንታንዳያ ኮይሳኔ።

5 ሜሌ ዳሮ ጾኦዛ ቢያ ፃላሄርኬ፤
ናንጊና ናንጋ ጎዳ ጋዓንቴ ጫሪንጮ ማዜኔ።

6 ቦንቸና ዳኤፑሞዋ ዲዛ ኮራኬ፤
ዲዛኮ ጌኤዦ ማኣራ ደዲሞና ሚዛጹሞና ዓኣኔ።

7 ሳጾይዳ ናንጋ ዳራ ናንጊና ናንጋ ጎዳ ጋላቱዋቲ!
ዲዛኮ ቦንቸና ዋልቆናሮ ዲዛ ጋላቱዋቲ።

8 ናንጊና ናንጋ ጎዳ ሱንጾም ቦንቸ ዲንጉዋቲ፤
ዲንጎ ባኣዚ ዓርቂ ዲዛኮ ዓሳ ቡካ ጳኦኮ ጌሉዋቲ።

9 ዲዛኮ ደማዳያ ማዔ ዳኤፑሞሮ ዲዛም ዚጉዋቲ፤
ሳዓ ቢያ ዲዛ ቤርታ ጎጋይቁዋቲ።

10 ዳሮ ቢያሢ ባኣካ፡- «ናንጊና ናንጋ ጎዳ ካኣታዳኔ!» ጎዑዋቲ፤
ሳዔላ ደዲና ማዢንቴሢሮ ዓጊፃዓኬ፤
ዓሲም ቢያ ዲ ፒዙሞና ዋጋኔ።

11 ጫሪንጫ ዋዛዲዋቲ! ሳዔሌ ኔኤኒያ ዋዛዳ!
ባዘንታ ዬያይዳ ዓኣ ባካ ቢያ ዑኡዘ ዋይዚሱዋቲ።

12 ጎዦንታ ጊዳ ዓኣ ባካኣ ቢያ ዪኩዋቲ!
ያዲ ማዓዛ ካዮ ሚፃ ቢያ ዋዛና ዓይናዳንዳኔ።

13 ዲዚ ሙካንዳኔ፤
ናንጊና ናንጋ ጎዳ ቤርታ ዔያታ ዓይናዳንዳኔ፤
ሳጾይዳ ዋጋኒ ዲ ሙካንዳኔ፤
ሳጾይዳ ያሉሞና ዳሮ ዑፃ ጎኑሞና ዋጋንዳኔ።

97

ጾኦሲ ቢያፓ ዑሣ ማዒፃ

1 ናንጊና ናንጋ ጎዳ ካኣቲኬ!
ሳዔሌ ኔኤኒ ዋዛዳ፤
ዲንሢ ባዘ ሳዛ ዓኣ ዓጫ
ቢያ ዋዛዲዋቲ!

- 2 ዲዛኮ ኮሮ ሻኦሬንታ ዲሜ ቃኦኮንታ ካንቂ ዓኣኔ፤
ካኦቱሞ ያይታ ዲሎሞና ፒዜ ዋጌና ጌሢንቴኔ።
- 3 ዲዛኮ ቤርታ ታሚ ዓኣዳኔ፤
ኮይሎ ዲዛኮ ማንጊ ዓኣ ሞርኮሞ ሚቻኔ።
- 4 ዜኤሊንፃ ዲዛኮ ዓጮ ፖዓኔ፤
ሳዓ ዬያ ዛጋፖ ጎጋይቃኔ።
- 5 ዲካ ናንጊና ናንጋ ጎዳ ቤርታ
ሳዓኣ ቢያ ዓዳ ሾፒጉዲ ዓልቄኔ።
- 6 ጫሪንጫ ዲሎሞ ዲዛሲ ኬኤዛኔ፤
ዴሪ ቢያ ቦንቾ ዲዛሲ ዛጋኔ።

- 7 ዓርሲ ኮሾና ማላቶሞ ዚጋዞንሢ
ሜሌ ካኣሽኮ ያኦዞና ሄርሺንታዞንሢ
ቢያ ቦርሲንቶንጎ፤
ዲንሢ ሃይ ሜሌ ያኦዞ ዲዛሞ ዚጉዋቱ።
- 8 ናንጊና ናንጋ ጎዳሢየ!
ዋጋ ኔኤሲ ፒዜ ማዔሢሮ ዲኮኔ ዴራ ዋይዚ ዋዛዴኔ፤
ዪሁዳ ዓጮ ካታማኣ ሚርጌና ዋዛዴኔ።
- 9 ናንጊና ናንጋ ጎዳሢየ! ኔኤኒ ሳይዴ ቢያ ዴኔፒኬ፤
ሜሌ ያኦዞፓ ቢያ ኮሺ ኔኤኒ ዴጊ ጋዓያኬ።

- 10 ዲንሢ ናንጊና ናንጋ ጎዳ ናሽካ ዓሳ
ፑርታ ባኣዚ ሻኦኪንቱዋቱ፤
- ጉሙርቁንታዞንሢኮ ዲዚ ሹሞፓሢ ካፓሢሮ
ዋይዞ ዲፃ ዓሶ ኩጫፓ ሄሊ ዲ ዔያቶ ዓውሳንዳኔ።
- 11 ፖዓ ዲሎ ዓሶሞ
ዋዛኣ ዲና ፒዜ ማዔዞንሢሞ ኬሰኪ ጴዳኔ።
- 12 ዲንሢ ዲሎ ዓሳ ናንጊና ናንጋ ጎዳና ዋዛዴዋቱ!
ዲዛኮ ዲሜዴ ሱንፆዋ ጋላቱዋቱ።

98

ዓይነቱ

- ያኦሲ ዓጮ ዋይሣያ ማዔሢ
- 1 ናንጊና ናንጋ ጎዳሞ ዓኪ ዓይነቱ ሺኢሹዋቱ፤
ያኦሲ ፔ ዋልቄና ማዲንታ ዓኪ ባኣዚ ማዴኔ፤
ዲዛኮ ሚዛቆ ኩጫንታ ዲሜዴ ቃሳኣ

97:9 ዓይነ. 29:1-2።

- ዳቂንታ ዔኪ ሙኬኔ።
- 2 ናንጊና ናንጋ ጎዳ ዳቂሺያ ፔኤሲ ዔርዘኔ፤
ዲሉሞ ፔኤሲ ዳሮ ቤርታ ፔጋሴ።
- 3 ዒሰራዔኤሌ ዓሶሞ ፔኤኮ ሚጨነቲያ
ጉሙርቁንታያ ማዒያዎ ማሌኔ፤
ዓጫ ማዓ ካሮና ቢያ ኑ ያኦዛሢኮ ዓውሲያ ዛጌ።
- 4 ሳዓ ናንጋ ዳራ ቢያ ናንጊና ናንጋ ጎዳም ዒላሹዋቲ!
ሄርሺሢያ ዒዛም ሚርጊሹዋቲ፣ ዎዛና ዓይናዲ ጋላቲዋቲ።
- 5 ናንጊና ናንጋ ጎዳም
ሚርጌ ሻዡ ዳንሢ ዋርቆ ጎኦሎና ዓይናዲዋቲ፤
ዓይኑሞ ዓንጋሞና ዑኡሲ ኬሲ ዒዛም ዓይናዲዋቲ።
- 6 ዲንኮና ዛዬ ዑኡሲና
ናንጊና ናንጋ ጎዳ ማዔ ካኦታሢ ቤርታ ዒላሹዋቲ።
- 7 ባዘንታ ዬያይዳ ዓኣ ባካ ቢያ
ሳያንታ ዒኢካ ናንጋ ባካ ቢያ
ዑኡዘ ዋይዚሱዋቲ!
- 8 ዎራ ኩጮ ፔኤኮ ባያንጎ፤
ዲካኣ ዎሊ ዑፃ ዓይናዲንጎ።
- 9 ዬያታ ያኦዛሢ ቤርታ ዓይናዲንጎ፤
ዒዚ ሳያይዳ ዎጋኒ ሙካንዳኔ፤
ዓጮ ዑፃ ዒዚ ዲሉሞና
ዳሮ ዑፃኣ ጎኡሞና ዎጋንዳኔ።

99

- ያኦሲ ዳኤፒ ካኦቲ ማዔሢ
- 1 ናንጊና ናንጋ ጎዳ ካኦታዳኔ፤
ዳራ ጎጋይቆንጎ፤
ዒዚ ከሩቤኤሎ ዑፃ ዓኣ ካኦቲሞ ያይታ ዳዔኔ፤
ሳዓኣ ዓጊያንጎ።
- 2 ናንጊና ናንጋ ጎዳ ዲዮኔይዳ ዳኤፒኬ፤
ዳሮኮ ቢያ ዑሣ ዒ ዳግ ዳጊ ጌዔኔ።
- 3 ኔኤኮ ዔያታ ዳኤፑሞና ዒጊቻ ሱንያና ሄርሸንጎ፤
ዒዚ ዲማዳያኬ።

99:1 ኬሲ. ማግ 25:22።

- 4 ፒዜ ወገን ናሽካ ወልቆ ካኣቲዮ!
ኔኤኒ ፒዜ ባኣዚ ማዲንታንዳጉዲ ማሄኔ፤
ፒዜ ወገህና ዲሉሞና ያይቆኦቤ ዓሰም ዔኪ ሙኩኔ።
- 5 ናንጊና ናንጋ ጎዳ ማዔ ኑ ጾኦዛህ ዴግ ዴጊዲዎቲ!
ቶካ ዒዛኮ ሄርቃ ሳይይዳ ዚጉዎቲ!
ዒዚ ዲማዴያኩ።
- 6 ዒዛም ቄኤሶ ማዔዘንህ ባኣካ ሙሴና ዓኣርኔና ዓኣኔ፤
ሃሃ ዒዛ ሺኢቄዘንህ ባኣካፓ ሳሙዔኤሌ ፔቲህኩ፤
ዔያታ ናንጊና ናንጋ ጎዳ ዔኤላዛ
ዒዚ ዔያቶም ማሃ ዩሄኔ።
- 7 ቱርቱርጉዲ ዔቄ ሻኣር ባኣኮይዳ ዒ ጌሰቲኔ፤
ዔያታኣ ዒዚ ዔያቶም ዒንጌ ዳምቦና ዎጎና ካፔኔ።
- 8 ናንጊና ናንጋ ጎዳ ማዔ ኑ ጾኦዛህዮ!
ኔኤኒያ ዔያቶም ዩሄኔ፤
ኔ ዔያቶኮ ዲቢንቶር ኮሜ ኮፃያ ማዔቲያ
ኔኤኒ ዔያቶም ዓቶንጎ ጋዓ ጾኦኪኩ።
- 9 ናንጊና ናንጋ ጎዳ ማዔ ኑ ጾኦዛህ ዴግ ዴጊዲዎቲ!
ዒዛኮ ዲማዴ ዲካ ዒዛም ዚጉዎቲ፤
ናንጊና ናንጋ ጎዳ ማዔ ኑ ጾኦዛህ ዲማዴያኩ።

100

ጋላታ ዓይነቱ

- 1 ሳዓ ቢያ ናንጊና ናንጋ ጎዳም ዒላሹዎቲ!
- 2 ናንጊና ናንጋ ጎዳም ዎዛና ማዲዎቲ!
ዎዛ ዓይነቱም ዓይናዲህና ዒዛ ቤርቶ ሺኢኩዎቲ።
- 3 ናንጊና ናንጋ ጎዳ ጾኦሲ ማዔህ ዔሩዎቲ፤
ኑና ማገፔህ ዒዛኩ፥ ኑኤኒ ዒዛርኩ፤
ኑኤኒ ዒዛ ዴሮ፥ ዒዚ ሄንቃ ማራቶኩ።
- 4 ጋላታና ዒዛ ካሮ ባንህ
ሄርሺህና ዓሳ ቡካ ጰኦኮዎ ጌሉዎቲ፤
ጋላቱዎቲ፥ ሱንጾዎ ዒዛሲ ዓንጂዎቲ።
- 5 ናንጊና ናንጋ ጎዳ ኮሺ
ሚጪንቲፃኣ ዒዛኮ ናንጊና ናንጋያኩ፤

99:7 ኪሲ. ማግ 33:9።

ዒዛኮ ጉሙርቁንቲፃ ሾይንቲፓ ሾይንቲ ሄላኔ።

101

ደውቲ ዓይነቱ

ካኣታ ጆኦሲም ጫኣቃ ጫኣቁም

1 ኔኤኮ ሚጫንቲፃና ፒዜ ዋጊፃና ዛሎ ታ ዓይናዳኔ፤
ናንጊና ናንጋ ጎዳሢዮ! ጋላታ ዓይነቱ ታ ኔኤም ሺኣሻኔ።

2 ዳቢንቲባኣ ጎይጃሎ ዶዲሺ ታ ዓርቃንዳኔ፤
ኔኤኒ ታ ኮራ ዓይዲ ዩዓንዳይ?
ታ ማኣሮ ዓሶና ዋላ ፒዜ ዓኔና ታ ናንጋንዳኔ።

3 ፑርታ ባኣዚ ማዳንቲም ታ ዛጊ ዚቲ ጋዓዓኬ፤
ጆኦሲዳፓ ሃኬ ዓሳ ማዳ ባኮ ቢያ ታ ዒፃኔ፤
ፔቲታፃ ታ ዔያቶና ዋላ ካኣማዓኬ።

4 ዋቦ ዓና ዓኣ ዓሳ ታ ኮራፓ ሺኢኮንጎ፤
ፑርቲምና ዋላ ታኣኮ ፔቲም ባኣሴ።

5 ፔ ላጋሢ ካሽካሽ ደንካሢ ታ ጎራኔ፤
ጆቶርቃ ዓኣፒና ሄርሺንታ ዓኣ ዓሢ ታ ቲኣሩዋሴ።

6 ታኣና ዋላ ናንጋንዳጉዲ
ታኣኮ ዓኣፓ ሳፃይዳ ጉሙርቁንታዘንሢዳኬ፤
ጌኤሺ ጎይሢና ሃንታሢ ዒዚ ታኣም ማዳንዳኔ።

7 ጌሻያ ማዔ ዓይጎ ዓሲያ ታ ማኣሮይዳ ናንጋዓኬ፤
ሉኡዙም ጌሰታሢያ ታ ቤርታ ፒዝ ጌዒ ዔቃዓኬ።

8 ሳፃይዳ ፑርቶ ማዳ ዓሶ ቢያ
ጉቲ ጉቲ ታ ባይዛንዳኔ፤
ፑርቶ ማዳ ዓሶ ቢያ
ናንጊና ናንጋ ጎዳ ካታማፓ ታ ጋፒሳንዳኔ።

102

ሜታዳ ዓሲ ያዩሢና ናንጊና ናንጋ ጎዳ ሺኢቃ ሺኢጲሢ
ሜታዳ ዓሲ ሺኢቃ ሺኢጲሢ

1 ናንጊና ናንጋ ጎዳሢዮ! ሺኢጲፃ ታኣሲ ዋይዜ፤

100:5 1ፆኦሲ. ዓሃኬ 16:34፤ 2ፆኦሲ. ዓሃኬ 5:13፤ 7:3፤ ዒዝ. 3:11፤ ዓይኑ. 106:1፤
107:1፤ 118:1፤ 136:1፤ ዔር. 33:11።

- 2 ታኣኒ ዒላታ ዒላታ ኔ ኮራ ሄሎንጎ።
 2 ታኣኒ ሜታጅ ከሎና ዓኣፖ ኔኤሲ ታ ጊዳፓ ማሂፖ።
 ዋዮ ኔኤኮ ታ ባንሢ ማሄ፤
 ታኣኒ ኔና ዔኤላ ከሎና ሩኡሪና ታኣሞ ዩሄ።
- 3 ናንጎ ዋዳ ታኣኮ ጨቢጉዲ ዳንዲ ጋፓኔ፤
 ሜገፃ ታኣኮ ዓዳ ናኣቦጉዲ ያይዳኔ።
- 4 ዒና ታኣኮ ቃኣያ ዋጅ ማኣቲጉዲ ሜሌኔ፤
 ካሣ ሙኡዚያ ታ ዋሌኔ።
- 5 ታኣኮ ዒላታፓ ዔቄያና
 ዑፃ ታኣኮ ሜሊ ዓቴኔ።
- 6 ዓሳ ናንጉዋ ዳውሎይዳ ዓኣ ሙኡታሌ ታ ማሌኔ፤
 ዶዔ ባዓ ቤሰካ ዓኣ ኩኩቲ ማዔኔ።
- 7 ጊንዓ ባኣያ ታ ዋርቃኔ፤
 ማኣሮኮ ሄላሢዳ ፔኤሮ ዓኣ
 ሚኢሻካፒ ታ ማዔኔ።
- 8 ሞርካ ታኣኮ ሮኦሮ ጉቤ ታና ሚኢጫኔ፤
 ታና ፑርቲሳ ዓሳ ሱንፆ ታኣኮ ጋዳንቁንቲያ ማሂ ዛጋኔ።
- 9 ዲቢንሢ ታኣኒ ዲኢሊጉዲ ኩኡሌኔ፤
 ዑዠ ታኣኮ ታኣኒ ዓቢያና ሲኢሬኔ።
- 10 ኔኤኮ ጎሪንቶና ዳጎናፓ ዔቄያና
 ሌካ ታና ኔ ከሴ ቤዛፓ ሊካ ከኤሬኔ።
- 11 ናንጎ ለዓ ታኣኮ ዓቢ ጌሊ ዔኤከፍጉዲከ፤
 ታኣኒያ ማኣቲጉዲ ሹሌኔ።
- 12 ናንጊና ናንጋ ጎዳሢዮ!
 ኔኤኒ ጋዓንቲ ናንጊና ኔኤኮ ካኣቱሞ ያይታ ዳዔኔ፤
 ሱንፃ ኔኤኮ ሸይቲፓ ሸይንቲ ሄላንዳኣና ናንጋኔ።
- 13 ኔ ዔቃንዳኔ፣ ዒዮኔያ ሚጨንታ ዓኣፒና ዛጋንዳኔ፤
 ዒዞሞ ኔኤኒ ኮሹሞ ኔኤሲ ዳዋ ዋዶ ማዔሢሮ
 ኔ ጌዔ ዋዳ ሄሌኔ።
- 14 ኔኤኮ ዓይላ ሹጮ ዒዞኮ ዛጊ ዋዛዳንዳኔ፤
 ሳዖ ዓጮማኣ ሚጨንታንዳኔ።
- 15 ዴራ ናንጊና ናንጋ ጎዳሢ ሱንፆ
 ሳዖ ካኣታኣ ቢያ ቦንቾ ኔኤሲ ዒጊጫንዳኔ።
- 16 ናንጊና ናንጋ ጎዳ ዒዮኔ ጊንሣ ማሂ ማዞንዳኔ፤

- ፔኤኮ ቦንቾና ፔጋዲ ደዳንዳኔ።
 17 ዒዚ ማንቆ ዓሶ ሺኢጲያ ባንሢ ዛጋንዳኔ፤
 ዔያታ ሺኢቃ ሺኢጲያ ዒ ቦሃዓኬ።
- 18 ሃጊ ሸይንቲባኣ ዓሳ ዒዛ ጋላታንዳንጉዲ
 ሃያ ናንጊና ናንጋ ጎዳ ማዴ ዲቃሢ ሄርሺሳ ባኮ
 ሙካ ሸይንቶም ፃኣፑዋቱ።
- 19 ናንጊና ናንጋ ጎዳ ዴጌ ቤዛ ዓኣ
 ናንጎ ማኣራፓ ሊካ ዛጌኔ፤
 ጫሪንጫይዳ ዓኣፖ ሳፖ ዛጌኔ።
- 20 ዬያ ዒ ማዴሢ
 ቱኡቱ ዓሶኮ ዒላቶ ዋይዛጊ
 ሃይቆም ዋጊንቱ ዓሶዋ ዓውሳኒኬ።
- 21 ዬያሮ ናንጊና ናንጋ ጎዳኮ ሱንፃ ፃዮኔይይዳ
 ጋላታኣ ዬሩሳላሜይዳ ኬኤዚንታንዳኔ።
- 22 ዬይያ ዴርንታ ካኣቶንታ
 ናንጊና ናንጋ ጎዳ ካኣሸካጊ
 ፔቱሞና ቡኪንታኣና ማዓንዳኔ።
- 23 ደዲሞ ታኣኮ ጎይፃ ዓይሴኔ፤
 ናንጎ ታኣኮ ዒ ዑኬና ጋፒሴኔ።
- 24 ዬካፓ ታኣኒያ፡- «ፆኦሲዮ ኔኤኒ ናንጋሢ
 ሸይንቲፓ ሸይንቲ ሄላንዳኣናታሢሮ
 ናንጎ ታኣሲ ታኣኒ ጋፒሲባኣንቲ
 ታ ናንጋ ሃጊ ዓኣ ጎይሢ ዓኣንቲ
 ታና ዔኪፖ» ጌዔኔ።
- 25 ኔኤኒ ሚና ቤርታ ሳፖ ማገፔኔ፤
 ጫሪንጫኣ ኔ ማገፔሢኬ።
- 26 ዔያታ ባይቃንዳኔ፤
 ኔኤኒ ጋዓንቲ ደዲ ናንጋንዳኔ።
 ዬይ ቢያሢ ማኣፖጉዲ ጪንቃንዳኔ፤
 ዓፒላጉዲያኣ ኔ ዔያቶ ላኣማንዳኔ፤
 ዔያታ ቤዘና ኬኤሪንታንዳኔ።
- 27 ኔኤኒ ጋዓንቲ ኔናኬ፤
 ሌዓኣ ኔኤኮ ፔቲታፖ ጋፑዋሴ።
- 28 ኔ ዓይሎኮ ናኣታ ዔያቶም ጊኢጌም ናንጋንዳኔ፤

102:27 ዔ.ብ. 1:10-12።

ዘርፃ ዔያቶኮ ኔ ቤርታ ዶዲ ዴዓንዳኔ።

103

ዳውቲ ዓይኑም

ጾኦሲ ናሹሞ

1 ታኣኮ ሸምፔሌ! ናንጊና ናንጋ ጎዳ ዓንጃ!
ታኣኮ ጋር ዑፃኣ ቢያ ዒዛኮ ዲማዳ ሱንጾ ጋላቱዋቱ።

2 ታኣኮ ሸምፔሌ! ናንጊና ናንጋ ጎዳ ዓንጃ፤
ኔኤም ዒ ማዳ ባኮ ቢያ ዋሊፖ።

3 ጎሞ ቢያ ኔኤኮ ዓቶም ጋዓሂ
ሃርጎ ኔኤኮ ቢያ ፓሣሂ።

4 ናንጎ ኔኤኮ ባይሲንቶ ዔቶፓ ዓውሳሂ
ፔኤኮ ሚጨንቲጾና ኮሹሞና ኔና ጎኦባሂ።

5 ጋርቹ ዋልቆ ኔኤኮ ዓዳ ኮኦኬ ጎይሂ ዓካሳሂ
ኔኤኒ ማላ ባኮ ፔ ኮሹሞና ኩንሣሂ
ኔኤም ዒዛኬ።

6 ናንጊና ናንጋ ጎዳ ሄርቁንቲ ዋርቃዞንሂም ቢያ
ፒዜ ዋጌ ዋጋኔ።

7 ጎይጾ ፔኤሲ ሙሴም
ማዶዋ ፔኤሲ ዒሰራዔኤሌ ዓሶም ዒ ቤኤዜኔ።

8 ናንጊና ናንጋ ጎዳ ሚጨንታያና ዓቶም ጋዓያ
ዳጋዳኒ ሩኡሩዋያና ናሹማኣ ሚርጌያኬ።

9 ዒዚ ቢያ ዋዴ ዳቢንቲ ሙሪ ሃንቱዋሴ፤
ዳጋዳ ጎይሣኣ ዴዑዋሴ።

10 ዒዚ ኑም ኑኡኮ ጎሞጉዴያ ማሂ ዒንጊባኣሴ፤
ኑ ዳቢንቶጉዴያኣ ጨጊባኣሴ።

11 ጫሪንጫ ሳዓፓ ሌካ ዴጋሂጉዲ
ዒዛኮ ሚጨንቲጾ ዒዛ ዒጊጫ ዓሶም ዴኤፒኬ።

12 ዓባ ኬሰካ ባንፃ ጌላ ባንፃፓ ሃካሂጉዲ
ዳቢንቶ ኑኡሲ ኑፓ ዒ ሃኪሴኔ።

13 ዓዴ ፔኤኮ ናኣቶ ሚጨንታሂጉዲ
ናንጊና ናንጋ ጎዳ ዒዛ ዒጊጫዞንሂ ሚጨንታኔ።

14 ዒዚ ኑኡኮ ማዢንቶ ዔዔራኔ፤
ኑኡኒ ሲላሊ ማዔሂያ ማላኔ።

- 15 ዓሲኮ ናንጎ ዎዳ ማክቲጉዳያኬ፤
ካይዚዳ ዑጊ ቡና ቡኒጉዲኬ።
- 16 ካይዚ ቡኒ ዠባሬ ዠባርሻ ዎዶና ቤዞና ዲኢኒ ባይቃኔ፤
ይይ ዎንዴ ዒኢካ ዓኣያ ማዔሢያ ዔርቱዋሴ።
- 17 ናንጊና ናንጋ ጎዳኮ ሚጪንቲፃ ጋዓንቲ
ናኣናና ዒዛ ዒጊጫዘንሚምኬ፤
ዒዛኮ ፃሉማኣ ናዖኮ ናዖ ሄላንዳኣናኬ።
- 18 ዒዚ ዬያ ማዳሢ ጫኣቁሞ ካፓዘንሢና
ዓይሢዎዎ ዶዲ ካፓዘንሢምኬ።
- 19 ናንጊና ናንጋ ጎዳኮ ካኣቱሞ ዖይታ ጫሪንጫ ዶዴኔ፤
ካኣቱማኣ ዒዛሲ ቢያሢ ዎይሣኔ።
- 20 ዒንሢ ዒዛኮ ቃኣሎም ዓይሢንታ ከኢታንቻ
ዒዛኮ ዓይሢዎ ማዲ ኩንሣ ዎልቆርንሢ
ናንጊና ናንጋ ጎዳ ዓንጂዎቲ።
- 21 ዒንሢ ዒዛኮ ማሊዎ ማዲ ኩንሣ
ጫሪንጫ ዓኣ ማዠንታ
ናንጊና ናንጋ ጎዳ ዓንጂዎቲ።
- 22 ዒንሢ ዒዚ ዎይሣ ዓጫ ናንጋ ዓሳ ቢያ
ማዠንታኣ ቢያ ናንጊና ናንጋ ጎዳ ዓንጂዎቲ፤
ታ ሼምፔሌ! ዒዛ ዓንጃ።

104

ማዤ ዖኣዛሢም ሺኢኬ ጋላታ

- 1 ታ ሼምፔሌ! ናንጊና ናንጋ ጎዳ ዓንጃ!
ናንጊና ናንጋ ጎዳ ማዔ ታ ዖኣዛሢዮ! ኔኤኒ ኮሺ ዳኤፒኬ፤
ቦንቾና ዳኤፑሞና ኔ ማይንቲኔ።
- 2 ኔ ኔና ፖዒና ካንቄኔ፤
ጫሪንጫ ኔኤኒ ዓፒላጉዲ ዳሬኔ።
- 3 ማኣር ኔኤሲ ኔኤኒ ሎ ዋኣዎ ዑፃ ማዤኔ፤
ሻኣር ኔኤኮ ሳርጌሎ ዖይቶ ማሄኔ፤
ዠባራ ኔኤኮ ጋኣሲ ማዔም ኔ ባራናኔ።
- 4 ከኢታንቻ ኔኤኮ ኔ ዠባሬ
ዓይሎ ኔኤሲ ታሚ ሎሰቲ ኔኤኒ ማሄኔ።
- 5 ናንጊና ዓጊፀዋጉዲ

104:4 ዔ.ብ. 1:7።

- ሳን ማገገጥ ቤዛ ደዲሺ ኔ ዳይህኔ።
 6 ባዘና ዓፒላጉዲ ሳን ኔ ካንቄኔ፤
 ዋኣፃ ዲኮኮ ቶኦኪና ማዔኔ።
- 7 ዔያቶ ኔ ጎሪ ዋደና ጋዓንቴ ቤዘና ሸኢኬኔ፤
 ኔኤኮ ጉጉንፃ ዑኡዘ ዔያታ ዋይዘፃ
 ጸሸኪ ፑኔኔ።
- 8 ዲኮኮ ዑፃ ዔያታ ላኣሊንቴኔ፤
 ኔኤኒ ዔያቶም ገኢጊሹ፣ ደኣጫዳ ጊንፃ ዋቴኔ።
- 9 ጊንሣ ዔያታ ሳን ዔኤዲ ባይዙዋጉዲ
 ዑሣ ኬሰኪያ ላኣሊንቴዋጉዲ
 ጌዲ ኔ ጌህኔ።
- 10 ዓልቃ ዋኣፃ ደኣጫዳ ጊንፃ ዋታንዳጉዲ ኔ ማህኔ፤
 ዲኮኮዋ ባኣኮና ዔያታ ዋታኔ።
- 11 ካዮ ቦዓ ዒኢካፓ ዑሸካኔ፤
 ኪርሞላ ዒኢካፓ ዴኤቦ ፔኤሲ ዛኣራኔ።
- 12 ካፓ ማኣሮ ፔኤኮ ዋሮ ዓጫ ማዣኔ፤
 ሚፆ ካኣፖ ባኣካኣ ዲላኔ።
- 13 ኔኤኒ ሎ ኔ ማኣራፓ ዲኮ ዑሻኔ፤
 ሳዓኣ ኔ ማዶ ዓኣፖ ሙይ ሚሸካኔ።
- 14 ቆልሞም ሳዓፓ ማኣቲ ኔ ባቃልሳኔ፤
 ዓሲም ሙኡዚ ማኣዳንዳ ዲማ ዲማ ባኣዚ ኔ ኬሳኔ።
- 15 ዓሲ ዋዛሳ ዋይኔ
 ዓኣፖ ካሮዋ ዓኣዒሳ ዛይቴ
 ዋልቄ ዒንጊ ደዲሻ ሃኣኮዋ ዒኢፓ ጴዳኔ።
- 16 ዬያጉዲ ሃሣ ናንጊና ናንጋ ጎዳኮ ሚፃ
 ዒዚ ቱኬ ሊባኖኦሴ ሚፃ ዋኣፃ ዑሸኪ ሚሸካኔ።
- 17 ካፓ ፔኤኮ ማኣሮ ዒኢካ ማዣኔ፤
 ቦኣካህሂ ዚቢቆ ባኣካ ዋሮቆ ቤሲ ዳንቃኔ።
- 18 ፆደዙ ዲካ ዋሻ ናንጋ ቤሲ
 ላሎ ቆኦፓኣ ሾኦና ጌላ ቤሲኬ።
- 19 ዓጊና ዋደ ዲማሳንዳጉዲ ኔ ማዳኔ፤
 ዓባኣ ፔ ጌላ ዋደ ዔዔራኔ።
- 20 ሳዓ ኔ ዓሚሻዛ ዲሚ ማዓኔ፤
 ዒማና ካዮ ቦዓ ቢያ ኬሰኪ ዲርጊ ሸራኔ።

21 ሃጊ ዔቃ ዘባ ሙዖ ኮይ ጉዳኔ፤
ሙዖንዶ ባኮዋ ያኣሲዳፓ ኮዓኔ።

22 ዓባ ያርቃኣና ዓኣሺንቲ ካዮ ጌላኔ፤
ፔኤኮ ቡኡላ ቡኡላ ጌሊ ላሃኔ።

23 ዬካፓ ዓሳ ማዶይዳ ሶኣፓኔ፤
ሳዓ ዓማንዲያ ሄላንዳኣና ፔኤቃኔ።

24 ናንጊና ናንጋ ጎዳሢዮ!
ማዳ ኔኤኮ ዎዚ ሚርጋይ!
ዬያ ቢያ ኔኤኒ ኔ ቢታንቶና ኮሸኔ፤
ሳዓ ኔኤኒ ማዜ ማዜንቶና ኩሜኔ።

25 ሃይ ዴኤፖ ባዛ ዳልጊና ሚጨንቲያኬ፤
ዴኤፒንታ ዳካ ቦዖንታ ፓይዲባኣ ዓጊፃ ባኣዚ ዒኢካ ዓኣኔ።

26 ዋኣዖ ካኣሚላ ዒኢካ ዑፃ ሃንታኔ፤
ኔኤኒ ማዜ ለዋታኔያ * ዒኢካ ዴማ ዓማላኔ።

27 ዔያታ ሙዓንዳ ባኮ ዎዶና ኔ ዔያቶም ዒንጋኔ፤
ዬይ ቢያ ዎዛና ኔና ካፓኔ።

28 ኔኤኒ ዔያቶም ዒንጋ ዎዶና ዬያ ዔያታ ቡኩሳኔ፤
ኔኤኮ ኩጮ ኔ ቡላ ዎዶና
ኮሺ ባኣዚ ሙዒ ዔያታ ሚሸካኔ።

29 ዔያቶይዳፓ ዓኣፖ ካር ኔኤኮ ኔ ሺርሻዛ
ዲቃቲሢ ሌሊ ዔያታ ሚርጋኔ፤
ሺምፓሢ ኔ ዔያቶኮ ዔካዛ ሃሃይቃኔ፤
ኬሰኬ ዓጮ ባንሢያ ማዓኔ።

30 ኔኤኮ ዓያኖ ኔ ዳካዛ ዔያታ ማማዢንታኔ፤
ሳዖዋ ኔኤኒ ዓከ ማሃኔ።

31 ናንጊና ናንጋ ጎዳኮ ቦንቻ ናንጊና ዶዲ ናንጎም፤
ዒዚ ፔኤኮ ማዶ ማዶና ዎዛዶንጎ።

32 ሳዖ ዒዚ ዛጋዛ ዓዓጊፃኔ፤
ዲኮዋ ካኣማዛ ጨጨባኔ።

33 ታኣኒ ሸምፔና ዓኣና ናንጊና ናንጋ ጎዳም ዓይናዳንዳኔ፤
ዔቂታ ሃንታ ዎዳ ዒዛ ታ ዓኣሣንዳኔ።

* 104:26 ለዋታኔ ለዋታኔ ጌይንታ ቦዓሢ ጉርጉርጉዴያ ዴኤፒ ቦዖ ዋኣሢዳ ናንጋያኬ።
104:26 ዓ.ዮ. 41:1፤ ዓይኑ. 74:14፤ ዓ.ሲ. 27:1።

- 34 ታኣኒ ናንጊና ናንጋ ጎዳና ዎዛዳሂጉዲ
 ታ ማሊፃ ዒዛ ዎዛሶንጎ።
- 35 ጎሞ ዓሳ ሳዓፓ ባይቆንጎ!
 ዎይዞ ዒፃ ዓሳ ማይ ሃይፓ ሴካ ጴዳፓ!

ታ ሸምፔሌ! ናንጊና ናንጋ ጎዳ ዓንጄ!
 ጋላቲያ ዒዛ ጋላቲ።

105

ፆኦሲና ዒዛኮ ዳሮና
 (1ፆኦሲ. ዓሃኬ 16:8-22)

- 1 ናንጊና ናንጋ ጎዳ ጋላቲዎቲ፤
 ሱንፆ ዒዛኮ ዔኤሉዎቲ፤
 ማዶዎ ዒዛሲ ዳሮ ባእካ ፔጋሲ ዳውዎቲ።
- 2 ናንጊና ናንጋ ጎዳም ጋላታ ዓይኑም ዓይናዲዎቲ፤
 ዒዛኮ ዲቃሂ ሄርሺሳ ማዶዎ ቢያ ኬኤዙዎቲ።
- 3 ዲማዴ ሱንፆ ዒዛኮ ሄርሹዎቲ!
 ናንጊና ናንጋ ጎዳ ከዓ ዓሳ ቢያ ዎዛዳንጎ።
- 4 ናንጊና ናንጋ ጎዳንታ ዲዲሞዎ ዒዛኮ ኮዑዎቲ፤
 ቢያ ዎዴ ዓኣፖ ካሮ ዒዛሲ ኮዑዎቲ።
- 5-6 ፆኦሲ ዓይላሂ ዓብራሃሜ ናይዮቲ!
 ዒንሂ ያይቆኦቤ ናኣታ!
 ፆኦሲ ማዴ ዲቃሂ ሄርሺሳ ባኮንታ ዒዚ ዒንጌ ዎጎንታ
 ዒ ማዴ ዲቃሂ ሄርሺሳ ባኮዎ ማሊ ጰቂሡዎቲ።
- 7 ዒዚ ናንጊና ናንጋ ጎዳ ማዔ ፆኦዛሂኬ፤
 ዎጋ ዒዛሲ ዓጮ ቢያይዳኬ።
- 8 ዒ ጫኣቁ ጫኣቁም ዒዛሲ ናንጊና
 ዒ ዓይሂ ቃኣሎዎ ሺያ ሸይንቲ ሄላንዳኣና
 ማሌ ጎይሣኬ።
- 9 ዓብራሃሜና ዒዚ ጫኣቁ ጫኣቁም
 ዪሳኣቁም ሳላዲ ዒ ዒንጌ ዎዞ ዎሉዎሴ።
- 10 ያይቆኦቤም ዒ ዬያ ዳምቤ ማሂ
 ዒሰራዔኤሌማኣ ናንጊና ጫኣቁያ ማሂ ደዲሼኬ።
- 11 ዒማና ዒዚ፡- «ኔ ዳኔ ማሂ
 ካኣናኔ ታ ኔኤም ዒንጋንዳኔ» ጌዔኔ።

- 12 ይይ ያዳ ማዕረግ ዓይነቱ ገደዳ ማርገባክንቴ
ይኖ ዓጩሎም ዓይነቱ ሸኦቹ ማዕረ ዓክንቴኩ።
- 13 ይይ ዳር ኮራገ ማሌ ዳሬ ባንሢ
ፔቴ ዓጩገ ማሌ ዓጩ ባንሢ
ቤቴ ቤቴ ዓይነቱ ማታዳጅ።
- 14 ያኦኒያ ጌኔ ማዳ ዓይነቱ ዑፃ ማዳንዳጉዲ ዒ ሃሺባኦ፤
ዓይነቱ ዘሎ።
- 15 «ታ ዶኦማዘንሢ ሄሊፖቴ፤
ታ ማሊያ ከኤዘዘንሢ ዑፃ ፑርታ ማዳፖቴ» ጌዒ ካኦቶ ጎሬ።

- 16 ዓጩይዳ ዒ ናይዚ ዓኤሌ፤
ሃኦኮ ጎዖ ባኦዚያ ቢያ ባይዜ።
- 17 ዓይሌ ማዕረ ሸንቸንቴ ዓሢ
ዮሴፔ ዓይነቱ ቤርታሲ ዳኩ።
- 18 ዒማና ቶካ ዒዘኮ ዓንገ ዲፃና
ዒዘኮ ዑፃኦ ዓንገና ቱኡቴ።
- 19 ዒዘም ሎንሢንቴ ቃኦላ ኩማንዲያ ሄላንዳኦና
ናንገና ናንገ ጎዳኮ ቃኦላ ዮሴፔ ዋይታቴያ ጌዒ ዘጌ።
- 20 ዩካገ ካኦቴ ዓሲ ዳኪ ዒዘ ቡሊሴ፤
ዓሲ ዋይሣሢያ ዒዘ ከሴ።
- 21 ማኦርኮ ዓዳሢ
ፔኤኮ ዓኦ ባኮ ቢያ ዋይሣያ ዒዘ ማሄ።
- 22 ይይያ ሱኡጎ ዒ ፔ ዓራ ጎይያ ማዳሸንዳጉዲ
ዳኤፖ ዓሲዋ ዓራቶ ዓርዘንዳጉዲ።

- 23 ዒሰራዓኤሌ ገብፃ ዓኦ፤
ያይቆኦይ ካኦማ ዓጩ ሙኬ ዓሲ ማዕረ ናንጌ።
- 24 ናንገና ናንገ ጎዳ ዳር ፔኤሲ ኮሺ ማርገሼ፤
ዓይነቱ ሞርኮይዳገ ባሽ ዶዲ ማሄ።
- 25 ፔኤኮ ዳር ይይ ዓሳ ዒፃንዳጉዲ
ዒዘ ዓሲ ዑፃ ፑርቱሞ ማላንዳጉዲ
ዒኖ ዓይነቱ ዲማሴ።

105:15 ማኸ. ማፃ 20:3-7። 105:16 ማኸ. ማፃ 41:53-57። 105:17 ማኸ. ማፃ 37:28፤ 45:5። 105:19 ማኸ. ማፃ 39:20—40:23። 105:20 ማኸ. ማፃ 41:14። 105:21 ማኸ. ማፃ 41:39-41። 105:23 ማኸ. ማፃ 46:6፤ 47:11። 105:25 ከሲ. ማፃ 1:7-14።

- 26 ዲዛኮ ዓይላሢ ሙሴ
ዲዚ ደኦሪ ዓኣርኔያ ዳኬኔ።
- 27 ዔያታ ያኦሲ ፔ ዋልቆና ማዳ ማላቶ ዬያቶ ባአካ
ዲቃሢ ሄርሺሳ ባኮዋ ካአሜ ዓጮይዳ ማዳኔ።
- 28 ያኦሲ ሳዖ ደማንዳጉዲ ማሢ ደሚሽኔ፤
ያዲ ማዔቲያ ገብፄ ዓሳ ዓይሢያ ዲዛሲ ኩንሢባአሴ።
- 29 ዋአያ ዔያቶኮ ዲ ሱጉሢ ማሄኔ፤
ሞላሢያ ዋዳኔ።
- 30 ዔያቶኮ ዓጮንታ ካአቲ ማአራአ ዓቲዋንቲ
ፓንቃ ኩሚ ካራ ባይዜኔ፤
- 31 ያኦሲ ዓይሣዛ፣ ወፃሌ ሻአራጉዴያ ሙኬኔ፤
ጉኡኔያ ዓጮ ዔያቶኮ ባይዜኔ።
- 32 ዲሮ ዔያቶኮ ዲ ሻቸ ማሄኔ፤
ሳዖ ዔያቶሲ ቢያ ጉጉንሢ ዲኬኔ።
- 33 ዋይሮ ሚያንታ ቤሌሶዋ ባይዜኔ፤
ዓጮ ዓአ ሚያ ማንሢ ዲ ጋአጮኔ።
- 34 ያኦሲ ዓይሣዛ ዓቢሢ ሙኬኔ፤
ሃይማኬ ጌይንቲዋ ማካ ቤዘና ዬዔኔ።
- 35 ሳዖይዳ ባቃሌ ባኮ ቢያ ሙዔኔ፤
ዔያቶኮ ጎሽኮና ጎዡዋ ፒዲ ባይቄኔ።
- 36 ዔያቶኮ ዓጮይዳ ዓአ ቆልሞኮ ቤርቶ ናአቶንታ
ዓሳኮዋ ቶይዶ ናአቶ ቢያ ዋዳኔ።

- 37 ዲማና ዲሰራዔኤሌ ዓሳ ቢሮንታ ዋርቆንታ
ጫኣኒ ዔኪ ኬሰካንዳጉዲ ዲ ማዳኔ፤
ዔያቶ ዜርፃፓ ፔቲታዖ ገንሢሞ ዓቲባአሴ።
- 38 ገብፄ ዓሳ ዔያቶ ሚርጌና ዲጊጮሢሮ
ኬሰኪ ዔያታ ዓአዳኣና ዋዛዳኔ።
- 39 ሻአሮ ዔያቶም ጎኦ ባቢላጉዲ ጌሣኔ፤
ዋንቶ ታሚ ዔያቶም ዲ ፖዒሴኔ።
- 40 ዔያታ ዲዛ ያኦጫዛ ፑሮ ዔያቶም ዲ ዳኬኔ፤
ጫሪንጮ ካሦዋ ሙኡዚ ሚሽኔ።

105:26 ኬሲ. ማጻ 3:1—4:17። 105:28 ኬሲ. ማጻ 10:21-23። 105:29 ኬሲ. ማጻ 7:17-21። 105:30 ኬሲ. ማጻ 8:1-6። 105:31 ኬሲ. ማጻ 8:16-17፤ 20:24። 105:33 ኬሲ. ማጻ 9:22-25። 105:35 ኬሲ. ማጻ 10:12-15። 105:36 ኬሲ. ማጻ 12:29። 105:38 ኬሲ. ማጻ 12:33-36። 105:39 ኬሲ. ማጻ 13:21-22። 105:40 ኬሲ. ማጻ 16:2-15።

- 41 ላሎ ዒ ዳርዘም ዋአሂ ጎዔኔ፤
 ዒሲ ናንጉዋ ዳውሎይዳ ዋርዚጉዲ ዋቴኔ።
- 42 ፔኤኮ ዓይላሂ ዓብራሃሚም ዒ ዒንጌ
 ዲማጅ ዋዘ ቃአሎ ማሌኔ።
- 43 ዴሮ ፔኤኮ ዋዘና
 ዒ ደኦሬዘንሂያ ዒላሽሲ ኬሴኔ።
- 44 ማሌ ዴሮ ዓጮ ዔያቶም ዒንጌኔ፤
 ዬያታ ላቤ ላቢያ ሃኣታ ዔኬኔ።
- 45 ዬይያ ዳምቦ ዒዛኮ ዔያታ ካፓንዳጉዲ
 ዋጎ ዒዛሲያ ማዲ ኩንሃንዳጉዲኬ።

ናንጊና ናንጋ ጎዳም ጋላታ!

106

ጾኦሲ ፔ ዴሮም ኮሽካ ኮሹሞ

- 1 ናንጊና ናንጋ ጎዳ ጋላቱዋቴ!
 ዒዚ ኮሺታሂሮና ናሹማኣ ናንጊና ናንጋያታሂሮ
 ዒዛ ጋላቱዋቴ!
- 2 ናንጊና ናንጋ ጎዳ ማዲ ዴኤፖ ማዲ ዛሎ
 ጾኦኒ ኬኤዛኒ ዳንዳዓይ?
 ዒዛም ማዓ ጋላቶ ሲያ ጾ ኬኤዚ ጋፒሳንዳይ?
- 3 ፒዜ ዋጌ ዋቡዋጉዲ ካፓዘንሂ
 ቢያ ዋዴ ዒሎ ማዔዘንሂ
 ዓንጂንቴያኬ።
- 4 ናንጊና ናንጋ ጎዳሂዮ!
 ኔኤኮ ዴሮ ኔ ማኣዳ ዋዶና ማሊ ጳቂሄ፤
 ዔያቶ ኔ ዓውሳ ዋዶና ታና ማሌ።
- 5 ዬይያ ኔኤኒ ደኦሬዘንሂኮ ጾርጎቹም ታ ዛጋኒ
 ኔ ዴሮ ዋዘና ታ ዋዛዳኒ
 ኔ ዓሶና ዋላ ታ ኔና ሄርሻንዳጉዲኬ።

- 6 ኦኡኒ ኦ ዓዶንሂጉዲ ጎሚ ማዴኔ፤

105:41 ኬሲ. ማጻ 17:1-7፤ ፓይ. ማጻ 20:2-13። 105:44 ዒያ. 11:16-23።
 106:1 1ጾኦሲ. ዓሃኬ 16:34፤ 2ጾኦሲ. ዓሃኬ 5:13፤ ዒዝ. 3:11፤ ዓይኑ. 100:5፤
 107:1፤ 118:1፤ 136:1፤ ዔር. 33:11።

ኑ ዳቢንቴኔ፥ ፑርታ ማዳኔ።

7 ኑኡኮ ዓድንሢ ጊብፂ ዓጫ ዓኣዖ
ኔ ዎልቆና ማዲንታ ዓኮ ባኮ ማሊ ጰቂሢባኣሴ፤
ኔኤኮ ሚጨንቲዖ ሚርጉሞዎ ዔያታ ማሊባኣሴ፤
ዘቄ ባዘ ዓጫ ዎይዚ ኔኤም ዒፃኔ።

8 ዒዚ ጋዓንቴ ፔ ዎልቆኮ ዴኤፑሞ ቤኤዘኒ
ፔ ሱንዖሮ ዔያቶ ዒ ዓውሴኔ።

9 ዘቄ ባዘ ዒ ጎሬኔ፤
ባዘኣ ሚጨኔ፤

ዓሲ ናንጉዎ ዳውሌ ቦኦሊና ዓኣደሢጉዲ
ዎኣዖ ዔቶኮ ባኣኪና ዔኪ ዔያቶ ዒ ዓኣዴኔ።

10 ዔያቶ ዒዖ ዓሶ ኩጫፓ ዒ ዓውሴኔ፤
ሞርኮ ኩጫፓኣ ዒ ሄሊ ዓይሴኔ።

11 ሞርኮ ዔያቶኮ ዎኣዖ ሙዔኔ፤
ዩያ ሞርኮይዳፓ ፔቴታዖ ቶሊ ዓቲባኣሴ።

12 ዩካፓ ዔያታ ዔያቶም ኬኤዘና ቃኣሎ ጉሙርቄኔ፤
ዓይኑሞናኣ ዒዘ ጋላቴኔ።

13 ጋዓንቴ ዔያታ ዒ ማዳ ባኮ ቤዘና ዎሌኔ፤
ዒዘኮ ዘርና ዓኣዳኒ ጊቢ ዳንዳዒባኣሴ።

14 ዓሳ ናንጉዎ ዳውሎይዳ ሱኡካዲሢ ዔያታ ዓርቄኔ፤
ዒኣካ ዖኦሲ ዎይታቴያ ጌዒ ዒዘ ዘጌኔ።

15 ዒዚ ዔያታ ዒዘ ዖኦጭሢ ዔያቶም ዒንጌኔ፤
ጋዓንቴ ዔያቶ ዖኦፒሳ ደርዓ ዳኪንቴኔ።

16 ጉርደይዳ ዔያታ ዓኣዖ
ሙሴንታ ዖኦሲም ዱማዳ ዓኣርኔንታ
ማዳ ማዳ ዘጊ «ዩይ ዔያቶም ሌሊ ዓይጋ ማዔይ» ጌዒ
ማሌኔ።

17 ሳዓ ዳርዒ ዳኣታኔ ጎዖሢ ዔኤዴኔ፤
ዓቤርኔንታ ዒዘኮ ማኣሮ ዓሶዎ ጉኡፔኔ።

18 ዔያቶኮ ቡኪንቶ ባኣካ ታሚ ዔኤቴኔ፤
ሎሰታሢ ፑርቶ ዓሶ ሚቺ ባይዘኔ።

19 ዔያታ ኮሬቤ ጌይንታ ቤዘ ዓኣዖ ዎርቄና ናኣሪ ኮሺኔ፤

106:7 ኬሲ. ማፃ 14:10-12። 106:12 ኬሲ. ማፃ 14:31። 106:12 ኬሲ.
ማፃ 15:1-21። 106:15 ፓይ. ማፃ 11:4-34። 106:18 ፓይ. ማፃ 16:1-35።

- ዬያ ዓንጎ ሸኤሽ ማዠና ያኦዘም ዚገኔ።
- 20 ዔያቶኮ ቦንቾ ማዔ ያኦዘሢ ዔያታ
ማኣቶ ሄንቃ ቆልሞ ማላ ባኮና ላኣሜ።
- 21 ጊብፄ ዓጮይዳ ዴኤፒ ባኣዚ ማዲ
ዔያቶ ዓውሴ ያኦዘሢ ዔያታ ዋሌ።
- 22 ዒዚ ጋዓንቴ ካኣሜ ዓጮይዳ ዲቃሣ ማዶ
ዘቄ ባዘይዳኣ ዲቃሣ ሄርሺሳ ባኣዚ ማዴ።
- 23 ዬያሮ ዲማ ዲማ ዎዳ ባኮና
ዔያቶ ዒ ባይዙዋጉዲ ማዳኒ
ዒዚ ዶኦሬ ሙሴ ያኦሲንታ ዔያቶንታ ባኣኮ ጌሊ
ዒዘኮ ቤርታ ዔቁባኣያታቴ
ዔያቶ ዒ ባይዛንዳሢ ኬኤዜያኬ።
- 24 ዬካፓ ዔያታ ኮዠ ዓጮሎ ቶኦቹ፤
ዒዚ ዔያቶም ዒንጌ ዎዘ ቃኣሎዋ ጉሙርቁባኣሴ።
- 25 ዔያታ ዓፒሎና ማዢንቴ ፔ ማኣራ ማኣራ ጉንዲሜ፤
ናንጊና ናንጋ ጎዳሢ ዑኡዘዋ ዎይዚባኣሴ።
- 26 ዓሳ ናንጉዋ ዳውሎ ቦኣላ ዔያቶ ኬኤራኒ
ኩጮ ፔኤሲ ዔቁሲ ዒ ጫኣቄ።
- 27 ዜርያ ዔያቶኮ ዒ ሜሌ ዴሮ ባኣካ ሃሻኒ
ዲማ ዲማ ዓጮ ዔያቶ ላኣላኒ ጫኣቄ።
- 28 ዔያታ ፔና ቢዔልፔጎሬና ዎላ ፔቴ ማሄ፤
ሸምፓባኣ ያኦዘም ሹኮና ዓሽኮዋ ሙዔ።
- 29 ዔያታ ፔ ማዶና ናንጊና ናንጋ ጎዳ ዳጋሴ፤
ዲማ ዲማ ባይዛ ባካ ዔያቶ ሄሌ።
- 30 ጋዓንቴ ፒንሃሴ ዔቁ
ደቢንቶ ማዴ ዓሶ ዎዴ ዎዶና
ዲማ ዲማ ዎዳ ባካ ዎዲያ ሃሸ።
- 31 ዬይያ ሸይንቲፓ ሸይንቲ ሄላንዳኣና
ናንጊና ዒዛም ዲሎም ማዒ ፓይዲንቴ።
- 32 ዬያጉዲ ሃሣ ሜሪባ ጌይንታ ዋኣያ ዓጫ
ናንጊና ናንጋ ጎዳ ዔያታ ዳጋሴ፤
ሙሴያ ዬያ ዘሎና ሜቶይዳ ኬዴ።
- 33 ሙሴ ዔያታ ዳጋሴሢሮ

106:23 ኬሲ. ማፃ 32:1-14። 106:26 ፓይ. ማፃ 14:1-35። 106:27 ሌዊ. ዓኬ 26:33።

ዒዚ ኮይሱዋ ዑኡሲ ፔ ደንጋፓ ኬሴኔ።

34 ናንጊና ናንጋ ጎዳ ዔያቶ ዓይህ
ሜሌ ዳሮ ባይዚያ ዔያታ ሃሼኔ።
35 ዔያታ ሜሌ ዳሮና ዋላ ሲኢሪንቴኔ፤
ዬይ ዓሳ ማዲ ሃንታ ባኮ ዔያታኣ ዔሬኔ።

36 ዬያቶኮ ካኣሽኮ ያኦዞዋ ዔያታ ካኣሽኬኔ፤
ዬይ ዔያቶም ፒሮ ማዔኔ።
37 ዔያቶኮ ዓቲንቆንታ ዉዲሮ ናኣቶንታ
ፑርቶ ዓያሮም ዔያታ ሹኬኔ።
38 ዔያቶኮ ዓቲንቆንታ ዉዲሮ ናኣቶንታኮ ጌኤዮ ሱጉያ
ሜሌ ካኣናኔ ያኦዞም ላኣሊያና
ሳዔሎ ሱጉህሂ ሳዓ ማሂ ዔያታ ዒኢሴኔ።

39 ዔያታ ፔ ማዶና ዒኢቴኔ፤
ዘኣሰካ ኮኦማ ላኣሊጉዲ ፔ ያኦዞህም ዔያታ
ጉሙርቁንቲባኣሴ።

40 ዬያሮ ናንጊና ናንጋ ጎዳኮ ደጋ
ዒዛ ዳሮ ዑፃ ዔኤቴኔ፤
ፔ ዓሶዋ ዒ ሻኣከንቴኔ።
41 ዔያቶ ዒዚ ሜሌ ዳሮም ዓኣህሂ ዒንጌኔ፤
ሞርካ ዔያቶኮ ዔያቶ ዋይህያ ማዔኔ።
42 ሞርካ ሄርቁ ዔያቶ ዋህያ ማዔኔ፤
ፔ ቢታንቶኮ ደማ ማሄኔ።
43 ዒዚ ሚርጌ ዋዶና ዔያቶ ሄሊ ዓውሴኔ፤
ዔያታ ጋዓንቴ ዋይዚ ዒዲህሂ «ኑ ሃሻዓኬ» ጌዔኔ፤
ፔ ጎሞና ዔያታ ደውሲንቴኔ።
44 ጋዓንቴ ዒላቶ ዔያቶኮ ዒ ዋይዜ ዋዶና
ሜታህሂ ዔያቶኮ ዛጌኔ።
45 ዔያቶሮ ጌይጋፓ ጫኣቁ ጫኣቁም ዒ ማሌኔ፤
ዒዛኮ ዓኣ ሚጨንቲያ ሚርጉሞጉደያ
ደጋፓ ዒ ማዔኔ።
46 ዔያቶ ዲዒ ዔኬ ዓሳ ቢያ
ሚጨንታንዳጉዲ ዒ ማዶኔ።

106:33 ፓይ. ማፃ 20:2-13። 106:36 ሱኣጎ. ማፃ 2:1-3፤ 3:5-6። 106:37
2ካኣቶ. ማ 17:17። 106:38 ፓይ. ማፃ 35:33። 106:40 ሱኣጎ. ማፃ 2:14-18።

47 ናንጊና ናንጋ ጎዳ ማዕ ኑ ጾኦዛሢዮ! ዓውሴ ኑና፤
 ኔኤኮ ዲማዕ ሱንጾም ጋላታ ኑ ሸኢሻንዳጉዲ
 ኔና ኑ ከኤዚ ሄርሻንዳጉዲ
 ዴር ባኣካፓ ቡኩሲ ኑና ኔ ዔኪ ዩዔኔ።

48 ናንጊና ናንጋ ጎዳ ማዕ ዒሰራዔኤሌ ጾኦዛሢ
 ናንጊፓ ናንጊ ሄላንዳኦና ዓንጂንቶንጎ!
 ዴራ ቢያ ዓኣማን ጎጾንጎ፤
 ናንጊና ናንጋ ጎዳ ጋላቱዋቴ!

ደንጋሳ ፓቂጾ

107

(ዓይነ. ማፃ ዓይ. 107—150)

ጾኦሲ ኮሹሞ ዛሎ ጋላቲንቴ ጋላታ

- 1 ኮሺ ማዕሢር ናንጊና ናንጋ ጎዳ ጋላቱዋቴ፤
 ሚጨንቴፃ ዒዛኮ ናንጊና ናንጋያኬ።
- 2 ናንጊና ናንጋ ጎዳ ማሂ ሻንቂ ዓውሴ ዓሳ
 ዒዚ ሞርኮ ኩጫፓ ሄሊ ዓውሴ ዓሳ
 ሂዚ ጎጾንጎ፡-
- 3 ዓባ ኬሰካ ባንፃፓ
 ጌላ ባንፃፓ
 ኬዶ ዛሎና ደኦሎ ዛሎናይዳፓ
 ዓጮ ቢያይዳፓ ቡኬ ዓሳ ሂዚ ጎጾንጎ።
- 4 ፔቴ ፔቴዘንሢ ዓሲ ናንጉዋ ዳውላ ዣኦሊ ሃንቴኔ፤
 ዔያታ ናንጋ ካታሞ ሄሊሳ ጎይጾዋ ባይዘኔ።
- 5 ናይዲንቴኔ፣ ዴኤቢንቴኔ፤
 ማሊፃኦ ዔያቶኮ ላቤኔ።
- 6 ዔያታ ሚታዕ ዋዶና ናንጊና ናንጋ ጎዳ ባንሢ ዒላቴኔ፤
 ዒዚያ ሚታሢዳፓ ዔያቶ ዓውሴኔ።
- 7 ዔያታ ናንጋ ካታሞ ባንሢ
 ፒዜ ጎይሢና ዔኪ ዓኣዴኔ።
- 8 ናንጊና ናንጋ ጎዳኮ ሚጨንቴጾ ዛሎር

106:48 1ጾኦሲ. ዓሃኬ 16:35-36። 107:1 1ጾኦሲ. ዓሃኬ 16:34፤ 2ጾኦሲ. ዓሃኬ 5:13፤ 7:3፤ ዒዚ. 3:11፤ ዓይነ. 100:5፤ 106:1፤ 118:1፤ 136:1፤ ዔር. 33:11።

ዓሰማኣ ዒ ማዕ ዲቃሢ ሄርሺሳ ማዕሮ
ዒ ዛ ጋላቶንጎ።

9 ዒዚ ደኤቢንቴ ዓሰኮ ደኤቦ ማሃኔ፤
ናይዲንቴ ዓሰዋ ኮሺ ባኣዚ ሙኡዚ ሚሻኔ።

10 ፔቴ ፔቴ ዓሳ ካኒ ቢራታና ቴኡቴ
ሄርቁንቴያ ሜታዲ
ሻኔ ዲሚዳኣ ደዔኔ።

11 ያኦሲ ቃኣሎ ዋይዘ ዒዲያና
ደኤፖ ያኣዛሢኮ ዘሮ ዔያታ ቶኦቹ።

12 ዬያሮ ዋልቁ ማዕ ማዲሲሢና ዒኖ ዔያቶኮ ዒ ላቢሴ፤
ጋፒ ዔያታ ላቤ፤ ማኣዲያ ደዲባኣሴ።

13 ዔያታ ሜታዲ ዋዶና ናንጊና ናንጋ ጎዳ ባንሢ ዒላቴ፤
ዒዚያ ሜታሢዲፓ ዔያቶ ዓውሴ።

14 ሻኔ ዲሞይዲፓ ዔያቶ ዒ ኬሴ፤
ቴኮና ካኖ ቢራቶ ሜንሢ።

15 ናንጊና ናንጋ ጎዳ ዒዛኮ ጋፑዋ ሚጨንቴያሮ
ዓሰማኣ ዒ ማዕ ዲቃሢ ሄርሺሳ ማዕሮ
ዔያታ ዒ ዛ ጋላቶንጎ።

16 ዒዚ ሞኦኖ ዓንጎና ዎዶና ካሮ ሜንሢ፤
ዓንጎ ጋጋርዘዋ ሾኦሌ።

17 ፔቴ ፔቴ ዓሳ ዋይዘ ዒዲያፓ ዔቄያና ዔኤያ ማዔ፤
ደቢንታፓ ዔቄያናኣ ሜቶይዳ ኬዴ።

18 ዑፃ ዔያቶኮ ዲማ ዲማ ሙዎ ሻኣኪንቴ፤
ሃይቃኒ ዔያታ ዑኬ።

19 ዔያታ ሜታዲ ዋዶና ናንጊና ናንጋ ጎዳ ባንሢ ዒላቴ፤
ዒዚያ ዔያቶ ሜታሢዲፓ ዓውሴ።

20 ዒዚ ፔ ቃኣሎ ዳኪ ዔያቶ ፓሢ፤
ዲኡካኒ ዔኪ ዓኣድንቴያ ዓውሴ።

21 ናንጊና ናንጋ ጎዳ ዒዛኮ ጋፑዋ ሚጨንቴያሮ
ዓሰማኣ ዒ ማዕ ዲቃሢ ሄርሺሳ ማዕሮ
ዔያታ ጋላቶንጎ።

22 ጋላታ ዒዛም ዒንጎ ባኣዚ ማሂ ዔያታ ሺኢሾንጎ፤
ማዕ ዒዛኮ ዎዛሳ ዓይኑምና ፔጋሲ ዔርዘንጎ።

23 ፔቴ ፔቴ ዓሳ ዋኣያ ካኣሚሎና
ባዘ ባንሢ ኬዴ፤

- ጴጌ ጥላኦ ዑፃኣ ፔ ማዶ ማዶ።።
- 24 ናንጊና ናንጋ ጎዳኮ ማዶ ዒኢካ ዔያታ ዛጌ፤፤
ዒዛኮ ዲቃሢ ሄርሺሳ ማዶ ጴጌ ጥላኦ ዓይነቱ።።
- 25 ዒዚ ዓይሢ ዓልጎ ዠባር ዠባርሺሴ፤፤
ዠባራኣ ጥላኦ ዓጊሢ ዴቹ።።
- 26 ለካ ጫሪንጮ ኬሰኬ፤፤ ለካ ዴሞሞ ኬዴ፤፤
ሚታሢዳፓ ዔቄያና ጎጳ ዔያቶኮ ጥላጴ።።
- 27 ዓዳ ማሢንቴ ዓሲጉዲ ዓኣፓ ሺሬሞ
ሴካ ሃንጋ ዔያታ ቡኡዲንቴ፤፤
ጎንጎዶ ጎይጎንታ ማዶንደሢኮሞ
ካራ ዔያቶሞ ባይቄ።።
- 28 ዔያታ ሚታዴ ሞዶና ናንጊና ናንጋ ጎዳ ባንሢ ዒላቴ፤፤
ዒዚያ ሚታሢዳፓ ዔያቶ ዓውሴ።።
- 29 ዓልጋሢ ዠባር ዒ ዚቴዴ፤፤
ባዘ ጉዳሢያ ዓጊጾ ላኣጌ።።
- 30 ዩይ ዚቴዮ ጌዔሢር ዔያታ ሞዛዴ፤፤
ዔያታ ዔቄሳኒ ማሌ ጥላኦ ካኣሚሎ ቤዘ
ዒ ዔያቶ ሄሊሴ።።
- 31 ናንጊና ናንጋ ጎዳ ዒዛኮ ጋፑሞ ሚጨንቴጾር
ዓሰማኣ ዒዚ ማዶ ዲቃሢ ሄርሺሳ ማዶር
ዔያታ ዒዛ ጋላቶንጎ።።
- 32 ዴራ ቡከንታ ቤዘ ዒዛ ዴግ ዴጊዶንጎ፤፤
ጋርቾ ዓሶ ቡከንቶይዳኣ ዒዛ ሄርሾንጎ።።
- 33 ሞር ዒዚ ዓሳ ናንጉሞ ዳውሎ ባንሢ
ዓልቃ ጥላኦ ጶዲ ሳዓ ማሄ።።
- 34 ዒኢካ ናንጋ ዓሶኮ ፑርቱማፓ ዔቄያና
ኮዠ ዓጩሎ ሶኣጌና ሲኢሪንቴያ ዒ ማሄ።።
- 35 ዓሲ ናንጉሞ ዳውሎ ቦኣሎ ጥላሢ ዴዓያ
ሚሎ ሳጾ ጥልቃ ጥላሢ ዒ ማሄ።።
- 36 ናይዲንቴ ዓሶ ዒ ዒኢካ ጌሄ፤፤
ዔያታ ናንጋ ካታማኣ ማዠ።።
- 37 ጎዠይዳ ዔያታ ዜርቄ፤፤ ሞይያ ቱኬ፤፤
ሚርጌ ባኣዚያ ካፂሴ።።
- 38 ዔያቶ ዒ ዓንጄ፤፤ ኮሺያ ዔያታ ሚርጌ፤፤
ዔያቶኮ ባኣቶ ፓይዶሞ ዒ ዳኪሲባኣሴ።።
- 39 ካራ ዔያታ ባይዚ ሚታዲ ጾዩሢና

- ገይዳ ዔያቶኮ ዳኬም ቦርሲንቴኔ፤
- 40 ቢቶ ዓሶ ያኦሲ ዳውሲሴኔ፤
 ዓሳ ናንጉዋ ዳውሎ ማኣሻሎይዳ
 ማታዲ ሃንታንዳጉዲ ማዳኔ።
- 41 ማታዳ ዓሶ ጋዓንቴ ማታሢዳፓ ጎቹ ዒ ኬሴኔ፤
 ዔያቶኮ ማኣሮ ዓሶዋ ማራይጉዲ ማርጊሼኔ።
- 42 ዒኖ ፒዜ ዓሳ ዩያ ዛጊ ዋዛዳኔ፤
 ፑርቶ ማዳ ዓሳ ጋዓንቴ ቦርሲንቴ ዚቲ ጋዓኔ።
- 43 ዓካሪ ያኦኒያ ጨንጫ ማዔቴ
 ሃያ ባኮ ዒና ዔኮንጎ፤
 ዩያይዳሢ ናንጊና ናንጋ ጎዳኮ ሚጨንቴዎ ማሊ ጳቂሦንጎ።

108

ዳውቴኮ ጋላቶ ዓይነቱ
 ያኦሲዳፓ ማኣዶ ዳንቃኒ ሺኢቂንቴ ሺኢጲሢ
 (ዓይኑ. 57:7-11፤ 60:5-12)

- 1 ያኦሲዮ! ዒና ታኣኮ ኔና ጉሙርቂ ሂርጉዋሴ፤
 ታኣኒ ዓይናዳንዳኔ፤
 ጎኔ ዒናፓኣ ታ ዓይናዳንዳኔ።
- 2 ሚርጌ ሻዡ ዳንሢ ዋርቆ ጎኦሎንታ
 ማሌ ዓይነቱ ማንጋማኣ ዔቁዋቴ፤
 ታኣኒያ ሚኢሪ ዔቃንዳኔ።
- 3 ናንጊና ናንጋ ጎዳሢዮ! ዳሮ ባኣካ ታ ኔና ጋላታኔ፤
 ዓሶ ባኣካኣ ታ ኔኤም ዓይናዳኔ።
- 4 ሚጨንቴዎ ኔኤኮ ጨሪንጫፓ ዑሣ ዳኤፒኬ፤
 ጉሙርቂንቴዎኣ ሌካ ሻኣሮ ሄላኔ።
- 5 ያኦሲዮ! ኔኤኒ ጨሪንጫፓ ዑሣ ሌካ ዳግ ዳጊ ጌዔ፤
 ቦንቻ ኔኤሲ ሳዎ ዑፃ ቢያ ማዎንጎ።
- 6 ኔ ናሽካ ዳራ ዳቃንዳጉዲ
 ኔኤኮ ሚዛቆ ኩጮና ታና ዓውሴ፤
 ታኣም ዋይዜ።
- 7 ያኦሲ ፔኤኮ ዳማዳ ማኣራፓ ሂዚ ጌዔኔ፡-
 «ታኣኒ ባሺ ሴኬሜ ደኦጮ ፓቃንዳኔ፤

- ሱኩቴ ደኑጮዋ ታ ዳርሞ ታ ጊሽካንዳ።
- 8 ጌሌዓዳንታ ሚናሴንታ ታኣርኬ፤
 ዔፕሬኤሜ ታኣኮ ምላሽ ቶኦካ ዓጎ ዓንጎ ቆኑባሢ፤
 ዪሁዳ ታኣኮ ካኣቱሞ ኮኦሎኬ።
- 9 ሞዓኣቤ ታኣኮ ዋኣፆ ማሰቶ ጎንጎኬ፤
 ዔዶኦሚይዳ ታ ዱርዘ ታኣኒ ኬሲ ጌሣንዳ፤
 ፒሊሰጻኤሜ ዓሶ ባሺ ታኣኒ ሚርታንዳ።»
- 10 ከልቂ ዲርቆና ካታሚሎ ባንሢ ምታና ዔኪ ዓኣዳንዳይ?
 ዔዶኦሚያ ምታና ሄሊሳንዳይ?
- 11 ምኦሲዮ! ከኤሪ ታና ሃሽሢ ሄናቱሞዓዳ?
 ኦኡኮ ምላ ዓሶና ምላ ከዘ ኔ ዒጻ።
- 12 ሃሢያ ዓሲ ዓሲ ዓውሳኔ ጎሮሢ፤
 ኦ ሞርኮ ኦ ባሻንዳጉዲ ኔ ኦና ማኣዳ።
- 13 ምኦሲ ኦና ማኣዳዛ ደዲ ኦ ማዓንዳ፤
 ኦ ሞርኮ ኦ ቶኮ ዳማ ሄርቂሳንዳሢ ዒዛኬ።

109

- ዓይኑሞ ሱኡጋሢ ዓይሣ ጎይፆ ዓይናዲንታ ዳውቴ ዓይኑሞ
 ሚቶይዳ ዓኣ ዓሲ ሸኢቃ ሸኢጲሢ
- 1 ታ ኔና ጋላታ፥ ምኣዛሢዮ!
 ሃዳራ ዚቲዮ ጌዒፖ።
- 2 ፑርቶ ዓሶና ጌሻ ዓሶና ታና ማኬ፤
 ታ ጌዳ ሉኡዙሞና ጌሰታ።
- 3 ዔያታ ታና ዒፆ ዑኡሲና ማንጌ፤
 ታ ማዳ ባኣዚ ባኣንቴ ታና ዔያታ ምሌ።
- 4 ታ ዔያቶ ናሽኬቴያ ዔያታ ታና ፑርታ ማሃ፤
 ታኣኒ ጋዓንቴ ዔያቶሞ ሸኢቁ።
- 5 ታ ዔያቶሞ ኮሺ ማዳሢሮ ፑርታ
 ታኣኒ ናሽኬሢሮ ዒዲ ታና ዔያታ ዒጻ።
- 6 ዒዛሞ ምጋንዳያ ፑርታ ዓሲ ጌሢ፤
 ዓሲ ዒዛ ምጌና ዓይሢሳንዳጉዲ ማዳ።
- 7 ምጎና ጌሰቶ ቤዛ ዳቢንቴያ ማዒ ዒ ጴዳንጎ፤
 ዒዚ ሸኢቃ ሸኢጲፆኣ ዒዛ ምጋያ ማፆንጎ።
- 8 ናንጎ ምዳ ዒዛኮ ቃሚቆንጎ፤

- ሱኡጋቶ ዒዛሲ ሜሌ ዔኮንጎ።
 - 9 ናኣታ ዒዛኮ ዓዴ ባኣያ ማዒ ዓቶንጎ፤
 - ማቻኣ ዜኤሪንዶ ማዖንጎ።
 - 10 ናኣታ ዒዛሲ ካራ ባይዚ ሜታድንጎ፤
 - ሺኢቁ ሃንታያ ማዖንጎ፤
 - ዔያቶኮ ሻሂንቴ ማኣራፓ ዳውሲንቲ ባይቆንጎ።
 - 11 ዒዛ ባኮ ቢያ ጋሌ ዓኣ ዓሲ ዔኮንጎ፤
 - ዒዚ ላቢ ዴንቁ ባኮ ፃንጎ ዓሲ ቡሮንጎ።
 - 12 ዖኣኒያ ዒዛም ሚጨንቶፓ፤
 - ዒዛኮ ዜኤሮ ናኣቶም ዓይጎ ዓሲያ ማሎፓ።
 - 13 ዜርፃ ዒዛሲ ዴማዲ ባይቆንጎ፤
 - ሱንፃ ዔያቶሲ ሙካ ሸይንቶ ባኣካፓ ዲርካቺንቶንጎ።
 - 14 ዒዛኮ ዓደንሢ ደቢንቶ
 - ናንገና ናንጋ ጎዳ ዓርቃያ ማዖንጎ፤
 - ዒንዶ ጎማኣ ባይቆፓ።
 - 15 ሰዓፓ ዜርሢ ዔያቶኮ ባይዛኒ
 - ጎማ ዔያቶሲ ናንገና ናንጋ ጎዳ ቤርታ
 - ዔርቴያ ማዒ ዴዖንጎ።
- 16 ዓይጎሮ ጌዔቴ ዒዚ ሜታዴ ዓሶንታ ማንቆ ዓሶንታ
- ሃሣ ዒና ሜቁ ዓሶዋ
- ሃይቃንዳያ ሄላንዳኣና ዳውሳንዳኣፓ ዓቴም ሚጨንቲባኣሴ።
- 17 ጋዳማ ዒዚ ናሽኬሢሮ ዒዛ ባንሢ ሙኬኔ፤
- ዓንጅ ናሽኪባኣሢሮ ዒዛፓ ሃኬኔ።
- 18 ጋዳማ ዓዳ ማኣዖጉዲ ዒ ማይንቴኔ፤
- ዬይ ዋኣሢጉዲ ዒዛኮ ዑፆ ጋሮ
- ዛይቴጉዲያ ዒዛኮ ሜጌፆና ዓኣዴኔ።
- 19 ዑፆ ዒዛኮ ዒ ዓኣቻ ማኣዓሢጉዲ
- ቢያ ዋዳ ዒ ቴኡታ ቃልሾጉዲ ዬይ ማዖንጎ።
- 20 ታና ፑርታ ማሃ ዓሶም
- ታ ሹምፓሢዳ ፑርታ ጌሰታዞንሢም
- ናንገና ናንጋ ጎዳ ጨጋንዳ ባካ ዬያ ማዖም።
- 21 ኔኤኒ ጋዓንቴ ናንገና ናንጋ ጎዳሢዮ!
- ኔ ሱንፆሮ ጌዒ ኮሹምና ታና ዛጌ፤
- ሚጨንቲፃ ኔኤኮ ዴኤፒታሢሮ ታና ዓውሴ።

- 22 ታኣኒ ማንቆ፥ ሜታደ ዓሲኬ፤
ጋሮ ዒና ታኣኮ ኪፃዴ፤
- 23 ዋኣንታኣ ዔኤገፍጉዲ ታ ዛጋማፓ ሸሬ፤
ታኣኒ ዓቢሢጉዲ ሃርፒንቴ፤
- 24 ሙዖ ሃሺዖ ዳሞቦና ዋልቃ ታኣኮ ላቤ፤
ዑፃኣ ታኣኮ ዖኦፒ ዲቢንሢ ማዔ፤
- 25 ታ ዔያቶኮ ሚኢቺ ማዔ፤
ታና ዔያታ ዛጋዖ ቦሂ ቶኦኪ ዓገሢ፤

- 26 ናንጊና ናንጋ ጎዳ ማዔ ታ ዖኦዛሢ! ታና ማኣዳ፤
ኔ ሚጪንቴዖና ታና ዓውሴ፤
- 27 ናንጊና ናንጋ ጎዳሢ! ኔ ኩጮኬ ሃያይዳሢ
ኔኤኒ ማዔያ ማዔሢ ዔያታ ዔሮንጎ፤
- 28 ዔያታ ጋጋዳንቃ፤ ኔ ጋዓንቴ ዓንጃ፤
ዔያታ ዔቃዖ ዳውሲንታ፤
ኔኤኮ ዓይላሢ ጋዓንቴ ዋዛዳ፤
- 29 ታና ፑርታ ማሃ ዓሳ ዳውሲንቶንጎ፤
ቦርሲንቴና ዔያታ ቦኦሪ ዳዖንጎ፤

- 30 ናንጊና ናንጋ ጎዳ ታ ዳንጎና ታኣኒ ጋላታ፤
ሚርጌ ዓሶ ባኣካ ታ ዒዛ ሄርሻ፤

- 31 ዓይጎር ጌዔቴ ዋዳኒ ዋጋ ዓሶይዳፓ ዓውሳኒ
ዩዖ ሚታደ ዓሢኮ ሚዛቆ ዛላ ዒ ዔቃሢሮ፤

110

ዳውቴ ዓይነቱ

- ናንጊና ናንጋ ጎዳ ደኦሪ ካኣቲ
- 1 ናንጊና ናንጋ ጎዳ ታ ጎዳሢ (ሜሲሃም)
«ኔ ሞርኮ ኔኤኒ ቶኪና ሄርቃንዳጉዲ
ታ ኔኤም ማሃንዳ ሄላንዳኣና
ሚዛቆ ዛላ ታኣኮ ዳዔ» ጌዔ፤
- 2 ናንጊና ናንጋ ጎዳ ኔኤኮ ደዶ ካኣቲ
ዩዖይዳፓ ኬሰኪ ዙሎ ሄላንዳኣና ዳልጊሻንዳ፤

109:25 ማቲ. 27:39፤ ማር. 15:29። 110:1 ማቲ. 22:44፤ ማር. 12:36፤ ሉቃ. 20:42-43፤ ዳኪ. ማደ 2:34-35፤ 1ቆሮ. 15:25፤ ዔፕ. 1:20-22፤ ቆላ. 3:1፤ ዔብ. 1:13፤ 8:1፤ 10:12-13።

ዒዚ፡- «ኔ ሞርኮ ኔ ዴማ ማሂ ዎይህ» ጋዓንዳኔ።
 3 ያልዚ ያላኒ ኔ ኬሰካ ዎዶና
 ኔኤኮ ያሎ ዓሳ ናሽኪ ኔኤና ኬሰካንዳኔ፤
 ካሪዎ ዑፃ ኔ ሙኪ
 ኔኤኮ ዲቃሂ ሄርሺሳ ዒጊቺዎና ፖዓኣና
 ያሎ ዴጌሂ ዓዳ ያዎርቃ ዓቢጉዲ ማዒ ሙካንዳኔ።

4 «ኔኤኒ ሜልኬ ያዲቄጉዲ
 ናንጊና ቄኤሴ ማዒ ናንጋንዳኔ» ጌዒ
 ናንጊና ናንጋ ጎዳ ጫኣቄኔ፤
 ዒዚ ፔኤኮ ማሌ ማሊዎ ሺርሹዎሴ።

5 ናንጊና ናንጋ ጎዳ ኔኤኮ ሚዛቃኬ፤
 ፔኤኮ ጎሪንቶ ዓቦና ካኣቶ ዒ ጋኣጫንዳኔ።

6 ዴሮ ባኣካ ዒዚ ዎጋንዳኔ፤
 ያሎ ቤዞዎ ሌሲ ሌሊ ማሃንዳኔ፤
 ሳዎይዳ ዓኣ ካኣታ ቢያ ጋፒ ባይቃንዳኔ።

7 ዒዚ ጎይዎ ዓጫ ዓኣ ዓልቃ ዎኣዎ ዑሽካንዳኔ፤
 ዬያሮ ዒዚ ዴግ ዴጊ ጋዓንዳኔ።

111

ናንጊና ናንጋ ጎዳ ጋላቶና ጋላታ

1 ናንጊና ናንጋ ጎዳም ጋላታ!
 ፒዜ ዓሳ ቡኪንታ ቤዞይዳ
 ናንጊና ናንጋ ጎዳ ታኣኒ ጉቤ ዒናፓ ጋላታንዳኔ።

2 ናንጊና ናንጋ ጎዳኮ ማዳ ዴኤፒኬ፤
 ዬያና ዎዛዳ ዓሳ ቢያ ዬያ ማላኔ።

3 ማዳ ዒዛሲ ቦንቺንታያና ዲቃሂ ሄርሺሳያናኬ፤
 ዪሉማ ዒዛኮ ዶዲ ናንጋያኬ።

4 ዲቃሂ ሄርሺሳ ዓኮ ማዳ
 ማሊንቲ ናንጋንዳጉዲ ዒ ማዳኔ፤
 ናንጊና ናንጋ ጎዳ ኮሺ፥ ሃህ ሚጨንታያኬ።

5 ዒዛ ሚጨንታዞንሂም ሙኤዚ ዒ ዒንጋኔ፤
 ዒዚ ዒዬያቶም ጫኣቄ ጫኣቄም ዎሉዎሴ።

6 ዒዚ ፔ ዴሮም ሜሌ ዴሮ ዴሮ ዒንጊሂና

110:4 ዔብ. 5:6፤ 6:20፤ 7:17፤21።

ፔ ማድኮ ደዲሞ ቤኤዜኔ።

- 7 ማዳ ዲዛኮ ጎኔ፥ ሃሣ ፒዜኬ፤
ዳሞባ ዲዛሲ ሲያ ጉሙርቁንታያኩ።
- 8 ዬይ ናእናና ደዲ ዳዳያኩ፤
ጎኩሞና ፒዙሞና ማዳንቲያኩ።
- 9 ፔ ዳሮሞ ዳቁንታ ዲዚ ዳኬኔ፤
ናንጊና ደዲ ዳዳ ጫኣቁሞ ዲ ጫኣቁኔ፤
ሱንፃ ዲዛሲ ደማዳያና ዲጊጩንታያኩ።
- 10 ዔራቶኮ ካራ ማዳ ባኣዚ
ናንጊና ናንጋ ጎዳ ዳጊጩሢ፤
ዳይሢያ ዲዛሲ ማዳ ኩንሣዘንሢ፤
ማሊ ጳቂሣ ዲኔ ዳኣያ ማዳኔ፤
ናንጊና ናንጋ ጎዳ ጋላቲንቲ ጎይሣ ናንጋንዳኔ!

112

ኮሺ ዓሲኮ ዎዛ

- 1 ናንጊና ናንጋ ጎዳሞ ጋላታ!
ናንጊና ናንጋ ጎዳ ዳጊጩያና
ዳይሢያ ዲዛኮ ኩንሢያና ዎዛዳሢ
ዎዚ ዓንጂንቲያዳይ!
- 2 ዬያ ዓሢኮ ዜርፃ ጎዳ ዴኤፒ ማዳንዳኔ፤
ፒዜ ዓሶ ሾይንታ ዓንጂንታንዳኔ።
- 3 ቆሎንታ ዖርጎቹሞንታ ማኣሮ ዲዛኮ ኩማንዳኔ፤
ዲሎማ ዲዛኮ ናንጊና ናንጋንዳኔ።
- 4 ዲዚ ኮሺ፥ ሚጩንታያ፤ ሃሣ ዲሎ ማዳ ጎይያና
ፒዜ ዓሲሞ ዳሞይዳ ፖዲ ፖዳኔ።
- 5 ዔኤሲ ዲንጋያና ሂርጉዎ ታልዳያሞ
ማዳ ፔኤሲ ፒዜ ማዳሢሞ
ኮሺ ባኣዚ ማዳንዳኔ።
- 6 ዬይ ዓሢ ናንጊና ዳጊፃዳኩ፤
ዲሎ ዓሲኮ ማዳ ማሊንቲ ጎይሣ ዳዳንዳኔ።
- 7 ፑርታ ሃይሴ ዲዛ ዲቃሠቆሴ፤
ዲና ዲዛኮ ናንጊና ናንጋ ጎዳ ጉሙርቁ ደዳያኩ።

111:10 ዓ.ኖ. 28:28፤ ኮኣኪ. 1:7፤ 9:10።

- 8 ዒና ዒዛኮ ዶዲኬ፣ ፔቴታዎ ዒጊጨዋሴ፤
ጋፒንፆይዳ ሞርካ ዒዛኮ ሎኦማሢ ዒ ዛጋንዳኔ።
- 9 ማንቆ ዓሶሞ ፔ ሼኔና ዒዚ ዒንጌኔ፤
ዒሉማ ዒዛሲ ናንጊና ናንጋንዳኔ፤
ዒዚ ቦንቹንቲ ዎልቄና ዴግ ዴጊ ጋዓንዳኔ።
- 10 ፑርቶ ዓሳ ዬያ ዛጋዎ ሮኦጋዳንዳኔ፤
ዓቺ ዳይ፣ ዎኦፒ ዎኦፒ ዓኣዳንዳኔ፤
ዬያ ዓሶኮ ማሊፃ ጉሪ ማዓንዳኔ።

113

ናንጊና ናንጋ ጎዳኮ ኮሹሞ ዔርዛ ጋላታ

- 1 ናንጊና ናንጋ ጎዳሞ ጋላታ!
ዒንሢ ናንጊና ናንጋ ጎዳ ዓይላ ጋላቱዋቴ!
ሱንፆ ዒዛኮ ሄርሹዋቴ።
- 2 ሃናፓ ዓርቃዎ ናንጊና ናንጊ ሄላንዳኣና
ናንጊና ናንጋ ጎዳኮ ሱንፆ ጋላቲንቶንጎ።
- 3 ዓባ ዎርቃ ካራፓ ጌላ ካሮ ሄላንዳኣና
ናንጊና ናንጋ ጎዳኮ ሱንፆ ጋላቲንቲያ ማዎም!
- 4 ናንጊና ናንጋ ጎዳ ዴራፓ ዑሣ ዴግ ጌዔያኬ፤
ዒዛኮ ቦንቻ ጫሪንጮኮ ዑሣኬ።
- 5 ናንጊና ናንጋ ጎዳ ማዔ ኑ ዎኦዛሢጉዲ ዎኦኒያ ባኣሴ፤
ዒዛኮ ካኣቱሞ ዎይታ ቢያፓ ባሼኬ።
- 6 ጫሪንጮና ሳዎናይዳ ዓኣዘንሢ ዛጋኒ
ፔ ቶኦኮ ሄርኪዳይ ዎናዳይ?
- 7 ዒዚ ማንቆ ዓሶ ሳዎ ሲላላፓ ዔቁሳኔ፤
ሜታዴሢያ ዲቢንሢፓ ዴግ ዴጊዳኔ።
- 8 ቦንቹንታ ዓሶና ዎላ ሄኮ ማሃኔ፤
ዴሮኮ ሱኡጎና ዎላ ዒዛ ዴይሣኔ።
- 9 ዘኦኮ ላኣሎሞ ማኣሪንዶ ማሂ ዴይሣኔ፤
ዎዛዳያ፣ ሃሃ ናይንዶሞ ማሃኔ።

ናንጊና ናንጋ ጎዳሞ ጋላታ!

114

ዑሣ ዓኣዲያ ቦንቻ ኬሎ ማሊ ዓይናዲንቲ ዓይኑሞ

112:9 2ቆሮ. 9:9።

- 1 ዲሰራዔኤሌ ዴራ ገብፄ ዓጫፓ
ያይቆኑሴ ማኣራ ፃንጎ ማዕ ሜሌ ዴር ባኣካፓ ከሰከያና፥
- 2 ዪሁዳ ዴራ ያኦሲኮ ዲማዴ ማኣሮ
ዲሰራዔኤሌያ ዲዛ ዴማ ዎርቃያከ።
- 3 ባዛ ዲዛ ዛጋዖ ገንሢም ፑኒ ጳሽኬኔ፤
ዮርዳኖሴ ዎራኣ ገንሢም ማዕኔ።
- 4 ዲካ ዓዳ ዓዴ ማራይጉዲ
ጌሜራኣ ዓዴ ማራናይጉዲ ዪከኔ።
- 5 ባዚዮ! ዓይጋ ኔ ፑኒ ጳሽኬይ?
ዮርዳኖሴ ዓይጋ ኔ ገንሢም ማዕይ?
- 6 ዲንሢ ዲካ ዓዴ ማራይጉዲ
ጌሜራኣ ዓዴ ማራናይጉዲ ዓይጋ ዪከይ?
- 7 ዔዛ ሃይ ሳዓ!
ጎዳ ቤርታ
ያይቆኑሴ ያኣዛሢ ቤርታ
ዒገቹሞና ጎጋይቄ።
- 8 ዒዚ ላሎ ዴዔ ዎኣሢ ባንሢ
ዴኤፖ ሹጮዎ ዓልቃ ዎኣሢ ባንሢ ማሃኔ።

115

ያኦሲም ኮይሳ ጋላታ

- 1 ናንጊና ናንጋ ጎዳሢዮ!
ኑጋይቴቱዎንቴ ኔኤኮ ናንጊና ናንጋ ናሹሞና
ጉሙርቁንቴዎናሮ ሱንዖ ኔኤሲ ቦንቹ።
- 2 ሜሌ ዴራ፡-
«ዔያቶ ያኣዛሢ ዎካ ዓኣዖ?» ዓይጋ ጋዓንዳይ?
- 3 ኑ ያኣዛሢ ጫሪንጫኬ፤
ዒዚ ፔና ዎዛሳ ባኣዚ ማማዳኔ።
- 4 ዔያቶኮ ካኣሽኮ ያኣዛ ጋዓንቴ
ዓሲ ኩቻ ቢራና ዎርቁናፓ ኮሺንቴያከ።
- 5 ዲንጋ ዔያቶኮ ዓኣኔ፥ ጌሰቲ ጌሰቱዎሴ፤
ዓኣፒያ ናንጊከ፥ ጋዓንቴ ዛጉዎሴ፤

114:1 ከሲ. ማጻ 12:51። 114:3 ከሲ. ማጻ 14:21፤ ዒያ. 3:16። 114:8 ከሲ. ማጻ 17:1-7፤ ፓይ. ማጻ 20:2-13።

- 6 ዋይዚ ዓኣኔ፥ ዋይዘያቱዋሴ፤
 ሲኢዲ ናንጊታፆ ዴሁዋያኸ፤
- 7 ኩቲያ ናንጊኸ፥ ጋዓንቴ ሄሊ ዓርቁዋሴ፤
 ቶኪ ናንጊታፆ ሃንቴ ሃንቴዋሴ፤
 ፔ ጎርዥና ዑኡሲያ ዔያታ ከሳኒ ዳንዳዑዋሴ።
- 8 ዬያጉዴ ባኮ ኮሻ ዓሳ
 ዬያቶ ጉሙርቃ ዓሳኣ ቢያ
 ዔያቶጉዴያ ማፆንጎ።
- 9 ዒሰራዔኤሌ ዓሲዮቴ! ናንጊና ናንጋ ጎዳ ጉሙርቁዋቴ፤
 ዒንሢ ማኣዳሢና ጊቲማሢያ ዒንሢኮ ዒዛኸ።
- 10 ዓኣሮኔ ዓሲዮቴ! ናንጊና ናንጋ ጎዳ ጉሙርቁዋቴ፤
 ዒንሢ ማኣዳሢና ጊቲማሢያ ዒንሢኮ ዒዛኸ።
- 11 ዒንሢ ናንጊና ናንጋ ጎዳ ዒጊጫ ዓሳ ዒዛ ጉሙርቁዋቴ፤
 ዒንሢ ማኣዳሢና ጊቲማሢያ ዒንሢኮ ዒዛኸ።
- 12 ናንጊና ናንጋ ጎዳ ኑም ማላኔ፤
 ዓንጂያ ኑና ዓንጂንዳኔ፤
 ዒዚ ዓኣሮኔንታ ዒሰራዔኤሌንታ ማኣሮ ዓንጂንዳኔ።
- 13 ናንጊና ናንጋ ጎዳ ዒዛ ዒጊጫዘንሢ ቢያ
 ዴኤፖንታ ዳኮንታ ዓንጂንዳኔ።
- 14 ናንጊና ናንጋ ጎዳ ዒንሢንታ ዒንሢኮ ናኣቶንታ
 ዓንጂ ዒዚ ዒንሢ ሚርጊሾንጎ!
- 15 ጫሪንጫንታ ሳፆንታ ማኸ፥ ናንጊና ናንጋ ጎዳ
 ዒንሢ ዓንጂንጎ!
- 16 ጫሪንጫኮ ጫሪንጫ ናንጊና ናንጋ ጎዳሮኸ፤
 ሳፆ ጋዓንቴ ዓሲም ዒዚ ዒንጌኔ።
- 17 ናንጊና ናንጋ ጎዳ ጋላታዘንሢ
 ሃይቁ ዓሰቱዋሴ፤
 ዘቲዮ ጌዔ፥ ዲኡፖ ጌሌ ዓሰዋቱዋሴ።
- 18 ሃናፓ ዓርቃፆ ዒዛ ዓንጂንዳዘንሢ ኑናኸ።

ናንጊና ናንጋ ጎዳም ጋላታ!

115:8 ዓይኑ. 135:15-18፤ ዮሃ. ፆፔዳ 9:20። 115:13 ዮሃ. ፆፔዳ 11:18፤ 19:5።

116

ሃይቢፓ ዓቴ ዓሲ ያኦሲም ጋላቴ ጋላታ

- 1 ታኣኮ ዒላቶንታ ሺኢጲፆዋ ዋይዜሢር
ናንጊና ናንጋ ጎዳ ታ ናሽካኔ።
- 2 ዋዮ ፔኤሲ ዒ ታ ባንሢ ማሄሢር
ታ ናንጎ ዎዶ ቢያይዳ ታ ዒዛ ባንሢ ዒላታንዳኔ።
- 3 ሃይቢ ፒራ ታና ዓርቄኔ፤
ዲኡፖኮ ዒጊቺፃ ታና ማታሴኔ፤
ዎዩሢንታ ማቶንታ ታና ባሼኔ።
- 4 ታኣኒ ናንጊና ናንጋ ጎዳ ሱንፆ ዔኤላዎ፡-
«ናንጊና ናንጋ ጎዳሢዮ! ታኣኮ ሸምፓሢ
ኔ ዓውሳንዳጉዲ ታ ሺኢቃኔ» ጌዔኔ።

- 5 ናንጊና ናንጋ ጎዳ ኮሺ፥ ሃሃ ጂሎኬ፤
ኑ ያኦዛሢ ሚጪንታያኬ።
- 6 ናንጊና ናንጋ ጎዳ ዒና ሸሌዔዘንሢ ካፓኔ፤
ታኣኒ ሚርጌና ማታዲ ዓኣንቴ ዒ ታና ዓውሴኔ።
- 7 ናንጊና ናንጋ ጎዳ ኮሺ ባኣዚ ኔኤም ማዳሢር
ታ ሸምፔሌ! ኔኤኮ ሃውሾሢ ባንሢ ማዔ።

- 8 ዒዚ ሸምፓሢ ታኣኮ ሃይቢፓ
ዓኣፖዋ ታኣኮ ዓቢሢዳፓ
ቶኮ ታኣኮ ዲቆይዳፓ ዓይሴኔ።
- 9 ዬያር ሸምፔና ዓኣ ዓሳ ናንጋ ቤዛ
ናንጊና ናንጋ ጎዳ ኮራ ታ ናንጋንዳኔ።
- 10 «ኮሺ ታ ማታዳኔ» ጌዔ ዎዶናታዎ
ኔና ጉሙርቂዎ ታ ሃሺባኣሴ።
- 11 ካራ ታኣም ባይቄ ዎዶና
«ዓሲ ቢያ ሉኡዚኬ» ታ ጌዔኔ።

- 12 ዒዚ ታኣም ማዳ ኮዡ ባኮሮ ቢያ
ናንጊና ናንጋ ጎዳም ታ ዓይጎ ጪጋንዳይ?
- 13 ናንጊና ናንጋ ጎዳ ታና ዓውሴሢር ጋላታንዳኔ፤
ዎይኖ ዑዡ ዒንጊሢ ማሃ ታ ዒዛም ሺኢሻንዳኔ።
- 14 ቡኬ ዳር ቢያሢ ቤርታ ኬሰኪ

116:10 2ቆር. 4:13።

ታ ናኣቤ ናኣቦ ኩንሣንዳኔ።

- 15 ጾኦሲም ዲማዳ ዓሶኮ ሃይባ
ናንገና ናንጋ ጎዳ ቤርታ ቦንቺንቴያኩ።
- 16 ናንገና ናንጋ ጎዳሢዮ! ታኣኒ ኔኤኮ ዓይላሢኬ፤
ታ ኔ ዓይሌሎ ናኣዚ፥ ኔኤም ማዳሢኬ፤
ታኣኮ ቱኡዛፓ ኔ ታና ቡሌኔ።
- 17 ታ ኔኤም ዒንጎ ባኣዚ ማሂ ጋላታ ሺኢሻኔ፤
ሱንጾዋ ኔኤኮ ታ ዔኤላኔ።
- 18 ቡኬ ዴሮ ቢያሢ ቤርታ
ናንገና ናንጋ ጎዳም ታ ናኣቤ ናኣቦ ኩንሣንዳኔ።
- 19 ዬሩሳላሜ! ታኣኒ ኔ ጋራ
ናንገና ናንጋ ጎዳ ማኣሮኮ ዓሳ ቡካ ጸኦካ
ዬያ ማዳንዳኔ።

ናንገና ናንጋ ጎዳም ጋላታ!

117

ጾኦሲ ጋላቶና ጋላታ

- 1 ዒንሢ ሜሌ ዴራ ቢያሢ
ናንገና ናንጋ ጎዳ ጋላቱዋቱ!
ዴራ ቢያ ዒዛ ጋላታና ዴግ ዴጊዳዋቱ።
- 2 ዒዚ ኑና ናሽካ ናሹማ ደዲኬ፤
ጉሙርቁንቲፃኣ ዒዛኮ ጋፑዋያኩ።

ናንገና ናንጋ ጎዳም ጋላታ!

118

ናንገና ናንጋ ጎዳ ቢያ ዋዴ ሚጨንታያ ማዔሢ

- 1 ናንገና ናንጋ ጎዳ ኮሺ ማዔሢሮ
ዒዛ ጋላቱዋቱ፤
ሚጨንቲፃ ዒዛኮ ናንገና ደዲ ናንጋኔ።
- 2 ዒሰራዔኤሌ ዴራ ቢያ
«ሚጨንቲፃ ዒዛኮ ናንገና ናንጋያኩ» ጎጾንጎ።

117:1 ሮሜ 15:11። 118:1 1ጾኦሲ. ዓሃኬ 16:34፤ 2ጾኦሲ. ዓሃኬ 5:13፤ 7:3፤
ዒዛ. 3:11፤ ዓይኑ. 100:5፤ 106:1፤ 107:1፤ 136:1፤ ዔር. 33:11።

- 3 ዓኣርጌ ማኣሮ ዓሳ
«ሚጨገቲፃ ዒዛኮ ናንገና ናንጋያኬ» ጎዖንጎ።
- 4 ዒዛ ዒጊጫ ዓሳ ቢያ
«ሚጨገቲፃ ዒዛኮ ናንገና ናንጋያኬ» ጎዖንጎ።
- 5 ታኣኒ ማታጃ ዎዶና ናንገና ናንጋ ጎዳ ዔኤሌኔ፤
ዒዚያ ታኣም ማሂ ዩሃኔ፤
ኩንዒንቲፃፓ ዒ ታና ኬሴኔ።
- 6 ናንገና ናንጋ ጎዳ ታኣና ዎላኬ፤
ታኣኒ ዒጊጫዓኬ፤
ዓሲ ታና ዓይጎ ዎኦታንዳይ?
- 7 ታና ማኣዳኒ ዒዚ ታኣና ዎላኬ፤
ታ ሞርካ ሎኦማሂ ታ ዛጋንዳኔ።
- 8 ዓሲዳ ጌኤቁንቲሂዳፓ ባሽ
ናንገና ናንጋ ጎዳ ፑኖ ካይዚ ማሂሂ ቃራኬ።
- 9 ዎይሂ ዓሶ ጉሙርቁያይዳፓ ባሽ
ናንገና ናንጋ ጎዳ ፑኖ ካይዚ ማሂሂ ቃራኬ።
- 10 ዴራ ቢያ ታና ማንጌኔ፤
ጋዓንቲ ታ ዔያቶ ናንገና ናንጋ ጎዳ ሱንዖና ባይዜኔ።
- 11 ማንጊያ ዔያታ ቢያ ዛሎና ታና ማንጌኔ፤
ጋዓንቲ ታ ዔያቶ ናንገና ናንጋ ጎዳ ሱንዖና ባሽኔ።
- 12 ዓዳ ማሂጉዲ ዔያታ ታ ዑፃ ቁንዳኔ፤
ጋዓንቲ ዓንጊሂ ታሚዳ ዔኤታሂጉዲ ዔያታ ጋፔኔ፤
ጎኔና ናንገና ናንጋ ጎዳ ሱንዖና ታ ዔያቶ ባይዜኔ።
- 13 ሂዖም ሎኦማኒ ታ ጋኣዲንቲኔ፤
ጋዓንቲ ናንገና ናንጋ ጎዳ ታና ማኣዳኔ።
- 14 ናንገና ናንጋ ጎዳ ታኣኮ ዶዲማሂና ዓይናዲሂናኬ፤
ዒዚ ታኣኮ ታና ዓውሳሂኬ።
- 15 ሂሎ ዓሶኮ ማኣራ ዒላሺሂና ሶራይቲና ዎይዚንታኔ፤
ዑኡዛ ሂዚ ጋዓኔ፡-
«ናንገና ናንጋ ጎዳኮ ዎልቃ ዶዲ ማዶ ማዳኔ!»
- 16 ናንገና ናንጋ ጎዳኮ ሚዛቆ ኩጫ ዴግ ዴጊ ጌዔኔ፤
ዩይ ኩጫ ዶዲ ማዶ ማዳኔ።

118:6 ዔ.ብ. 13:6። 118:14 ኬሲ. ማጻ 15:2፤ ዒሲ. 12:2።

17 ቶሊ ዓቲ ሸምፔና ናንጋንዳኣፓ ዓቴም ታ ሃይቁንዲዋሴ፤
ናንገና ናንጋ ጎዳኮ ማዶ ታ ሃጋኣ ከኤዛንዳ።

18 ጎሪያ ናንገና ናንጋ ጎዳ ታና ኮሺ ጎሬኔ፤
ጋዓንቴ ሃይቢም ዓኣሢ ታና ዒዚ ዒንገባኣሴ።

19 ዲሎሞኮ ካራ ታኣም ቡሉዋቴ *፤
ዬያና ጌሊ ታ ናንገና ናንጋ ጎዳ ጋላታንዳ።

20 ዬና ካሬላ ዒዛ ካራኬ፤
ዲሎ ዓሳ ዒዞና ጌላ።

21 ዋይዚ ኔ ታኣም ማሄኔ፤
ታና ኔ ዓውሳሢ ማዔሢሮዋ ታ ኔና ጋላታ።

22 ማኣሮ ሹጮና ማዣ ዓሳ ቶኦቹ ሹጮሢ
ማኣሮኮ ሄላሢ ማዔ።

23 ዬያ ናንገና ናንጋ ጎዳ ማዶ፤
ዬይ ኑ ዓኣፖም ዲቃሣያኬ።

24 ናንገና ናንጋ ጎዳ ማዢ ከሌላ ሃኖኬ፤
ዬያሮ ኮሺ ኑ ዋዛዶም!

25 ናንገና ናንጋ ጎዳሢዮ! ሃዳራ ኑና ዓውሴ!
ናንገና ናንጋ ጎዳሢዮ! ሃዳራ ኑኡም ገኢጊሹ።

26 ያኦሲ ሱንፆና ሙካሢ ዓንጃንቴያኬ!
ናንገና ናንጋ ጎዳ ማኣራፓ ኑ ዒንሢ ዓንጃ።

27 ናንገና ናንጋ ጎዳ ያኦሲኬ፤
ፔኤኮ ፖፖ ዒ ኑ ዑፃ ፖዔ፤

ዒንሢ ቦንቾ ከሎሮ ዔኪ ሙካ ባኮ
ዒንጊያ ሸኢሾ ባኮኮ ጉራኖና ዓይሢ ቱኩዋቴ።

28 ኔኤኒ ታኣኮ ያኦሲኬ፣ ታ ኔና ጋላታ፤
ኔኤኒ ታኣኮ ያኦሲኬ፣ ታ ኔና ዴግ ዴጊዳንዳ።

* **118:19** ዲሎሞኮ ካራ ታኣም ቡሉዋቴ ጋዓዛ ዔብሬ ዓሳ ሙኡጮ ማፃኣፖይዳ ዒማዲ ጋዓያ ማዓዛ ማሊ ያዛዛ ጌኤኮ ማኣሮኮ ካሮ ታኣም ቡሉዋቴ ጋዓያ ማላ። **118:22** ሉቃ. 20:17፤ ዳኪ. ማዳ 4:11፤ 1ጴ፪. 2:7። **118:23** ማቴ. 21:42፤ ማር. 12:10-11። **118:25** ማቴ. 21:9፤ ማር. 11:9፤ ዮሃ. 12:3። **118:26** ማቴ. 21:9፤ 23:39፤ ማር. 11:9፤ ሉቃ. 13:35፤ 19:38፤ ዮሃ. 12:13።

29 ዒዚ ኮሺ ማዕሣሮ ዒዛ ጋላቱዋቴ!
ሚጠገንቲፃ ዒዛኮ ናንጊና ዶዲ ናንጋያኬ።

119

ጾአሲ ዋጌ

1 ናንጋ ናንጎና ዔኤቢ ቦሂሳ ባአዚ ባአዘንሢ
ናንጊና ናንጋ ጎዳ ዋጎና ሃንታዘንሢ
ዓንጂንቴያኬ።

2 ዒዛኮ ዓይሢፃ ካፓዘንሢ
ፔኤኮ ጎኔ ዒናፓ ኮዓዘንሢ
ዓንጂንቴያኬ።

3 ዳቢንቲ ባአዚ ዔያታ ማዲዋሴ፤
ጋዓንቴ ዒዛ ጎይፃና ዓአዳኔ።

4 ዛጊ ኑ ካፓንዳጉዲ
ዳምቦ ኔኤኮ ኔ ኑና ዓይሢ።

5 ዳምቦ ኔኤኮ ኑ ካፓንዳጉዲ
ጎይፃ ታአሲ ዶዲ ታአም ማዕቴ ዓይጎ!

6 ኔ ዓይሢፃ ባንሢ ታ ዛጋአና ቦርሲንቴዋሴ።

7 ኔኤኮ ጂሉም ዋጎ ታ ዔራ ዋዶና
ፒዜ ዒኔና ጋላታ ታ ኔኤም ሺኢሻንዳኔ።

8 ዋጎ ኔኤሲ ታ ካፓንዳኔ፤
ኔኤኒ ታና ጋፒ ሃሺፖ።

ጾአሲ ዋጎም ዓይሢንቲሢ

9 ዳጌሢ ጎይፃ ፔኤሲ ዋማይዲ ጌኤሻንዳይ?
ኔኤኮ ቃአላ ጋዓ ጎይፃ ናንጊሢናኬ።

10 ታአኒ ጉቤ ዒናፓ ኔና ኮዔኔ፤
ኔ ዓይሢፃፓ ታ ዓጊፀዋጉዲ ታና ካፔ።

11 ታ ኔኤም ዋይዘ ዒፂ ዳቢንቴዋጉዲ
ቃአሎ ኔኤሲ ታ ዒና ታአኒ ዓአቼኔ።

12 ናንጊና ናንጋ ጎዳሢዮ! ኔኤኒ ዓንጂንቴያኬ፤
ዳምቦ ኔኤሲ ኔ ታና ዔርዜ።

13 ኔ ዳንጋፓ ኬሰካ ዋጎ ቢያ
ታ ዳንጎና ታአኒ ኬኤዘንዳኔ።

14 ዓሲ ፔ ቆሎና ዋዛዳሢጉዲ
ኔ ዓይሢፃጉዴያ ሃንቲፃ ታና ዋዋዛሳኔ።

15 ኔኤኮ ዳምቦ ታአኒ ታ ዒናና ማላኔ፤
ዒና ታአሲ ታአኒ ኔ ጎይፃ ማሄኔ።

16 ዳምባ ኔኤሲ ታና ዋዛሳኔ፤
ቃኣሎዋ ኔኤኮ ታ ዋሉዋሴ።

ያኦሲ ዋጋፓ ጴዳ ዋዛ

- 17 ናንጊና ናንጋኒ ቃኣሎ ኔኤኮ ታ ካፓንዳንጉዲ
ታና ኔኤኮ ዓይላሢም ኮሺ ማዴ።
- 18 ኔኤኮ ዋጋፓ ዲቃሢ ሄርሺሳ ባኣዚ ታ ዛጋንዳጉዲ
ዓኣፖ ታኣሲ ቡሌ።
- 19 ታኣኮ ሳያይዳ ቤሲባኣ ዓሲኬ፤
ኔኤኮ ዓይሢያ ታ ጊዳፓ ዓኣቺፖ።
- 20 ቢያ ዋዴ ዋጎ ኔኤኮ ጳቂሥሢና
ሹምፓሢ ታኣኮ ኮሺ ደጩኔ።
- 21 ኔኤኮ ዓይሢያይዳፓ ደቢንቴዘንሢ
ሄርሺንጋዘንሢና ጋዳንቁንቴዘንሢ ኔ ጎራኔ።
- 22 ኔኤኮ ዓይሢያ ታ ካፔሢሮ
ዔያቶኮ ጫዠና ቶኣቺያና ታኣፓ ሺኢሹ።
- 23 ዋይሣ ዓሳ ዴዒ ታና ባይዘኒ ዘርቴያታቴያ
ኔኤኮ ዓይላሢ ዳምቦ ኔኤሲ ዒኖና ማላኔ።
- 24 ዓይሢያ ኔኤኮ ታኣም ዋዛኬ፤
ዘሪያ ታና ዘራያኬ።

ያኦሲ ዋጎ ማዲ ኩንሣኒ ዔቂሢ

- 25 ታኣኒ ሳያ ዓጮና ፔቴ ማዒ ዓዲንቴኔ፤
ኔኤኮ ቃኣሎ ጉዴያ ሹምፔና ማሢ ታና ጌሣ።
- 26 ታ ናንጎ ጎይያ ታ ኔኤም ኬኤዘኔ፤
ኔኤኒ ታኣሲ ዋይዘኔ፤
ዳምቦ ኔኤኮ ታና ዔርዘ።
- 27 ኔ ዳምቦ ማሊ ታ ጳቂሣንዳጉዲ ታና ማሢ፤
ታኣኒያ ኔኤኮ ዲቃሢ ሄርሺሳ ማዴ ማላኔ።
- 28 ማሊፃፓ ዔቂያና ዒና ታኣኮ ላቤኔ፤
ኔ ቃኣሎ ጉዴያ ታና ደዲሹ።
- 29 ሉኡዙሞ ታ ጊዳፓ ሺኢሹ፤
ኔ ኮሹሞና ዋጎ ኔኤሲ ታና ዔርዘ።
- 30 ታኣኒ ጉሙርቂንጋያ ማዒና
ዋጎዋ ኔኤሲ ካፓኒ ጋፒ ታ ዔቂኔ።
- 31 ናንጊና ናንጋ ጎይሢዮ!
ኔ ዋጎ ታኣኒ ደዲሹ ዓርቂኔ፤
ሃዳራ ታና ቦርሲሲፖ።

32 ታ ዒኖ ዓርቃ ባኣዚፓ ኔ ከሴሢረ
ኔ ዓይሢ ጎይዖና ታ ጳሽካንዳኔ።

ማሊ ጳቂሥሢ ዴንቃኒ ሸኢቂንቲ ሸኢጲሢ

33 ናንጊና ናንጋ ጎዳሢዮ! ኔ ዎጎ ጎይዖ ታና ዔርዜ፤
ታኣኒያ ጋፒንዖ ሄላንዳኣና ካፓንዳኔ።

34 ዎጎ ኔኤሲ ታ ካፓንዳጉዲና
ጉቤ ዒናፓ ታ ዓይሢንታንዳጉዲ
ማሊ ጳቂሥሢ ኔ ታኣም ዒንጌ።

35 ዬያና ታ ዎዛዳሢረ
ኔ ዓይሢዖ ጎይዖ ዔኪ ታና ዓኣዴ።

36 ታኣም ኮይሳ ባኣዚዳ ጎይቂሢዳፓ ባሽ
ዒኖ ታኣሲ ኔ ዓይሢዖ ባንሢ ማሄ።

37 ዔኤሲ ፓሠዎ ባኣዚ ዛጊሢፓ ዓኣፖ ታኣሲ ማሄ፤
ኔኤኮ ቃኣሎ ጉዴያ ናንጎ ታኣኮ ዓካሴ።

38 ኔ ዒጊጨንታያ ማዓንዳጉዲ
ታና ኔ ዓይላሢም ኔ ዒንጌ ዎዘ ቃኣሎ ማዲ ኩንሢ።

39 ዎጋ ኔኤሲ ፒዜ ማዔሢረ
ታ ዒጊጫ ዳውሲንታፓ ታና ካፔ።

40 ዓይሢዖ ታ ኔኤኮ ካፓኒ ኮዓኔ፤
ኔኤኒ ዲሎ ማዔሢረ ናንጎ ታኣኮ ዓካሴ።

ዖኣሲ ዎጎና ጌኤቂንቲሢ

41 ናንጊና ናንጋ ጎዳሢዮ! ሚጨንቲዖ ኔኤኮ ታ ባንሢ ሙኮንጎ፤
ኔኤኮ ዓውሲዖኣ ኔ ቃኣሎጉዴያ ታኣም ዳኪንቶንጎ።

42 ኔ ቃኣሎ ታ ጉሙርቃሢረ
ታና ጨሽካ ዓሶም ማሂ ታ ከኤዛንዳኔ።

43 ዎጎ ኔኤኮ ታ ጉሙርቃኔ፤
ጎኑም ሃይሴ ታ ዳንጋፓ ፔቲታዖ ሸኢሺፖ።

44 ናኣናና ናንጊ ሄላንዳኣና
ቢያ ዎዴ ዎጎ ታ ኔኤሲ ካፓንዳኔ።

45 ዳምቦ ታ ኔኤኮ ኮዓኔ፤
ታ ሹኖጉዴያ ሃንጋ ሴካ ታ ሃንታንዳኔ።

46 ዓይሢዖ ኔኤኮ ታኣኒ ካኣቶም ከኤዛንዳኔ፤
ዬያ ታ ማዴሢረ ቦርሲሳ ባኣዚ ታና ባኣሴ።

47 ታ ኮሺ ናሽካ ኔ ዓይሢዖና ዎዛዳኔ።

48 ኩጮ ታኣሲ ታኣኒ ናሽካ ኔ ዓይሢዖ ባንሢ ዔቂሳኔ፤
ዳምቦዎ ኔኤሲ ማሊ ታ ጳቂሢ።

የኦሲ ዋናና ጉሙርቁንቲሢ

- 49 ሃጋኣ ዋዛ ታ ማሃሢ ዩያይዳ ማዔሢሮ
ታና ኔኤኮ ዓይላሢም ኔ ዒንጌ ቃኣሎ ማሌ።
 - 50 ኔኤኮ ቃኣላ ታና ናንጋያ ማሃኔ፤
ዩይ ታኣኮ ሜታሢ ዋዶና ዶዶም ማዓያኬ።
 - 51 ዖቶርቃ ዓሳ ሚርጌና ታና ሚኢጨኔ፤
ታኣኒ ጋዓንቲ ኔኤኮ ዋጋፓ ዓገፃዓኬ።
 - 52 ናንገና ናንጋ ጎዳሢዮ!
ሚናፓ ዓኣ ዋጎ ኔኤኮ ታ ማሌ፤
ዩያና ታኣኒ ታና ዶዶሼ።
 - 53 ዋጎ ኔኤሲ ሃሼ ፑርቶ ዓሶይዳፓ ዔቁያና
ዳጋሲ ታና ዳጋሳ።
 - 54 ታኣኮ ሸኦቹም ዓጫ
ዳምባ ኔኤሲ ታኣኮ ዓይኑምኬ።
 - 55 ናንገና ናንጋ ጎዳሢዮ!
ዋንቶና ሱንፆ ኔኤኮ ታ ማላ፤
ዋጎ ኔኤሲያ ታ ካፓ።
 - 56 ኔ ዳምቦ ጎይፆ ታ ሃንታ፤
ዩይ ታኣኮ ማዶ ማዔ።
- የኦሲ ዋጎም ዓይሢንቲሢ
- 57 ናንገና ናንጋ ጎዳሢዮ! ታኣኒ ኮዓሢ ኔና ሌሊኬ፤
ኔኤኮ ዋጎዋ ካፓኒ ታ ጫኣቃ።
 - 58 ጉቤ ዒናፓ ታ ኔ ዓኣፖ ካሮ ኮዔ፤
ኔኤኮ ቃኣሎጉዴያ ኮሹም ኔኤሲ ታና ዳቄ።
 - 59 ታኣኒ ጎይፆ ታኣሲ ዛጌ፤
ታ ሃንቲፆዋ ኔ ዓይሢፆ ባንሢ ታ ማሃ።
 - 60 ኔ ዓይሢፆ ታኣኒ ካፓኒ ሩኡሬ፤
ኔገያ ታ ኔጉዋሴ።
 - 61 ፑርቶ ዓሶኮ ሱዛ ታና ማሬ፤
ታኣኒ ጋዓንቲ ዋጎ ኔኤሲ ዋለባኣሴ።
 - 62 ኔኤኮ ዲሎ ዋጎ ዛሎሮ
ሳዖኮ ገዲሚዣ ኔና ጋላታኒ ታ ዔቃ።
 - 63 ታኣኒ ኔና ዒገጫዘንሢም ቢያ
ዳምቦዋ ኔኤሲ ካፓዘንሢኮ ታ ላጌኬ።
 - 64 ናንገና ናንጋ ጎዳሢዮ! ሳዓ ኔኤኮ ሚጨንቲፆና ኩሜ፤
ዳምቦዋ ኔኤሲ ታና ኔ ዔርዜ።

የኦሲ ዋጋ ቦንቹንቲያ ማዒፆ

- 65 ናንገና ናንጋ ጎዳሢዮ! ኔኤኮ ቃኣሎጉዴያ
ኔ ዓይላሢም ኮሺ ባኣዚ ኔ ማዳኔ።
- 66 ኔኤኮ ዓይሢያ ታ ጉሙርቃኔ፤
ኮሺ ማላሢንታ ዔራቶዋ ታና ዔርዜ።
- 67 ኔ ታ ገዳ ሜቶ ዓጋንዳሢኮ ቤርታ ጎይያ ዳቢ ታ ዓኣዳኔ፤
ሃሢ ጋዓንቴ ቃኣሎ ኔኤኮ ታ ካፓኔ።
- 68 ኔኤኒ ኮሺኬ፥ ኔ ማዳ ባኣኣ ኮሺኬ፤
ዬያሮ ዳምቦ ኔኤሲ ታና ዔርዜ።
- 69 ጾቶርቃ ዓሳ ሱንያ ታኣኮ ሉኤዙሞና ፑርቲሴኔ፤
ታኣኒ ጋዓንቴ ዓይሢያ ኔኤኮ ጉቤ ዒናፓ ካፓኔ።
- 70 ዒና ዔያቶኮ ባይቁ ደጨያኬ፤
ታኣኒ ጋዓንቴ ኔ ዎጎና ዎዛዳኔ።
- 71 ዳምቦ ኔኤሲ ታ ዔራንዳንጉዲ
ሜታሢዴና ኬዛ ታኣም ኮሺ ማዔኔ።
- 72 ፓይዲባኣ ቢራና ዎርቁናይዳፓ ባሺ
ኔ ዳንጋፓ ኬሰካ ዎጋ ታኣም ኮሺኬ።

ያኣሲ ዎጎኮ ፒዙሞ

- 73 ኔ ኩጫ ታና ማዜኔ፥ ኮሺያ ታና ኮሺኔ፤
ኔኤኮ ዓይሢያ ታ ዔራንዳጉዲ
ማሊ ጳቂሥሢ ታኣም ዒንጌ።
- 74 ኔኤኮ ቃኣሎ ሃጋኣ ዎዛ ማሂ ታ ጌሢሢር
ኔና ዒጊጫዘንሢ ታና ዛጊ ዎዛዳንጎ።
- 75 ናንገና ናንጋ ጎዳሢዮ! ኔ ዎጋ ዒሎ ዎጌኬ፤
ኔ ታና ሜታሴሢያ ኔኤኮ ጉሙርቁንቴያናታሢ ታ ዔሬኔ።
- 76 ታና ኔኤኮ ዓይላሢም ኔ ጫኣቁ ጎይያና
ኔ ሚጨንቴፃ ታና ደዲሻያ ማዎንጎ።
- 77 ኔኤኮ ዎጋ ታኣኮ ዎዘኬ፤
ሺምፔና ታ ናንጋንዳጉዲ ኮሹማ ኔኤሲ ታኣም ሙኮንጎ።
- 78 ጾቶርቃ ዓሳ ሉኤዙሞና
ታና ሜቶይዳ ጌልዜሢር ቦርሲንቶንጎ፤
ታኣኒ ጋዓንቴ ዓይሢያ ኔኤሲ ማላኔ።
- 79 ኔና ዒጊጫዘንሢ
ዓይሢያዎ ኔኤሲ ዔራዘንሢ
ሃንጋ ታ ባንሢ ሙኮንጎ።
- 80 ታኣኒ ቦርሲንቴዎጉዲ
ዒና ታኣኮ ኔ ዎጎ ካፒያና ፒዜ ማዎንጎ።

ዳቂንታ ዴንቃኒ ሺኣቂንቴ ሺኣጲሢ

- 81 ታ ሼምፓሢ ኔ ዳቁሺያ ሚርገና ኮዔኔ፤
ቃኣሎ ኔኤኮ ታኣኒ ሃጋኣ ዋዛ ማሃንዳኔ።
- 82 «ዓይዲ ኔ ታና ደዲሻንዳይ?» ገዒ ገዒ
ዓኣፓ ታኣኮ ኔ ቃኣሎ ካፒያና ላቤ።
- 83 ታኣኒ ጩቢዳ ሱዲንቴ ዋይኔ ዓርሦ ሱርባጉዲ ማዔያታቴያ
ደምቦ ኔኤኮ ታ ዋለባኣሴ።
- 84 ኔ ዓይላሢ ዋማ ሄላንዳኣና ሜታዲ ደዓንዳይ?
ታና ደውሳዘንሢዳ ሜቶ ኔ ዓጋንዳሢ ዓይዲዳይ?
- 85 ኔኤኮ ዋጋ ጋዓ ጎይያ ዓኣዲዋያታያ ያቶርቃዘንሢ
ዔቴ ታኣም ቦኣኬ።
- 86 ዓይሢያ ቢያ ኔኤኮ ጉሙርቁንታያኬ፤
ዓሳ ታና ታ ማዴ ባኣዚ ባኣንቴ ደውሳሢ
ኔኤኒ ታና ማኣዴ።
- 87 ሳይይዳፓ ዔያታ ታና ባይዛኒ ዳካ ዓቴ፤
ታኣኒ ጋዓንቴ ዓይሢያ ኔኤሲ ሃሺባኣሴ።
- 88 ኔ ሚጩንቴያጉዴያ ገንሣ ማሢ ታና ሼምፔና ገሢ፤
ታኣኒያ ኔ ዓይሢያ ካፓንዳኔ።

ያኦሲ ዋጎና ጉሙርቁንታሢ

- 89 ናንገና ናንጋ ጎዳሢያ! ቃኣላ ኔኤኮ ጩሪንጩይዳ
ናኣናና ደዲ ናንጋያኬ።
- 90 ኔኤኮ ጉሙርቁንታያ ሾይንቴፓ ሾይንቴ ሄላንዳኣና ናንጋኔ፤
ሳያ ኔ ማገፍ፤ ዬይ ደዲ ናንጋኔ።
- 91 ቢያሢ ኔ ዓይሌ ማዔሢ
ኔ ዋጋ ሃኖ ሄላንዳኣና ደዲ ናንጋኔ።
- 92 ዋጋ ኔኤሲ ታኣኮ ዋዛ ማዒባኣያታቴ
ሜታሢ ዋደና ታ ሄኤደ ባይቄያ ናንዳኔ።
- 93 ዬያና ኔ ታና ሼምፔና ማሄሢ
ኔ ዓይሢያ ፔቴታያ ታኣኒ ዋላዓኬ።
- 94 ታኣኒ ኔኤርታሢሢ ሃዳራ ታና ዓውሴ!
ኔኤኮ ዋጎዋ ታኣኒ ኮዔኔ።
- 95 ፑርቶ ዓሳ ታና ባይዛኒ ካቴ፤
ታኣኒ ጋዓንቴ ዋጎ ኔኤሲ ማሌ።።
- 96 ፒዙሞኮ ቢያ ዛጲ ዓኣሢ ታ ካገኔ፤
ዓይሢያ ጋዓንቴ ኔኤሲ ኮሺ ዳልገኬ።

ያኦሲ ዋጎ ናሽኪሢ

- 97 ዋጎ ኔኤሲ ታ ኮሺ ናሽካኔ፤
ሮኦሮ ጉቤያ ታኣኒ ማላ።።

- 98 ኔኤኮ ዓይሠጻ ዓይጎ ወደናኣ ታኣፓ ዲማዲዋኣሢሮ
 ታ ሞርኮይዳፓ ባሼ ታና ኔ ማሊ ጳቂሠጻ ማህኔ።
 - 99 ኔ ዋጎ ታኣኒ ማላሢሮ
 ታና ዔርዛ ዓሶይዳፓ ባሼ ማሊ ጳቂሠጻ ዒኔ ታ ዔኬኔ።
 - 100 ኔኤኒ ኬሴ ዋጎ ገንጾ ታ ዓኣዳሢሮ
 ጋርቹ ዓሶይዳፓ ባሼ ታኣኒ ዔራ ማዔኔ።
 - 101 ኔኤኮ ቃኣሎ ታኣኒ ካፓኒ
 ቶኮ ታኣኮ ታ ፑርታ ጎይሢዳፓ ቃዜኔ።
 - 102 ኔኤኒ ኔኤር ታና ዔርዜሢሮ
 ኔ ዋጎይዳፓ ታ ኬሰከባኣሴ።
 - 103 ቃኣላ ኔኤሲ ዋዚ ዓኣጻይ!
 ጾሎሊ ዔኤሲዳፓኣ ባሼ ዓኣጻኔ።
 - 104 ኔ ዋጎይዳፓ ማሊ ጳቂሠሢ ታኣኒ ዴንቄኔ፤
 ዬያሮ ሉኡዙሞ ጎይፆ ቢያ ታኣኒ ዒፆኔ።
- ጾኦሲ ዋጋፓ ጳዳ ፖሲ
- 105 ቃኣላ ኔኤሲ ታ ቶኮኮ ጾሞፔ
 ታ ጎይፆኮሞ ፖዔኬ።
 - 106 ኔኤኮ ፃሎ ዋጎ ታኣኒ ካፓኒ ጫኣቄሢሮ
 ዬያ ታኣኒ ደዲሺ ዓርቃንዳኔ።
 - 107 ሚርጌና ታ ሚታዳኔ፤
 ናንገና ናንጋ ጎዳሢዮ! ኔ ቃኣሎጉዴያ
 ገንሣ ማሂ ሼምፔና ታና ጌሢ።
 - 108 ናንገና ናንጋ ጎዳሢዮ! ታ ሼኔና ታ ኔኤም ሺኢሺ
 ታኣኮ ጋላቶ ዒንገጾ ኔ ዔኬኔ፤
 ኔኤኮ ዋጎሞ ታና ዔርዜ።
 - 109 ሼምፔላ ታኣኮ ቢያ ወዴ ሚቶይዳኬ፤
 ጋዓንቴ ታ ኔኤኮ ዋጎ ሞሊባኣሴ።
 - 110 ፑርቶ ዓሳ ቡኡዶ ፒሮ ታኣም ፒሬኔ፤
 ታኣኒ ጋዓንቴ ዳሞቦኮ ዑሣ ዓኣዲባኣሴ።
 - 111 ኔ ዋጋ ናንገና ታኣኮ ዳካሊ ባኣዚ ማዔኔ፤
 ዬያና ዒና ታኣኮ ሚርጌና ዋዛዳኔ።
 - 112 ዓይሠጻ ኔኤሲ ናንገና ናንገ ሄላንዳኣና
 ማዲ ታ ኩንሣኒ
 ዒኖ ታኣሲ ዬያ ባንሢ ማህኔ።
 - 113 ላምፆ ማሊሢና ዓኣ ዓሶ ታ ዒጻኔ፤
 ታኣኒ ጋዓንቴ ኔ ዋጎ ናሽኬኔ።
 - 114 ኔኤኒ ታኣኮ ፑኖ ካያሢና ጌቲማሢናኬ፤

- ቃላሎ ኔኤሲ ታ ዋዛና ካፓኔ።
 115 ታ ያክዛሂኮ ዋጎ ታኣኒ ካፓንዳጉዲ
 ዒንሂ ፑርቶ ዓሳ ታ ኮራፓ ሃኩዋቱ።
 116 ኔኤኮ ቃኣሎጉዳያ ታና ኬልቂ ዓርቄ፤
 ታኣኒ ሸምፔና ናንጋንዳኔ፤
 ዋዛ ታኣኮ ጉሪ ማዕም ታ ቦርሲንቱዋጉዲ።
 117 ሂርጋ ባኣያ ታ ናንጋንዳጉዲ ኬልቂ ታና ዓርቄ፤
 ኔ ዳምቦዋ ቢያ ዎዴ ታ ዛጋንዳኔ።
 118 ማሊፃ ዔያቶኮ ጌና ሉኡዙሞና ኩሜያ ማዕሚር
 ኔ ዎጋፓ ዒፂ ኬሰካዙንሂ ቢያ ኔያ ዒፃንዳኔ።
 119 ሳዖይዳ ፑርቶ ዓሳ ቢያ ቡኡራጉዲ ኔ ሺኢሼኔ፤
 ዬያሮ ታ ኔኤኮ ዳምቦ ናሽኬኔ።
 120 ዑፃ ታኣኮ ኔና ዒጊቹሞና ጎጋይቃኔ፤
 ኔ ዎጎዋ ሚርጌና ታ ዒጊጩኔ።
 121 ፒዙሞና ሂሉሞና ዓኣ ባኣዚ ታ ማዳኔ፤
 ሄርቂ ዎይህ ዓሰም ዓኣሂ ታና ዒንጊፖ።
 122 ታና ኔ ዓይላሂኮ ዳቂንቶ ጎናሴ፤
 ዎቶርቃዘንሂ ታና ሄርቂ ዎይህንዳጉዲ ማሂፖ።
 123 ዓኣፓ ታኣኮ ኔ ዓውሲፃንታ
 ሂሉሞ ቃኣሎዋ ካፒሂና ላቤኔ።
 124 ታና ኔ ዓይላሂሞ ናሹሞ ኔኤሲ ቤኤዘ፤
 ኔ ዎጎዋ ታና ዔርዘ።
 125 ታኣኒ ኔ ዓይላሂኬ፤
 ኔ ዳምቦ ዔራንዳጉዲ ታና ማሄ።
 126 ናንጊና ናንጋ ጎዳሂዮ!
 ዎጋ ኔኤሲ ሃሽንቲዳ ዓኣሂር
 ኔኤኒ ማዶ ማዳንዳ ዎዳ ሃሂኬ።
 127 ዓይሂያ ኔኤሲ ዎርቄይዳፓ ባሼ ታ ናሽካኔ፤
 ጎኔኬ ጌኤሽ ዎርቄይዳፓኣ ባሼ ሚጨንታኔ።
 128 ኔ ዓይሂፃ ቦሂሳ ባኣዚ ባኣያ
 ፒዘኬ ታ ጋዓኔ፤
 ዬያሮ ሉኡዙሞ ጎይዎ ታ ዒዒፃኔ።
 ያኣሲ ዎጎ ቦንቻኒ ናሽከሂ
 129 ዳምባ ኔኤኮ ዲቃሂ ሄርሺሳያኬ፤
 ዬያሮ ታ ሸምፓሂ ዬያ ካፓኔ።
 130 ኔ ቃኣሎኮ ቡሊፃ ፖፖዓኔ፤
 ዔሩዋ ዓሰ ማሊ ጳቂህያ ማሃኔ።

- 131 ዓይሢያ ታ ኔኤኮ ኮሺ ርሽካሢሮ
ሱኡኮና ታ ዳንጎ ታ ዋሊ ዳዓኔ።
- 132 ሱንያ ኔኤኮ ርሽካዘንሢሮ ቢያ ኔ ማዳ ጎይያ
ታ ባንሢ ማዒጋጋ ታኣም ሚጨንቴ።
- 133 ሃንቲያ ታኣኮ ኔ ቃኣሎጉዳያ ፒዚሴ፤
ጎሜ ታና ዎይሢንዳጉዲ ሃሺፖ።
- 134 ኔ ዓይሢያ ታ ካፓኒ ዳንዳዓንዳጉዲ
ዓሲ ታና ማኣሳንሣያይዳፓ ዓውሴ።
- 135 ታና ኔኤኮ ዓይሢሢሮ ዓኣፖ ካሮ ኔኤኮ ፖዒሴ፤
ዳምቦዋ ኔኤኮ ታና ዔርዜ።
- 136 ዎጋ ኔኤኮ ቦንቲንቲባኣሢሮ
ዓቢፃ ታኣኮ ዋኣሢጉዲ ዎታኔ።
- ያኦሲ ዎጋ ፒዜ ማዔሢ**
- 137 ርንጊና ርንጋ ጎዳሢያ! ኔኤኒ ዒሎኬ፤
ዎጊፃኣ ኔኤኮ ፒዜኬ።
- 138 ኔ ዓይሢያ ኔኤኒ ዒሎሞና ኬሴኔ፤
ዬይያ ኮሺ ጉሙርሳያኬ።
- 139 ታ ሞርካ ቃኣሎ ኔኤሲ ዔኪባኣሢ
ኮሺ ታና ሮኦጋሳኔ።
- 140 ቃኣላ ኔኤኮ ኮሺ ጊሶናያኬ፤
ታኣኒ ኔ ዓይሢሢሮ ዬያ ርሽኬኔ።
- 141 ታኣኒ ፓሡዋያና ቶኦቲንቴያናኬ፤
ጋዓንቴ ታ ኔኤኮ ዓይሢያ ዋሊባኣሴ።
- 142 ዒሎማ ኔኤኮ ርንጊና ርንጋያኬ፤
ዎጋኣ ኔኤሲ ጎኔኬ።
- 143 ማቶና ዋኣዩሢና ታና ሄሌኔ፤
ጋዓንቴ ኔ ዓይሢያ ታኣኮ ዎዛኬ።
- 144 ዓይሢያ ኔኤሲ ርንጊና ዒሎሞ ዓይሢሢሮ፤
ሼምፔና ታ ርንጋንዳጉዲ ማሊ ጳቂሢሢሮ ታኣም ዒንጌ።
- ሞርኬ ኮሽካፓ ዳቃኒ ሺኣቁንቴ ሺኣጲሢሮ**
- 145 ርንጊና ርንጋ ጎዳሢያ! ጉቤ ዒናፓ ታ ዒላታኔ፤
ኔ ታኣም ዎይዜ፤
ዳምቦዋ ኔኤኮ ታ ካፓንዳኔ።
- 146 ታ ኔ ባንሢ ዒላታሢሮ ታና ዓውሴ፤
ዓይሢያ ታ ኔኤኮ ካፓንዳኔ።
- 147 ኔ ታና ማኣዳንዳጉዲ
ዓባ ያርቁዋንቴ ጳጨ ታ ዒላታኔ፤

- ኔ ቃኣሎብ ሃጋኣ ዋዛ ማሂ ታ ጌሃኔ።
- 148 ኔኤኮ ቃኣሎ ታ ማላኒ
 ዓኣፓ ታኣኮ ዋንቶ ጉቤ ዲኡሚንቱዋዎ ዎርቃኔ።
- 149 ኔ ኮሹሞጉዴያ ዑኡዞ ታኣሲ ዋይዜ፤
 ናንገና ናንጋ ጎዳሂዮ! ኔ ዎጎጉዴያ
 ገንሣ ማሂ ታና ሸምፔና ናንጋያ ማሄ።
- 150 ፑርታ ባኣዚ ታኣም ቱካ ዓሳ ታ ባንሣ ዑኩኔ፤
 ጋዓንቱ ዔያታ ኔ ዎጎኮ ዙላኩ።
- 151 ናንገና ናንጋ ጎዳሂዮ!
 ኔኤኒ ጋዓንቱ ዑኩኩ፤
 ዓይሂፃኣ ኔኤሲ ቢያ ጎኔኩ።
- 152 ናንገና ኔኤኒ ዬያ ኔ ዎጎ ደዲሺ ኩሴያ ማዔሣ
 ሚርጌ ዎዴኮ ቤርታፓ ታ ዔሬኔ።

ዎኣሲ ሸኢጲሂ

- 153 ታኣኒ ዎጎ ኔኤኮ ዋሊባኣሴ፤
 ዋኣዪዎ ታኣኮ ዛጌ፤
 ሄሊያኣ ታና ዓውሴ።
- 154 ታ ዛሎ ኔ ሞኦቲንቱ፥ ታና ዓይሴ፤
 ኔ ቃኣሎ ጎይዎ ሸምፔና ታና ናንገሹ።
- 155 ዳምቦ ኔኤሲ ዔያታ ኮዑዋኣሂር
 ዳቂንታ ፑርቶ ዓሶይዳፓ ሃኩኩ።
- 156 ናንገና ናንጋ ጎዳሂዮ! ሚጪንታ ኔኤኮ ዴኤፒኩ፤
 ኔ ዎጎጉዴያ ሸምፔና ታና ናንገሹ።
- 157 ታና ዳውሳ ሞርካ ሚርጌኩ፤
 ታኣኒ ጋዓንቱ ኔኤኮ ዓይሂፃፓ ሸኢኪባኣሴ።
- 158 ዔያታ ቃኣሎ ኔኤሲ ካፑዋሴ፤
 ዬያሮ ጉሙርቂንቱዋ ዓሶ ዛጊ ታ ሻኣኪንቱ።
- 159 ናንገና ናንጋ ጎዳሂዮ!
 ኔኤኮ ዓይሂዎ ታ ናሽካያ ማዔሣ ዛጌ፤
 ኔኤኮ ናንገና ናንጋ ናሹሞና ሸምፔና ታና ጌሃ።
- 160 ኔኤኮ ቃኣላ ጉቤና ጎኔኩ፤
 ኔኤኮ ዲሎ ማዔ ዎጋኣ ናንገና ናንጋያኩ።

ዎኣሲ ዎጎም ዓይሂንቲሂ

- 161 ሱኡጋ ታኣኒ ዔኤቢ ማዲባኣንቱ ዳውሴኔ፤
 ታ ጋዓንቱ ቃኣሎ ኔኤኮ ዓጊቹሞና ቦንቻኔ።
- 162 ዔኤቢ ሚርጌ ዲዒ ዔኩ ዓሲጉዲ
 ቃኣላ ኔኤኮ ታና ዎዛሴኔ።

- 163 ሉኡዙሞ ታ ዒፃኔ፥ ሻሻኣኪንታኔ፤
 ዎጎ ኔኤሲ ጋዓንቲ ናሽካኔ።
 - 164 ኔኤኮ ጂሎ ማዔ ዎጎ ዛሎ
 ፔቲ ኬሊዳ ላንካይ ማይንቲ ታ ኔና ጋላታኔ።
 - 165 ኔኤኮ ዎጎ ናሽካ ዓሶም ሚርጌ ኮሹሞ ዓኣኔ፤
 ዲቃ ባኣዚያ ዔያቶ ባኣሴ።
 - 166 ናንጊና ናንጋ ጎዳሢሮ! ዓውሲያ ኔኤሲ
 ዎዛ ጌሢ ታ ካፓኔ፤
 ኔ ዓይሢያዎ ማዲ ታ ኩንሣንዳኔ።
 - 167 ሼምፓሢ ታኣኮ ኔ ዓይሢያ ካፓኔ፤
 ሚርጌና ዬያ ታ ናሽካኔ።
 - 168 ጎይፃ ታኣኮ ጉቤ ኔ ቤርታ ፔጋኣኬ፤
 ዬያሮ ኔኤኮ ዎጎንታ ዓይሢያንታ ታ ካፓኔ።
- ማኣዶ ዴንቃኒ ሺኢቁንቲ ሺኢጲሢ
- 169 ናንጊና ናንጋ ጎዳሢሮ! ታ ዒላታ ኔ ቤርቶ ሄሎንጎ፤
 ኔ ቃኣሎጉዴያ ማሊ ጳቂሥሢ ታኣም ዒንጌ።
 - 170 ሺኢጲፃ ታኣሲ ኔ ቤርቶ ሄሎንጎ፤
 ኔ ቃኣሎጉዴያ ሄሊ ታና ዓውሴ።
 - 171 ኔ ዎጎ ኔ ታና ዔርዘሢሢ
 ዳንጋ ታኣሲ ጋላታ ዓልቁሳኔ።
 - 172 ዓይሢያ ኔኤሲ ቢያ ጂሎ ሞ ዓይሥሢ ታሢሮ
 ዒንዲርዘ ታኣሲ ኔ ቃኣሎ ዛሎ ዓይናደንጎ።
 - 173 ኔኤኮ ዓይሢያ ታ ዶኦሪሢሢ
 ኩጫ ኔኤሲ ታና ማኣዳኒ ጊኢጌያ ማዎንጎ።
 - 174 ናንጊና ናንጋ ጎዳሢሮ! ዓውሲያ ታ ኔኤሲ ኮዔኔ፤
 ኔኤኮ ዎጋ ታና ዎዛሳያኬ።
 - 175 ታ ኔና ጋላታኒ ሼምፔና ናንጎም!
 ኔ ዎጋኣ ታና ማኣዶንጎ።
 - 176 ዓዳ ዣኣሌ ማራይጉዲ ታ ማዔኔ፤
 ዓይሢያ ታ ኔኤሲ ዋለባኣሢሢ
 ታና ኔ ዓይላሢ ኔኤኒ ኮዔ።

120

ጊዮኔ ኬዞ ዓይኑሞ

ሉኡቃ ዓሲና ጌሻ ዓሲናፓ ቶላኒ ሺኢቁንታ ሺኢጲሢ
 1 ሜታዲ ካራ ታኣኒ ባይዛዎ

- ናንገናናናን ጎዳ ባንሢ ሲላቴኔ፤
ዒዚያእ ታኣኮ ሺኢጲያ ዋይዜኔ።
- 2 ናንገናናናን ጎዳሢየ!
ሉኡቃ ዓሶና ጌሻ ዓሶናፓ ታና ዓውሴ።
- 3 ዓንሢ ጌሺ ማልታ ዓሳ!
ያኦሲ ዓንሢ ዋዋዳቴ ኮሺኬ ጎያንደይ?
ዋዚጉዳ ማቶ ዓንሢዳ ቃሴቴ ታኣሞ ጌኢጋንዳይ?
- 4 ዓዚ ዓንሢ ዓጩ ሂኢጉና ዳካንዳኔ፤
ታሚ ቄንሢናኣ ዓንሢ ዓ ሚቻንዳኔ።
- 5 ቄዳሬ ዓጩ ዳሮ ባኣካ
ጌንሢ ሃሣ ማሸኬ ዳሮ ባኣካ
ሙፒ ዓሲ ማዒ ታ ናንጌሢሮ ታና ባዳዔ!
- 6 ኮሹሞ ዓፃ ዳሬና ዋላ
ሚርጌ ሌዔ ታኣኒ ናንጌኔ።
- 7 ታኣኒ ኮሹሞ ኮኮዳኔ፤
ታኣኒ ኮሹሞ ዛላ ጌሰታኣና
ዔያታ ያልዚ ሃይሴ ሌሊ ዔካኔ።

121

- ፃዮኔ ኬዘ ዓይነቱ**
ያኦሲ ኑና ፑርታፓ ካፓያ ማዒያ
- 1 ታ ሌካ ዳኤፖ ዳኮ ባንሢ ዛጋኔ፤
ሃንጎሹ፣ ታኣኒ ማኣዶ ዓንካፓ ዳንቃንዳየ?
- 2 ማኣዳ ታኣሞ ሙካሢ
ጫሪንጮና ሳያና ማዜ ናንገናናናን ጎዳፓኬ።
- 3 ኔና ካፓሢ ሲያ ዋዳ ጳቹ ዳይ ካፓሢሮ
ቶኮ ኔኤኮ ሃርቻቹ ዔኪ ኔና ሎንሣዓኬ።
- 4 ዓሲራዔኤሌ ካፓሢ ፔቴታ? ጌንዑባሴ፤
ሃውሻኒ ጌይያኣ ላሁባሴ።
- 5 ኔና ካፓሢ ናንገናናናን ጎዳኬ፤
ኔኤኮ ሚዛቆ ዛላ ዓ ሺሲ ማዒ ዓኣኔ።
- 6 ሮኦሮና ዓባ ኔና ሚቻዓኬ፤
ዒባሮናኣ ዓገና ፔቴታዎ ፑርታ ባኣዚ ሃለሳዓኬ።
- 7 ናንገናናናን ጎዳ ፑርታ ባኣዚ ሲያይዳፓ ኔና ካፓንዳኔ፤
ኔኤኮ ሸምፓሢ ኮሺና ዓዚ ካፓያኬ።
- 8 ኔ ማኣራፓ ኬሰኪ ኔኤኒ ዳንዳኣና
ጌንሢ ኔኤኒ ዩካፓ ማዓኣና

ሃኖዋ ማጻፊ ሃጊያ ናገገና ዒ ኔና ካፓንዳኔ።

122

ደዮኔ ከዘ ዓይነቱ ዳውቲ ዓይናዳህ

ዬሩሳሌም ሄርሺ ዓይናዳገቲ ዓይነቱ

1 «ናገገና ናገገ ጎዳህ ማኣሪ ኑ ዓኣደም!» ዔያታ ጋዓኣና ሚርጌና ታና ዎዛሴኔ።

2 ዬሩሳሌም! ካሮና ኔኤኮ ኑኤኒ ጌሊ ጋራ ዔቁኔ።

3 ዬሩሳሌም ካታማ ዎላ ካንህ ጋጋሦናጉዲ ዶዲሺ ማዢንቲ ካታማኬ።

4 ዒሰራዔኤሌም ዒንገገንቲ ዳምቦ ጎይጾጉዲ ናገገና ናገገ ጎዳህም ጋላታ ሺኢሻኒ

ጾኦሲ ፃጸ ቢያ ቡካህ ሃኖ ካታማሎይዳኬ።

5 ዳውቲ ፃጸፓ ካኣታዳ ካኣታ ቢያ ፔኤኮ ደሮም ዎጎ ዎጋኒ ሃኖ ካታማሎይዳ ደዓኔ።

6 ዬሩሳሌም ካታማይዳ ኮሹሞ ዓኣያ ማዓንዳጉዲ ሂዚ ጌይ ጾኦሲ ሺኢቁዎቲ፡- «ኔና ናሽካ ዓሳ ቢያ ጌኢጎንጎ፤

7 ኔኤኮ ከኤሎ ዲፃ ቢያ ኮሺ ማዒ ደጾንጎ፤ ኔኤኮ ካኣቶ ማኣራ ሜታ ባኣያ ኮሺ ናገጎንጎ።»

8 ታኣኮ ዒጊኖንታ ታ ላጎንታሮ «ዬሩሳሌም! ኮሹሞ ኔኤም ማጻጎጎ!» ታኣኒ ጋዓንዳኔ።

9 ዬሩሳሌም! ናገገና ናገገ ጎዳ ማዔ ኑ ጾኦዛህ ማኣሮ ዛሎሮ ኔኤም ኮሺ ሙካንዳጉዲ ታ ኮዓኔ።

123

ደዮኔ ከዘ ዓይነቱ

ጾኦሲ ሚጠገንቲ ማኣዳንዳጉዲ ሺኢቁንቲ ሺኢጲህ

1 ጫሪንጫ ካኣቱም ዶይታ ደዒ ዓኣሂዮ! ኔ ባንህ ታኣኒ ዛጋኔ።

2 ናገገና ናገገ ጎዳ ማዔ ኑ ጾኦዛህዮ! ዓይሎ ማዒ ማዳ ዓቲንቃ ማኣሮ ዓዶ ኩጮ

ለአላ ገንሣ ማእሮ ዲንዶ ኩጮ
 ዘጋሣጉዲ ኔኤኒ ኑና ሚጨገቲ ማኣዳንዳያ ሄላንዳኣና
 ኔ ማኣዳሣ ሙካንዳ ጎይጾማ ኑ ካፓኔ።
 3 ናንገና ናንጋ ጎዳሣዮ! ሚርጌና ኑ ጫሽኪንቴሣሮ
 ሃዳራ ኑና ሚጨገቲ ማኣዳ።
 4 ጾቶሮ ዓሳ ኑና ቦሃ ቦሃፃ
 ጾርጎጮ ዓሳ ኑና ቶኦቻ ቶኦቻፃ
 ሚሺ ኑና ቴኤቄኔ።

124

ዲዮኔ ኬዘ ዓይነቱ ማዕቲ ዓይናዳሣ
 ጾኦሲ ፔ ዓሶ ካፓያ ማዒያ
 1 ናንገና ናንጋ ጎዳ ኑኡና ዋላ ማዒባኣቴ
 ኑ ዋዎይታንዳያ ዓቴይ?
 ዒሰራዔኤሌ ሂዘ ጎጾንጎ፡-
 2 «ዋንዳ ናንገና ናንጋ ጎዳሣ ኑኡና ማዒባኣቴ
 ኑኡኮ ሞርካ ኑና ባይዛኒ ሙኬያና፤
 3 ዳኤፖ ዳጎና ኑጊዳ ዔያታ ዔቄያና
 ሽምፔና ዔቄ ዓኣንቴ ኑና ዔያታ ዔዔኤዳያ ዓቴኔ፤
 4 ዲጳ ኑና ዔኤዲ ጋፔያታንቴ
 ዩይ ሴኤሊንቴ ዳንዳ ዋኣፃ ኑና ሙይ ጋፔያታንቴኬ፤
 5 ሩኡሪና ዳንዳ ዲጳ ፒፂ ኑና ዔኪ ዳንዳናንዳንቴኬ።»
 6 ኑኡኮ ሞርካ ዓጮና ኑና ዳይ ሸኦሎዋጉዲ ካፔ
 ናንገና ናንጋ ጎዳሣ ጋላቲንቶም።
 7 ኑኡኒ ካፒጉዲ ኑኡም ፒሮና ፒራሰካፓ ቶሌኔ፤
 ዩይ ፒራሣ ማቄም፡ ኑኡኒ ዓዲንቴዋዎ ዓቴኔ።
 8 ዩያይዲ ኑና ማኣዳሣ
 ጫሪንጮና ጎጾና ማዕፍ ናንገና ናንጋ ጎዳ ሱንጾኬ።

125

ዲዮኔ ኬዘ ዓይነቱ ማዕቲ
 ጾኦሲ ፔ ዓሶ ጉሙርሳያ ማዒ ካፓ ካፒሣ
 1 ናንገና ናንጋ ጎዳ ጉሙርቃ ዓሳ
 ፔቴታዎ ዓጊፀዋዎ ናኣናና ናንጋ
 ዲዮኔ ዲኮጉዲ ዲዲ ዳዓያኬ።
 2 ዲካ ዩሩሳላሚኮ ኮይሎ ቢያ ዲርቄ ዓኣሣጉዲ
 ሃናኣፓ ዓርቃዎ ዳንዲ ናንገና ናንጋንዳያና

3 ጾሎ ዓሳ ፑርታ ባኣዚ ማዲ ዓርቁዋጉዲ
 ፑርቶ ዓሳ ጾሎ ዓሳ ሳይዳ ዳይ
 ዋይሣንዳሢ ሚርጌ ናንጋዓኩ።
 4 ናንጊና ናንጋ ሳዳሢዮ!
 ኔኤኮ ዓይሢያ ካፒ ኩንሣ
 ኮዥ ዓሶም ኮሺ ባኣዚ ማዳ።
 5 ዋሶ ሳይያ ባንሢ ጊንሣ ማዓ ዓሶ ጋዓንቴ
 ፑርቶ ማዳ ዓሶና ዋላ ጾኦሲ ባይዛንዳኩ።

ኮሹሞ ዒሰራዔኤሌም ማግኒ!

126

ግዮኔ ኬዘ ዓይነቱ

ዲዒንቲጋ ማዓያ ዋዛና ዓይናዲንቴ ዓይነቱም
 1 ናንጊና ናንጋ ሳዳ ኦና ግዮኔ ዔኪ ማህያና
 ዓውቲ ኦኡም ማሌኔ፣ ጎኔ ባኣዚኬ ኦ ጌይባኣሴ።
 2 ዳንጋ ኦኡኮ ሚኢቹ ሌሊ ሚኢጫያ
 ዋዛና ዓይነቱም ሌሊ ዓይናዳያ ማዔኔ፤
 ዬያሮ ሜሌ ዳራ፡-
 «ናንጊና ናንጋ ሳዳ ዳኤፒ ባኣዚ ዔያቶም ማዳኔ» ጌዔኔ።
 3 ጎኔና ናንጊና ናንጋ ሳዳ ሚርጌ ዳኤፒ ባኣዚ ኦኡም ማዳኔ፤
 ዬያሮ ሚርጌና ኦኡኒ ዋዛዳኔ።
 4 ናንጊና ናንጋ ሳዳሢዮ!
 ዒራ ዋርቃዛ ደኦሎ ዛሎይዳ ዓኣ
 ዓሲ ናንጉዋ ደውሎም ዲጶ ዋኣያ ዔኪ ሙካ ዋሮጉዲ
 ኦ ባኮ ኦኡም ማህ ዒንጊ ዋንዴ ኦ ዓኣ ሳይያ ማህ።
 5 ዬኤኪ ዬኤኪ ዜርቁ ዓሳ
 ዋዛና ዒላሺ ዒላሺ ማኣሎ ቡራንዳኔ።
 6 ዜርቆ ዔኪ ዳንዳኣና ዬኤኬ ዓሳ
 ናኣሮ ኬዲ ዋዛና ማዒ ሙካንዳኔ።

127

ግዮኔ ኬዘ ዓይነቱ ሴሎሞኔ ዓይናዳሢ

ጾኦሲኮ ኮሹሞሮ ጋላቲንቴ ጋላታ
 1 ናንጊና ናንጋ ሳዳ ኬኤሢ ማዢባኣንቴ
 ማኣሮ ማዢኔ ጋዓ ዓሳ ላባሢ ጉሪኬ።

ናንጊና ናንጋ ጎዳ ካታሞ ካፒባኣንቲ
 ካታሞ ካፓኔ ጋዓ ዓሳ ጉሪ ላባኔ።
 2 ጉቱ ዲቡርታ ዔቁ
 ጊንሣ ሃሣ ዒባኒ ላሆንዶ ዎዶ ዓአሢ
 ሳዖይዳ ዓአ ናንጎሮ ላቢፃ ጉሪኬ።
 ናንጊና ናንጋ ጎዳ
 ዒዚ ናሽካ ዓሶም ሃውሾ ዒንጋኔ።
 3 ናይ ናንጊና ናንጋ ጎዳ ዒንጋ ባአዚኬ፤
 ጎኔ ፒዜ ማዔ ዓንጅኬ።
 4 ዓሲ ዴጌ ዓአዖ ሾዓ ዓቲንቁ ናይ
 ዖልዚ ዓሲኮ ኩሽካ ዓአ ሂኢሺጉዴያኬ።
 5 ካቲላ ዩያጉዴ ሂኢዠና ኩሜ ዓሲ
 ጎኔና ባሊቲ ዓአ ዓሲኬ፤
 ፔ ሞርኮና ዎላ ካታሞ ጌሎ ካራ ማርማአና
 ባሺንቲ ቦርሲንቱዎያኬ። *

128

ደዮኔ ኬዘ ዓይነቱ

ዖኦሲም ዓይሢንቲና ጴዳ ዓንጅ
 1 ናንጊና ናንጋ ጎዳ ዒጊጫዘንሢና
 ዓይሢዖዎ ካፓዘንሢ ዓንጅንቲያኬ።
 2 ኔ ማዲ ላቤ ጮጋጮ ኔኤሲ ኔኔኒ ሙዓንዳኔ፤
 ኔ ዓንጅንታንዳኔ፥ ዔኤቢ ቢያ ኔኤም ጊኢጋንዳኔ።
 3 ኔኤኮ ላአሌላ ማኣሮይዳ ዓሚ ካፃ ዎይኔ ማዓንዳኔ፤
 ኔኤኮ ናአታአ ካሦ ሙዖ ጎንጎ ዓጮይዳ
 ፑሪ ኬሰኬ ዛይቶ ሪሚቶ ናአቶጉዲ ማዓንዳኔ።
 4 ናንጊና ናንጋ ጎዳ ቦንቺ ዒጊጫ ዓሲ
 ያዲ ዓንጅንታያ ማዓንዳኔ።
 5 ናንጊና ናንጋ ጎዳ ደዮኔፓ ኔና ዓንጅንጎ!
 ዩሩሳላሜኮ ዖርጎቹም ኔ ናንጋ ዎዶ ቢያይዳ
 ኔና ዳዎንጎ!
 6 ኔ ናአቶኮ ናአቶ ሂላንዳአና
 ኔና ዒዚ ዛጊሶንጎ!

* 127:5 ዩና ዎዶና ማዲንታ ጎይዖ፡- ዩይ ዲቦ ዓቲንቆ ናአታ ዓዶና ዎላ ዓዶ ዛሎ ማርማኒ ሙካያ ማዒያ ዒርዛያኬ።

ኮሹሞ ዒሰራዔኤሌም ማዖም!

129

ደዮኔ ኬዘ ዓይነቱ

ዒሰራዔኤሌኮ ሞርኮፓ ቶላኒ ሺኢቂንቴ ሺኢጲሢ

1 ናኣቶፓ ዓርቃዖ ፑርታ ባኣዚ ታና ሄሌኔ፤

ዒሰራዔኤሌ ዓሳ ሂዚ ጎዖንጎ:-

2 «ታኣኒ ናኣቶ ዓኣንቴ ዓርቃዖ

ታኣኮ ሞርካ ታና ሚጨንቴቃይዶ ዳውሳኔ፤

ጋዓንቴ ታና ዔያታ ባሺባኣሴ።

3 ታኣኮ ዙሎ ዔያታ ዠራፓና ጳርቂ

ጎሺ ጎሺኮማጉዲ ሹኬኔ።

4 ናንጊና ናንጋ ጎዳ ቢያ ዎዴ ፒዜኬ፤

ዔያቶ ሚጨንቴሞ ፑርቶ ዓሶ ቱኡዛፓ ታና ዒ ቡሌኔ።»

5 ደዮኔ ዒፃ ዓሲ ቢያ

ቦርሲንቴ ጊንሢም ማዖም።

6 ማኣሪ ዑሢዳ ባቃሌ ማኣቲጉዲ

ሃጊ ዑጉዎዖ ሹሊ ባይቃያ ማዖም።

7 ዔያጉዴ ማኣታ ዎዳ ዓሲኮ ኩጮ ኩሙዎያ

ጌኤቴ ማሂ ቱካኒ ጋዓሢማኣ ኮኣማ ኩሙዎያ ማዖም።

8 ዔያቶኮ ኮይለና ዴንዳ ዓሲ ቢያ ደዮኔኮ ሞርኮ:-

«ናንጊና ናንጋ ጎዳ ዒንሢ ዓንጅንጎ!

ኑኡኒያ ናንጊና ናንጋ ጎዳ ሱንፆና ዒንሢ ዓንጅኔ!»

ዔያቶ ጋዓዓኬ።

130

ደዮኔ ኬዘ ዓይነቱ

ፆኦሲ ማኣዳንዳጉዲ ሺኢቂንቴ ሺኢጲሢ

1 ናንጊና ናንጋ ጎዳሢዮ! ዴኬፒ ዖዪሢዳ ዓኣዖ

ኔ ታና ማኣዳንዳጉዲ ኔ ባንሢ ታ ዒላታኔ።

2 ጎዳሢዮ! ታ ሺኢቃ ሺኢጲያ ዎይዜ፤

ኔ ዎያ ታኣኮ ዒላቶ ዎይዛያ ማዖም።

3 ኔኤኒ ኑኡኮ ጎሞ ኮጲሳያ ማዔቴ

ፆኦኒ ፒዜ ማዒ ሜቶ ዔኩሞ ዓታጎዳይ?

4 ጋዓንቴ ኔና ኑ ቦንቻንዳጉዲ

ኑኡኮ ጎሞ ኔኤኒ ዓቶም ጋዓኔ።

- 5 ታኣኒ ናንገና ናንገ ጎዳ ጳቂሢ ካፓኔ፤
 ታ ሹሞፓሢያ ዒዛ ገቢ ካፓኔ፤
 ዒዛኮ ቃኣሎዋ ታ ጉሙርቃኔ።
- 6 ዛቤ ካፓ ዓሲ ሳዓ ካራንዳጉዲ ኮዓያይዳፓ ባሹ
 ታኣኒ ናንገና ናንገ ጎዳ ጳቂሢ ካፓኔ።
- 7 ዒሰራዔኤሌ! ዒዛኮ ናሹማ ናንገና ናንገያ ማዔሢሮ
 ዓሲ ዓውሳኒያ ዎልቄ ዓኣያ ማዔሢሮ
 ናንገና ናንገ ጎዳይዳ ሃገ ዎዛ ጌሢ ጉሙርቄ።
- 8 ናንገና ናንገ ጎዳ ፔኤኮ ዴሮ ዒሰራዔኤሌ
 ዔያቶኮ ጎሞ ቢያይዳፓ ዓውሳያኬ።

131

ዒዮኔ ኬዘ ዓይነቱ ማግኒት ዓይናዳሢ

- ፆኦሲ ጉሙርቄሢ
- 1 ናንገና ናንገ ጎዳሢዮ! ታ ዒኖይዳ ፆቶርሙሞ ባኣሴ፤
 ዓኣፓ ታኣኮ ፆቶርሙሞና ዛጌ ጎይሢ ባኣሴ፤
 ዒና ታኣኮ ኮይሱዋ ዴኤፓቶ ኮዒባኣሴ፤
 ታኣሞ ሃናኑዋ ባኣዚ ሄላኒ ታ ጨኢዲንቲባኣሴ።
- 2 ዳንሢፓፓ ጉኡጳ ናይ ዒንዶኮ ዳዳ ሊቶ ጌይ ዴዓሢጉዲ
 ታኣኒ ዔኤቢያ ጎዑዋዎ ዘቲ ጌዔኔ።
- 3 ዒሰራዔኤሌ! ሃሢፓ ዓርቃዎ ናንገና ናንገ ሄላንዳኣና
 ናንገና ናንገ ጎዳሢ ጉሙርቄ ናንጌ!

132

ዒዮኔ ኬዘ ዓይነቱ ማግኒት

- ጌኤዢ ማኣሮ ዛሎ ዓይናዳንቲ ዓይነቱ ማግኒት
- 1 ናንገና ናንገ ጎዳሢዮ!
 ታና ዳውቲያ ማሊ ጳቂሢዎ፤
 ዒዚ ማታዲ ዓኣሢ ማቶዋ ቢያ ሃዳራ ዋሊፓ።
- 2 ናንገና ናንገ ጎዳሢዮ! ኔኤና ዎላ ዒ ጨኣቄ ጨኣቄሞና
 ቢያ ባኮ ዳንዳዓ፣ ያይቆኑቤ ፆኦዛሢ፣ ኔኤሞ
 ሂዚ ጌይ ዒ ጨኣቄ ናኣቤ ናኣቦ ማሊ ጳቂሢ፡-
- 3-5 «ናንገና ናንገ ጎዳሢ ማግኒት ታኣኒ ማኣንዳኣና
 ቢያ ባኮ ዳንዳዓ ያይቆኑቤ ፆኦሲ ማኣሪ ታ ኮሻንዳኣና
 ታ ኬኤዎ ታኣኒ ጌላዓኬ፤

130:8 ማቲ. 1:21፤ ቲቶ 2:14።

- ታ ዓርሶይዳኣ ታኣኒ ላሃዓኬ፤
ሃውሽ ጊንጾ ጋዓ ባኣዚያ ታ ጊንዓዓኬ።።»
- 6 ዔፕራታይዳ ኑ ዓኣዖ
ዒዚ ጫኣቁሞ ጫኣቁ ሳኣዲኖ ዛሎ ኑ ዋይዜኔ፤
ቁሪያትይዓሪሪሜይዳ ዬያ ሳኣዲኖ ኑኡኒ ዳንቄኔ።።
- 7 ዬካፓ ኑኡኒ፡- «ናንጊና ናንጋ ጎዳሢኮ ማኣሪ ኑ ዓኣዲም፤
ቶካ ዒዛኮ ሄርቃ ሳያይዳ ሂርኪ ጌይ ኑ ዒዛም ዚጎም» ጌዔኔ።።
- 8 ናንጊና ናንጋ ጎዳሢዮ!
ኔኤኮ ዋልቆ ፔጋሲ ዔርዛያ ማዔ
ጫኣቁሞ ሳኣዲኖና ዋላ ኔኤኒ ሃውሻ ቤዞ
ኔኤኮ ጌኤኸ ማኣሪ ጌሌ።።
- 9 ኔኤም ማዳ ቁኤሳ ዲሎ ማዶ ማዶም!
ኔኤም ጉሙርቁንታያ ማዔዘንሢ ዋዛና ኔና ቦንቺ ዓይናዶም!
- 10 ኔ ዓይላሢ ዳውቴ ጋይቴ ጌይጋፓ
ኔኤኒ ካኣታሢኒ ቲሽኪ ዶኦሚሢ ሃሺፖ።።
- 11 ናንጊና ናንጋ ጎዳ ዳውቴም
ሂዚ ጌይ ላኣሚንቱዋ ጫኣቁሞ ጫኣቄኔ፡-
«ኔ ናኣቶፓ ፔቴሢ ታኣኒ ካኣታሢንዳኔ፤
- 12 ኔኤኮ ናኣታ ታኣኒ ዔያቶም ጫኣቁ ጫኣቁሞንታ
ታ ዔያቶ ዓይሢ ባኮንታ ካፒ ኩንሣያ ማዔቴ
ዔያቶኮ ናኣታ ሃሢ ኔና ሄሊሲ
ናንጊና ካኣታዲ ናንጋያ ማዓንዳኔ።።»
- 13 ናንጊና ናንጋ ጎዳ ዲዮኔ ፔኤም ማሂ ዶኦሬኔ፤
ዒኢካ ማኣሪ ማሂ ናንጋኒያ ኮዔኔ።።
- 14 ሃና ታኣኮ ናንጊና ሃውሽ ናንጎ ቤሲኬ፤
ሃይካ ታኣኒ ናንጋኒ ሚርጌ ኮዔያታሢር
ሃኖ ቤዞ ታ ማኣሪ ታኣኒ ማሄኔ።።
- 15 ዲዮኔ ታ ኮሽ ዑሣ ዓኣሢ ዓንጃንዳኔ፤
ማንቆ ዓሶ ሙኡዚ ታኣኒ ሚሻንዳኔ።።
- 16 ቁኤሶ ታኣኒ ዳቁንታ ማኣዖጉዲ ማይሳንዳኔ፤
ዒኢካ ናንጋ፣ ጉሙርቁንታ ዓሳኣ ዋዛና ዓይናዲንዳኔ።።
- 17 ዳውቴ ዜርፃፓ ካኣቲ ማዓያ ታኣኒ ኬሳንዳኔ፤
ታኣኒ ዶኦሚ ካኣታሢሢም ዴኤፒ ዋልቁ ታ ዒንጋንዳኔ።።
- 18 ዒዛኮ ሞርኮ ታኣኒ ቦርሲንቲ ዓፒላንቲኖ ማይሳንዳኔ፤

132:10 2ዖኦሲ. ዓሃኬ 6:41-42። 132:11 2ሳሙ. 7:12-16፤ 1ዖኦሲ. ዓሃኬ 17:11-14፤ ዓይኑ. 89:3-4፤ ዳኪ. ማዶ 2:30። 132:17 1ካኣቶ. ማ 11:36።

ጋዓንቲ ዒዛኮ ቶኦካ ታኦኒ ዓጋንዳ ቦንቾ ባካ ዓኣፓ ዲካያ ማዓንዳኔ።

133

ዒዮኔ ኬዘ ዓይነቱ ዳውቲ ዓይናዳህ

ፔቱሞና ናሽኪንቲ ናንጊህ ዛላ ዓይናዳንቲ ዓይነቱ

1 ያኦሲ ዓሳ ሞላ ፔቱሞና ናንጋዛ

ሚርጌና ኮሺኬ፥ ሞዛሳያኬ።

2 ዓኣሮኔኮ ቶኦካ ሞሆዛ

ቡኡጮ ባኣያና ጌይ

ዓፒሎ ማጫሮ ሃላኒ ሻኣዲ ዴንዳ

ኮሺ ሳውሞ ዓኣ ሪሚቶ ዛይቶ ጉዴያኬ።

3 ዬያጉዲ ሃሃ

ሄርሞኔ ዲካፓ ዒዮኔ ጌሚሮ ጎኦባ ያዳ ያልኮጉዲኬ፤

ናንጊና ናንጋ ጎዳህ ባይቁሞያ ማዒ ናንጋ

ኮሺ ናንጊንታ ዓንጅንታ ዒኣካ ማዓንዳጉዲ ዓይህኔ።

134

ዒዮኔ ኬዘ ዓይነቱ

ያኦሲ ጋላታኒ ዓይናዳንታ ዓይነቱ

1 ዒንህ ናንጊና ናንጋ ጎዳሞ ማዳ ዓይላ

ዲሞና ጌኤዢ ማኣራ ዔቂ ዒዛም ማዳ ዓሳ ቢያ

ሃኒ ዬይ ናንጊና ናንጋ ጎዳ ጋላቱሞ።

2 ጌኤዢ ማኣሮይዳ ኩጮ ዒንህኮ ሌካ ዔቂሲ

ናንጊና ናንጋ ጎዳህ ጋላቱሞ።

3 ጫሪንጮና ሳዖና ማዢ፥ ናንጊና ናንጋ ጎዳህ

ዒዮኔፓ ዒንህ ዓንጅንጎ!

135

ጋላታ ዓይነቱ

1 ናንጊና ናንጋ ጎዳ ጋላቱሞ፤

ዒንህ፥ ናንጊና ናንጋ ጎዳኮ ዓይላ

ዒዛኮ ሱንዖ ቦንቾ ጋላቱሞ።

2 ኑ ያኦካህኮ ጌኤዢ ማኣሮይዳ

ናንጊና ናንጋ ጎዳኮ ማኣሮ ጋሮይዳ

- 3 ሙኪ ዔቂ ማዶ ማዶ ዓሳ ዒዛ ጋላቱዋቱ።
- 3 ዒዚ ኮሺ ማዔሢሮ ናንገና ናንጋ ጎዳ ጋላቱዋቱ፤
ዒዚ ሚጨገጎታያ ማዔሢሮዋ ሱንፆ ዒዛሲ ሲንቺ ዓይናዲዋቱ።
- 4 ዒዚ ያይቆኑቤ ፔኤም ማሂ
ዒሰራዔኤሌ ፔ ሚኢሼ ማሂ ዶኦሬ።
- 5 ናንገና ናንጋ ጎዳ ዴኤፒታሂ
ኑ ጎዳ ሜሌ ፆኦዘፓ ቢያ ባሻያ
ዴኤፒ ፆኦሲ ማዔሢ ታ ዔራ።
- 6 ናንገና ናንጋ ጎዳ ጫሪጎጮይዳ ሳፆይዳ
ዬያጉዲ ዴኤፖ ባዘይዳ
ኮይሴ ባኣዚ ቢያ ዒ ማማዳያኩ።
- 7 ዒርዘና ዓኣ ሻኣሬ ሳፆኮ ጋፓፓ ዔኪ ዬዓኔ፤
ዒራ ዋርቃኣና ዜኤሊንሂ ዒዚ ዜኤሊንሂሳኔ፤
ዠባርዋ ፔ ኮናፓ ኬሲ ዳካ።
- 8 ጊብፄ ዓጮይዳ ዓሶንታ ቆሎንታኮ
ቶይዶ ናኣቶ ዋዴሂ ዒዛኬ።
- 9 ጊብፄ! ኔ ጊዳ ኔኤኮ ካኣቲንታ
ዒዛም ማዶ ዓሶ ቢያሂዳ ሜቶ ዓጋኒ
ፔ ዋልቆና ማዲንታ ባኣዘንታ
ዲቃሂ ሄርሺሳ ባኣዚ ናንገና ናንጋ ጎዳ ዶኩ።
- 10 ዒዚ ሜሌ ሚርጌ ዴሬ ዋዲ ኩርሴ፤
ዴኤፖ ዴኤፖ ካኣቶዋ ዋዴ።
- 11 ዓሞራ ዓሶ ካኣቲ ሲሆኔ
ባኣሳኣኔ ዓሶ ካኣቲ ፆኦጌ
ካኣናኔ ዓጮ ካኣቶዋ ቢያ ዒዚ ዋዴ።
- 12 ዬያቶ ዓሶኮ ሳፆ ፔ ዴሮ ዒሰራዔኤሌም
ዴኔ ማሂ ዒዚ ዒንጌ።
- 13 ናንገና ናንጋ ጎዳሂዮ! ሱንፆ ኔኤኮ ናንገና ናንጋያኩ፤
ዋዶና ዋዶና ኬሰካ ዓሳ ቢያ ኔና ዋሉዋ ጰቂሃንዳ።
- 14 ናንገና ናንጋ ጎዳ ፔ ዴሮም ፒዜ ዋጌ ዋጋ፤
ዒዛም ማዶ ዓይሎማኣ ሚጨገጎታ።
- 15 ሜሌ ዴሮኮ ፆኦዘ
ቢራ ዓንገና ዋርቁናይዳፓ ዲይ ኮሻናያኩ።
- 16 ዬያ ፆኦዘኮ ዳንጋ ዓኣፆ ጌሰቱዋያ
ዓኣፒ ዓኣፆዋ ዴንቁዋያኩ።
- 17 ዋይዚያ ዓኣ፤ ጋዓንቴ ዋይተዋሴ፤
ፔ ሲኢ ዴና ዑኡሲ ዔካኒ ዳንዳዑዋያኩ።
- 18 ዬያቶ ኮሼ ዓሶንታ ጉሙርቃ ዓሳኣ ቢያ

- 19 ዩያቶ ያኦዘጉዲ ማዒ ዓቶንሳ።
 19 ዒሰራዔኤሌ ዳሬዮቴ!
 ናንጊና ናንጋ ጎዳ ጋላቱዋቴ፤
 ዒንሢ፡ ናንጊና ናንጋ ጎዳም ማዳ ቄኤሳ!
 ናንጊና ናንጋ ጎዳሢ ጋላቱዋቴ።
- 20 ዒንሢ ሌዊ ፃጸ ማዔ ዓሳ!
 ናንጊና ናንጋ ጎዳ ጋላቱዋቴ፤
 ዒንሢ፡ ናንጊና ናንጋ ጎዳሢ ሶንቻ ዓሳ ቢያ ዒዛ ጋላቱዋቴ።
- 21 ናንጊና ናንጋ ጎዳ ጸዮኔይዳ ጋላቱዋቴ፤
 ዒዚ ናንጋ፡ ዩሩሳላሜይዳኦ ጋላቱዋቴ።

ናንጊና ናንጋ ጎዳ ጋላቱዋቴ!

136

ጋላታ ዓይኑም

- 1 ዒዚ ኮሺ ማዔሢሮ ናንጊና ናንጋ ጎዳ ጋላቱዋቴ፤
 ዒዛኮ ሚጪንቲፃ ናንጊና ናንጋያኬ።
- 2 ያኦዘኬ ጌይ ካኦሽኮ ባኮይዳፓ ቢያ ባሽ ማዔ ያኦዛሢ ጋላቱዋቴ፤
 ዒዛኮ ሚጪንቲፃ ናንጊና ናንጋያኬ።
- 3 ጎዳቶኮ ቢያ ጎዳ ማዔ ያኦዛሢ ጋላቱዋቴ፤
 ዒዛኮ ሚጪንቲፃ ናንጊና ናንጋያኬ።
- 4 ዒዚ ፔኤሮ ሌሊ ዳኤፒ ዲቃሢ ሄርሺሳ ባኦዚ ማዳኔ፤
 ዒዛኮ ሚጪንቲፃ ናንጊና ናንጋያኬ።
- 5 ዒ ፔ ዔራቶና ጫሪንጮ ማገኛ፤
 ሚጪንቲፃ ዒዛኮ ናንጊና ናንጋያኬ።
- 6 ዳኤፖ ዋኦይዳ ሳዖ ሶኦሰልቁ ዒዚ ደቄኔ፤
 ሚጪንቲፃ ዒዛኮ ናንጊና ናንጋያኬ።
- 7 ዳኤፖ ዳኤፖ ጫሪንጮ ፖዖ ዒ ማገኛ፤
 ሚጪንቲፃ ዒዛኮ ናንጊና ናንጋያኬ።
- 8 ዓቢ ሮኦራ ፖዓንዳጉዲ ዓይሢኔ፤
 ሚጪንቲፃ ዒዛኮ ናንጊና ናንጋያኬ።
- 9 ዓጊኖንታ ዠኦጋሢንታ ዲማ ፖዓንዳጉዲ ዓይሢኔ፤
 ሚጪንቲፃ ዒዛኮ ናንጊና ናንጋያኬ።
- 10 ጊብፄ ዓጮ ዓሶኮ ቶይዶ ናኦቶ ዒ ዋዳኔ፤

136:1 1ዖኦሲ. ዓሃኬ 16:34፤ 2ዖኦሲ. ዓሃኬ 5:13፤ 7:3፤ ዒ.ከ. 3:11፤ ዓይኑ. 100:5፤
 106:1፤ 107:1፤ 118:1፤ ዓ.ር. 33:11። 136:5 ማኸ. ማፃ 1:1። 136:6 ማኸ.
 ማፃ 1:2። 136:9 ማኸ. ማፃ 1:16።

- ሚጠንቅቅ ዓዛኮ ርንገና ርንገያኩ።

11 ዒሰራዔኤሌ ዳሮ ገብፂ ዓጫፓ ዒዚ ዔኪ ኩሴኔ፤

ሚጠንቅቅ ዓዛኮ ርንገና ርንገያኩ።
- 12 ዒዛኮ ዋልቁ ዓኣያ፣ ሃሣ ቢታንቶ ዓኣያ ማዒያና ዬያይዳኔ፤

ሚጠንቅቅ ዓዛኮ ርንገና ርንገያኩ።
- 13 ዞቁ ባዞ ዒዚ ፓቄኔ፤

ሚጠንቅቅ ዓዛኮ ርንገና ርንገያኩ።
- 14 ዒሰራዔኤሌ ዓሶ ባዞኮ ባኣኪና ዳኬኔ፤

ሚጠንቅቅ ዓዛኮ ርንገና ርንገያኩ።
- 15 ገብፂ ካኣቲንታ ሶሎ ዓሶንታ ዞቁ ባዞ ዱኡኬኔ፤

ሚጠንቅቅ ዓዛኮ ርንገና ርንገያኩ።
- 16 ፔኤኮ ዳሮ ዓሲ ርንገጥ ዳውላ ዔኪ ሃንቴኔ፤

ሚጠንቅቅ ዓዛኮ ርንገና ርንገያኩ።
- 17 ዴኤፖ ዴኤፖ ካኣቶ ዒ ዋዴኔ፤

ሚጠንቅቅ ዓዛኮ ርንገና ርንገያኩ።
- 18 ዋልቆና ዓኣ ካኣቶ ዲርካቺ ባይዜኔ፤

ሚጠንቅቅ ዓዛኮ ርንገና ርንገያኩ።
- 19 ዓሞራ ዓሶ ካኣቲ፣ ሲሆኔ ዒዚ ዋዴኔ፤

ሚጠንቅቅ ዓዛኮ ርንገና ርንገያኩ።
- 20 ባኣሳኔ ዓሶ ካኣቲ፣ ሶኦኔ ዒ ዋዴኔ፤

ሚጠንቅቅ ዓዛኮ ርንገና ርንገያኩ።
- 21 ዬያ ዓሶኮ ሳያ ቢያ ፔ ዳሮሞ ዴኔ ማሂ ዒንገኔ፤

ሚጠንቅቅ ዓዛኮ ርንገና ርንገያኩ።
- 22 ፔ ዓይላሂ ዒሰራዔኤሌ ዒዚ ዳካልሴኔ፤

ሚጠንቅቅ ዓዛኮ ርንገና ርንገያኩ።
- 23 ሶሎና ኑ ባሺንቴያና ኑና ዒ ዋሊ ሃሺባኣሴ፤

ሚጠንቅቅ ዓዛኮ ርንገና ርንገያኩ።
- 24 ኑ ሞርኮ ኩጫፓ ቶሊሲ ኑና ዒዚ ዓውሴኔ፤

ሚጠንቅቅ ዓዛኮ ርንገና ርንገያኩ።
- 25 ማዢንቲሞ ቢያ ሙኡዚ ዒዚ ዒንጋኔ፤

ሚጠንቅቅ ዓዛኮ ርንገና ርንገያኩ።
- 26 ጫሪንጮ ሶኣዛሂ ጋላቲዋቲ፤

ሚጠንቅቅ ዓዛኮ ርንገና ርንገያኩ።

136:10 ኬሲ. ማፃ 12:29። 136:11 ኬሲ. ማፃ 12:51። 136:15 ኬሲ. ማፃ 14:21-29። 136:19 ፓይ. ማፃ 21:21-30። 136:20 ፓይ. ማፃ 21:31-35።

137

- ዲዲንቲ ዳንዲ ዓሳ ዲሰራዔኤሌ ዓሰኮ ዩኤፖ
- 1 ኑኡኒ ባብሎኔ ዎሮ ዓጫ ዳዒ
 ዲዮኔ ማሊ ጳቂህዎ ዩኤኤኔ።
 - 2 ዲኢካ ዓሃይያ ጌይንታ ማያ ዑፃ
 ጎኦኦ ኑኡኮ ኑ ሱዲ ሃሼኔ።
 - 3 ኑና ዲዲ ዔኪ ዳንዲ ማታሳ ዓሳ
 ዓይኑሞ ዓይናዲ ኑ ዔያቶ ዎዛሳንዳጉዲ
 «ዲዮኔይዳ ዲንህ ዓይናዳ ዓይኑሞፓ ፔቴ ሂንዳ ዓይናዲሞቴ»
 ጌዔኔ።
 - 4 ናንጊና ናንጋ ጎዳ ቦንቺ ዓይናዳ ዓይኑሞ
 ዓሲ ዓጪዳ ዳይ ዎይቲ ኑ ዓይናዳንዳይ?
 - 5 ዩሩሳላሜ! ኔና ታ ዎሌያ ማዔቴ
 ታኣኮ ጎኦኦ ዎርቃ ማዛቆ ኩጫ ዘዲ ዓቶሞ።
 - 6 ዩሩሳላሜ! ታ ኔና ጳቂሁሞ ዓቲ፥ ጊንህ ሃህ
 ታና ጋፒንህ ዎዛሳን ማዓህ ኔና ማሂ ታ ዔኪባኣቴ
 ዲንዲርዛ ታኣኮ ሆንጎላህና ዎላ ዓዲንቶሞ።
 - 7 ናንጊና ናንጋ ጎዳህዮ! ዩሩሳላሜ ዓዲንቲ ዓቦና
 ዔዳኦሜ ዓሳ ማዳ ባኮ ማሊ ጳቂህ፤
 «ሹጮና ከልቆና ዲያ ፃጳፓ ቱጊ ደይሱሞቴ!» ጌይ
 ዔያታ ዲላቴ ዲላቶ ጳቂህ።
 - 8 ባብሎኔ! ኔኤኒ ሻሂንቲ ባይቃንዳኔ፤
 ኔኤኒ ኑጊዳ ማዳ ጌኖ ማዳ ቢያህ ዛሎ
 ኮሞ ኮፃህ ጋላቲንቴያኩ።
 - 9 ኔኤኮ ናኣቶ ዔኪ ዔኪ
 ላሎ ሹጮይዳ ጳዲሲ ዳኣፃህ ጋላቲንቴያኩ።

138

- ዳውቴ ዓይኑሞ
- ጋላታ ሺኢጳህ
- 1 ናንጊና ናንጋ ጎዳህዮ! ጉቤ ዲኔፓ ታ ኔና ጋላታኔ፤
 ማሌ ያኣዛ ዛጋንቴ ኔኤሞ ታኣኒ ጋላታ ዓይኑሞ ዓይናዳ።
 - 2 ኔኤኮ ናንጊና ናንጋ ናሹሞንታ ፒዙሞንታ
 ኔኤኮ ሱንፆ ጳኤፑሞንታ፥ ሃህ ኔ ዓይህዮ ፑኡፑሞንታ
 ፔጋሲ ኔኤኒ ታኣሞ ዳዌሂር

137:8 ዮሃ. ያፔ. 18:6።

- ኔኤም ዲማዳ ኔኤኮ ገኔኮ ማኣሮ ባንሢ ሺሪ
ሂርኪ ገይ ዘገ ዘገ ታ ኔና ጋላታኔ።
- 3 ታ ኔና ዔኤላዛ ኔ ታኣኮ ሺኢዲያ ዋይዜኔ፤
ኔ ዲዲሞና ኔኤኒ ታና ዲዲሼኔ።
- 4 ናንገና ናንጋ ጎዳሢዮ!
ኔ ገዔ ቃኣሎ ዔያታ ዋይዜሢሮ
ዓጮ ካኣታ ቢያ ኔና ጋላታኔ።
- 5 ኔ ማዳ ባኮ ቢያሢንታ
ኔኤኮ ዴኤፖ ቦንቸንታሮ
ዓይናዲ ዔያታ ዴኤፒሳኔ።
- 6 ኔኤኒ ሌካ ዴገ ቤዛ ዓኣያ ማዔቴያ
ሂርኬ ማዔ ቦሂንቴዘንሢ ኔ ዛጋኔ፤
ያቶሮ ዓሶ ሃኬ ዓኣ ቤዛ ዓኣያ ኔኤኒ ዔራኔ።
- 7 ታኣኒ ሜቶኮ ባኣኮ ገሌቴያ
ኔኤኒ ሼምፔና ታና ገሢኔ።
- ዳጋዲ ታገዳ ዔቁ ሞርኮ ኔኤኒ ማካኔ፤
ኔኤኮ ዴኤፖ ዋልቆና ኔ ታና ዓውሳኔ።
- 8 ናንገና ናንጋ ጎዳ ታኣም ማሌ ማሊያ ኩንሣንዳኔ፤
ናንገና ናንጋ ጎዳሢዮ! ኔኤኮ ናሹማ ናንገና ናንጋያኬ፤
ኔ ኩጮና ኔኤኒ ማገፍሢ ዋሊ ሃሺፖ።

139

ዓይነቱ ስኡጋሢ ዓይሣ ጎይያ ዓይናዲንታ ዳውቴ ዓይነቱ

- ያኣሲ ቢያ ዋዴ ዑኬ ማዲያ
- 1 ናንገና ናንጋ ጎዳሢዮ! ኔ ታና ሙሪ ዛገ ዔሬኔ።
- 2 ታኣኒ ዴዓኣና ማያም ዔቃኣና ኔ ታና ዔራኔ፤
ታኣኮ ማሊያ ሃኬ ዓኣያ ኔኤኒ ዔዔራኔ።
- 3 ታ ሃንታ ቤዘንታ ዴይ ሃውሻ ቤዘ ኔ ዋሉዋሴ፤
ታ ማዲ ሃንታ ባኮ ቢያ ኔ ዔራኔ።
- 4 ናንገና ናንጋ ጎዳሢዮ! ታኣኒ ሃገ ኬኤዘንዳሢኮ ቤርታ
ታ ዋዚ ጋዒ ጋዒያ ኔ ዔራኔ።
- 5 ታ ኮይሎይዳ ቢያ ኔኤኒ ዓኣኔ፤
ኔ ኩጮና ጎኣቢ ፑርታፓ ኔ ታና ካፓኔ።
- 6 ኔኤኮ ዔራታ ኮሺ ጨሊሊ ጋዓያኬ፤
ታኣኒ ማሊ ጳቂሢ ዔራንዳሢኮ ዑሣኬ።
- 7 ዓንኮዋ ታ ዓኣዲ ኔኤፓ ቶላኒ ዳንዳዑዋሴ፤
ኔ ቤርታፓ ዓንኮዋ ታ ዴንዲ ፑናንዳ ቤሲ ባኣሴ።

- 8 ጫሪንጮ ታ ከሰኩቶ ኔኤኒ ዒሊካ ዓኣኔ፤
 ጎዖ ዴሞ ዓሶ ኮይላ ታኣኒ ጌሌቴያ ኔ ዒሊካኬ።
- 9 ዓባ ከሰካ ባንዖ ታኣኒ ባራኒ ዴንዴቴያ
 ባዘ ዴኤፖ ሶፒ ዴንዲ ታ ናንጌቴያ፤
- 10 ዒሊካ ኔ ዓኣያ ማዒ ኔ ኩቻ ኔ ታና ጎቺ ሃንቲሳኔ፤
 ኔኤኮ ማዘቆ ኩጮና ኔ ታና ዶዲሺ ዓርቃኔ።
- 11 ታኣኒ፡- «ዲማ ታና ዓኣቺ ዓይሳንዳኔ፤
 ታ ኮይላ ዓኣ ፖዓ ዲሞንጎ» ጌዔቴያ፤
- 12 ዲማ ኔኤኮ ዓኣፖ ዴንቂ ላኣጉሞሴ፤
 ዲማ ኔ ኮይላ ሮኦሪጉዲ ፖዓኔ፤
 ኔ ኮይላ ዲሚንታ ሮኦሪንታ ዲማዲሞያኬ።
- 13 ታና ጉቤና ማዠህ ኔናኬ፤
 ታ ዒንዶ ጎጶ ታ ዑዖ ሞላ ካንህ ማዠህ ኔናኬ።
- 14 ዲቃህ ሄርሺሳ ጎይህና ታ ማዠንቴህሮ ታ ኔና ጋላታኔ፤
 ኔኤኮ ማዳ ቢያ ሄርሺሳ ዲቃህያ ማዔህ ጋፒ ታኣኒ ዔራኔ።
- 15 ጴዲሞያ ማዔ ዓኣሺንቴ ቤዛ ታ ማዠንቴያና
 ጎዖ ዴሞ ማዔ ቤዘይዳኣ ታ ዑፃ ፔቴይዳ ሞላ ካንህንቴያና
 ታ ዑፃ ኔ ዓኣፓፓ ዓኣቺንቴ ማዠንቴያቴሞሴ።
- 16 ታ ዒንዶ ጎጶ ታኣኒ ሱጉህ ዓኣንቴ ኔ ታና ዴንቂኔ፤
 ታኣሞ ጎዖና ኬላ ሃጊ ፔቴ ጌይ ዓርቂንቴሞንቴ
 ኔኤኮ ማዘጋቦይዳ ፃኣፒንቴ ዴዔኔ።
- 17 ዖኦሲዮ! ኔ ታኣሞ ማላ ማሊፃ ኮሺ ዴኤፒኬ፤
 ፓይዳኣ ኮሺ ዲባያኬ።
- 18 ኔ ታኣሞ ማላ ማሊፃ ፓይዲንቴቴ
 ባዚ ዓቺ ማኣሻላፓ ባሻያኬ፤
 ታኣኒ ገንዒ፥ ገንህ ጴጫኣናኣ
 ሃይሾ ኔ ታ ኮይላ ዓኣ ጎይሃኬ።
- 19 ዖኦሲዮ! ፑርቶ ዓሶ ባይዜቴራ!
 ዒንህ ሃይ፥ ሱጉዖ ዴኤቤ ዓሳ ታ ኮይላፓ ባይቁሞቴ!
- 20 ዔያታ ኔኤሞ ፑርታ ጌኤሲ ጌሰታኔ፤
 ኔኤኮ ሞርኬ ማዒ ኔ ሱንዖ ፑርቲሲ ዔያታ ደንካኔ።
- 21 ናንገና ናንጋ ጎዳሂዮ! ኔና ዒፃ ዓሶ ዒናፓ ታ ዒፃዓዳ?
 ኔኤሞ ጌኤታዳ ዓሶ ኮሺ ታኣኒ ሻኣኪንታዓዳ?
- 22 ጉቤ ዒናፓ ጋፒ ታ ዔያቶ ዒፃኔ፤
 ታ ሞርኬ ማሂ ታ ዔያቶ ዛጋኔ።
- 23 ዖኦሲዮ! ታና ሙሪ ዛጊ፥ ታ ዒኖ ዴንቂ፤
 ታ ሞዘሞታቴያ ዛጊ፥ ታ ሜታዲ ማላ ማሊፃ ዔራ።

24 ፑርታ ጎይሢ ማላ ዒኔ ታኣኮ ዓኣቴ ዛጊ ዴንቄ፤
ናንጊና ናንጋ ጎይፆ ታ ዓኣዳንዳጉዲ ታና ዳቆ።

140

ዓይኑሞ ሱኡጋሢ ዓይሣ ጎይፆ ዓይናዲንታ ዳውቴ ዓይኑሞ

ፆኦሲ ማኣዳንዳጉዲ ሸኢቁንታ ሸኢጲሢሢ

1 ናንጊና ናንጋ ጎይሢሢ! ፑርቶ ዓሶፓ ታና ዓውሴ፤

ጌኖ ማዳ ዓሶ ኩጫፓኣ ታና ቶሊሴ።

2 ዔያቶኮ ዒና ፑርታ ማዳንዳፆ ማሊ ቱካኔ፤

ቢያ ዎዴ ዑራ ሌሊ ዔያታ ማኸኔ።

3 ዔያቶኮ ዒንዲርዛ ፑርታ ሾኦሽጉዲ ዳዳዓያኬ፤

ዔያታ ዳንጋፓ ኬሳ ባካ ዶርባ ሾኦሽ ማርዜኬ።

4 ናንጊና ናንጋ ጎይሢሢ! ፑርቶ ዓሶ ኩጫፓ ታና ዓውሴ፤

ታኣኮ ቶኮ ቡኡዳኒ ማላ ጌኖ ዓሶፓ ቶሊሴ።

5 ፆቶር ዓሳ ፒር ታኣሞ ዓኣቺ ፒሬኔ፤

ፒር ሱሲ ታና ቡኡዳኒ ዔያታ ታ ቤርታ ዎሂኔ፤

ፒራሢና ታና ዓይሣኒ ታኣኒ ሃንታ ጎይፆ ዔያታ ፒሬኔ።

6 ናንጊና ናንጋ ጎይሢ፤ «ታኣኮ ኔኤኒ ፆኦሲኬ» ታ ጋዓኔ፤

ናንጊና ናንጋ ጎይሢሢ! ታ ኔና ሸኢቁ ዒላታ ዒላቶ ዎይዜ።

7 ዎልቁና ዓኣፆ ማዒ ታና ዓውሳ

ናንጊና ናንጋ ታ ጎይ ማዔ ፆኦዛሢሢ!

ፆሎ ዓሶና ጊቲማ ማዒ ሂኢዣ ታና ዓይዲዎጉዲ ቃዜ።

8 ፑርቶ ዓሶሞ ዔያታ ኮዓ ባኮ ዒንጊፖ፤

ዔያታ ማሊ ቱካ ቱኡዘ ዔያቶሞ ሃኒሲፖ።

9 ታና ማንጌ ታ ሞርካ ታና ባሻንዳጉዲ ማሃፖ፤

ዔያታ ማዳኒ ማላ ጌኖ ማዳ ዔያቶ ባንሢ ሸርሹ።

10 ታሚ ቁንሢ ዔያቶ ዑፃ ኬዶሞ፤

ዬካፓ ዔያታ ቶሊ ኬሰኩዎጉዲ ታሚዳ ዓጊንቶሞ፤

ኮሽ ዔያታዳፆ ቶርጴ ዓኣ ዔቴይዳ ኬኤሪንቶሞ።

11 ሉኡዙሞና ዓሲ ፑሽኪ ሃንታ ዓሲ ሳፆይዳ ናንጎፓ፤

ጌኔ ማዳ ፑርቶ ዓሶ ፑርታ ባኣዚ ኬሚ ባባይዘሞ።

12 ናንጊና ናንጋ ጎይሢሢ! ማንቆ ዓሶሞ ፒዜ ዎጌ ኔ ዎጋሢንታ

ሄርቁንቲ ዎይሢፆና ሜታዳ ዓሶ ዛሎ ኔ ሞኦታሢ ታ ዔራኔ።

13 ኮኸ ዓሳ ጎኔና ኔና ጋላታኔ፤

ኔ ዓኣ ቤዘይዳ ኔኤና ዎላ ዶዲ ዔያታ ናንጋንዳኔ።

141

ደውቴ ዓይነቱ

- ጾኦሲ ዓውሳንዳጉዲ ሺኢቁንታ ሺኢጸሢሢ
- 1 ናንጊና ናንጋ ጎዳሢዮ! ታ ኔ ዋይዘሞ ዒላታኔ፤
ኔጉዋዖ ዑኩና ታና ማኣዴ፤
ታኣኒ ኔ ዋይዘሞ ዒላታሢ ዋይዘ።
- 2 ታኣኒ ሺኢቃ ሺኢጸ፡፱ ዑንጃ ኔኤም ጨቢሸያጉዲ
ኔ ባንሢ ዔቁሳ ኩጫኣ ዒባናኣና ዒንጎ ዒንጊያጉዲ ማዖም።
- 3 ናንጊና ናንጋ ጎዳሢዮ! ታ ደንጎ ካፓ ዓሲ ጌሢ፤
ታ ሙሱሮዋ ቃዛንዳ ዓሲ ዔቁሴ።
- 4 ፑርቶ ዓሶና ዋላ ፑርታ ማዶ ታ ማዶዋጉዲ
ታኣኩ ዒኖ ፑርቱሞ ባንሢ ማሊሲ፤
ዔያቶና ዋላ ዴይ ሙዋ ሙኤዚያ ታና ሙዒሲ፡ፖ።
- 5 ጻሎ ዓሲ ታና ፀንቆንጎ፣ ዩይ ታና ሚጨንቲሢ፤
ዒዚ ታና ጎሮንጎ፣ ዩይ ታ ቶኣኩ ዖይሲና ቲሸከሢ፤
ጋዓንቲ ታ ቢያ ዋይ ፑርቶ ዓሶ ማዶ ማኪ ማኪ ሺኢቃ።
- 6 ሱኡጋ ዒያቶኩ ዴኤፖ ላሎ ማጋ ኬኤሪንታኣና
ታ ጋዓ ባካ ጎኔታሢ ዔያታ ዔራንዳ።
- 7 ጎዓ ጎሸከንታኣና ቦኪ ቡርሺንታሢጉዲ
ዔያቶኩ ማጌፃ ዴኤፖ ካራ ካራ ዜርቁንታንዳ።
- 8 ናንጊና ናንጋ ጎዳ ማዔ ታ ጾኣዛሢዮ!
ታኣኒ ጋዓንቲ ኔና ጉሙርቁያ ሃሻዓኬ፤
ኔ ታና ዓኣቻንዳጉዲ ታ ኮዓሢሮ ሃይቆም ጌይ ታና ሃሺ፡ፖ።
- 9 ዔያታ ዓኣቺ ፒሬ ፒራሰካፓ ታና ቶሊሴ፤
ፑርቶ ማዶ ዓሶኩ ዴቃሰካፓ ታና ዓይሴ።
- 10 ታኣኒ ኮሺና ጾኣኪ ዴንዳዛ
ፑርቶ ዓሳ ዔያታ ፒሬ ፒራሰካ ፔኤሮ ዓዲንቶንጎ።

142

ደውቴ ዴኖ ዔቶይዳ ዓኣ ዋደና ዔራቶና ካላሌ ካላሎ

- ጾኦሲ ማኣዳንዳጉዲ ሺኢቆ ሺኢጸሢሢ
- 1 ዑኡዘ ታኣኒ ዴጊዲ ናንጊና ናንጋ ጎዳ ዋይዘሞ ዒላታኔ፤
ታና ዒዚ ሚጨንታንዳጉዲ ታ ሺኢቃ።
- 2 ታ ዒዛ ሃደርሳ ባኮ ቢያ ዒዛ ቤርቶ ሺኢቫ፤
ሜቶዋ ታኣኩ ቢያ ታ ዒዛም ኬኤዛ።

141:2 ዮሃ. ጾፔጳ 5:8።

- 3 ዒና ታኣኮ ጋፒ ያያኒ ዑካኣና
 ታኣኒ ዓይኅ ዋዳኒ ኮይሳቲያ ዒዚ ዔዔራኔ፤
 ታኣኒ ዴንዳ ጎይያይዳ
 ሞርካ ታኣም ፒሮ ዓኣቶ ፒሬኔ።
- 4 ኮይሎ ታ ሺሪ ዛጋንቲ ታና ዓኣቻንዳ ካይዚ ባይቄኔ፤
 ፔቲታያ ታና ማኣዳ ዓሲ ባኣያ ማዔኔ፤
 ታና ካፓያና ታ ዛሎ ሂርጋ ዓሲያኣ ባኣሴ።
- 5 ናንጊና ናንጋ ጎዳሢዮ! ኔኤኒ ታና ማኣዳንዳጉዲ
 ታኣኒ ኔ ባንሢ ዒላታኔ፤
 ናንጊና ናንጋ ጎዳሢዮ! ኔኤኒ ታኣኮ ፑሮ ካያሢኬ፤
 ሹምፖና ዓኣ ዓሳ ናንጋ ዓጮይዳ ታኣኮ ዓኣያ ማዔሢ ኔናኬ።
- 6 ታኣኒ ጋፒ ዋዛ ቲቂ ዴዔሢሮ
 ኔ ታና ማኣዳንዳጉዲ ኔ ባንሢ ታ ዒላታሢ ዋይዜ፤
 ዑሣ ዓኣዴ ታኣም ዔያታ ዋልቃዴሢሮ ታ ሞርኮፓ ታና ዓውሴ።
- 7 ታኣኒ ኔና ጋላታንዳጉዲ ሃያ ቱኡዛፓ ታና ቡሌ፤
 ኔኤኒ ታኣም ማዴ ኔኤኮ ኮሹሞ ማዴ ዛጋያ
 ዒሎ ዓሳ ሙኪ ታ ኮይላ ቡካንዳኔ።

143

ዳውቲ ዓይነቱ

- ያኮሲፓ ማኣዳ ዴንቃኒ ሺኢቆ ሺኢጲሢ
 1 ናንጊና ናንጋ ጎዳሢዮ! ሺኢጲያ ታኣኮ ዋይዜ፤
 ታኣኒ ኔና ሺኢቃ ሺኢጲያ ባንሢ ዋይዜ ጌሢ፤
 ኔኤኒ ጉሙርቂንታያ፣ ሃሣ ፒዜ ማዔ ጎይያና
 ታ ሺኢቃ ባኮ ታኣም ዒንጌ።
- 2 ኔ ቤርታ ፔቲታያ ዒሎ ማዓ ዓሲ ባኣሢሮ
 ታና ኔ ዓይላሢ ዋጌሮ ኔ ቤርቶ ዔኪ ሺኢሺፖ።
- 3 ታ ሞርካሢ ታና ዋዳኒ ዳውሳኔ፤
 ዲሚዳ ጌልዚ ቱኪ ታኣኮ ካራ ባይዜኔ፤
 ሚርጌ ዋዴኮ ቤርታ ሃይቂ ዲኡቲ ዓሶጉዲ ታኣኒ ማዔኔ።
- 4 ታኣኮ ጋርይዳ ዓኣ ሹምፓሢ ባኣያ ማዔኔ፤
 ዒና ዲቃቲም ካራ ታኣኮ ባይቄኔ።
- 5 ታኣኒ ሚናኣ ዋዶ ጳቂሢ ማሌኔ፤
 ኔኤኒ ማዴ ማዶዋ ሺርሺ ሺርሺ ታ ማሌኔ፤
 ኔ ዋልቆና ኔ ማዴ ባኮዋ ቢያ ታ ጳቂሴኔ።

142:7 1ሳሙ. 22:1፤ 24:3። 143:2 ሮሜ 3:20፤ ገላ. 2:16።

- 6 ታ ኩጮ ኔና ሺኢቁ፥ ኔ ባንሢ ታ ዔቁሴኔ፤
ዳውሌ ዓጪ ዳ ዋኣሢ ጴኤ ባሢጉዲ
ታኣኮ ሸምፔላ ዒማዲ ኔና ጴኤቤኔ።
- 7 ናንጊና ናንጋ ጎዳሢዮ! ሸምፓሢ ታኣኮ ላቤሢሮ
ኔጉዋዖ ታ ሺኢቃ ባኮ ታኣም ዒንጌ፤
ኔ ዓኣፖ ካሮ ታ ባንፃፓ ሸርሺፖ፤
ኔ ዩያይዴቲ ሳዖ ዴሞ ኬዳ ዓሶጉዲ ታኣኒ ማዓንዳኔ።
- 8 ታኣኒ ጉሙርቃሢ ኔና ማዔሢሮ
ኬላ ኬላ ኔኤኮ ናንጊና ናንጋ ናሹሞ ታና ዔርዜ፤
ታ ሸምፓሢ ሃዳርሲ ታ ኔኤም ዒንጌሢሮ
ታኣኒ ዴንዳንዳ ጎይዖ ታና ዳዌ።
- 9 ናንጊና ናንጋ ጎዳሢዮ! ታኣኒ ኔና ፑኖ ካያሢ ማሃሢሮ
ታኣኮ ሞርኮይዳፓ ታና ማኣዲ ዓውሴ።
- 10 ኔኤኒ ታኣኮ ዖኣዛሢኬ፤
ኔ ጋዓ ባኮ ታኣኒ ማዲ ኩንሣንጉዲ ታና ዔርዜ፤
ኔኤኮ ኮዡ ዓያኖና ኮሺ ጎይሢ ታኣም ዳዌ።
- 11 ናንጊና ናንጋ ጎዳሢዮ! ኔ ቦንቾም ጌይ ታ ሸምፓሢ ካፔ፤
ኔኤኮ ፒዙም ማዶና ታኣኮ ሜቶይዳፓ ቢያ ታና ኬሴ።
- 12 ኔኤኮ ናንጊና ናንጋ ናሹሞ ፔጋሲ ታኣም ዳዋኒ
ታኣኮ ሞርኮ ዎዲ ባይዜ፤
ታኣኒ ኔኤኮ ዓይላሢታሢሮ
ታኣም ፑርታ ባኣዚ ማዳ ዓሶ ቢያ ኩርሴ።

144

ዳውቲ ዓይነቱ

- ባሺሢ ዴንቃዖ ዓይናዶ ዓይነቱ
- 1 ናንጊና ናንጋ ጎዳ ማዔ ታኣኮ ላላሢ ጋላቲንቶንጎ!
ዒዚ ታና ዖልዚ ዖሎ ጎይሢ ዔርዚ፥ ዖልዚም ጌኢጊሻኔ።
- 2 ናንጊና ናንጋ ጎዳ ታና ካፓያ ታኣኮ ጊቲማኬ፤
ታኣኮ ፑኖ ካያሢ፥ ሃሃ ታና ዓውሳሢኬ፤
ታኣኒ ዒዛ ጉሙርቁ ኮሺ ናንጋኔ፤
ዴራኣ ታኣም ዓይሢንታንዳጉዲ ማሃሢ ዒዛኬ።
- 3 ናንጊና ናንጋ ጎዳሢዮ!
ዓሲንሢ ዓይጎኬ ጌይ ኔ ሃያይዲ ቶኣኮ ዛጋይ?
ሃያይዲ ኔ ሂርጊ ዔያቶም ማላሢ ዓይጎኬ ጌይዳይ?

144:3 ዓ.ኖ. 7:17-18፤ ዓይነ. 8:4።

- 4 ዓሲ ዠባገጉዳ ባአዚኬ፤
ናገገ ዋዳኣ ዔኤዠፍ ሺቢጉዳ ዳንዲ ባይቃያኩ።
- 5 ናገገና ናገገ ጎዳሢዮ! ጫሪንጮ ዳርዚ ሊካ ኬዳ፤
ዲኮ ኔ ኩጮና ካኣሚ ጨቢሺ።
- 6 ኔኤኮ ዘኤሊንፆ ዘኤሊንሢ ኔ ሞርኮ ዳውሲ ባይዘ፤
ኔኤኮ ሂኢዠና ዔያቶ ዲኪ ዳውሴ።
- 7 ኔ ኩጮ ሎኦፓ ሊካ ዳኬ፤
ዴኤፖ ዋኣፆ ዳማፓ ታና ጎቺ ኬሲ፥ ዓውሴ፤
ፃንጎ ማዔ ሜሌ ዓጮ ዓሶፓ ታና ዓይሴ።
- 8 ዔያታ ፔቴታፆ ጎኔ ባአዚ ጌሰቱዋሴ፤
ሚዛቆ ኩጮ ዔያታ ዔቂሲ ሉኡተሞና ጫኣቃ።
- 9 ፆኦሲዮ! ዓኪ ዓይኑሞ ኔና ቦንቺ ታ ዓይናዳንዳ፤
ታጰ ሻሺ ዳንሢንታ ጎኦሎሞ ዋርቂ ታኣኒ ዓይናዳንዳ።
- 10 ፆልዚና ባሻንዳጉዲ ካኣቶሞ ኔኤኒ ዋልቂ ዒንጋኔ፤
ኔ ዓይላሢ ዳውቴያ ጨንቾ ዓራፖ ዓጩሢፓ ኔ ዓውሳያኩ።
- 11 ፃንጎ ማዔ ሜሌ ዓጮ ሞርኮይዳፓ ታና ዓውሴ፤
ዔያቶኮ ዳንጋ ሉኡዚ ባአዚ ጌሰታያኬ፤
ሚዛቆ ኩጮ ዔያታ ሉኡተሞ ጫኣቁሞሮ ዔዔቂሳ።
- 12 ኦኡኮ ዴጌ ናኣታ ሃጊ ዔቃኣና
ሃጊ ባቃሊ ዐጊ ዳንዳ ሚሢጉዲ ማፆንጎ፤
ኦኡኮ ዉዲሮ ናኣታ ካኣቱሞ ማኣሮኮ ጎንጃሢ ዋላ ካኣማ ካርይዳ
ዴቂንቲ ኬኤፆ ሚዛጲሳ፥ ዓርሲ ኮሾና ፒዜ ቱርቱሮጉዲ
ማፆንጎ።
- 13 ኮና ኦኡኮ ዲማ ዲማ ቶኦኪ ሃኣኮና ኩሚያ ማፆንጎ፤
ሄንፆሮ ዘኣዘ ኬሰኬ ኦኡኮ ማራታ
ሚርጌ ሺያና ፓይዲንታ ማሪናይ ሾይ ዲቦንጎ።
- 14 ባኣታ ኦኡኮ ካኣሽኮንጎ፤
ቡሉሞፆ ሾይ ሾይ ዲቦንጎ፤
ኦና ዲዒ ዔኪ ዳንዳ ባአዚ ባይቆንጎ፤
ኦ ካታሞኮ ሳዘ ጎይፆ ዴኤፖይዳ ዩኤፒ ዐኡሲ ዋይዚንቶፓ።
- 15 ዩያጉዳ ዓንጃ ዒንገንቲ ዳሬ ጋላቲንቲያኬ፤
ናገገና ናገገ ጎዳ ዔያቶኮ ፆኦሲ ማዔ ዳሬ ዓንጃንቲያኩ።

145

ዳውቲ ዓይኑሞ
ጋላታ ዓይኑሞ
1 ታ ፆኦዛሆ፥ ታ ካኣቲዮ!

- ታ ኔኤኮ ደኤፑም ሄርሺ ኬኤዛንዳኔ፤
ናንጊና ታ ኔ ሱንፆ ጋላቱ ጎይሣ ናንጋንዳኔ።
 - 2 ቢያ ኬላ ኬላ ታ ኔና ጋላታንዳኔ፤
ናንጊና ታ ኔኤኮ ሱንፆ ቦንቼ ጎይሣ ናንጋንዳኔ።
 - 3 ናንጊና ናንጋ ጎዳ ደኤፒኬ፤
ፑኡፒ ጋላታ ቢዛም ኮይሳያኬ፤
ቢዛኮ ደኤፑማ ዓሲ ዔራኒ ዳንዳዓያይዳፓ ዑሣኬ።
 - 4 ዎዶና ዎዶና ኬሰካ ዓሳ ኔኤኮ ማዶ
ሄሊሲ ሙካ ዓሶም ኬኤዚ ዔርዛንዳኔ፤
ኔኤኮ ዲቃሢ ሄርሺሳ ማዶዎ ፔጋሲ ዔያታ ኬኤዛንዳኔ።
 - 5 ዴራ ኔኤኮ ቦንቸንጎታ ቦንቸንቶኮዎ ደኤፑም ኬኤዛንዳኔ፤
ታኣኒያ ኔኤኮ ዲቃሢ ሄርሺሳ ማዶ ማሊ ማሊ ናንጋንዳኔ።
 - 6 ዴራ ኔኤኮ ዲቃሢ ሄርሺሳ ደኤፖ ማዶ ዛሎ ኬኤዛንዳኔ፤
ታኣኒያ ኔኤኮ ደኤፖ ማዶ ሄርሺ ደጊዲ ኬኤዛንዳኔ።
 - 7 ዔያታ ኔኤኮ ኮሹዎ ሚርጊፆ ኬኤዛንዳኔ፤
ኔኤኮ ፃሎዎ ዎልቆ ዛሎ ዴግ ጌዔ ዑኡሲና ዓይናዳንዳኔ።
 - 8 ናንጊና ናንጋ ጎዳ ኮሺ፣ ሃሃ ሚጨንታያኬ፤
ዳጋዳኒ ሩኡሩዎያ፣ ናሹማኣ ናንጊና ጋፑዎያኬ።
 - 9 ዓዚ ቢያ ባኮም ኮሺኬ፤
ቢ ማዜ ባኮ ቢያ ሚጨንታያኬ።
 - 10 ናንጊና ናንጋ ጎዳሢዮ!
ኔ ማዜ ባካ ቢያ ኔና ጋላታንዳኔ፤
ኔኤም ዲማዴ ኔ ዴራ ቢያ ኔና ደኤፒሲ ሄርሻንዳኔ።
 - 11 ኔኤኮ ካኣቱም ቦንቸ ዛሎ ኬኤዛንዳኔ፤
ኔኤኮ ዎልቆ ዛሎዎ ሄርሺ ጌሰታንዳኔ።
 - 12 ዩያይዲ፣ ዓሲ ቢያ
ኔ ዎልቆና ኔኤኒ ማዴ ደኤፖ ማዶንታ
ጊንሣ ሃሃ ኔኤኮ ካኣቱም ቦንቸ ደኤፑምዎ ዔራንዳኔ።
 - 13 ኬሰካ ዎዶ ቢያይዳ ዎይሣ ካኣታሢ ኔናኬ፤
ኔኤኮ ካኣቱማ ናንጊና ባይቁዎያኬ።
- ናንጊና ናንጋ ጎዳ ጋዓ ባኮ ጉሙርቂንቲ ኩንሣያኬ፤
ዓዚ ማዶ ባካ ቢያ ኮሺኬ።
- 14 ሎኦማኒ ቡኡዲንታ ዓሶ ዓዚ ኬኤሊንቃኔ፤
ሳዓ ሎኦሚ ዓኣ ዓሶዎ ዔቂሳኔ።
 - 15 ቢያሢ ጉሙርቂ ኔና ዛጋኔ፤
ኔኤኒያ ዔያቶም ኮይሳ ዎዶና

- ዓይነቱ ማግኒ ሙሉ ዓይነቱ።
- 16 ኔኔ ኔኔ ከጭ ቡሊ
ፔቴ ፔቴ ሽምፔና ዓኣ ባኮም
ኮይሳ ባኮ ዓይን ዓይኖ ዓይኖቶኮ ሃውሺሳ።
- 17 ናንገና ናንጋ ጎዳ ማዳ ባኮና ቢያ ዲሎኬ፤
ገንሣ ሃሣ ኮሺኬ።
- 18 ናንገና ናንጋ ጎዳ ዓዛ ሺኢቃዘንሣም ቢያ
ጎኔ ዓይጋ ሺኢቃዘንሣም ቢያ ዓ ዑኬኬ።
- 19 ቦንቺ ዓዛ ዓገጫዘንሣም
ኮይሳ ባኮ ቢያ ዓዛ ዓይን፤
ሜታዲ ዓላታ ዓላቶዋ ዋይዚ ዓይኖ ማኣዳ።
- 20 ዓዛ ናሽካዘንሣም ቢያ ዓ ፑርታጋ ካጋ፤
ፑርቶ ዓሶ ጋዓንቴ ዓዛ ዋዲ ባይዛ።
- 21 ታኣኒ ቢያ ዋዴ ናንገና ናንጋ ጎዳ ጋላታንዳ፤
ዓዛ ማዜ ባካ ቢያ
ዓዛኮ ዲማዴ ጌኤገፍ ሱንፆ ሄርሺ ሄርሺ ናንጎንጎ።

146

ዳቂሻ ያኦሲም ሺኢካ ጋላታ

- 1 ናንገና ናንጋ ጎዳም ጋላታ!
ታ ሽምፔሌ! ናንገና ናንጋ ጎዳ ጋላታ።
- 2 ሽምፔና ዓኣ ዋዴ ቢያይዳ ናንገና ናንጋ ጎዳ ታ ጋላታንዳ፤
ናንጋ ዋዴ ቢያይዳ ታ ያኦዛሣ ታኣኒ ቦንቺ ዓይናዳንዳ።
- 3 ዳቂሻኒ ዳንዳዑዋ፣ ዓሲ ማዢንቲ ማዔ ዓሶና
ሱኦጎ ማዔ ዋይሣ ዴኤፖ ዓሶ ጉሙርቂፖ።
- 4 ዓይነቱ ሃይቃዎ ሳኣ ዳሚ ጌላ፤
ዓሚ ኬሎይዳ ዓይነቱ ማላ ባካ ቢያ ጉሪ ባይቃ።
- 5 ያይቆኦ ያኦሲ ዓዛ ማኣዳያ ማዔ ዓሣ
ናንገና ናንጋ ጎዳ ማዔ ፔ ያኦዛሣ ጌኤቂንቴሣ ዋዛዳንጎ።
- 6 ናንገና ናንጋ ጎዳ ጫሪንጫንታ ሳዎንታ
ዴኤፖ ባዘንታ ገዳ ዓኣ ባኮ ቢያ ማዢሣኬ፤
ናንገና ጉሙርቂንቴ ጎይሣ ናንጋያኬ።
- 7 ሄርቂንቲ ዋርቃ ዓሶም ፒዜ ዋጌ ዋጋ፤
ናይዲንቴዘንሣም ሙኡዚ ዓይን፤

146:6 ዳኪ. ማዳ 4:24፤ 14:15።

- ናንጊና ናንጋ ጎዳ ቱኡቱ ዓሰቀ ቱኡዛፓ ዒ ቡላኔ።
- 8 ናንጊና ናንጋ ጎዳ ዓኣፓ ባይቄ ዓሰኮ ዓኣፖ ቡላኔ፤
ሎኦሚ ዓኣ ዓሰ ሳዓፓ ዔቁሳኔ፤
ዒሎ ማዔ ዓሰቀ ዒዚ ናሽካኔ።
- 9 ናንጊና ናንጋ ጎዳ ማሌ ዓጪፓ ሙኬ ዓሲ ማዒ ናንጋ ዓሰ ካፓኔ፤
ዜኤሪንዶ ማዔ ላኣሎንታ ዜኤሮ ናኣቶ ማኣዳኔ፤
ፑርቶ ዓሰኮ ጌኖ ማሊያ ጉሪ ማሃኔ።
- 10 ናንጊና ናንጋ ጎዳ ካኣቲ ማዒ ናንጋያኔ፤
ዒዮኔ! ኔ ያኣዛሢ ከሰካ ዎዶ ሲያይዳ ካኣታዲ ናንጋኔ።

ናንጊና ናንጋ ጎዳም ጋላታ!

147

ቢያ ባኮ ዳንዳዓ ያኦሲም ሸኢካ ጋላታ

- 1 ናንጊና ናንጋ ጎዳ ጋላቱዎቱ!
ኑ ያኦሲ ቦንቺ ጋላታ ዓይነቱም ዓይናዲሢ ቃራኔ፤
ዒዛ ጋላቲፃ ዎዛሳያ፡ ሃሢ ኮይሳያኔ።
- 2 ናንጊና ናንጋ ጎዳ ዬሩሳሌም ጊንሣ ዓካሲ ማዣኔ፤
ዒሰራዔኤሌፓ ዳውሲንቲ ዳንዴ ዓሰ ጊንሣ ዒ ማሃኔ።
- 3 ዒኔ ማቂ ያዩ ዓሰ ዒዚ ዶዲሻኔ፤
ኪያዎ ኑኡኮ ዒ ፓሣኒ ማራኔ።
- 4 ዡኣጋሢኮ ሚርጉም ዒዚ ፓይዲ ዔራኔ፤
ፔቲ ፔቲሢኮዎ ሱንያ ዒ ጌሣኔ።
- 5 ናንጊና ናንጋ ኑ ጎዳሢ ዳኤፒ፡ ሃሢ ዎልቄና ዓኣያኔ፤
ዒዚ ዔራ ዔራታ ሃይማኔ ጌይንቱዎያኔ።
- 6 ዒኖ ሸሌዔ ዓሰ ዒዚ ቦንቺሲ ዳጊሳኔ፤
ፑርቶ ማዳ ዓሰ ጋዓንቲ ሳዓ ከኤሪ ዳውሲሳኔ።
- 7 ናንጊና ናንጋ ጎዳ ቦንቺ ዓይነቱም ዓይናዲዎቱ፤
ጎኣላ ዎርቂ ዎርቂያኣ ኑ ያኣዛሢ ዓይናዲ ቦንቺዎቱ።
- 8 ዒዚ ሻኣሮ ጫሪንጮይዳ ሚጫኔ፤
ሳያይዳ ዒርዚ ዎርቂሳኔ፤
ዲኮይዳ ማኣቲ ከሲ ዓኣዒሳኔ።
- 9 ካዮ ቦንታ ቆሎንታም ቢያ ሙኡዚ ዒንጋኔ፤
ሙኡዚ ባይቄም ዒላታ ቁራኮ ናኣቶ ዒ ሙኡዛኔ።
- 10 ዒዚ ዎዛዳሢ ዶዶ ፓራሢንታ
ያሎ ዓሰንታኮ ዎልቆ ዛጊቱዎሴ።

- 11 ዒዛ ዋዛሳህ
 ዒዛ ቦንቸ ዒገጫዘንህና
 ናንገና ናንጋ ናሹሞ ዒዛኮ ጉሙርቃዘንህኬ።
- 12 ዩሩሳላሜ! ናንገና ናንጋ ጎዳ ጋላቲ!
 ዒዮኔ! ኔ ያኦዛህ ፑኡፒሲ ዒላሸ!
- 13 ዒዚ ኔኤኮ ማርሾ ካርኮ ጋጋርዘ ዶዲሺ ካፓኔ፤
 ኔ ጋራ ዓኣ ዳሮ ዒዚ ዓንጃኔ።
- 14 ዒዚ ኔ ዓጮኮ ዛጾ ኮሺ ማሂ ካፓኔ፤
 ቃራ ዛርጌ ካዒሲ ኔና ዒ ሚሻኔ።
- 15 ሳዖ ፔ ቢታንቶና ዒዚ ዓይህኔ፤
 ዒዚ ጋዓ ባካ ኔጉዋዖ ማዲንቲ ኩማኔ።
- 16 ዴኤፖ ሻጮ ዋዲንቲ ፑኡታጉዲ ሳዓ ዒዚ ሚጫኔ፤
 ሊኢሎጉዲ ላሃ ዖልኮዋ ዲቢንህጉዲ ሳዓ ላኦላኔ።
- 17 ሻጮ ቃንዖጉዲ ሳዓ ዒዚ ዲኢኒሻኔ፤
 ዩያ ኩዳ ሻጮ ቤርታ ዖኢኒያ ጫርቂ ዔቃኒ ዳንዳዑዋሴ።
- 18 ዩካፓ ዒዚ ዓይሥህህ ዓይህኔ፤
 ዩይ ላኦዳዲ ዳይ ዓኣ ሻጮ ዓልቃኔ፤
 ዠባሬ ዒዚ ዠባርሺሴም ዋኣህ ዒኢፓ ጎዓኔ።
- 19 ፔ ቃኦሎ ያይቆኦሴ ናኣቶም
 ዒዛኮ ዋጎንታ ዳምቦንታ ዒሰራዔኤሌም ፔጋሲ ዔርዛኔ።
- 20 ዩያ ቢያ ዒዚ ሜሌ ዓይጎ ዳሪማኣ ማዲባኣሴ፤
 ዩያታ ዒዛኮ ዋጎ ዔሩዋሴ።

ናንገና ናንጋ ጎዳም ጋላታ!

148

ማዠንቲ ቢያ ያኦሲ ጋላታንዳያ ኮይሳህ

- 1 ናንገና ናንጋ ጎዳ ጫሪንጫፓ ጋላቱዋቲ!
 ሎ ዴጌ ጫሪንጫ ዓኣ ማዠንታ
 ናንገና ናንጋ ጎዳህ ጋላቱዋቲ።
- 2 ዒንህ፡ ዒዛኮ ኪኢታንቻ ዒዛ ጋላቱዋቲ፤
 ጫሪንጫይዳ ዓኣ ዒዛኮ ዖሎ ዓሳ ቢያ ዒዛ ጋላቱዋቲ።
- 3 ዓቦንታ ዓገኖንታ ጋላቱዋቲ፤
 ጫሪንጫ ፖዓ ዠኦጋህያ ዒዛ ጋላቱዋቲ።
- 4 ሌካ ዴግ ጌይ ዓኣ ጫሪንጫ ዒዛ ጋላቱዋቲ፤
 ዴጌ ቤዘኮ ዑፃ ዓኣ ዋኣፃኣ ጋላቱዋቲ።

- 5 ቢያ ባካ ናንገና ናንጋ ጎዳ ጋላቶንጎ!
 ዒዚ ዓይሄም ዩይ ባካ ቢያ ማዢንቴኔ።
- 6 ኬሰካ ዎደይዳ ቢያ ለእሚንቱዎ ዳምቤና
 ናንገና ናንጋንዳጉዲ ማዢ ዶዲሺ ዔያቶ ዒ ጌህኔ።
- 7 ባዘይዳ ዓኣ ዴኤፖ ቦዎንጎ
 ኮሺ ዔታዳ ቁልቦ ዎኣፃኣ ቢያ
 ሳዒፓ ናንገና ናንጋ ጎዳ ጋላቱዎቴ።
- 8 ዜኤሊንፃ፥ ዳኮ ሻጫ፥ ሻጮ ዴኤፖንጎ ሻኣሮንጎ
 ዒዘኮ ዓይሄያ ማዲ ኩንህ ዴኤፖ ዓልጋህ ቢያ
 ናንገና ናንጋ ጎዳ ጋላቱዎቴ።
- 9 ጌሜሮንጎ ዲኮንጎ
 ዓኣፓ ሙይንጎ ሚያንጎ
 ዴኤሎ ካያ ዓኣ ሚፃኣ ቢያ ዒዛ ጋላቱዎቴ።
- 10 ካዮ ቦዎንጎ ጋራ ዓኣ ቆልሞንጎ
 ሳይይዳ ጎቹንቲ ሃንጎ ባኮንጎ ጋኣዘና ባራና ባካ ቢያ
 ናንገና ናንጋ ጎዳህ ጋላቱዎቴ።
- 11 ካኣቶንጎ ሳይይዳ ዓኣ ዴራ ቢያ
 ቢታንጎ ዓኣ ሱኡንጎ ምጎ ምጋ ዓሳኣ ቢያ ዒዛ ጋላቱዎቴ።
- 12 ዓቲንቆ ዴጌህንጎ ዉዲራህንጎ
 ጋርቾንጎ ናኣቶንጎ ቢያ ዒዛ ጋላቱዎቴ።
- 13 ዒዘኮ ሱንፃ ሜሌ ሱንፃ ቢያፓ ባሻህሮ
 ዒዘኮ ቦንቻ ሳይና ጫሪንጮናፓ ባሼ ዴኤፒታህሮ
 ቢያህ ናንገና ናንጋ ጎዳ ጋላቶንጎ!
- 14 ዒዘኮ ዒኖና ዎላ ቱኡቴያ ማዔ ዒዛ ዴር
 ዒሰራዔኤሌ ዒዚ ዴገዲ ቦንቹሴኔ፤
 ጋላጎ ጋላጎንዳጉዲያኣ ዒዚ ዔያቶ ማህኔ።

ናንገና ናንጋ ጎዳ ጋላቱዎቴ!

149

ጋላጎ ዓይነቱ

- 1 ናንገና ናንጋ ጎዳ ጋላቱዎቴ!
 ናንገና ናንጋ ጎዳህም ዓኪ ዓይነቱ ኬሲ ዓይናዲዎቴ!
 ያኦሲ ዓሳ ቡኩ ቤዘይዳ ዒዛ ቦንቾም ዓይናዲዎቴ!
- 2 ዒሰራዔኤሌ ማዢ ያኦሲና ዎዛድንጎ!
 ዪዮኔ ዴራኣ ካኣቲሮ ኮኣሚ ዎዛድንጎ!
- 3 ዒዛ ቦንቾም ዓገዲ ዓገዲ ጋላቶንጎ፤

ካራቤ ባዒ፣ ጎኑላኦ ዋርቁ ዋርቁ ዒዛ ጋላቶንጎ።
 4 ናንጊና ናንጋ ጎዳ ፔ ዳሮ ዛጋያ ዋዛዳኔ፤
 ባሽህሂ ዒንጊ፣ ዒኖ ሼሌዔ ዓሶ ዒዚ ቦንቹሳኔ።
 5 ያኦሲ ዳራ ዬያ ቦንቹንቴ ቦንቹሮ ዋዛዳንጎ፤
 ዋንቶ ላሂ ቤዛ ቢያ ዋዛዳ ዒይናድንጎ።
 6 ጩንቻ ዓራፖ ዔያቶኮ ኩጫ ዓኦኔ፤
 ዬያሮ ዔያታ
 ዒላሸ ዒላሸ፣ ዳግ ጌዔ ዑኡሲና ያኦሲ ጋላቶንጎ።
 7 ዔያታ ዬያይዳቴ
 ሜሌ ካኦቶ ባሻኒ
 ሜሌ ዳሮይዳ ዳኤፒ ሜቶ ዓጋኒ፣
 8 ዬያ ዳሮኮ ካኦቶ ካኒ ቢራታና
 ዳኤፖ ዳኤፖ ሱኡጎዋ ዳጃና ዓርቁ ቱካኒ፣
 9 ናንጊና ናንጋ ጎዳ ዔያቶይዳ ዋጌ ዋጎ ማዲ ኩንህኒ
 ናንጊና ናንጋ ጎዳኮ ዳራ ባሽህሂ ዋልቁ ዳንቃንዳኔ።

ናንጊና ናንጋ ጎዳ ጋላቲንቶም!

150

ናንጊና ናንጋ ጎዳ ጋላቲዋቲ/
 1 ናንጊና ናንጋ ጎዳህ ጋላቲዋቲ!
 ዒዛም ዳማዳ ጌኤኮ ማኦርይዳ ያኦሲ ጋላቲዋቲ!
 ዒዛኮ ዲቃህ ሄርሺሳ ዋልቃ ዓኦ ጫሪንጫይዳኦ ዒዛ
 ጋላቲዋቲ!
 2 ዒዚ ማዳ ዲቃህ ሄርሺሳ ማዶሮ ጋላቲዋቲ፤
 ቤቃያ ባኦያ ማዔ ዳኤፑሞሮ ዒዛ ጋላቲዋቲ።
 3 ዛዬ ዋርቁ ዒዛ ጋላቲዋቲ፤
 ጎኑላንታ ዲቢ ሻሺና ዳንህሂ ዋርቆ ጎኑሎዋ
 ዋርቁ ዋርቁ ዒዛ ጋላቲዋቲ።
 4 ካራቤ ባዒ ዒዛ ቦንቹም ዓጊዲ ዓጊዲ ጋላቲዋቲ፤
 ጎኑላንታ ሹሉንጎንታ ዋርቁ ዒዛ ጋላቲዋቲ።
 5 ዑኡቱቡሎ ዋሺ ዋሺ ዒዛ ጋላቲዋቲ፤
 ዑኡዛ ኮሺ ሚዛጳ ዑኡቱቡሎናኦ ዒዛ ጋላቲዋቲ።
 6 ሸምፔና ዓኦያ ማዔ ማኸንታ ቢያ
 ናንጊና ናንጋ ጎዳ ጋላቲዋቲ!

ናንጊና ናንጋ ጎዳ ጋላቲንቶም!

ጌኤዢ ማጻሕፍት
The Holy Bible in the Maale language of Ethiopia,
using Ethiopic script

copyright © 2008 The Word for the World International and The Bible Society of Ethiopia

Language: Maale (Male)

Translation by: The Word for the World

Contributor: Bible Society of Ethiopia

ጌኤዢ ማጻሕፍት

Maale Full Bible

The Word For The World International

Bible Society of Ethiopia

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

PDF generated using Haiola and XeLaTeX on 13 May 2025 from source files dated 13 May 2025

bbcfb90a-3ae3-5452-983d-6c4c02375929